

**LA VIE DU
VENERABLE PERE
ANTOINE YUAN,
PRESTRE,
INSTITUTEUR DE...**

Gilles Gondon, Humbelot





De Conuentu Patrum Minimorum Aquensium

LIMITATEVR

DE 14.28.E.34

IESVSCHRIST.

OV



LA VIE

DV VENERABLE PERE

ANTOINE YVAN.

PRESTRE, INSTITUTEVR

de l'Ordre des Religieuses de Nostre
Dame de Misericorde.

Et l'Histoire de la Fondation du mesme Ordre.

Par Maistre GILLES GONDON, Prestre & Docteur
en Theologie.

DEDIE'E A LA REINE, MERE DV ROY.

De Conuentu patrum Minimorum aquensium

A PARIS.

Chez JEAN BOVLLARD, au dessus du Carrefour sainte
Geneviève, vis à vis la petite porte de Nauarre
à l'Image de la mesme Sainte.

M. DC LXII.

AVEC PRIVILEGE DV ROY, ET APPROBATION.



Certificat pour l'obtention du Priuilege.

I'Ay leu vn Liure intitulé, *l'Imitateur de Iesus-Christ, ou la vie du venerable Pere Antoine Tuan*, Prestre Instituteur de l'Ordre des Religieuses de Nostre-Dame de Misericorde, & l'Histoire de la Fondation du mesme Ordre, par GILLES GONDON, Prestre Docteur en Theologie. Fait ce vingtième Aoust 1662.

M. GRANDIN.

Extrait du Priuilege du Roy.

LE Roy par grace & Priuilege, fait deffenses à tous Imprimeurs, Libraires & autres, d'imprimer, ou faire imprimer, vendre ny debiter, alterer ou changer vn Liure intitulé *l'Imitateur de Iesus Christ, ou la vie du venerable Pere Antoine Tuan &c. & l'Histoire &c.* par GILLES GONDON, Prestre & Docteur en Theologie, sans le consentement special dudit GILLES GONDON, & par l'espace de sept ans, à peine de trois mille liures d'amende, confiscation des exemplaires &c. comme il est plus amplement porté dans ledit Priuilege. Donné à Saint Germain en Laye, le troisième de Septembre 1662.

Signé MALLEAV.

Enregistré sur le Liure de la Communauté des Imprimeurs & Libraires, le fixième Septembre 1662. suivant l'Arrest de la Cour de Parlement du huietième Avril 1653.

Signé, DVBRAY.

Achené d'imprimer pour la premiere fois le premier Octobre 1662.

Les Exemplaires ont estéournis.



A
LA REINE, MERE
DV
ROY.



A D A M E,

J'ay desia eu l'honneur d'offrir à VOSTRE
MAIESTE', deux Liures du venerable Pere Antoine
Yuan; le premier Recueil de ses Lettres, & un Traité de la
Penitence, tiré de ses pieux & doctes écrits: en voicy un troi-
sième, qui contient la vie de ce grand serviteur de Dieu, &
l'Histoire de la Fondation de son Ordre des Religieuses de
Nostre Dame de Misericorde. Si les exemples de
vertu sont plus efficaces, que les discours; & s'il y a plus
de satisfaction, & de profit à voir les belles actions des hom-

à ij

EPISTRE.

mes illustres, qu'à ouyr leurs doctes & solides instructions ;
VOSTRE MAIESTE' verra avec ioye dans ce troi-
 siesme Liure, que le Pere Yuan a fait ce qu'il a dit, qu'il
 a pratiqué en soy ce qu'il a enseigné aux autres, & que
 par la sainteté de sa vie, il a confirmé cette haute, subli-
 me & sincere pieté que chacun admire dans ses escrits. Il
 est vray que ce sage **Maistre** de la vie spirituelle, ensei-
 gne une perfection eminente, fondée sur des abbaissemens,
 & sur des dépouillemens si prodigieux, que peu de person-
 nes y osent aspirer : mais il a montré par ses exemples,
 qu'elle n'estoit pas impossible ; puis qu'il en a fidelement
 suiuy les preceptes, avec mesme plus d'exactitude, & de
 severité, qu'il ne les a proposez à ses Disciples. Ainsi
 ie puis dire que si par ses escrits il a comme r'appellé en
 ce dernier temps, les sentimens des plus severes Docteurs
 de la primitive Eglise ; par ses actions, il a renouvelé les
 exemples des plus austeres Anachorettes, ayant esgalé par
 ses mortifications estonnantes & continuelles, les Hila-
 rions, les Simons Stilites, les Guillaumes, & les autres
 plus illustres penitens des siècles passez. Et ce qui est enco-
 re plus merueilleux, cet excellent Prestre a mis en prati-
 que dans les grandes villes, parmy les conuersations du
 siècle, & travaillant au salut des ames dans les
 fonctions de Curé, ce que ces grands hommes n'ont fait
 que dans les cellules, ou dans les cavernes des bois, &
 dans la retraite, & l'estude de la vie contemplative.

C'est ce qui fait voir qu'il a esté le fidele & parfait
 Imitateur de Iesus-Christ : en effet si dans tous ses écrits il
 porte les Chrestiens à l'imitation de cet adorable Sauveur ;
 l'on remarquera dans toutes les démarches de sa vie, qu'il

E P I S T R E.

a voulu se rendre luy-mesme une veritable copie de ce celeste & incomparable Original. Aussi fais-ie voir dans la diuision des parties de ce Liure, que cet admirable Ecclesiastique a suivi toutes les routes de son diuin Maistre: dans la premiere, qu'il l'a imité dans les miseres, & dans les trauaux de son enfance, & de sa vie cachée: dans la seconde, qu'il a exprimé sa vie publique, meslée d'action & de contemplation: dans la troisieme, que comme Fondateur d'un Ordre, il s'est rendu semblable à Iesus-Christ dans la Fondation de son Eglise: dans la quatrieme, qu'il a esté par ses escrits, & par ses actions, les vertus que ce diuin Sauueur a enseignées par ses paroles, & par ses œuvres: enfin dans la derniere, ie montre qu'il a participé des dons gratuits du mesme Fils de Dieu, par les merueilles que le Tout-puissant a faites en luy, & par luy. C'est le fonds de cette Histoire, & la diuision que i'en ay faite, pour la rapporter avec plus de clarté.

Ie m'arreste beaucoup dans le recit de la Fondation de l'Ordre des Religieuses de Nostre Dame de Misericorde; parce qu'elle est si féconde dans les exemples de vertu qu'elle contient, si abondante dans les prodiges que la grace y a operez, & si agreable dans la diuersité des rencontres qui la composent; que ie n'ay peu la décrire plus succinctement. J'aurois mesme deu en faire un plus ample rapport, si la modestie de quelques personnes qui viuent encore, ne m'auoit obligé de taire plusieurs belles actions qui paroistroient également admirables d'une singuliere edification. L'on verra dans cette Histoire les soins extraordinaires que le Ciel a pris, de proteger cet Ordre naissant contre les attaques de l'enfer, & les persecutions de la terre; &

EPISTRE.

par combien de demonstrations de bonté & de puissance, la sainte Vierge s'en est déclarée la mere & la protectrice: de telle sorte, *MADAME*, que cette Reine des Cieux semble auoir choisi *V. M.*, pour suivre ses intentions, seconder ses desseins, & acheuer ce qu'elle a commencé dans ce nouuel Institut. C'est dequoy personne ne peut douter; voyant, *MADAME*, l'affection que *V. M.* tesmoigne à ces bonnes Religieuses, & les obligantes promesses qu'elle leur a souvent répétées, de les favoriser & ayder en tout, comme auguste mere, & grande Maistresse de ses tres fideles filles & tres humbles seruantes. Cette premiere pierre de leur nouvelle Eglise, que *V. M.* a honorée de sa Royale presence, & consacrée par ses illustres mains, n'est elle pas un glorieux monument des graces qu'elles reçoient de vostre magnificence, & un précieux gage de la continuation qu'elles en doivent esperer? Aussi, *MADAME*, en ont elles une parfaite reconnoissance: la conseruation & la sanctification de vostre sacrée personne, & de toute la famille Royale, est l'obiet ordinaire de leurs vœux, de leurs prieres, & de leurs plus tendres deuotions. Elles sont consacrées à la Reine des Anges, comme à leur unique mere & Fondatrice; mais elles vous regardent, comme tenant sa place sur la terre, & representant ses diuines perfections par vos heroïques vertus. C'est en cette qualité, *MADAME*, que ie vous presente la vie de ce grand homme, leur Instituteur & l'Histoire de la Fondation merueilleuse de leur Ordre. Ie n'y ay rien mis que ie n'aye seu par des personnes dignes de foy, & par des attestations authentiques. L'on y trouuera plusieurs defauts dans la simplicité du stile, & dans la rudesse de la com-

ÉPISTRE.

position. Mais *MADAME*, l'obeyssance que i'ay rendue aux personnes qui ont eu pouuoir de me commander, doit excuser toutes mes fautes : puis que ç'a esté pour obeyr que i'ay commencé, continué & acheué cet Ouvrage. Comme il est extraordinaire, & tout à fait singulier dans sa matiere, il a besoin d'un puissant appuy contre ceux qui se choqueront des continuelles merueilles qu'il contient, mais il sera à couuert des traits des enuieux, & en assurance contre tous les Critiques ; si *VOSTRE MAIESTE'* daigne l'accepter sous son Auguste protection, & l'honorer de ses Royales faueurs. C'est, *MADAME*, la grace que ie vous demande tres-humblement, & qu'en reconnoissance des obligations infinies que i'ay à vos magnifiques bontez, vous me permettiez de me dire.

MADAME,

DE VOSTRE MAIESTE'.

Le tres-humble, tres-obeyssant, & tres-
fidele seruiteur & sujet
G O N D O N Prestre.



NOUS sous-signez Docteurs en Theologie de la faculté de Paris, certifions auoir leu avec beaucoup de soin & d'admiration vn Liure intitulé *l'Imitateur de I. C. ou la Vie du venerable P. A. Yuan, Prestre Fondateur de l'Ordre des Religieuses de Nostre Dame de Misericorde & l'Histoire de la Fondation du mesme Ordre par Gilles de Gondon, Prestre Docteur en Theologie*: dans lequel, nous n'auons rien leu qui ne soit capable d'exiter dans les ames veritablement fideles vn saint estonnement de voir que la diuine Prouidence n'a point esté empeschée par la corruption & malignité du siecle où nous viuons, d'y faire paroître vn prodige d'austerité dans la personne de ce grand seruiteur de Dieu; qui depuis sa tendre ieunesse iusques aux derniers iours de sa vie, a exercé contre son corps toutes les rigueurs qu'ont pratiqué les Saints Hermites les plus ieueres de l'antiquité Nous sommes donc obligez de témoigner au public que bien loin d'auoir trouué dans ce Liure quelque chose de contraire à la foy, & à la pieté Chrestienne, nous n'y auons rien leu qui ne soit capable d'exiter dans les fideles, & autres ames Religieuses les desirs de s'auancer dans la plus haute perfection; & dans les direct urs des consciences vne forte emulation, de se sanctifier dans l'exercice de leurs diuins fonctions, par l'exemple de toutes les vertus sacerdotales, qui ont éclaté dans la vie de cet incomparable Prestre. Fait à Paris le 25. Septembre 1662.

Frere P. H. LE ROY.

Fre. SIMPLICIEN LE GROS Religieux Aug.

NOUS sous-signés, Docteurs en Theologie, certifions auoir leu vn Liure intitulé, *l'Imitateur de Iesus Christ, ou la vie &c. & l'Histoire &c. par M. Gilles Gondon &c.* & rendons témoignage des choses qu'il contient, parce qu'ayant eu l'honneur de conuerser familièrement durant plusieurs ann es avec le venerable Pere Yuan, Nous en auons veu la plus grande partie de nos yeux, & auons appris le reste ou par luy mesme, ou par des personnes dignes de foy. Nous auons veu ce grand seruiteur de Dieu, simple, droit, innocent, & patient comme Iob fidele comme Abraham, obeyssant comme Isaac, vigilant, comme Iacob debonnaire comme Moÿse, zelé comme Helie penitent comme Ieremie & S. Iean-Baptiste, ne s'estudiant qu'à imiter l'estat de Iesus-Christ, souffrant, crucifié & aneanty; c'est pourquoy nous n'auons rien trouué dans ce Liure qui ne soit orthodoxe, de grande edification, & tres efficace pour encourager les commençans à entrer dans le chemin de la vertu, fortifier ceux qui en ont desia la pratique, & seruir de consolation aux ames plus auancées en l'amour diuin. A Paris ce 15. Septembre 1662.

I. B. PAUL.

G. GARCIN.

L'IMITATEUR



L I M I T A T E U R
D E
I E S V S - C H R I S T ,
O V
L A V I E
D U V E N E R A B L E P E R E
A N T O I N E Y V A N .
P R E S T R E , F O N D A T E U R ,
& I n s t i t u t e u r d e l ' O r d r e d e s R e l i g i e u s e s
d e N o s t r e - D a m e d e M i s e r i c o r d e .

P R E M I E R E P A R T I E .

S O M M A I R E .

Pour commencer à faire voir les rapports, que le venerable Pere Antoine Yvan a eû avec I E S V S - C H R I S T , dont il est imitateur ; la premiere Partie

A

de son histoire nous apprend, qu'il l'a imité dans son enfance, & dans sa vie cachée. Car comme cét adorable Sauueur, a passé les premicres années de sa vie, dans la pauvrete, dans les fatigues, & dans les miseres; Antoine Yvan dès sa naissance, iuſques à sa tren:ième année, a aussi veſcu dans une tres-grande pauvrete; & a passé sa ieunesse en diuerſes Prouinces, parmy toute ſorte d'incommoditez, & de ſouffrances. Et ſi le Sauueur de nos ames a fait connoiſtre ſa diuinité, ſous la nature humaine; par les diuines perfections, qu'il a maniſteſtées, & par les grands miracles, que ſon Pere a faits en ſa faueur: Atoine Yvan a donné dès ſes premieres années, des teſmoignages des plus excellentes vertus du Chriſtianisme; & le Seigneur a operé pour luy des merueilles, qui nous font connoiſtre, qu'il eſtoit enrichy des threſors du Ciel, dans la priuation des commoditez de la terre.

CHAPITRE I.

Sa naiſſance, & les marques de vertu qu'il donne dès ſes premieres années.



L'nâquit en l'année mil cinq cens ſeptante-fix, le dixième du mois de Nouembre, dans vn grand bourg appellé Riaus, du Diocēſe d'Aix en Prouence. Son pere ſe nommoit Honoré Yvan du meſme lieu de Rians; & ſa mere Honorée Lents du lieu de la Verdier de la meſme Prouince; l'vn, & l'autre ſimples, deuots, & craignans Dieu; plus riches des threſors du Ciel, que des biens de la terre; &

mieux pourueus des benedictions de la grace , que des auantages de la fortune ; qui supportoient leur indigence , avec grande resignation ; mangeant leur pain à la sueur de leurs visages , & gagnant innocemment leur vie , par le trauail , & l'industrie de leurs mains. Antoine n'auoit que trois ans quand son pere deceda ; & le Seigneur témoigna dés lors , qu'il l'auoit pris sous sa protection ; le preseruant de la maladie contagieuse , de laquelle son pere estoit mort : quoy que ce petit innocent , eust couché , sans aucune precaution avec luy , durant tout le temps qu'il en auoit esté atteint.

Estant preuenu des benedictions de la grace , il ne contracte rien de la bassesse de son extraction ; ne faisant paroistre que de vertueuses inclinations , dès son enfance. En effet dès les premieres années de sa vie ; on reconnoist , qu'il a de l'auersion pour le vice , & pour toutes les choses contraires à la vertu : car il ne peut souffrir la compagnie des enfans qui jurent , qui se querellent , ou qui proferent des parolles , qu'il croit n'estre pas bien honnestes. Il les reprend , il les menace ; & quand il arriue , qu'il n'est pas écouté , & que ses compagnons , au lieu de se corriger , s'irritent contre luy , & continuënt d'estre méchans ; il se retire tout triste , & affligé ; comme s'il sentoit déjà les offenses que l'on fait à Dieu.

Mais s'il donne à connoistre dans ce bas-âge , qu'il hait si fort le vice ; il ne monstre pas moins d'aymer la vertu. Ainsi méprisant les jeux , & les autres amusemens de l'enfance , il se plaist aux choses serieuses , & à des exercices , qui font aysement connoistre , à quoy le porte son inclination. Ses plus ordinaires occupations consistent , à demeurer longtemps dans l'Eglise ; pour y faire ses petites prieres , ou pour s'arrester , à y voir les choses qui se presentent à ses yeux : de maniere qu'il semble ne se pouoir lasser , de regarder les tableaux , les images de relief , & les autres embellissemens des Chapelles , d'ouïr chanter les Prestres , & de remarquer leurs ceremonies ; qu'il tâche d'imiter quand il est seul , ou avec d'autres enfans : s'empressant fort à faire des proces-

sions, à bâtir des autels, à dresser de petits oratoires, & à chanter à la façon des Ecclesiastiques.

Sa pieté paroist encore du tout singuliere dès ce bas-âge, dans le respect qu'il porte aux Images, aux Croix, à l'eau benîte; & aux autres choses saintes; ne s'en approchant qu'avec modestie; & avec vne timidité respectueuse. Mais elle paroist particulièrement quand il assiste à la sainte Messe: car il l'entend à genoux, il tient les mains jointes, ses yeux sont collez sur le Sanctuaire, ou sur quelque deuote image. Enfin il prie avec vne attention d'esprit, qui surpasse la legereté de son âge; & qui monstre en luy vne deuotion merueilleuse: se tenant modeste comme vn Ange; quoy que naturellement agissant, porté au trauail, & ennemy de l'oïsiueté, & du repos.

Son inclination à l'étude paroist si extraordinaire; qu'on ne scauroit exprimer les soins qu'il prend, & les diuers moyens dont il se sert, dès l'âge de six à sept ans, pour se porter de luy-mesme à la connoissance des Lettres; nonobstant les difficultez qu'il y rencontre. Dès qu'on luy donne quelque piece d'argent, il l'employe à acheter des Alphabets; jusques à en auoir cinq, ou six à la fois, auant mesme qu'il ait commencé à connoistre les lettres. Mais voicy vne inuention singuliere, que nous pouuons sans doute attribuer à l'Esprit de Dieu, secondant l'inclination de nostre petit Antoine, & suppleant aux moyens dont il manque. Commel'entrée des écoles luy est interdite, parce qu'il n'a pas de quoy payer les Maistres; il va trouuer les écoliers dans leurs maisons, & les prie pour l'amour de Dieu, & d'une façon tout à fait touchante, de luy monstrier à lire. Mais cette voye ne satisfaisant pas au feruent desir qu'il a d'apprendre, parce qu'on luy refuse souuent l'entrée des maisons, à cause qu'il est mal vestu, il s'adresse aux mesmes écoliers par les ruës, quand ils sortent de l'école, ou quand ils y vont; les conjurant de luy enseigner à lire, & les y sollicitant, par la gratification qu'il leur fait de quelques fruits, qu'il retranche des aliments dont sa pauvre mere le nourrit. Ce vertueux enfant s'abstient de manger, pour se

faire instruire : comme s'il vouloit déjà commencer le jeûne, qu'il a depuis observé avec tant de rigueur ; montrant bien qu'il est conduit de l'Esprit de Dieu ; qui voulant se servir de luy pour l'édification de plusieurs, & le proposer comme vn excellent maistre de la vie spirituelle ; le porte à se prier des choses nécessaires à la nourriture de son corps, pour perfectionner son ame ; & à souffrir plustost la faim, que l'ignorance.

La grace perfectionnant la nature, sembloit avoir avancé l'usage de raison à nostre petit Yvan ; car en cet âge encore tendre, auquel les enfans ne songent qu'à se jouer, il s'exhortoit luy-mesme à acquerir la vertu ; & par la pensée de l'aduenir & par d'autres raisons, que nostre esprit ne peut produire de luy-mesme, que dans vn âge plus avancé. Ainsi quand nostre feruent écolier commence à connoistre les lettres, il se retire dans sa maison, aussi-tost qu'on luy a montré à lire ; il repete seul ce qu'on luy a enseigné : s'y portant avec tant d'ardeur, qu'il se menace luy-mesme, de s'imposer de rudes penitences ; s'il ne lit aussi bien qu'il le pretend. En effet prenant son Liure, apres avoir estudié avec toute l'attention qu'il luy est possible ; [Ca, dit-il, (pour me servir de ses propres termes) Antoine, dites vostre leçon ; & si vous ne la sçavez pas, resoluez-vous de jeûner, ou de coucher la nuict à terre :] Il tâchoit en suite à lire estant tout seul ; & comme si le Maistre & le disciple eussent esté en luy deux personnes differentes ; quand il connoissoit qu'il auoit manqué, il repetoit la mesme leçon deux ou trois fois ; jusques à ce qu'il croyoit l'auoir bien dite : Apres quoy s'interrogeant avec rudesse : [Pourquoi est-ce, disoit-il à soy-mesme, que tu n'as pas aussi bien lû la premiere, & la seconde fois, que la troisiéme ? Va pauvre miserable ; tu ne sçauras jamais rien ! hélas qu'est-ce que tu deviendras !] Il se punissoit de la sorte & encore bien plus sensiblement par des peines effectiues ; couchant à terre, ou souffrant quelques autres mortifications, ainsi qu'il s'estoit menacé.

Il faut auoüer, que ce vertueux enfant s'accoustumoit à souffrir de tres-bonne heure : puis quedans sa plus tendre jeu-

nessé, lors que les autres enfans ne songent qu'à se diuertir, il se peinoit beaucoup de luy-mesme, se traitant avec grande rigueur, comme estranger, & comme inferieur coupable. Il maceroit déjà son corps, & faisoit souffrir son esprit; s'affligeant de l'estat present où il se trouuoit, & de celui qu'il apprehendoit à l'aduenir. Ainsi quelquesfois considerant d vne part les desirs ardens, dont il se sentoit porté à l'étude; & de l'autre faisant reflexion aux difficultez, qu'il y trouuoit; à raison de sa pauureté, il s'affligoit viuement: jusques à sanglotter, & à répandre beaucoup de larmes; craignant d'estre contraint de quitter l'estude, afin de pouuoir subsister par quelque autre voye.

Il nous a appris luy-mesme avec grande naïveté, ce que ie viens de dire, & plusieurs autres choses semblables: Dieu l'ayant disposé, à faire cette declaration; pour donner à connoistre les graces dont il l'auoit preuenue dès son enfance; & que s'il l'auoit priué des biens exterieurs, que l'on appelle de fortune, il l'auoit enrichy des biens du corps, qui consistent principalement en vne forte santé; & des biens de l'ame; qui sont, outre les biens furnaturels, le bon esprit, le solide jugement; & les inclinations à la vertu. Nous pouuons encore adjouster que les exercices de nostre petit Yvan, estoient vne marque de sa vocation à l'estat Ecclesiastique; puis que quand Dieu nous appelle, à quelque employ, il nous donne les qualitez necessaires pour nous en acquitter; ou il nous incite de bonne heure à les acquerir. Si bien que comme Yvan deuoit exceller en la profession de Prestre, où la science est tres-necessaire; Dieu l'excitoit d vne façon extraordinaire à estudier dès les premieres années de sa vie.



CHAPITRE II.

Il monstre vne charité extraordinaire dans son enfance.

LE grand Apostre semble nous exhorter à estre charitables, dans le mesme temps que nous trauaillons pour nous rendre sçauans; quand il dit que la science enfle, & que la charité édifie. Le petit Yvan suiuit cét aduis, dans sa plus tendre jeunesse: car aussi-tost qu'il commence à étudier pour pouuoir vn jour acquerir la science; il donne des marques, d'une charité du tout admirable: jusques à souffrir la faim; pour donner à manger, à ceux qui luy demandent l'aumosne, & à se dépouïller, pour vestir les nuds. Ainsi ce benit enfant se priuoit quelquesfois d'une partie des alimens que sa mere luy donnoit pour sa nourriture; & quelquesfois, il se priuoit mesme de tout son dîner, pour le donner à ceux qu'il croyoit estre dans vne plus grande disette. Souuent mesme il prenoit dans sa maison, ce qu'il pensoit estre propre pour soulager la misere des pauures, le leur departissant avec joye. Si bien que lors mesme que sa mere paistrissoit, il luy déroboit innocemment de la pâte, pour en faire l'aumosne, quand il n'auoit aucune autre chose à donner.

Mais son inclination à exercer les œuures de miséricorde le portoit à faire des actions de charité encore plus remarquables, n'estant âgé pour lors, que de sept à huit ans: car il sembloit ne pouuoir souffrir, que les autres pauures fussent plus incommodez que luy; quand il les pouuoit soulager. C'est pourquoy rencontrant des enfans abandonnez, qui alloient nuds pieds, il quittoit ses souliers, les leur offroit, les pressoit de les receuoir, & les aydoit encore à les chauffer. Il faisoit le mesme, de ses habits: car il s'en dépouïilloit avec amour, pour en reuestir les miserables, qu'il voyoit en auoir vn extrême besoin: & quand il rencontroit

des gens reduits à la derniere indigence , & qu'il n'auoit rien du tout pour les secourir , il en estoit si sensiblement affligé ; qu'il en repandoit des larmes : tant il auoit le cœur tendre aux mouuemens de compassion ; & tant il estoit porté de luy-mesme , à vouloir soulager les miseres de son prochain.

Ces actions de charité de nostre petit Yvan paroissent d'autant plus considerables , qu'il ne faut pas les regarder , comme effets seulement de son inclination naturelle ; mais encore , comme productions de la grace diuine , qui le faisoit agir. Car depuis que la nature a esté corrompuë par le peché , elle ne nous incite à la poursuite du bien , que par de foibles mouuemens , qui se r'alentissent d'abord ; principalement dans l'enfance , & quand nous trouuons de grands obstacles à vaincre , & des maux sensibles à supporter : si ce n'est que le Saint Esprit les appuye , & les fortifie par son secours. C'est pourquoy il faut aduoüer que la charité d'Yvan étoit extraordinaire ; puis qu'il en continuoît l'exercice avec ferueur , nonobstant les empeschemens qu'il y trouuoit , & les maux qu'il estoit contraint d'en souffrir. En effet quoy que sa mere fust tres-pieuse , & qu'elle benist le Seigneur , pour les louables inclinations qu'elle voyoit en son fils ; neantmoins craignant que sa liberalité ne fust plustost , vn effet de la legereté de son âge , que des mouuemens de l'esprit de Dieu , elle se seruoit de diuers moyens pour l'en détourner. Et ainsi quelquesfois elle le flattoit , luy remontrant avec douceur que Dieu ne demande qu'aux personnes riches de faire l'aumosne , & qu'il ne doit pas donner ses habits , ny ce qu'il trouue dans la maison , en ayant luy-mesme necessité. Bien souuent elle se met en colere contre luy , elle le menace , & des menaces passant aux coups , elle le chastie avec rigueur , luy donnant les verges d'une maniere tres-rude , & le tenant les jours entiers enfermé dans vne chambre. Mais comme ces moyens ne sont pas capables d'arrester la ferueur de nostre charitable enfant , sa mere qui l'accuse de desobeyssance , & d'opiniastreté , le chastie d'une maniere tout à fait violente ; de telle sorte que le dé-

pouillant

poüillant au plus fort de l'Hyuer, elle l'expose tout nud dans la rue aux injures de l'air, & à la rigueur du temps; afin que les douleurs qu'il sentira par l'extrême froid, l'empeschent d'estre si prodigue, que de donner ses habits. C'est vne chose admirable, qu'encore que cette punition fust tres-rude & tres-sensible; neantmoins le patient enfant l'enduroit avec vne telle force, qu'il n'en faisoit aucune plainte; il n'en tesmoignoît pas mesme du ressentiment, que par les larmes que la violence du froid tiroit de ses yeux.

Mais sa charité luy faisoit encore souffrir d'autres maux tres-sensibles; car quelquesfois ayant donné ses souliers, & ses bas de chausses à de pauvres enfans, qui n'en auoient point; & sa mere, pour le punir, ne voulant pas luy en bailler d'autres, il enduroit des froids si violens aux pieds & aux jambes; qu'il en perdoit presque le sentiment. Si bien que se trouuant contraint de chercher quelque lieu, où il pust s'échauffer; comme il n'osoit pas retourner dans sa maison, de peur d'estre battu; il se refugioit vers les fours du village, où il souffroit encore des douleurs tres-aiguës: parce que comme pour s'échauffer tout d'un coup, il mettoit ses pieds sur les cendres chaudes, qu'on venoit de tirer du four, il sentoit des souffrances extrêmes par l'opposition du grand froid, & de la grande chaleur. Mais ce qui est le plus admirable, consiste en ce que ce genereux enfant, nonobstant tous les maux qu'il receuoit à l'occasion de sa charité; ne laissoit pas de continuer ses aumônes, quand il en auoit l'occasion, & le pouuoir.

Si le Fils de DIEU nous assure, que l'offrande de cette bonne Veufve del Euangile, quoy que tres-petite, estoit neantmoins plus agreable à son Pere, que les sommes immenses que plusieurs auoient mis dans le gazophylace du temple; parce qu'elle donnoit de sa substance, & de ce dont elle auoit besoin; au lieu que les autres ne donnoient que de leur superflu: Qui doutera que les aumônes du petit Yvan ne fussent tres-agreables à DIEU, & d'un tres grand merite; puis qu'il ne donnoit que de ce qui estoit necessaire à son entretien? Nous lisons des charitez semblables dans

la vie de plusieurs grands serueurs de DIEV; du bien-heureux Pierre de Luxembourg, de sainte Rosseline, & de plusieurs autres: mais où ils estoient auancez en âge, où ils estoient riches de leur maison. Nostre Yvan n'auoit ny l'un, ny l'autre; car il estoit pauvre, & vn petit enfant; mais vn pauvre charitable, & vn enfant remply de compassion; qui pouuoit dire avec le Patriarche Iob, que la misericorde estoit née avec luy, & l'accompagnoit dès le ventre de sa mere.

L'Apostre saint Paul exhorte ses disciples à trauailler, pour gagner dequoy viure, & dequoy faire l'aumosne aux infirmes. Les Peres du desert ont suiuy dans les premiers siecles, ce charitable conseil; & le petit Yvan l'a pratiqué dans sa plus tendre jeunesse. Car dès qu'il commença à pouuoir trauailler, il employa ses forces en des œuvres penibles, pour auoir dequoy exercer sa charité; allant querir des fagots dans les forests voisines, qu'il portoit sur son dos; & dont, apres les auoir vendus, il distribuoit la plus grande partie de l'argent aux pauvres.

Il passoit ses premieres années dans ces pieux exercices, qui luy estoient des dispositions excellentes à l'estat Ecclesiastique; lors que DIEV l'appella effectiuement dans l'Eglise, le faisant receuoir enfant de Chœur, dans la Paroisse de Rians, lieu de sa naissance: & comme cét employ luy donna occasion d'accroistre sa pieté, & luy seruir de motif pour se porter à l'étude avec plus de ferueur; il fit paroistre de nouuelles marques de sa deuotion, & de sa diligence. Car s'acquittant de ses fonctions, avec vne modestie, & exactitude merueilleuse; il trauailloit sans relâche à apprendre à bien lire, avec d'autant plus d'application, qu'il y estoit aydé par les soins de quelques Prestres de la mesme Paroisse. Il semble qu'il connoissoit déjà que pour estre veritablement sçauant, il faut apprendre la science du Ciel, en mesme temps que l'on s'addonne aux lettres de la terre; c'est pourquoy il vnissoit la priere à l'estude, en sorte qu'il n'étudioit qu'apres auoir fait sa priere; il ne continuoit & ne finissoit aussi son estude que par la priere: & il s'addonnoit à ces deuots exercices avec tant d'application, qu'il y em-

ployoit quelquesfois les nuits entieres. Sa vigilance estoit extraordinaire ; car pour estre plus diligent à se leuer le matin , afin d'auoir plus de loisir de bien faire son deuoir ; il couchoit ordinairement dans le clocher , ou sur des pierres , ou sur des ais , tenant vn Liure , ou son Chappellet dans sa main. C'est le moyen dont il se seruoit à Rians , & ailleurs , où il a esté employé au seruice de l'Eglise pour vaincre la paresse , & se rendre tres-diligent. Aussi a-t'il esté touûjours tres-prompt , & tres agissant en tout ce qu'il a entrepris , mesme dès son enfance ; montrant bien par là , qu'il agissoit par les mouuemens de l'Esprit de Dieu , dont la grace ne peut souffrir la paresse , ny la lâcheté.

CHAPITRE III.

Il pratique diuerses vertus dans le Conuent des Peres Minimes de Pourrieres.

LA diuine Prouidence semble auoir voulu que nostre petit Yvan exerçast diuers emplois dès sa plus tendre jeunesse , pour se rendre capable de conduire vn jour les ames en toutes sortes de voyes. Aussi apres qu'il se fust appliqué aux fonctions Ecclesiastiques , durant le temps qu'il fut Enfant de Chœur dans sa Paroisse ; cette Prouidence adorable luy donna les moyens d'apprendre la pratique des vertus religieuses , le faisant receuoir au seruice des Peres Minimes au Conuent de Pourrieres , qui n'est éloigné que de deux lieuës du village de Rians. Il n'y eut pas demeuré longtemps , que les Religieux connoissant combien volontiers , & exactement il faisoit ce qui luy estoit commandé , l'employèrent à diuerses choses ; à répondre à la Messe , à parer les Autels , à auoir soin de l'Eglise , & à plusieurs autres seruices domestiques. L'on ne sçauroit dire avec quelle diligence , & adresse il s'acquittoit de tous ces emplois , les embrassant tous , & y trouuillant avec autant de disposition , & de mar-

ques de sa bonne volonté; que s'il n'eust eû qu'une chose à faire; & faisant chaque chose avec autant de soin, que s'il n'eust eû que cette occupation là; ne negligéant rien de ce qui luy estoit ordonné, & ne se plaignant jamais qu'on le surchargeoit de travail: car il taschoit encore de trouver quelques momens de loisir pour estudier.

Aussi pouuons-nous dire que les Religieux auoient trouué en luy vn seruiteur accomply; car il leur obeïssoit en tout sans s'excuser, sans differer, & sans témoigner aucune repugnance: & quoy que bien souuent on luy commandast des choses qui estoient tres-difficiles, & qui sembloient surpasser sa foiblesse; il ne laissoit pas de les accepter avec soumission, & s'y employer avec ferueur. Il obeïssoit encore si volontiers, & de si bonne grace, qu'il faisoit naistre le desir de luy commander; aussi estoit-il le valet de tous, & de chacun en particulier: tous estans bien aise de se seruir de luy, comme d'une personne qui témoignoit de la joye de rendre seruice à tout le monde. Si bien que pour pouuoir faire tout ce qu'on luy commandoit, & suruenir à toutes les occupations, il s'estoit tellement accoustumé à courir, & à agir avec promptitude; qu'il auoit quasi perdu le pouuoir de marcher lentement; ainsi qu'il nous a auoué luy-mesme sur la fin de sa vie.

Mais comme si sa vertu n'eust pas trouué assez d'exercices dans les diuerses occupations qu'on luy donnoit; il commença dans ce Conuent la vie austere qu'il a depuis continuée: car il gardoit l'abstinence, & le ieusne de la Regle; quoy qu'il n'y fust pas obligé. De plus il maceroit son corps, par de sanglantes disciplines; il couchoit sur la dure; il alloit touïours nuds pieds, & la teste découuerte; il souffroit mille autres incommoditez, se portant de luy-mesme à ce qui estoit de plus rude, & de plus difficile.

Si selon le grand Apostre ceux qui ont crucifié leur chair appartiennent à IESVS-CHRIST, nous pouuons dire qu'Yvan estoit tout à ce diuin Sauueur; puis que dès son enfance, il faisoit souffrir vn continuel martyre à son corps; de maniere que bien loin de le traiter avec delicatesse il l'a-

uoit tellement accoustumé à trauailler, & à souffrir, qu'il sembloit l'auoir rendu insensible aux douleurs. En effet le Superieur de ce Conuent où il demeueroit luy ayant commandé d'aller querir de l'eau, il obeït; mais à son ordinaire, avec tant de promptitude, que courant & ne prenant pas garde sur quoy il marchoit, il mit le pied sur vn clou, dont la pointe entra bien auant dans la chair.

Il en sentit d'abord vne douleur tres-violente, qui neantmoins ne fut pas assez forte pour l'arrester: car secouant deux ou trois fois le pied, comme s'il eust voulu repousser ce qui le bleffoit, il continua son chemin, pour faire ce qu'on luy auoit commandé. Cependant le clou s'enfonce tellement, qu'il perce le pied d'outre en outre; le sang en sort des deux costez; la douleur en deuient extrême; sans que ce genereux enfant desiste de porter de l'eau au Superieur; qui touché de compassion, de voir nostre Antoine tout sanglant, & le pied percé par ce clou qui estoit encore dans la playe, tasche de le consoler, & appelle en suite du monde, pour luy faire appliquer quelque remede. Le pauvre bleffé témoigne la violence de la douleur par les larmes qui coulent de ses yeux; mais il témoigne encore mieux sa vigueur, & sa patience par cette action tout à fait genereuse; qui semble surpasser la foiblesse de son âge; il arrache luy-mesme le clou de son pied en repoussant d'une main la pointe qui sortoit au dessus de la playe; & le tirant de l'autre par la teste qui estoit au dessous, avec autant de force, & de courage que s'il l'eust arraché d'un mur.

Quoy que cette douleur fust extrême, ainsi que chacun peut juger; il la souffrit neantmoins, avec vne patience incroyable, sans proferer vne seule parole de plainte. Aussi semble-t'il que Dieu voulut le recompenser, en guerissant presque miraculeusement sa bleffure: car comme on n'y mit point d'autre appareil, qu'une bande de linge, pour en arrester le sang; ce linge se délia aussi-tost apres; par ce qu'Yvan accoustumé au trauail, ne voulut pas estre en repos: en suite dequoy il ne mit luy-mesme que de la bouë sur la playe, y faisant le signe de la sainte Croix, & implorant

le secours diuin. Merueille! cét Auguste Signe joint à la priere, communique vne souueraine vertu à l'emplastre qu'il auoit mise sur la playe; si bien que sans aucun autre remede, son pied fut gueri en mesme temps.

O que la patience est vn excellent lenitif! parce qu'elle nous deliure du vice contraire, qui ne sert qu'à renouveler, & accroistre nostre douleur; & que de plus elle nous rend dignes de l'assistance diuine, qui est le souuerain remede de tous nos maux.

CHAPITRE IV.

Il prie la sainte Vierge avec vne simplicité enfantine.

A Mesure que nostre Yvan croist en âge, il s'auance en vertu; de telle sorte qu'il donne de plus en plus des témoignages de ses louables inclinations. Il montre dans ce Conuent de Pourrieres, qu'il est naturellement porté à graver, & à peindre; parce qu'auant qu'on luy ait donné aucune intelligence de ces deux Arts, il se cache souuent pour s'y exercer, y employant le temps qu'il peut dérober à ses autres occupations. Mais il fait encore mieux paroistre les attrais de son ame, à la solide pieté; commençant deslors de frequenter les Sacremens de la Confession, & de la Communion, avec vne grande ferueur, & vne singuliere pureté. Il commence aussi de s'addonner à l'Oraison mentale, qui depuis a esté le plus ordinaire exercice de sa vie: mais la deuotion qui paroist en luy avec plus d'éclat, & plus d'edification dès ses premieres années, est son amour, & sa confiance enuers la Mere de Dieu, dont voicy vn exemple memorable.

Le Superieur l'ayant vn iour repris avec seuerité, de ce que selon son jugement il ne profitoit pas assez dans l'estude; nonobstant le soin qu'on prenoit à l'instruire; Yvan se prist à pleurer, & se plaignant contre soy-mesme de sa mau-

uaife memoire, qui ne fecondoit pas l'ardent defir, qu'il auoit de deuenir ſçauant; il s'affligea ſi fort que ce meſme Superieur en fut ſenſiblement touché: ſi bien qu'il le conſola, & l'encourageant, luy fit eſperer que Dieu l'ayderoit par ſa grace, & ſuppléeroit au deffaut de ſa memoire. Après quoy, pouſſé ſans doute par vn ſecret mouuement de l'Eſprit diuin: [Allez, luy dît-il; vous proſterner deuant l'image de Noſtre-Dame, qui eſt dans noſtre Chœur, & demandez-luy à haute voix, ce que vous deſirez: I'eſpere que cette grande Reyne, qui eſt la Mere des pauures, vous ſera fauorable.] Yvan obeïſſant entre dans le Chœur, ſe proſterne deuant l'image de la ſainte Vierge, & les yeux mouïllez de larmes, fait avec ferueur & ſimplicité cette priere à haute voix, & en preſence de pluſieurs Religieux.

[Sainte Vierge, je ſuis vn pauvre enfant, qui deſire acquerir la vertu; mais qui ne le puis, faute de moyens, & de memoire. J'ay recours à Vous, n'ayant ny parens, ny amis. Le Pere Superieur m'a enuoyé icy pour vous demander ce que ie deſire. Ie deſire, grande Reyne; ſçauoir bien lire, bien écrire, grauer, peindre; eſtre vn bon Preſtre, vn bon Confefſeur, vn bon Predicateur, & vn Saint. Ie vous prie, tres-ſainte Dame, de m'obtenir ces graces de voſtre Fils. Si ie ſçay bien lire, je reciteray voſtre Office; ſi ie ſçay bien peindre, & grauer, je graueray, & peindray de vos images; ſi ie ſuis Preſtre, je celebreray la ſainte Meſſe en voſtre honneur; ſi ie ſuis Confefſeur, je porteray mes penitens à vous ſeruir; ſi ie ſuis Predicateur. je preſcheray vos louanges; & ſi ie ſuis Saint, je vous aymeray toute ma vie, comme ma bonne Mere, & Maïſtreſſe.]

La Sainte Vierge qui regarde l'oraïſon des humbles, & ne mépriſe pas leurs prieres (ainſi que le Prophete a dit du Seigneur) exauça celle du bon Yvan; & luy obtint les graces qu'il luy auoit demandées: de maniere qu'il ſceut bien lire en fort peu de temps, & ſans preſque aucune aſſiſtance des creatures: il apprit à bien écrire; il deuint ſçauant en la peinture, & en l'art de grauer; & il acquit dans ſon temps les autres qualitez qu'il auoit deſirées. Enfin on remar-

qua d'abord vn tel changement en nostre petit Yvan, que ceux qui l'auoient connu auparauant en eurent de l'admiration; & sçachant que ce pieux enfant s'estoit adressé à la Mere de Dieu, publierent la bonté de cette grande Reyne, enuers ce deuot orphelin: disant à sa loüange ce qu'elle auoit publié à la gloire de son Fils; qu'elle auoit remply de biens le pauvre Yuan, qui en auoit vne grande faim, & manquoit de moyens de se rassasier.

Nous auons appris ce que ie viens de dire de plusieurs personnes, & mesme de quelques Religieux qui auoient esté presents, quand le petit Antoine fit sa priere: mais nous l'auons encore sçeu par le Pere Yvan mesme; qui sur la fin de sa vie en estant interrogé par ses plus familiers, leur aduoüant la verité avec franchise: [I'ay eü, leur dît-il, de la bonté de mon Sauueur par les intercessions de sa tres-sainte Merc, ce que ie luy demanday alors; horsmis la sainteté. Ce n'est pas qu'elle ne m'ait obtenu beaucoup de graces pour deuenir Saint: mais ie n'y ay pas correspondu fidellement, mes offenses y ayant touïours mis de l'obstacle.]

Cét adueu n'a esté, qu'apres les preuues effectiues qu'il nous en a laissées: car ses manuscrits font voir qu'il auoit vn bon caractere; les diuers tableaux qu'il a peints & les planches de deuotion, qu'il a grauées; montrent qu'il estoit sçauant en ces Arts. Le recit de sa vie fera voir, qu'il estoit bon Prestre, bon Confesseur, bon Predicateur, & qu'il a vëcu saintement. Enfin on pourra connoistre par le recit de sa mort, qu'elle a esté precieuse deuant le Seigneur, comme celle des Saints. Mais si la Sainte Vierge luy a accordé sa demande, il faut aduoüer, que de sa part il a esté fidelle à garder la promesse qu'il auoit faite à cette Reyne des Cieux; comme nous verrons dans la suite de cette Histoire.



CHAPITRE V.

La protection diuine paroist sur la conduite d'Yvan.

Pendant que nostre pieux Yvan est au service des Peres Minimes de Pourrieres, & que par ses trauaux, ses mortifications, & ses deuotsexercices, il jette les fondemens de cette admirable vie qu'il a depuis menée, la Prouence est affligée d'une si grande famine, que les plus riches se trouvent contrains de renvoyer leurs domestiques: si bien que les Peres Minimes reduits à cette extremité, donnerent congé à Antoine Yvan, encore qu'il leur fut tres-vtile, & qu'ils eussent beaucoup d'affection pour luy; Dieu le permettant de la sorte, pour faire voir dans cette rencontre qu'il auoit pris nostre jeune Yvan sous sa protection. Ce pauvre enfant se trouua dans vne extrême desolation, ne sçachant de quel costé se tourner, ny à quoy se resoudre; pour pouuoir subsister, & pour suiure ses estudes: car il n'auoit ny parens, ny amis qui le peussent ayder; & la mere à qui seulement il eust pû recourir, auoit elle-mesme beaucoup de peine à gagner son pain. Dépourueu donc de toute sorte de commoditez, & delaisé de toutes les creatures, il se retira dans le bois; l'on ne sçauroit dire les incommoditez qu'il souffrit dans cette retraite, durant les dix ou douze jours qu'il y demeura; sans y receuoir aucune assistance de personne du monde: car comme il n'y auoit aucun lieu pour s'y loger, il passoit le iour à rouler dans le bois, y cherchant des herbes, & des racines pour sa nourriture: & la nuit il estoit contrainct de coucher sous les arbres, exposé aux injures de l'air, & à la mercy des bestes sauuages. O! qu'il pouuoit bien dire pour lors, se trouuant dans vn estat si pitoyable, ces parolles du Sauueur de nos ames, dont il imitoit la paureté: Les Oyseaux ont leurs nids, & les Reuards leurs tannieres; mais moy, je n'ay pas vn lieu où ie

puisse reposer mon Chef. Il n'auoit autre recours , ny consolation dans cet estat de delaissement , que les prieres qu'il faisoit à Dieu , & les larmes qui couloient si abondamment de ses yeux , qu'elles sembloient luy seruir de boisson. Mais enfin craignant de mourir de faim , ou d'estre deuoré par quelque beste , il se resolut de quitter le bois , & d'aller en des lieux , où il pust trouuer quelque retraite plus fauorable. Apres quoy comme il ne vouloit pas estre à charge à personne , ayant amassé des pieces de bois dans la forest , il en fit vn fagot , qu'il mit sur ses épaules , à dessein de le vendre , & d'employer l'argent à acheter du pain ; mais comme il descendoit de la montagne , tout extenué par la faim , & par les autres incommoditez qu'il auoit souffertes , il se trouua si foible , que ne pouuant presque porter son fagot , il eut mesme de la peine à continuer son chemin : de façon que redoublant les sanglots , & ses larmes , il se plaignit de son extrême misere en cette sorte. [Mon Dieu , que feray-je ? hélas , Seigneur , que deuiendray-je ? assistez-moy , & ne me delaissez pas.] A peine eut-il acheué ces parolles , que Dieu ayant compassion de luy , témoigna qu'il auoit exaucé sa priere : Car il luy fit d'abord ouyr vne celeste voix , qui luy dist sensiblement , & d'une maniere intelligible , ces parolles ; [Pauvre enfant , ne te fâche point , Dieu aura soin de toy.

Il connut (sentant l'impression que cette voix fit dans son interieur) que le Sauueur en estoit l'Authcur : car nous pouuons dire , qu'elle luy seruit de nourriture ; suiuant ce que **I E S U S - C H R I S T** nous enseigne ; Que l'homme ne vit pas du pain seulement , mais encore de la parole qui sort de la bouche de Dieu : & cette diuine promesse appaisant à l'heure mesme toutes les peines de nostre affligé Antoine , changea la tristesse dont il estoit saisi , en de sensibles consolations , & luy donna vne forte & amoureuse confiance en la Prouidence diuine.

Le Roy Prophete a juste raison de dire en la personne des seruiteurs de Dieu ; Seigneur , nous nous sommes réjouis aux iours que vous nous avez humiliés ; & aux années que

nous auons souffert de grands maux; puis qu'il n'est rien de plus vtile aux justes, que les afflictions, & que Dieu ne leur donne jamais de plus grandes graces que lors qu'ils semblent estre le plus desolez. En effet, le delaisnement & les miseres d'Yvan, ses larmes, & ses plaintes luy firent meriter cette faueur singuliere; que d'ouïr vne voix du Ciel, qui l'asseurant de la protection diuine, le consola, & l'encouragea à souffrir.

Mais cette affliction luy apporta encore d'autres auantages. Car comme il auoit assez demeuré parmy les Religieux pour y apprendre l'esprit d'oraison, de recueillement, & de mortification: il estoit necessaire, qu'il reprit l'exercice des fonctions Ecclesiastiques; puisqu'il y estoit appellé, & qu'il estudiait avec plus de loisir, & de liberté qu'il n'auoit pas dans le Monastere des Peres Minimes: d'où il auoit esté congedié.

CHAPITRE VI.

Exercices d'Antoine Yvan dans la ville de Pertuis.

IL trouua tous ces auantages dans la ville de Pertuis, où il s'arresta au sortir du bois; & l'on peut dire, que cet endroit de la Prouince a esté fauorisé de la demeure des seruiteurs de Dieu: puis que d'un costé de cette ville on montre les lieux affreux où le grand saint Eucher, depuis Euesque de Lyon, fuyant la persecution des Empereurs Romains, fit son sejour, avec sainte Gale, sa femme, sainte Tulle, & sainte Conforce ses filles; de l'autre on fait voir l'ancien Chasteau, où le grand saint Elzear a passé presque toute sa vie, avec sainte Delphine sa chaste épouse. Mais puis que ie fais mention de ce Chasteau, je prens la liberté de faire cette digression, que j'estime deuoir estre agreable. On y montre la chambre, qui est maintenant changée en vne deuote Chappelle, où ces deux grands Saints couchans

dans vn mesme liét , ont gardé vne virginité Angelique.

Yvan arriué à Pertuis , gagne sa vie durant quelques jours, en faisant des images , qu'il vendoit à des écholiers ; & en aydant au Clerc de la Paroisse à sonner les cloches , & à faire les autres fonctions. Mais il ne tarda pas d'éprouuer ce qu'on luy auoit dit dans le bois , que Dieu auroit soin de luy ; parce qu'il eut bien-tost vn honneste employ , dans le soin qu'on luy donna d'instruire de jeunes Gentils-hommes. L'on ne luy eut pas plustost destiné vne chambre , qu'il y mit des marques de sa pieté ; y peignant contre les murs , proche de son liét vne teste de mort , avec trois os au dessous , & vne grande image du Crucifix. Nous pouuons dire qu'il representa au dehors les sentimens qu'il auoit dans son ame ; sa vie n'ayant esté qu'une preparation à la mort , & vne meditation continuelle de la Passion , & de la Mort de I E S U S-CHRIST.

Ayant eû le moyen dans cette Ville-là , de frequenter quelques Peintres , il se perfectionna , en ce qu'il sçauoit de la peinture , & aussi-tost il peignit diuers tableaux de deuotion ; & particulièrement deux que l'on conserue encore avec grand respect : c'est à sçauoir vne image de saint Antoine , representant ses tentations d'une façon singuliere ; & vne de sainte Magdelaine penitente. Disons-nous encore que sa main , & son pinceau suiuirent l'affection de son cœur ? car comme il auoit vne deuotion particuliere enuers saint Antoine dont il portoit le nom , & de qui il desiroit vn iour imiter la solitude , & les austeritez ; & enuers sainte Magdeleine , dont il commençoit déjà de suiure la penitence amoureuse.

Il s'acquittoit avec vne fidelité singuliere de ses exercices , qui estoient principalement l'instruction de la jeunesse , son estude & sa deuotion : car pour le premier , il esleua si bien ses disciples à la pieté , que plusieurs d'entr'eux portez par ses instructions , & son bon exemple , renoncerent au monde pour embrasser la vie religieuse. Quant au second il s'occupoit à l'estude avec tant d'application , & de ferueur , que ses autres emplois ne luy permettant pas d'y vacquer

pendant le iour, il y passoit bien souuent les nuits entieres. Aussi ne quittoit-il ses habits, que tres-rarement, quand il se couchoit; laissant pour l'ordinaire sa lampe allumée pendant la nuit, au costé de son liét, pour s'empescher de dormir, & pour pouuoir estudier, dès qu'il seroit éveillé.

Il ne s'endormoit point aussi qu'il n'eust quelque Liure entre les mains, suiuant le conseil que saint Ierosme donne à toutes les personnes de pieté, en sa lettre à Demetriade. [Ne vous endormez point, que vous ne lisiez la sainte Escriture; en sorte que quand le sommeil vous surmontera, ce sacré Liure serue d'appuy à vostre teste.]

Pour ses deuotions; outre la frequentation des Sacremens, il recitoit chaque iour le petit Office de la sainte Vierge; il faisoit plusieurs autres exercices de pieté, & prieres particulieres; il prenoit souuent la discipline; il jeusnoit tous les Mercredis, Vendredis, & Samedis; & continuoit exactement la pratique de l'Oraison Mentale, qu'il auoit commencée dans le Conuent des Peres Minimes de Pourrieres. Voylà les pieuses occupations de ce vertueux écolier, qui pouuoit déjà passer pour maistre dans la vie deuote: aussi l'enseignoit-il à plusieurs par ses parolles, & par ses actions; retirant du vice ses condisciples, & les portant avec vn grand zele aux pratiques des vertus Chrestiennes; de maniere qu'il s'estoit acquis vne si haute estime parmy ses compagnons, que sa seule presence estoit capable de les retenir dans leur deuoir.

Je ne dois pas obmettre icy vne rencontre qu'il eut dans la mesme ville de Pertuis, qui bien que legere, peut estre considerée comme vn effet de la Prouidence diuine; parce qu'il en receut du profit. Comme il desiroit depuis long-temps d'apprendre à écrire en caractere Italien, esperant par ce moyen pouuoir plus facilement subsister, & continuer ses estudes; Dieu luy en fournit le moyen par cette voye inopinée. Sortant de sa chambre pour quelque action de pieté, il trouua par la ruë, des exemplaires de ce mesme caractere, faits à la main, par vn Maistre excellent: quoy qu'ils fussent tous barbouillez, il les ramassa neantmoins avec plus

de joye, que s'il eust trouué de l'argent ; & s'estant d'abord appliqué à les copier, & à les imiter, il y reüssit si heureusement, qu'en peu de temps ses copies furent plus prisées, que les originaux. Il en a laissé des marques dans l'Eglise Paroissiale de la mesme Ville ; y ayant encore deux grandes fucilles de parchemin que l'on conserue comme chose precieuse ; parce qu'elles ont esté écrites de sa main.

Il n'est rien dans la vie des seruiteurs de Dieu, qui ne soit grand, & remarquable ; parce que tout ce qu'ils font, & tout ce qui leur arriue, contribué à leur sanctification. Mais le desir, & l'inclination de nostre Yvan, de deuenir vn sçauant, & bon Ecclesiastique, croissant de plus en plus, il s'estudia à se rendre tres-capable des fonctions de cet estat, par la pratique ; & comme il auoit fait l'Office d'enfant de Chœur dans la Paroisse de Rians, & dans le Conuent des Peres Minimes de Pourrieres, il exerça celuy de Sousdiacre dans l'Eglise de Pertuis, avec l'humilité, & la modestie d'un Ange, & vne grande édification de tout le monde.

CHAPITRE VII.

La sainte Vierge le deliure du danger de se noyer.

L'On n'enseignoit que le commencement de la Grammaire dans Pertuis ; ce qui obligea nostre feruent écolier d'en sortir, & d'aller aux Villes où l'on enseignoit les sciences plus hautes : si bien qu'il se porta à Arles ; où neantmoins il ne fit pas long séjour ; quoy qu'il y demeurast assez de temps, pour y éprouuer la protection qu'il auoit demandée à la Mere de DIEU, & pour y recevoir des effets sensibles, du soin maternel de cette Reine des Cieux : ayant esté trois fois deliuré par son assistance, du danger d'estre submergé.

La premiere fois passant le long du Rhosne, qui mouille les murailles, & le fertile terroir de cette ancienne, & ce-

lebre Ville, il tombe precipitément dans le fleuve, en vn endroit, où il est tres-profond. La frayeur dont il est saisi à l'instant, & l'embarras de ses habits, qui ne luy laissent pas la liberté de nager, le mettent dans vn peril évident d'estre noyé: mais le danger deuiant encore plus grand, lors que comme il s'éleue sur l'eau, pour tascher à gagner le bord, vn bâtelier poussant par mégarde son bateau sur luy, le fait retomber au fond de la riuiera; par cette nouuelle cheute, estant comme réduit, dans l'impuissance de se sauuer.

Peut-estre que l'ennemy du genre humain preuoyant la victoire, que nostre Yvan deuoit r'emporter sur luy; & le grand nombre d'ames, qu'il deuoit arracher de ses mains; auoit fait naistre cette occasion pour le perdre. Mais que peut ce foible serpent, contre Celle qui luy a brisé la teste; & contre ceux, qu'elle prend sous sa puissante protection? Yvan sort des eaux sans aucune assistance des creatures, retiré par les mains inuisibles de cette auguste Reine, qu'il auoit choisie pour sa bonne Mere: il sort, dis-je, sans auoir receu aucune incommodité, ny de sa cheute, ny de la périlleuse rencontre du bateau.

Vne autre fois, comme il vouloit s'embarquer sur la mesme riuiera, pour remonter d'Arles à Auignon, il auoit déjà leué le pied pour entrer dans le bateau lors que le bâtelier le retira tout d'un coup, & s'esloigna du bord, avec tant de promptitude; qu'Yvan n'ayant pû entrer, ny se retenir, cheut en mesme temps dans le fleuve. Tous ceux qui estoient dans le bateau se prirent à crier, craignant qu'il ne se perdît, & qu'il ne fût emporté par les eaux de cette riuiera, l'une des plus rapides de l'Europe: en effet ils se mettoient en estat de le secourir, quand ils l'apperceurent venir sur l'eau, sain, & avec vn visage riant, sans qu'il eust esté secouru d'aucun, que de la sainte Vierge, sa bonne & fidelle Protectrice: ainsi que luy-mesme a depuis déclaré à quelques-uns de ses plus familiers.

La troisième fois la Mere de D I E U luy donna des mar-

ques plus sensibles de son assistance, & la merueille qu'elle opera en faueur de son seruiteur, fut plus éclatante, que les deux premiers. Yvan se baignoit dans le Rhosne, avec de ses condisciples; lors que s'estant éloigné d'eux en suiuant le courant de l'eau, il se sentit emporté dans vn abyfme par l'impétuosité des ondes, sans qu'il pust reculer, ny s'arrêter. Il crie au secours; mais ses compagnons sont trop éloignez pour le secourir: cependant il se sent emporté par les eaux, sans qu'il luy reste aucune esperance de pouuoir éuiter la mort, par les voyes ordinaires. Il a recòurs à la Sainte Vierge; & versant quelques larmes, il la prie avec sa confiance ordinaire, de le deliurer de ce peril.

O bonté toujurs aymable, & toujurs bien faisante de cette Mere de misericorde! Elle le deliura de ce danger éuident, mais d'une maniere surprenante: car en sauuant le corps de son seruiteur, qui est presque déjà submergé; elle veut encore remplir son ame de joye, & de consolation. Et ainsi pour accroistre l'amour, & le respect de son fidelle Yvan, elle luy apparoit enuironnée de gloire, & portée sur vn Arc-enciel, qui luy seruoit d'un throsne éclattant: si bien que prenant nostre jeune Antoine par le bras, elle le porte sur le riuage, le laissant plein de respect, de reconnoissance, & tout ensemble de confusion, d'une si grande & si extraordinaire faueur.

Après quoy qui refusera de seruir cette incomparable Reine des Cieux, puis qu'elle a tant de soin de ses seruiteurs? mais ce soin qu'elle a de la santé, & de la vie corporelle de ses enfans, n'est qu'une image de la bonté, qu'elle exerce en leur endroit, leur procurant des graces pour la sainteté, & le salut eternel de leur ame: ce qui a donné occasion à vn bon Auteur, de dire en faueur des deuots de la Mere de DIEU. Depuis que le Sauueur est né jamais seruiteur de Marie à l'enfer ne fut condamné. Mais il faut que les seruiteurs de cette grande Princesse, soient reconnoissans des faueurs qu'elle leur impetre par ses intercessions; suiuant l'exemple que nous en auons en la personne de nostre Yvan, qui ayant
receu

receu des graces continuelles de cette diuine Bienfaitrice, n'a employé sa vie qu'à l'aymer, & à la seruir, & à la faire honorer par toutes sortes de personnes.

CHAPITRE VIII.

Dieu l'assiste dans sa misere, & il montre son amour enuers la Passion de IESVS-CHRIST.

NOstre pieux Yvan n'ayant pû trouuer de quoy subsister dans la ville d'Arles, fut contraint d'en partir, & d'aller à Avignon; où il s'adressa au venerable Pere Cesar de Bus, Fondateur de la Congregation des Peres de la Doctrine Chrestienne; qui connoissant la pieté, & les graces, dont son ame estoit pourueüe, le receut au nombre de ses enfans, qui viuoient pour lors sans obligation de vœux. Mais il ne s'y arresta pas fort long-temps; peut-estre qu'il n'auoit pas assez de loisir dans cette Societé pour estudier; & qu'estant trouué propre pour le seruice domestique, on ne luy permettoit pas d'aller au College; de maniere que le desir d'acquérir la science necessaire à vn Ecclesiastique, l'obligea d'en sortir; & nous pouuons dire que ce fut vn traitt de la Prouidence diuine, qui l'ayant destiné à d'autres emplois, ne voulut pas qu'il s'arrestast dans cette Congregation.

Après auoir obtenu son congé du venerable Pere de Bus, dont il reueroit grandement la haute vertu; il vint à Carpentras, où il se logea dans vne honneste maison, pour en instruire la jeunesse, n'y ayant autre salaire, que sa nourriture. Cela donna de l'exercice à son humilité, & à sa patience; parce qu'estant mal vestu, & dépourueu de linge, sans auoir de quoy se fournir, il souffrit beaucoup de mépris, de confusion, & mille autres incommoditez; à l'exemple du grand saint Ignace pendant ses estudes. C'estoient les appanages de nostre pieux Antoine; DIEU l'ayant toujours con-

D

duit par le chemin de la Croix; de telle sorte neantmoins que la Prouidence ne l'a jamais abandonné dans son extrême besoin: ainsi que nous en auons des preuues dans Carpentras, & par tout où il a demeuré.

Comme ses habits estoient si rompus, qu'il n'osoit presque plus sortir de sa chambre, ny aller au College; le Seigneur fit naistre cette occasion, par laquelle il en fut pourueu. Vn Cardinal passant par Carpentras, les Regens du College donnerent des Vers à plusieurs écoliers, pour les reciter deuant son Eminence; & le disciple d'Yvan ayant esté choisi pour ce sujet, pendant qu'il estudioit ses Vers, Yvan les dépeignit sur du latin, avec l'image du mesme disciple; mais d'une façon tres-belle, & tres-agreable; si bien que, comme l'on recitoit à son Eminence les Vers qu'on luy auoit preparez; le disciple d'Yvan prononça les siens: apres quoy il presenta au Cardinal le latin, sur lequel les Vers, & son portraict estoient dépeints. Le Cardinal les receut, avec demonstration de joye; & admirant la veritable ressemblance qui estoit entre la coppie & l'original. [Ah, s'écria-t'il, Voicy deux enfans bien semblables:] Il fit en suite des caresses particulieres à ce jeune écolier, témoignant pour luy plus d'estime, que pour ses compagnons: ce qui fut cause que le pere de ce garçon s'estima si obligé à Yvan, d'auoir contribué, à ce que dans cette occasion son fils auoit esté le plus caressé; qu'en reconnoissance il le fit habiller, le pourueut de linge, & des autres choses necessaires.

Mais si Dieu exerça sa bonté à Yvan de la façon que ie viens de raconter; nous pouons dire qu'Yvan donna vne illustre marque de son amour, enuers Dieu dans cette rencontre. Les Regens du College connoissant sa pieté, le choisissent dans vne representation publique des Mysteres de nostre Redemption, pour représenter la Personne de I E S V S- C H R I S T portant sa C roix; il la represente tout de bon; non pas comme les images, & les statuës; mais comme les Apostres & les Martyrs: car non content du fardeau dont il est chargé, vne couronne d'épines luy auant esté mise sur la teste, il l'enfonça si auant, que faisant entrer les pointes

dans la chair, son visage en devint tout couuert de sang. Les spectateurs touchez de compassion voulurent la luy oster : mais il leur resista courageusement, & en souffrit la douleur avec vne patience merueilleuse ; si toutesfois il est permis de donner le nom de douleur à vn sentiment, produit par vne action ; de laquelle parlant luy-mesme, il a dit depuis, qu'elle auoit remply son ame d'une consolation, & suauité extraordinaire : & qu'elle l'auoit confirmé dans la resolution, de se mortifier toute sa vie, à l'imitation de I E S V S souffrant.

Quelque temps apres sa vertu, qui deuoit le faire estimer, l'ayant rendu l'objet de l'enuie, & de la persecution de ses Regens, qui estoient pour lors personnes laïques, il fut contraint de sortir de Carpentras, & de chercher ailleurs de quoy subsister : mais quoy que cette mortification luy fust tres-sensible, parce qu'elle interrompoit ses estudes ; il l'accepta neantmoins avec vne parfaite resignation, faisant de nécessité vertu ; ce qui est vn des plus rares secrets de la vie spirituelle.

CHAPITRE IX.

Illustre marque de la chasteté d'Antoine Yvan.

Estant allé de Carpentras à Lyon, il éprouua dans cette ville ce que nous auons dit ; que la rencontre des exemplaires en caractère Italien, auoit esté vne faueur de la Providence diuine ; parce que ce fut par le moyen de cette sorte d'écriture, qu'il subsista durant quelque temps, l'enseignant à des écoliers, qui venoient écrire dans sa chambre. Toutesfois il ne pût s'y arrester long-temps ; car outre que son occupation ne luy donnoit pas assez de loisir pour estudier, l'amour de la pureté, qu'il cherissoit plus que les sciences, le fit retourner en Prouence.

Il s'estoit logé sans y penser, dans vne maison qui n'estoit

pas honneste; & dont les personnes ne viuoient pas dans la crainte de Dieu, ny mesme dans la bonne odeur des gens de bien. Il n'en auoit rien apperceu, lors qu'il y entra, ny quelque temps apres; parce que s'appliquant sans relâche à des choses serieuses, & bien contraires au vice, il ne prenoit pas garde à ce qu'on faisoit dans cette maison: mais enfin il fut aduertie de ce qui s'y passoit; il reconnut luy-mesme par quelque reflexion qu'il fit; qu'en diuerses rencontres, on y auoit dressé des pieges à sa pureté; & qu'il y estoit en danger de la perdre, ou de la salir. Si bien que l'on ne scauroit exprimer, la confusion qu'il eust, de s'y estre arresté; aussi resolu d'en sortir à l'heure mesme; & craignant de courir le mesme danger, dans vne semblable maison; parce qu'il estoit contraint de se loger parmy des personnes qu'il ne connoissoit pas, il determina de sortir de Lyon, & de s'en retourner en son pais.

La necessité est vne forte & pressante tentation, qui met les plus innocentes ames dans le danger; ce qui obligeoit le Prophete, à faire cette priere à DIEU: [Seigneur, deliurez-moy de mes necessitez.] Elle ne peut toutesfois rien sur Yvan, qui faisoit plus d'estat de son ame, que de son corps, & des richesses de la terre, que de tous les biens du monde. L'amour de l'estude ne le peut aussi retenir dans Lyon; car il ayma mieux abandonner le desir de deuenir scauant, que de hazarder sa virginité; & quoy que sa plus forte passion fust de se rendre capable d'estre Prestre; il auroit plustost renoncé à cette dignité, & à toute autre chose; que de s'exposer au hazard de perdre cette vertu, qu'il auoit consacrée à Dieu, & qu'il regardoit comme le caractère des enfans de la Sainte Vierge.

Et ainfin il suiuit d'abord sa resolution, qui le portoit à s'enfuir, n'ignorant pas, qu'on ne peut conseruer la pureté, ny euitier le vice contraire; que par la fuite de l'occasion. Il descendit donc à Avignon par le Rhosne; où s'estant arresté quelques iours, il en partit pour aller à d'autres Villes, selon que la necessité de ses affaires, & le conseil de son Confesseur l'y portoient. Mais en tous ces voyages, il endura

mille incommoditez; & des souffrances continuelles. Aussi auons-nous souuent appris de sa bouche, que le desir de seruir DIEV dans son Eglise, & de trauailler au salut des ames, luy auoit fait souffrir tous les maux, & toutes les miseres, qu'un pauvre écolier peut endurer; adjoustant qu'il auoit touiours esté assisté, des soins de la diuine Prouidence, par les intercessions de la Sainte Vierge sa Protectrice.

CHAPITRE X.

Il est fait Prestre.

S'Il m'estoit permis de faire reflexion, sur ce que nostre Yvan est contraint de changer souuent de demeure, & d'estudier en diuers Colleges; je dirois que l'Esprit du Seigneur en dispose de la sorte, pour le proposer, mesme dans la jeunesse, à diuerses personnes, comme vn miroir de modestie, de diligence, de pieté, & d'autres vertus Chrestiennes; & pour luy faire commencer la pratique du dépouillement des creatures, dont il a donné de si illustres marques le reste de sa vie. Mais la raison principale que ie pourrois apporter, est que Dieu a voulu qu'il ait souffert mille trauaux pendant ses estudes, pour rendre son enfance semblable à celle de IESVS-CHRIST, en la personne duquel David a dit; J'ay esté dans les trauaux dès ma jeunesse. Mais enfin DIEV recompense les peines d'Antoine Yvan, le faisant admettre à la dignité du Sacerdoce, ainsi qu'il l'auoit désiré avec ardeur, dès les premieres années de sa vie. Ce qui arriua l'an mil six cens six, & le vingt du mois de May, la trentième année de son âge; qu'ayant eû les moindres Ordres, le Souüdiaconat, & le Diaconat de diuers Euesques, il fut admis à la Prestrie par le Seigneur Euesque de Seves.

Ie ne parle pas des dispositions qu'il apporta à la reception de cet auguste Sacrement; puis que sa vie n'en auoit esté qu'une preparation continuelle; & qu'il n'auoit estudié, prié, fre-

quenté les Sacremens, jeusné, & pratiqué diuerſes ſortes de mortifications; que pour obtenir de DIEV la grace, d'eſtre vn bon Preſtre. l'obmets auſſi avec quelle pureté, humilité, amour & tendreſſe il receut ce diuin Sacrement: mais ie ne dois pas paſſer ſous ſilence de quelle maniere il ſe diſpoſa à celebrer ſa premiere Meſſe.

Car au lieu d'y conuier des perſonnes du monde, ſelon la couſtume de ſon temps; il tâche d'y conuier les eſprits bien-heureux; ſe preparant à cét auguſte & redoutable Sacrifice, par vne Confeſſion generale de touté ſa vie, par de tres-rudes penitences, & principalement par vne retraitte de quelques jours; pendant leſquels il ſ'addonna à l'oraïſon, avec tant de ferueur; qu'il y employa meſme la plus grande partie de la nuit. Dés qu'il fut Preſtre, il retourne à Rians lieu de ſa naiſſance, par ce pieux motif d'aſſiſter, & de conſoler ſa bonne mere, femme d'vne grande pieté; qui par deſſus les infinitez de ſon âge, eſtoit priuée des commoditez que l'on appelle de fortune. Ce charitable fils nous a ſouuent declaré, qu'il auoit ſouffert vne tres-ſenſible affliction pendant ſes eſtudes, depuis qu'il auoit eû l'âge de diſcretion; ſentant ſa mere dans les ſouffrances, ſans auoir de quoy la ſoulager: mais comme il l'auoit quittée, lors qu'il ne pouuoit que l'incommoder; il ſe rendit auprés d'elle, quand il eut le moyen de la ſecourir. Il prit en effet le ſoin des écoles de Rians, afin de fournir à ſa mere les choſes dont elle auoit beſoin, partageant le reſte en deux parts, dont l'vne eſtoit pour les pauures, & la derniere pour ſes preſentes neceſſitez.

Il commença dans cette fonction de Regent à donner des marques du zele de la gloire de DIEV, & du ſalut des ames, dont il eſtoit embrasé; car ſon principal ſoin eſtoit d'enſeigner la ſcience du ſalut eternal à ſes écoliers; de leur faire eſtudier le Catechiſme qu'il leur expliquoit; & de leur enſeigner les prieres, qu'il leur faiſoit dire le ſoir, & le matin; il les eſleuoit encore à la pratique des autres vertus Chreſtiennes, qu'il tâchoit d'imprimer dans les ames; par ces petites inſtructions, & par ſes exemples. Il commen-

ça aussi à prêcher la parole de DIEU, dans la Paroisse; & à faire des exhortations tres-feruentes au peuple; mais ce n'estoient encore que de foibles dispositions, aux illustres desseins qu'il conceuoit déjà; & aux éminentes vertus qu'il a depuis pratiquées, pour se rendre digne imitateur de IESVS-CHRIST.



SECONDE



SECONDE PARTIE
 DE
 L'IMITATEUR
 DE
 IESVS-CHRIST.
 O V
 DE LA VIE
 DV VENERABLE PERE
 ANTOINE YVAN,
 PRESTRE, FONDATEUR,
 & Instituteur de l'Ordre des Religieuses
 de Nostre-Dame de Misericorde.

SOMMAIRE.

Nostre fidelle Imitateur a paru dans la premiere Partie
 E

de sa vie comme un pauvre écolier dans la poussière des Colleges, & comme un fervent Novice, employant ses forces, pour acquérir la vertu; mais dans la seconde, il paroist comme une personne publique, en qualité d'un excellent Prestre, & d'un vigilant Pasteur; qui s'employe au service de l'Eglise, dans les fonctions du Sacerdoce; & à la conduite des ames, dans la voye de la perfection. De maniere que s'il a suivi le Fils de DIEU dans les miseres de sa ieunesse, & dans les souffrances de sa vie cachée; il imite encore fidelement dans sa vie publique, les soins, les travaux, & le zele de cet adorable Sauveur. Il commence à trente ans de s'appliquer au salut des ames, suivant l'exemple de IESUS-CHRIST. Et tout ainsi que ce divin Maistre mesle sa vie publique, d'action, & de contemplation; tantost preschant, & catechisant dans les Synagogues, dans les ruës, & parmy les champs; tantost se retirant dans les bois, & les montagnes pour faire oraison: Nostre excellent Ecclesiastique unit aussi l'un, avec l'autre. Car il agit comme Curé, & il s'addonne à la vie contemplative comme Hermite; travaillant dans diverses Paroisses en qualité de Pasteur; & demeurant dans un Hermitage en qualité d'Anachorete.



CHAPITRE I.

Il accepte la charge de Curé.

NOSTRE feruent Ecclesiastique auoit trop de capacité ; & les rayons que sa vertu commençoit à répandre par ses actions, estoient trop éclatans, pour demeurer long-temps cachez dans les classes ; aussi ne tardat-il pas d'auoir des emplois dans l'Eglise, conformes à son zele , & proportionnez aux talens , dont le Ciel l'auoit enrichy : si bien qu'il fut appelé par les Superieurs à la charge de Curé. D'abord il eut de la peine à y consentir ; son humilité luy persuadant qu'il en estoit indigne , & la crainte qu'il eut toute sa vie de se damner, en ne s'acquittant pas fidèlement, de ce à quoy il se seroit obligé , luy faisant apprehender la Cure des ames, comme vn tres-dangereux écüeil. Toutesfois il accepta cette charge ; l'obeïssance aux Superieurs, & la charité du prochain preualurent sur son humilité , & sur sa crainte ; & il donna son consentement à cét employ-là, avec d'autant plus de resignation ; qu'il y trouua de quoy trauailler , & de quoy souffrir pour la gloire de DIEU , & pour le salut des ames : ce qu'il auoit touïours désiré , comme le principal fruit de ses estudes.

Mais apres s'estre vaincu soy-mesme, il fut contraint de vaincre l'opposition de quelques personnes ; qui vouloient luy faire preferer vn autre Prestre, en la Cure du lieu de la Verdiere , qui estoit celle qu'on luy presentoit. Cét obstacle faillit à le rebuter , & à luy faire reprendre sa resolution de ne se pas mesler de la charge des ames ; il persista neantmoins dans le consentement qu'il auoit donué ; parce que

E ij

DIEU changea le cœur, de ceux qui résistoient à son eslection; en telle sorte qu'eux-mêmes le demandèrent, & le presserent de vouloir estre leur Pasteur, apres qu'ils eurent assisté à vne grande Messe, qu'il celebra dans leur Paroisse: disant, que sa modestie, son respect, & sa deuotion les auoit touchés, & leur auoit fait changer de sentiment. Mais ne pouuons-nous pas dire que ce changement, fut vn effet des prieres de nostre bon Ecclesiastique; qui auoit demandé à DIEU dans ce saint Sacrifice, d'estre agréé de tous les Paroissiens qu'il deuoit conduire, pour trauailler avec plus de fruit à leur salut. Il fut donc receu avec grande joye, & avec la bien-veillance de tous: il commençoit mesme déjà de s'acquitter des fonctions de Curé, avec vne édification singuliere de tous les paroissiens, lors que la Prouidence diuine l'appellant ailleurs, il fut obligé de quitter la Cure de ce lieu-là, pour accepter celle de Cotignac, lieu du Comte de Carces; où est l'Eglise de Nostre-Dame de grace, vne des plus celebres, & plus fréquentées de Prouence: à cause des merueilles, que la Sainte Vierge y opere, en faueur des personnes qui y accourent de toutes parts.

Ce fut dans ce lieu, que nostre fidelle Prestre entreprit d'vne bonne façon, de faire la charge de Curé; & qu'il s'en acquitta avec la sainteté, le zele, & la vigilance que l'on peut exiger d'un bon, & veritable Pasteur. Car premiere-ment il resolut, de ne chercher dans cet employ aucun interest particulier, ny honneur, ny profit, ny satisfaction propre; mais de renoncer à sa chair, & au sang; & de n'agir que dans la pureté de l'Esprit de DIEU, suiuant les maximes de l'Euangile, & l'exemple de IESVS-CHRIST: il resolut dis-je, de ne chercher simplement & constamment, que la gloire du bon DIEU; & le salut des paroissiens; & en l'un, & en l'autre, l'accomplissement de la volonté de son Maistre, qui a toujours esté la regle de ses desseins.

Et parce que l'Apostre saint Paul exhorte tous ceux qui ont la conduite des ames, d'employer leurs premiers soins enuers eux-mêmes; nostre bon Pere établit cette loy fondamentale, & irreuocable; de ne laisser aucune de ses prati-

ques de deuotion , ny de mortification , qui seroient compatibles avec sa charge ; & de ne relâcher jamais du soin exact de son interieur ; quelques soins extérieurs , & quelques occupations qu'il deust auoir.

Aussi sçauoit-il bien les difficultez qu'il y a , de se sauuer dans la conduite des ames ; ce redoutable Ministère ; duquel le grand saint Augustin parle en cette sorte ; *Nous voulons éleuer les creatures , & elles nous abaissent ; nous travaillons pour les détacher de la terre , & elles nous y attachent ; nous les attirons à la vertu , souvent elles nous en retirent ; nous tâchons de les rendre saintes , combien de fois nous rendent-elles pecheurs ? nous voulons les sauuer , & combien nous font-elles courir de danger de nous damner ? si nous ne veillons soigneusement sur nous , en mesme temps que la iustice , & la charité nous obligent à veiller sur les autres.* Vn des plus efficaces moyens , qu'un Curé puisse auoir pour s'asseurer dans ces dangers ; est de suivre un bon Directeur , par l'assistance duquel il puisse decourir les ruses de l'ennemy ; lors que d'un Ange de tenebres , il se tranfigure en Ange de lumiere ; & c'est la precaution de nostre bon Pere ; qui acceptant la charge de Curé , & de Directeur des autres ames , choisit aussi-tost un tres-excellent Directeur pour la sienne.

CHAPITRE II.

Les vertus du Directeur qu'il choisit.

IL y auoit dans la Chapelle de Nostre-Dame de Grace , dont nous auons déjà parlé ; un excellent Ecclesiastique appelé le Pere Paul , homme d'oraison , de penitence , & d'un zele Apostolique , qui menoit une vie tout a fait exemplaire. Le Pere Yvan poussé par le mouuement du Saint Esprit , le choisit pour son Directeur ; en sorte qu'il le visitoit tres-souuent , luy rendoit conte de l'estat de son ame , &

de celuy de sa Paroisse ; & n'entreprendoit rien de considerable pour soy , ny pour les autres , qu'apres l'auoir consulté.

Cét excellent Directeur s'estoit retiré dans la Chapelle de Nostre-Dame de Grace , comme dans vn lieu tres-propre au recueillement , & à l'oraison : en effet il employoit à ce diuin exercice , plusieurs heures du iour , & de la nuit ; ce qui l'auoit rendu si éclairé , & si sublime dans les communications avec DIEU ; que le Pere Yvan en parloit , comme du plus spirituel , & du plus sçauant Theologien Mystique , qu'il eust connu de son temps. On ne voyoit , aussi dans sa chambre , que des marques de sa paunreté , & des témoignages de sa mortification ; car il auoit vne pleine corbeille de diuers instrumens de penitence , de haïres , de cilices , chaisnes , disciplines de cordes ; & de fer ; dont il se seruoit continuellement : & si la nature luy auoit donné vn corps robuste ; il employoit sa force , à se mortifier sans relasche , par de tres-rudes austeritez. Car il alloit fort legèrement vestu , pendant les plus grands froids de l'Hyuer ; sans s'approcher du feu : pour mieux sentir la rigueur de la saison ; & l'Esté il faisoit de longs voyages à pied , & s'occupoit en des choses tres-penibles ; pour accroistre en soy les violentes incommoditez de la chaleur. Il jeûnoit presque toute l'année , & gardoit vne abstinence continuelle : en vn mot sa penitence , a seruy de modele à celle du Pere Yvan son disciple ; de laquelle on peut dire , qu'elle a passé jusques dans l'excès , si nous regardons les foiblesses de la nature.

La charité de cet excellent Directeur , enuers le prochain , surpasseroit la croyance ; si elle n'estoit asseurée , par les témoignages des personnes dignes de foy qui l'ont connu. l'en rapporteray quelques exemples que j'ay appris de la bouche du Pere Yvan. Ayant vn iour rencontré vn pauvre Marchand , qui estoit chargé d'un fardeau de Marchandise , si pesant qu'il ne pouuoit presque plus marcher de foiblesse , & de lassitude ; il le pria , & le pressa de le luy laisser porter ; le Marchand croyoit au commencement que ce bon Prestre

se mocquoit de luy, ne pouuant se persuader, qu'il fust si charitable: mais connoissant enfin, sa bonne volonté, il se déchargea de son fardeau, & le luy mit sur ses épaules; si bien que nostre feruent Ecclesiastique, le porta durant quatre lieux de Prouence, sans qu'il le voulut quitter; jusques à ce qu'il fut arriué au lieu, où le Marchand vouloit se reposer. Illustre marque d'une charité parfaite: qui ne consiste pas en parole, mais en effet, & qui suit à la lettre ce conseil de saint Paul, Portez les fardeaux les vns des autres.

Sa charité parut encore beaucoup plus grande, en cette autre rencontre. Vn pauvre homme conduisoit sur le soir des pourceaux dans vne maison des champs, où il auoit coutume de les enfermer pendant la nuit; lors que suruenant vne furieuse pluye, vn torrent par lequel il falloit necessairement qu'il passast, sans pont, ny barque, grossit tout à coup, en telle sorte qu'il fut contraint d'arrester sur le bord, sans pouuoir aduancer, ny reculer. Il se trouua dans vne tres-grande peine, craignant que l'eau ne submergeast son bestial, s'il passoit dans le torrent; ou qu'il ne s'égarast, & ne se perdist durant la nuit, s'il s'arrestoit dauantage; ne pouuant déjà plus le retenir. Cependant il en estoit chargé, à peine de payer ceux qui se perdroyent mesme par corps; & la pluye continuant toujours, d'une terrible façon, accompagnée d'éclairs, & de tonnerres épouuantes: si bien que ce pauvre homme estoit dans vne grande extremité, qui le portoit à prier le bon DIEU de luy enuoyer quelque assistance; lors que par vne rencontre favorable, le Pere Paul vint à son secours.

Ce bon Prestre reuenoit pour lors du Synode de Freius; & quoy que la pluye, l'eust surpris dans vn bourg par lequel il passa, & que mesme quelques personnes de sa connoissance, l'eussent prié de s'y arrester, il auoit neantmoins continué son chemin, pour arriuer bien-tost à Bariols, où il estoit Curé; craignant que sa presence ne fust necessaire à quelqu'un de ses paroissiens. Il semble que l'Esprit de DIEU le pressoit de poursuivre sa route; afin sans doute qu'il se-

courust promptement, ce pauvre homme affligé: en effet, dès qu'il connut la peine extrême où il estoit, il se porta à vne action extraordinaire, & d'une charité accomplie. Car c'eust esté assez, qu'il eust gardé les pourceaux, tandis que le porcher les auroit passéz, l'un apres l'autre, sur les épaules, ou autrement. mais c'estoit trop peu pour sa charité, car voulant rendre le service tout entier; il ne voulut pas mesme permettre, que ce pauvre miserable quittast ses souliers; mais s'estant mis luy-mesme en estat de passer le torrent, il porta sur les épaules tous ces animaux immondes, l'un, apres l'autre, quoy qu'ils fussent en grand nombre; & apres, il porta aussi le gardien; ne luy demandant pour toute reconnoissance, si ce n'est; qu'il ne laissast faire aucun degast par ces bestes au bien d'autrui, qu'il se gardast de jurer, & qu'il fust bien deuot à prier Dieu, soir & matin, & à se confesser aux Festes solempnelles de l'Eglise.

Mais l'ardeur que ce charitable Prestre auoit à bien faire, ne s'estend pas seulement aux hommes, & aux bestes; mais encore aux arbres, & aux choses insensibles. Et ainsi, dès qu'il eut fait l'action que ie viens de raconter; les éclairs, & les tonnerres redoublant avec vn bruit effroyable; la foudre tomba deuant ses yeux, & mit le feu à vn chesne, qui n'estoit qu'à trois pas de luy. Il semble que le demon ne pouuant retenir la rage qu'il auoit contre cet homme Apostolique, à cause de sa charité, voulut l'intimider par la cheute épouuantable de la foudre, qu'il auoit bien voulu faire tomber sur luy; si l'Ange du Seigneur qui est toujours auprès de ceux qui le craignent, ne l'eust destourné. Disons plustost, que DIEU ayant agréé le secours charitable, que son seruiteur auoit donné pour son amour, à ce païsant, & à son bestial, luy fournit vne nouvelle occasion, d'exercer encore sa charité. Aussi deuient-il plus fort, & plus courageux; & voyant que le feu s'allume, & qu'il y a danger, que le vent ne l'emporte aux autres arbres, & à des maisons qui ne sont pas esloignées, il monte sur cet arbre, qui estoit allumé; & sans craindre de se brûler luy-mesme, il esteignit le feu avec les pieds & les mains, avec ses habits, & en toutes les

— les façons dont il se put servir; empeschant le dommage qui en seroit infailliblement arriué. Qu'est-ce que ce seruent Ecclesiastique ne faisoit pas pour le salut des ames, puis qu'il prenoit tant de peine, pour la conseruation des corps, & des biens? & qui doute que comme vn bon Pasteur il n'eust exposé sa vie, pour le salut eternal de ses ouailles; puis qu'il ne l'épargnoit pas, pour assister son prochain dans ses facultez temporelles? Certes nous ne deuons pas douter, qu'apres ces deux illustres témoignages de sa charité; l'vn dans l'eau, qui ne peut amortir les flâmes; & l'autre dans le feu, qui leur ceda; DIEU qui est charité; & la recompense des personnes charitables, ne le remplît de douceur, & de consolation; afin qu'il püst dire avec le Prophete Dauid; Nous auons passé par l'eau, & par le feu; & vous Seigneur, nous avez donné, du rafraichissement. *Transimus, per ignem & aquam, &c.*

CHAPITRE III.


L'amitié du Pere Yvan avec son Directeur.

NOstre bon Pestre, & cet excellent Directeur, n'e se frequenterent pas long-temps, qu'ils se lierent l'vn avec l'autre d'une tres-forte, & tres-intime amitié; par la correspondance de mœurs, de desir, & d'intention qui se trouuoit entr'eux. Mais il faut aduouër que leur amitié, estoit bien contraire à la chair & au sang; puis qu'elle estoit si conforme à la Croix, & au Caluaire. Si l'amitié se decouure par les souhaits, parce qu'aymer, c'est vouloir du bien: & si elle s'entretient par les communications; parce que toutes choses doiuent estre communes entre les amis; les souhaits, & les communications de ce venerable Confesseur, & de ce fidelle penitent, estoient du tout singulieres; toutes celestes, & diuines; parce qu'ils ne s'entretenoient que des choses du Ciel, & des moyens d'accomplir fidel-

lement la volonté du Seigneur, dans leurs emplois; & leurs souhaits prenoient leur source, dans l'estat souffrant, & crucifié, de **I E S V S-C H R I S T**; puis qu'ils ne se souhaitoient mutuellement que des souffrances, & des martyres; à l'exemple de saint Philippe de Neri Fondateur des Peres de l'Oratoire, & du bien-heureux Felix de Cantalicio Religieux Capucin. En effet voicy les salutations que ces pieux amis se donnoient, & les souhaits, qu'ils se faisoient l'un à l'autre. Que tu fusse réduit sur vn fumier, & accablé de toutes sortes de maux; comme Iob; disoit le Pere Paul, au Pere Yvan; Et vous, luy répondoit le Pere Yvan; fussiez-vous brûlé tout vif, sur le gril comme saint Laurent. Je voudrois, disoit l'un, te voir pour **D I E U** la teste, & le corps tout brisé de coups de pierres, comme saint Estienne: Et ie desirerois, repliquoit l'autre; que pour l'amour de **I E S V S-C H R I S T**, vous fussiez brisé, & mis en pieces sur vne rouë, comme sainte Catherine. Fust-tu, pour la querelle de **D I E U**, disoit le Confesseur à son penitent; escorché tout vif, comme saint Barthelemy; ou deuoré par les bestes sauvages, comme saint Ignace Martyr: Je prie **D I E U**, repartoit le disciple, à son Directeur: qu'il vous donne vn iour la grace, d'estre lié, & crucifié comme **I E S V S-C H R I S T** son Fils, pour vous le faire imiter. Ces complimens sont bien contraires à la mode du siecle, & aux complimens des mondains: aussi y auoient-ils renoncé, & s'estoient-ils declarez ennemis, de la vaine complaisance, & de la fausse amitié des personnes du monde; qui causent la perte de leurs amis deuant **D I E U**, quand elles leur tesmoignent vne affection trop flatteuse, trop sensuelle, & trop complaisante. L'amitié de nos vertueux Ecclesiastiques, estoit vne image de l'amour du Pere Eternel, & de celui de **I E S V S-C H R I S T**, parce qu'ils ne s'aymoient qu'en **D I E U** & pour **D I E U**; & n'aspiroient qu'à la conformité avec **I E S V S-C H R I S T**, laquelle consiste principalement dans l'amour des souffrances.

Mais ces excellens Prestres ne se contentoient pas d'vnir leurs souhaits, ils joignoient encore leurs trauaux; particu-

lièrement quand il se presentoit quelque occasion penible, & importante pour la gloire de Dieu, ou pour le bien du prochain. Ainsi, comme on emmenoit de diuers endroits des demoniacles au Pere Paul, sa haute vertu estant connue, & chacun sçachant la grace particuliere qu'il auoit de chasser les demons; quand il arriuoit, que les malins esprits se rendoient opiniastres, à sortir des corps qu'ils possedoient, & qu'en suite ils luy donnoient vne tres-grande peine; pour lors ce sage Directeur connoissant les graces, & la pieté du Pere Yvan son disciple, le prenoit pour son collegue, & le faisoit trauailler dans les exorcismes; si bien que par la malice du demon, il leur estoit arriué beaucoup de choses extraordinaires, dans ces exorcismes; & particulièrement celle-cy que le Pere Yvan nous a racontée luy-mesme. Comme il entroit vn iour dans l'Eglise de Nostre-Dame de Grace, avec vn honneste homme, pendant que le Pere Paul exorcisoit vn demoniaque, il connut la nature du demon qui estoit exorcisé; soit par ses réponses, soit par vne inspiration particuliere; de sorte qu'il dit à cet honneste homme qui entroit avec luy, qu'il croyoit que le demon qui possedoit ce corps, estoit vn des esprits de la plus basse Hierarchie, & du dernier Chœur. A peine eut-il acheuè ces parolles, d'vn ton fort bas, & qui ne pouuoit estre entendu que de son compagnon, que le demoniaque qui estoit assez esloigné, se saisit d'vn Breuiare, & le luy jeta furieusement au visage. Le demon voulut se venger du Pere Yvan, par ce coup qu'il luy donna; mais le Pere Yvan se vengea de luy, en le souffrant avec humilité: car il n'y a rien qui fasche tant cet ennemy orgueilleux, que la pratique des vertus opposées à ses vices.



CHAPITRE IV.

Le Pere Yvan a vn soin exact de son Eglise & de faire honorer le Saint Sacrement de l'Autel.

NOstre Imitateur n'eust pas plustost accepté la charge de Curé, & commencé d'en faire les fonctions, qu'il donna des marques des éminentes vertus dont il estoit enrichy, & des qualitez Apostoliques qui le rendoient dignes de cét employ : car estant bien estably par les saintes & genereuses intentions, & resolutions, que nous auons dites, aydé par les instructions, & les exemples de son Directeur, dont nous auons parlé ; non seulement il continua ses exercices ordinaires de reciter son Office avec grande deuotion ; de celebrer tous les iours la sainte Messe avec preparation & action de graces ; de faire ses oraisons, la lecture d'estude, & de pieté ; ses mortifications, & les autres pratiques que l'Esprit diuin luy auoit inspirées : mais il les augmenta, & en trouua de nouvelles, conformes aux obligations de sa charge. Et ainsi comme l'un des principaux deuoirs d'un Curé consiste à honorer autant qu'il peut le tres-adorable Sacrement de l'Autel ; & en suite à auoir un grand soin que les Autels, les ornemens, les lampes, les vases, & toutes les autres choses dont on se sert dans l'Eglise, le paué mesme, & les murs, soient dans la decence & dans la propreté conuenable ; parce que toutes ces choses se rapportent à IESVS-CHRIST contenu dans le tres-Saint Sacrement de l'Autel, comme tout ce qui est dans le cabinet du Prince se rapporte à sa personne ; le Pere Yvan en prenoit un soin merueilleux ; & y apportoit vne vigilance extraordinaire. Car il ne se contentoit pas de commander en qualité de Curé, à ceux qui estoient sous luy, d'en auoir soin : mais il s'y employoit luy-mesme ; faisant tres-souuent l'office de Sacristain, de Marguillier &

d'enfant de Chœur. Il paroît luy-mesme les Autels , & balioit l'Eglise, il nettoyoit les lampes, & il ne negligeoit aucune des choses qui contribuoient à la decence de la Maison de DIEU, & à l'honneur extérieur du tres-Saint Sacrement; pour vile, & basse qu'elle parût, s'il y a quelque chose de vil, & de bas dans l'Eglise; où par la presence de IESVS-CHRIST, toutes choses sont sublimes & relevées.

Mais son amour touchant la decence de sa Paroisse alloit encore plus avant; car il negligeoit le soin de sa maison, pour avoir soin de la maison de DIEU, de maniere que l'on ne voyoit dans sa chambre que des marques de sa pauvreté & de sa simplicité, & qu'un mépris de tout ce que la vanité, & la volupté recherchent; pendant qu'il s'occupoit serieusement & de toutes ses forces, en ce qui concernoit le bien, & la beauté de son Eglise. Aussi la regardoit-il comme sa Maison, où il demouroit plus volontiers, & plus longuement que dans sa chambre. Car il y passoit presque toutes les matinées; souvent les apresdînées, & quelques-fois vne grande partie de la nuit, autant que sa charge, & la charité le luy permettoient; & lors mesme qu'il s'arrestoit dans sa chambre, nous pouvons dire qu'il travailloit pour son Eglise; car il s'employoit à peindre des tableaux de deuotion, à graver des planches, pour faire des paremens d'Autel; & à semblables choses qui seruoient à l'embellir; & particulièrement à orner le Maistre Autel: si bien qu'il pouvoit dire, avec le Prophete, Seigneur j'ay aimé la beauté & l'honneur de vostre Maison, parce qu'elle est le lieu dans lequel vous manifestez vostre gloire.

Mais son respect & son zele pour le Saint Sacrement, ne s'arrestoit pas à ces devoirs extérieurs; car pour le faire honorer par tous les paroissiens, il les exhortoit sans cesse dans tous les Profnes, Catechismes, & autres instructions publiques, & particulieres, à le visiter le plus souvent qu'ils pourroient; à venir faire leurs prieres en sa presence, à l'accompagner avec deuotion, quand on le portoit aux malades, & à le recevoir dans la communion avec les dispositions ne-

cessaires. Et pour rendre les instructions de sa bouche plus efficaces, il les appuyoit de l'exemple de ses actions ; car outre qu'il employoit quelques heures du iour, & mesme de la nuit, à faire ses prieres & son oraison dans l'Eglise en la presence de cét auguste Sacrement, il le receuoit tous les jours à la sainte Messe, il le portoit luy-mesme aux malades, mais avec vne deuotion toute singuliere ; qui témoignoient son amour & son humilité ; son amour, parce qu'elle le faisoit souffrir pour DIEU ; son humilité, parce qu'il cachoit ingenieusement sa souffrance ; en sorte qu'il estoit tres-difficile, quoy qu'elle fust exterieure, qu'on s'en apperceust. C'est qu'il portoit le Saint Sacrement aux malades, & aux Processions nuds pieds, mais d'une façon ingenieuse : car il portoit des bas de chausses, & des souliers qui n'auoient rien au dessous, & qui ne seruoient qu'à cacher par dessus la nudité de ses pieds. Si les hypocrites pour se faire estimer, ont cent inuentions à montrer leurs vertus, qui n'ont que l'apparence, jusques à extenuer leur visage au langage de l'Écriture, afin de persuader à ceux qui les voyent qu'ils ieusnent, & qu'ils aiment la mortification ; nostre feruent Ecclesiastique nous enseigne par son exemple, que les vrais deuots sont tres-ingenieux à cacher leurs plus solides pratiques, & que pour fuir les louanges humaines ils tâchent de paroistre sans aucune singularité.

CHAPITRE V.

Comment il visitoit la Chappelle de Nostre-Dame de Grace.

A Vcun ne doit presumer, dit Guillaume de Paris, d'honorer dignement IESVS-CHRIST, s'il ne rend ses respects à sa tres-Sainte Mere : parce que l'honneur du Fils, est inseparable de l'honneur de la Mere. Nostre fer-

uent Ecclesiastique trauaillant pour le seruice, du Fils de DIEU, s'occupe aussi à honorer, & faire honorer sa tres-sainte Mere: car il employe tous les jours, quelque temps deuant ses Autels à faire oraison sur les mysteres, & sur les vertus de sa vie, ou à reciter le Chapelet, ou quelque autre priere vocalle. De plus il exhortoit continuellement ses paroissiens à la reuerer, à la seruir, & à recourir à Elle dans leurs besoins; & pour les exciter plus efficacement par les effets, que par les parolles; il trauailloit autant que ses autres occupations luy donnoient de loisir, à peindre, & à grauer des images de la Sainte Vierge; qu'il distribuoit gratuitement. C'est vne deuotion qu'il a continuée toute sa vie, enuers la Mere d'amour; que de faire, & de donner ses images; pour la faire honorer. Mais voicy celles qu'il n'a pratiquée que durant le temps qu'il a esté Curé à Contignac.

Nous auons dit, qu'il y auoit dans le terroir de ce bourg vne Eglise tres-deuote, dédiée à la Sainte Vierge, sous le tiltre de Nostre-Dame de Grace: le Pere Yvan y alloit tous les jours rendre ses devoirs, quelque temps qu'il fust; sans que ny le changement de saison, ny l'incommodité du vent, de la pluye, du froid, ny de la chaleur, l'en pussent empescher: quoy que cette Eglise soit assez éloignée du bourg, & que le chemin en soit bien rude. Mais ce n'est pas merueille que ce seruent seruiteur de la Sainte Vierge, n'ait pû estre détourné de son deuot pelerinage, par aucune incommodité exterieure; puis qu'il s'incommodoit luy-mesme volontairement, par les rudes mortifications, qu'il faisoit souffrir à son corps pendant le chemin; car outre qu'il estoit chargé de diuers instrumens de penitence, il prenoit encore la discipline; quand il estoit arriué à vn petit Oratoire, qui est au milieu du chemin de cette Chappelle; & il faisoit cette rude, & sensible penitence, toutes les fois qu'il croyoit n'estre apperceu d'aucun, choisissant pour ce sujet le temps, & l'heure fort à propos.

S'il m'estoit permis de penetrer dans son interieur, & de declarer les motifs, qui le portoient à verser de cette rigueur, lors qu'il alloit rendre ses devoirs à sa diuine

P R I N C E S S E ; j'en apporterois cette raison ; que faisant l'examen de sa conscience durant son chemin , & se trouvant coupable de quelque deffaut , il vouloit se purifier sur le champ par la penitence , afin d'entrer dans la Chapelle avec plus de disposition , & paroistre plus pur , deuant la Mere de pureté. Aussi est-ce vne excellente pratique , quand nous entreprenons quelque bonne œuvre , ou que nous visitons quelque lieu saint , de nous y disposer par la contrition de nos pechez , & par quelque souffrance volontaire , qui tient lieu de satisfaction ; car nous osons par ce moyen les empeschemens des graces , que D I E U nous veut donner ; & nous nous disposons à les recevoir avec plus de merite , & plus de profit. En effet l'eau beniste , qui est à la porte de l'Eglise , nous aduertit , que nous devons lauer nos ames , quand nous entrons dans les lieux saints : & nous devons particulièrement tascher , d'auoir la pureté de cœur , & celle du corps , quand nous nous allons presenter deuant I E S V S - C H R I S T ; qui est le D I E U de la pureté , & deuant sa tres-digne Mere , la plus pure des creatures.

CHAPITRE VI.

De ses penitences & mortifications.

O Voy que la charge de Curé , tres-penible d'elle-mesme , & que le Pere Yvan rendoit encore plus laborieuse par les soins extraordinaires , qu'il auoit de s'en acquitter fidèlement , le dispensast de faire des rudes penitences ; & que mesme elle l'obligast à prendre quelque relâche ; pour se delasser du trauail continuel , entretenir ses forces , & conseruer sa santé ; neantmoins l'amour de la Croix , & le desir d'imiter les souffrances de son diuin Maître , luy faisoit embrasser toute sorte de penitences , & de mortification. L'oraison par la voye de la contemplation , sans
l'ayde

L'ayde des sens & du raisonnement naturel, est vn des plus mortifiants exercices de la vie de l'esprit, & de la Religion. S. Denis l'appelle, la destruction des sens : Thaulere vn affligeant exercice ; & l'experience mesme nous enseigne, que c'est vne des plus penibles occupations de la vie interieure ; puis qu'entre les personnes les plus deuotes, & les plus spirituelles, nous en voyons plusieurs actiues, qui se donnent à la pratique de diuerses vertus ; mais nous en trouuons fort peu de contemplatiues. Ce qui prouient sans doute, de ce que l'oraison de contemplation est contraire à la nature, à cause de la violence, presque continuelle qu'elle fait au sens, & à l'appetit inferieur. C'est toutefois l'oraison, à laquelle le Pere Yvan s'est addonné toute sa vie, avec vne application, & vne assiduité merueilleuse ; y employant plusieurs heures tous les iours, & souuent la plus grande partie de la nuit ; si bien qu'oultre la peine, qu'il en souffroit dans la partie interieure, son corps en ressentoit vne espee de martyre ; en ce qu'estant d'ailleurs accablé de trauaux & de soins, il estoit priué du repos, qui luy eust esté necessaire : mais ce ne sont pas les plus rigoureuses mortifications.

Il ne se nourrit d'aucune chose, qui eut sang, ou vie, durant les cinq années qu'il exerça la charge de Curé dans Contignac, ne mangeant ny chair, ny poisson, ny œuf, ny laitage ; ne viuant que d'vn peu de pain, de quelques herbes, & de quelques mauuais fruits, qu'il prennoit seulement vne fois le iour ; sans y apporter d'autre assaisonnement, que de l'absynthe, & de cédres, qu'il mesloit avec ses larmes. L'ay dit qu'il se nourrissoit de mauuais fruits ; par ce qu'il les refusoit quand il les trouuoit sauoureux, & agreables au goust ; tant il estoit ennemy de la sensualité, & amy de la mortification ; de maniere que si S. Hilarion ce grand, & illustre solitaire a autrefois estably, cōme vne maxime de la vie penitente ; qu'il ne faut pas chercher la propreté dans le cilice, le Pere Yvan auoit vn sentiment conforme, disant [qu'il ne faut pas chercher de la satisfaction dans l'abstinence ny dans le ieusne, que l'on ne doit obseruer, que pour mortifier le goust :] Il se priuoit encore de l'vsage des herbes, & des

fruits , le Mercredy , le Vendredy , & le Samedy , se contentant de pain , & d'eau : & comme si son ieusne ordinaire n'eust pas esté assez rigoureux , par ce qu'il sembloit s'y accoustumer ; il obseruoit 4. Caresmes l'année , pendant lesquels il ne se substantoit que de deux en deux iours , passant quelquefois iusques au troisieme , sans prendre aucune nourriture.

Il se mortifioit encore en son coucher , & en ses habits : car il ne portoit point de linge , que son mouchoir , & son rabat. Sa tunique estoit d'une estoffe si grossiere , & si rude , qu'elle pouuoit luy seruir de haire , & de cilice : son liect n'estoit pas aussi plus doux ; car il se couchoit sur vn ais à terre , ou sur vn banc ; sans draps , sans matelas , sans paille , sans couuertures ; n'ayant pour cheuet , qu'une pierre , ou vn liure , surquoy il appuyoit sa teste. Il ne quittoit iamais la soutane , qu'elle ne fust usée , non pas mesme la nuit ; soit qu'il le fist par la haute estime qu'il auoit de l'estat Ecclesiastique ; selon qu'il disoit luy-mesme ; *qu'il ne vouloit pas quitter la robe de S. Pierre* ; soit qu'il voulust se mortifier dauantage.

Qui se persuadera que ce ne sont pas encore ses plus grandes , ny ses plus rudes mortifications ? Car il prenoit la discipline iusques au sang , tous les Mercredys , & les Vendredys ; il portoit une haire effroyable , composée de deux grâdes lames de fer blanc , troiées en pointes à la façon d'une rappe , dont une estoit collée sur sa poitrine , & l'autre sur ses espaulles : & pour les rendre encore plus rudes , & plus picquantes , en les pressant , & les enfonçant dans la chair ; il les serroit par une ceinture de fer , qui estant herissée de pointes , le blessoit en plusieurs endroit quand il se remuoit. On monstre encore aujourd'huy avec estonnement cette haire , & cette ceinture , dans le lieu de Contignac , chez une vertueuse Demoiselle ; qui ayant esté la penitente du Pere Yvan , la luy auoit demandée , & l'ayant obtenue la conserue comme une precieuse relique. Ce qui est admirable ; & nous oblige à reconnoistre que la grace supleant aux foiblesses de la nature , luy a donné de forces presque

DV V. PERE ANTOINE YVAN. st
miraculeuses : C'est qu'avec si peu de nourriture , & parmy
de si rudes penitences il ait iouy d'une bonne santé : & tous-
jours eu assez de force , pour s'acquitter fidèlement des oc-
cupations penibles de son employ : si bien que nous pou-
vons dire avec le Prophete , *A Domino factum est iustud , &*
est mirabile in oculis nostris : Le Seigneur a esté l'autheur de
cette conduite , qui est tout à fait merueilleuse.

CHAPITRE VII.

Il travaille à l'aduancement spirituel de ses Paroissiens.

A Pres qu'un fidelle pasteur s'est acquitté , de ce qui
doit à Dieu , en l'honorant , & le faisant honorer ; de
ce qu'il doit à son Eglise , en ayant vn grand soin ; & de ce
qu'il doit à luy-mesme , en se punissant de ses fautes : il luy
reste à satisfaire aux devoirs , qui regardent ses Paroissiens :
qui sont, l'instruction de la parole de Dieu, l'administration
des Sacremens , les visiter en personne dans leurs maladies
& aduersitez, leur départir de ses biens, dans leur indigence ;
& leur donner bon exemple par ses actions. Nostre bon
Prestre ayant fidèlement satisfait à ce qu'il deuoit à Dieu, à
son Eglise & à soy mesme , a aussi travaillé avec zele à l'ad-
uancement de ses Paroissiens.

Tous les Dimanches au matin , il faisoit dans son presne
vne exhortation familiere & populaire , mais tres-solide &
tres-feruente , contre quelque vice , & pour persuader la
pratique de quelque vertu. Apres le disner , il expliquoit
quelque point de la doctrine Chrestienne , avec grande fa-
miliarité & grande instruction : s'accommodant à la portée
de ses Auditeurs ; interrogeant les enfans avec vn certain
mélange de douceur , & de grauité ; qui leur imprimoit
esgalement le respect & l'amour. Et par ce que pour attirer
les enfans , il faut leur donner de petits presens , il grauoit
luy-mesme diuerses planches de nostre Seigneur & de la

sainte Vierge ; sur lesquelles il tiroit des images , qu'il leur distribuoit. Ses exhortations , & ses paroles estoient pleines de feu & de zele ; il crioit sans cesse contre les vices de ses Paroissiens ; sans aucun respect humain : il reprenoit dans le particulier & le secret , les vices qui estoient particuliers : & il corrigeoit publiquement ceux qui estoient publics : ne craignant pas de faire rougir de confusion , ceux qui n'apprehendoient pas de causer du scandale par leur mauuaise vie. Ainsi s'il eust veu dans l'Eglise , ou ailleurs , vne femme immodeste , & découuerte ; apres l'auoir aduertie en particulier , il luy faisoit publiquement la correction ; quelque reproche qu'il en deust receuoir luy-mesme ; ce qui luy estoit arriué fort souuent. Aussi pouuoit-il dire comme l'Apostre S. Paul , que la charité de I E S V S - C H R I S T le pressoit ; puis qu'elle seule le faisoit agir. On ne sçauoit dire , avec quelle ardeur il corrigeoit ceux qu'il voyoit parler irreueremment dans l'Eglise ; son zele auoit imprimé vne telle crainte dans l'esprit de ses Paroissiens ; que sa seule presence les retenoit dans le deuoir ; & c'estoit assez de dire ; voicy le Pere Yvan , pour obliger les plus immodestes ; & les plus libertins , à paroistre sages , & à se mettre dans leur deuoir. Ce qui montre combien la presence d'un homme de grande pieté est vtile & efficace , & qu'on peut bien la comparer à celle du Soleil , qui à son leuer dissipe les nuages , & les broüillars , fait cacher les voleurs dans les bois , & contraint les bestes farouches de se retirer dans leurs tanières.

Si nostre vigilant pasteurs ne sortoit presque point de l'Eglise de tout le matin ; comme nous auons remarqué , c'estoit pour estre tousiours prest , à receuoir ses Paroissiens à la Confession , & à la Communion , quand ils la demanderoient ; & pour les y exciter doucement & fortement , par la facilité & la rencontre de sa personne. Car on employe volontiers les ouuriers , que l'on trouue tousiours disposez à trauailler avec ioye & sans interest ; comme au contraire , il arriue que le chagrin du Confesseur , & la crainte que l'on a de n'en estre pas receu agreablement , fait que bien

souvent les penitens s'en rebutent, & n'osent en approcher. En effet il est arriué plusieurs fois, que des personnes deuotes, qui n'eussent pas esté pour lors à confesse, & qui mesme n'y eussent pas pensé, le voyant dans le tribunal, en conceuoient le desir, s'y preparoient pour profiter de l'occasion; & mesme que de grands pecheurs qui ne s'estoient confessez depuis long-temps, qui auoient de la peine à s'y refoudre; & qui n'osoient se presenter à luy, dans vn autre lieu; quoy qu'ils en eussent le desir, & qu'ils y fussent preparez, le trouuant dans le tribunal, se iettoient à ses pieds & luy découuroient leur conscience, avec vn cœur contrit & humilié.

Aussi qui pourroit dire les conuersions merueilleuses que DIEU operoit par les soins charitables, & par les solides conseils de ce sage, & zelé Confesseur? Cette facilité que l'on trouuoit en luy, pour en receuoir les Sacremens de la Confession, & de la Communion; & la grande peine qu'il prenoit pour y bien disposer ceux qui se presentoient; attirèrent bien-tost ses Paroissiens à la frequentation de ces deux Sacremens; la plus vtile & la plus necessaire deuotion du Christianisme: de façon que l'on vid d'abord de notables changemens dans les familles & dans les particuliers, par les grands profits: que l'on receuoit du zele, & des trauaux de nostre vigilant, & infatigable Pasteur.

CHAPITRE VIII.

De ses soins enuers les malades, & de ses charitez enuers les pauvres.

C E n'est pas assez, qu'un bon Pasteur recoiue avec grande douceur & affabilité ses Paroissiens, quand ils viennent à luy; la charité l'oblige encore d'aller à eux, & de les aider, quand ils sont détenus par des maladies. Dès que le

nostre est aduertty des malades de sa Paroisse, il n'attend pas qu'on le fasse appeller, il ne differe point de les visiter; quelques obstacles qu'il ait, de la nuit, ou de mauuais temps; ou de ses affaires particulieres: il y accourt à toute heure, & en tout temps; sacrifiant à leur bien, & à leur consolation, son repos, sa refection, sa santé, & tous ses interests. Il les visite presque tous les iours, & mesme plusieurs fois le iour; quand il les void en danger: les disposant aussi-tost à recevoir les Sacremens de l'Eglise, & les leur administrant avec grande diligence, dès qu'il le iuge à propos. Il ne se lasse iamais d'estre aupres d'eux de les consoler, & de les aider en toute façon. Il y passe les nuits entieres, quand il iuge que sa presence leur est necessaire; les encourageant, leur faisant des exhortations ou des lectures de pieté; ou priant DIEU pour eux. Et prenant occasion de la visite des malades, de profiter à ceux qui se portent bien, il à grand soin de les instruire & de les exhotter à estre deuots. Aussi ne souffre-t'il pas dans les Chambres des malades, ny dans les autres maisons où la charité l'appelle, des tableaux deshonestes, de mauuais liures, ny aucune chose contraire à la pieté, ou à l'honesteté; si bien que quand il en trouue, il en fait de rudes corrections au *Maistre de la maison*; il les fait oster; souuent il les emporte luy-mesme pour les ieter au feu: il reprend encores seuerement, ceux qu'il trouue parler, & s'entretenir en la presence du malade, de choses vaines & inutiles, qui peuuent le destourner des bonnes pensées, & luy en donner de mauuaises: Tant il a de soin de leur salut, & de zele de la sanctification de leurs ames.

Sa charité n'estoit pas bornée au soin des ames; elle s'estendoit encores au soulagement des corps: de façon qu'encores qu'il n'eust que de tres petits reuenus, il faisoit neantmoins des aumosnes continuelles; distribuant aux pauvres de sa Paroisse le peu qu'il auoit; avec tant de bonté, que l'on n'a iamais veu, pendant le temps qu'il a esté Curé à *Contignac*, qu'il ait refusé l'aumosne à aucun de ceux qui la luy

ont demandée. Il gardoit exactement ce conseil de saint Ambroise, de saint Leon, & des autres Peres; qu'il faut donner aux pauvres ce que l'on espargne par l'abstinence, & par le jeusne; qu'autrement le iensne, & l'abstinence ne sont qu'un effet d'avarice: car faisant vne rigoureuse abstinence, & ieusnant presque continuellement, il espargnoit la plus grande partie de ses reuenus; mais ce n'estoit que pour les pauvres: de maniere qu'il ne reseruoit du tout rien, par ce qu'il donnoit tout. Si saint Augustin a dit, que nous sommes obligez de donner nostre superflu aux pauvres; & que cela a esté figuré par l'onguent dont sainte Magdelaine oignit les pieds du Sauueur, & par les cheueux dont elle les essuya: N. B. P. donnoit plus que de son superflu, parce qu'il donnoit de son necessaire; & de ce dont il auoit luy-mesme tres-grand besoin, iusques à souffrir la faim pour donner à manger aux pauvres, & la nudité pour pouuoir les vestir: montrant bien qu'il estoit imitateur de IESVS-CHRIST, qui estant riche s'est fait pauvre, pour nous enrichir de sa pauvreté.

Mais il ne faisoit pas seulement l'aumosne à ses Paroissiens; il la donnoit aussi avec grande liberté, aux pauvres estrangers: entre lesquels on a remarqué qu'il auoit un grand soin des pauvres Prestres, & Religieux; leur donnant plus qu'aux autres, & leur témoignant vne singuliere affection. Ses amis luy faisoient des reproches tres-grandes de ce qu'il donnoit ses biens sans se reseruer aucune chose; estant pauvre luy-mesme, & ayant à nourrir sa mere & vne niece: ils adioustoient aussi, que c'estoit tenter DIEU, & agir contre les regles de la prudence: mais pour toute responce, (*Il ne faut iamais, leur disoit-il, refuser l'aumosne à aucun; de peur de la refuser à IESVS-CHRIST, ou à quelques Anges, qui ont souvent paru sous la forme d'un pauvre, ainsi que nous lisons dans la vie de saint Gregoire, de saint Louïs, & de plusieurs autres grands seruiteurs de DIEU. Au reste, poursuioit-il, j'espere que DIEU aura soin de ma mere, & de ma niece; & que sa bonté ne nous refusera iamais ce qui nous sera necessaire: puis qu'il s'est amoureusement engagé, par les promesses*

qu'il nous a faites, à donner à ceux qui donnent; & à faire miséricorde à ceux qui auront esté misericordieux.

Si ceux qui esperent en Dieu ne sont jamais confondus; la confiance de nostre charitable Prestre estant singuliere, produisit des effets du tout merueilleux : car DIEU accomplissoit en luy ses promesses, en recompensant ses aumosnes; si bien que plus il donnoit, plus il auoit dequoy donner. Il mettoit tout son argent dans vne cassette, d'où il le tiroit, pour le donner aux pauvres; & avec cét auantage; que par vne merueille, que DIEU a coustume de faire en faueur des personnes charitables, sa cassette s'éstant renduë feconde, & son argent multiplié; il y en trouuoit beaucoup plus qu'il n'y en auoit mis.

Son ardeur à faire du bien alloit encore plus auant; puis qu'il auoit soin de trauailler à la conseruation mesme des biens temporels de ses paroissiens. C'est pourquoy comme le lieu de Contignac, pour estre esleué, & environné de montagnes, est grandement exposé à la gresle; de sorte que bien souuent le terroir en est rauagé: quand le Ciel se couuroit de nuages, & que le bruit du tonnerre sembloit menacer de quelques horribles tempestes; ce charitable Pasteur alloit par les champs, d'une colline à l'autre; priant DIEU, & benissant les terres avec vne image du Crucifix en relief qu'il auoit coustume de porter. Sa charité produisoit des effets merueilleux: car DIEU exauçoit ses prieres; & rendant ses benedictions efficaces, esloignoit de ce terroir la gresle, & toutes sortes d'orages; si bien qu'il n'y en eut point qui fist de grands degasts, & causast des pertes considerables durant tout le temps que nostre zelé Ecclesiastique y demeura. Ne vous semble-t'il pas que ce bon Curé imitoit le zele que Moysé auoit pour son peuple? car comme ce Patriarche pour appaiser la colere de DIEU, irrité contre les enfans d'Israël; & en détourner les carreaux de sa justice; s'y exposoit seul, voulant estre effacé du Liure de Vie pour leur conseruation: nostre charitable Prestre allant par les champs, pour oster les orages, & les tempestes, s'y exposoit

exposoit foy-mefme , pour en preferuer fes paroiffiens.

Après quoy personne ne doit s'estonner, s'il en estoit tendrement aimé; voyant qu'il leur donnoit tant de témoignages d'une affection paternelle : outre qu'il estoit si condescendant en tout ce, en quoy il ne connoissoit aucun deffaut; qu'il obeïssoit à tous, comme vn agneau; encore qu'il fust leur Pasteur. Si bien qu'imitant la douceur du Fils de DIEU, qui s'est fait Homme, pour gagner les hommes, il se faisoit tout à tous, pour les gagner tous. Ce que le grand Apostre a dit de foy; & ce que l'on a mis dans vne Epitaphe du grand saint Charles Borromée, que pour gagner les autres, en se perdant d'une bien-heureuse perte, il estoit tout à tous, & n'estoit rien à foy. *Omnibus omnis erat, qui sibi nullus erat.*

CHAPITRE IX.

Il est tenté par le Demon.

NOstre Imitateur me montrant vn iour l'image de saint Yvan Hermite, représenté au milieu de plusieurs demons, qui le tourmentoient, ainsi que l'on dépeint les combats & les tentations du grand saint Anthoine, me dist; que DIEU luy auoit donné deux Saints pour Patrons, saint Antoine, & saint Yvan, dont il portoit les noms; chacun desquels auoit esté diuerses fois attaqué, battu, & tourmenté par les demons, sans en auoir esté vaincu; que c'estoit vne des raisons, qui le portoient, à auoir vne deuotion singuliere à leur endroit; & que DIEU l'auoit conduit par vne voye semblable à la leur. Il ne m'expliqua pas pour lors, quelles estoient les violences que le demon auoit exercées contre luy: mais s'estant decouvert à d'autres personnes dignes de foy, nous auons sceu, que cét ennemy du genre humain l'auoit fait souffrir en diuers façons.

H

En premier lieu le demon l'a tourmenté par plusieurs tentations des-honnêtes ; l'inquietant avec des violences extrêmes, & en son esprit, & en son corps : pour à quoy resister ; ce genereux soldat de I E S V S - C H R I S T se servant des armes du grand saint Paul , redoubloit ses penitences, & ses prieres , particulierement enuers la Sainte Vierge, la Mere de la pureté , & la Protectrice desames pures. Il s'humilioit encore profondement deuant D I E U, se défiant de ses forces ; & mettant sa confiance en la grace diuine, il souffroit avec resignation , les peines que ces tentations luy caufoient ; les offrant à D I E U, comme vn sacrifice de son amour propre , & vn martyre de sa fidelité.

Quand nous sommes tentez hors des occasions , & des objets, nostre ennemy est plus foible, & nous sommes plus forts ; car outre que toutes nos forces sont vnies, nous sommes aydez de la grace avec moins d'obstacles, & le demon est seul à nous attaquer : mais quand nous sommes dans les occasions, & que l'object est present ; le demon en deuient tres fort ; estant secondé par l'vne, & par l'autre, la tentation se rend encore tres-violente ; nos forces se dissipent ; l'occasion fait souleuer la chair contre la raison ; & la grace trouue pour lors de grands empeschemens dans la complaisance de nos sens, & dans la rebellion de nostre esprit. O qu'il est pour lors difficile de ne pas succomber, ou de ne se relâcher pas en quelque chose ; sans vne grande grace, & vne singuliere vertu.

C'est la force que nous admirons dans les victoires que le Pere Yvan a r'emportées sur les demons : car cet ennemy ne pouuant rien gagner sur luy, quand il l'attaquoit seul, voulut se fortifier de l'occasion ; & ne pouuant l'exciter à la rechercher, ny à s'y trouuer temerairement ; ne pouuant pas mesme le faire relâcher de son exactitude, & de la fidelité qu'il auoit à fuir la conuersation des femmes, il en excite d'effrontées, à le rechercher, & à solliciter sa pureté ; de maniere qu'il y en eut qui vserent d'artifice, & mesme de tant de violence pour le corrompre, que le seul souuenir le fai-

Soit trembler, quand il parloit de ces sortes de tentations à ses plus familiers. Aussi repetoit-il, pour lors avec humilité & avec crainte cette fervente priere de la sainte Eglise; *Seigneur deliurez-nous de l'esprit d'impureté.* Mais cette seconde attaque, ne réussit pas plus heureusement à l'ennemy que la premiere; car nostre chaste Ecclesiastique resistant avec fidelité, & avec force, conserua le thresor de sa pureté avec tant de soin, & de vigilance; que sur la fin de sa vie il a déclaré; qu'il ne se souuenoit pas d'auoir jamais consenti à aucune pensée des-honneste; encore qu'il en eust souuent esté tenté, par les suggestions de l'ennemy, & par les sollicitations de quelques personnes perduës. Ce qui est au rapport des Peres vn plus grand miracle, que celuy des trois enfans de Babylone; qui furent conseruez au milieu des flâmes, sans que le feu brûlast vn seul poil de leurs vestemens.

Le demon se voyant vaincu en toutes ses ruses, voulut l'attaquer de force ouuerte: c'est pourquoy cét ennemy luy paroist visiblement sous diuerses formes horribles, & épouuantables, pour l'intimider, & le troubler. Bien souuent il excite des bruits effroyables, & si grands, qu'il semble que sa chambre se doie abysmer; d'autre fois; il le menace d'exercer sa rage contre luy, s'il ne quitte ses exercices de penitence, & le zele du salut des ames. Et bien souuent aussi les menaces estant suiuiues des effets, il joint les coups aux injures, & le bat avec tant de violence, que les coups sont entendus par la mere de ce bon Prestre, qui logeoit dans vne chambre voisine:

Cette vertueuse femme entendant le bruit que le demon fait, & les coups qu'il donne, en est au commencement toute épouuantée: mais enfin s'estant rassurée, elle se fortifie par les paroles, & par la constance de nostre patient Ecclesiastique; en telle sorte, que bien loin de craindre cét ennemy; elle le méprise, & l'accuse de foiblesse; se réjouissant mesme de ce que son fils en souffroit vne si cruelle guerre, comme d'vne preuue de sa vertu, & des graces, que le Ciel luy donnoit, contre les attaques de l'Enfer.

Comme vn petit feu est esteint par le moindre vent, & qu'un grand brasier en est dauantage allumé; nous pouons dire; que la plus-part des hommes se laissent affoiblir par les tentations, quoy que legeres; mais que nostre genereux Yvan se fortifie par les plus rudes attaques du demon; car plus cét ennemy le tourmente, pour le faire relâcher de ses exercices, d'oraison, de penitence, & du zele des ames; plus il s'y addonne exactement & avec ferueur. Il se console mesme, lors qu'il vient à considerer, qu'il est ennemy des demons; puis qu'il en est persecuté: de façon qu'il remercie DIEU de cette épreuue, dans laquelle il a le moyen, estant aydé de la grace, d'exercer la patience, l'humilité, & les autres vertus d'un parfait Chrétien.

CHAPITRE X.

On l'accuse destre Sorcier.

SI l'aiguillon des abeilles est plus piequant, que ceux des guespes; il faut auotier, que nous sentons plus viuent les persecutions, de ceux que nous croyons estre de nos amis; que les mauuais traitemens de nos aduersaires. Ainsi nostre excellent Curé fortifié de la grace, & des vertus Chrestiennes, se rit des violences du demon, qu'il scait estre son ennemy déclaré: mais il est tres-sensiblement affligé; de se voir calomnié, du plus noir de tous les crimes, par des personnes, qui deuoient le deffendre.

Quoy qu'il apportast tous les soins, que la prudence, & l'humilité luy pouuoient suggerer; pour ne paroistre singulier en aucune chose, & pour cacher les vertus; qui pouuoient luy gagner l'estime du monde, & le faire admirer; estant toutesfois obligé, par les fonctions de sa charge, de conuerser avec toutes sortes de personnes, il ne pût empescher; que plusieurs ne s'apperceussent, que sa vie estoit

extraordinaire en son abstinence, en son zele, & en ses autres trauaux. D'ailleurs, DIEU l'ayant enrichy, du don de prophetie; il predisoit à plusieurs des choses d'importance, qu'on ne pouuoit sçauoir, que par reuelation; & qui arriuoient de la façon qu'il les auoit predites. On voyoit encore son pouuoir sur les demoniaques, quand il les exorcisoit; & sur les nuées, & les tempestes, qu'il dissipoit par ses prieres, & par ses benedictions. Les gens de bien, qui jugeoient saintement de ces choses extraordinaires, les attribuant à la grace, & à sa vertu; en prenoient occasion, de l'estimer dauantage; & de faire plus de profit de ses instructions: au contraire les méchans, qui en jugeoient malicieusement, ou par la suggestion du demon, ou par vengeance, de ce qu'il reprenoit leurs vices, avec vne sainte liberté; attribuant sa façon de viure, ses predictions, & son pouuoir, à la vertu des diables; l'accuserent d'estre Sorcier; taschant par cette noire, & horrible calomnie, d'effacer la haute reputation, qu'il auoit acquise, & de le rendre vn objet de haine, & d'horreur, à tous ceux qui le connoissoient. Nostre bon Pasteur, receut cette affliction, avec grande tranquillité d'esprit, & vne entiere soumission aux ordres de la Prouidence diuine; sans en témoigner aucun ressentiment, sans se justifier, & sans mesme en faire aucune plainte: mais plustost se réjouissant, de participer aux injures, dont les Pharisiens auoient calomnié les miracles de IESVS-CHRIST; quand ils disoient, qu'il chassoit les diables des corps, au nom de Beelzebuth.

La calomnie prenant des forces, de la douceur, & du silence de nostre patient Ecclesiastique, va s'augmentant, & s'insinuë dans l'esprit de plusieurs; en sorte qu'il y en a, qui fuyent sa compagnie, & sa rencontre, & qui refuserent mesme de recevoir les Sacremens de l'Eglise par ses mains. Il y en eut vn particulierement, qui ayant fait porter son enfant nouvellement né dans la Paroisse, pour le faire baptiser, trouuant nostre vigilant Pasteur disposé, pour administrer ce diuin Sacrement, le refusa avec mé-

pris, & avec menaces; disant, qu'il feroit mourir son fils, par quelque sortilege, s'il le baptisoit. C'estoit vne des plus grandes injures, que le Pere Yvan pust recevoir dans sa charge; qu'on voulust l'empescher, d'en faire ses fonctions, par vne noire & detestable calomnie; dans vne occasion de cette importance; qui pouuoit estre diuulguée, & donner du soupçon contre luy, mesme aux plus gens de bien: neantmoins il ne fit aucune resistance; il ne témoigna pas mesme, qu'il en fust fâché; mais quittant paisiblement son surpelis, & l'étole, il les presenta à vn autre Ecclesiastique, le priant de suplérer à son deffaut, pour le salut de cét enfant, & pour la satisfaction de cét homme, qui auoit si mauuaise opinion de luy.

L'exemple de sa douceur, & de sa simplicité, deuoit effacer la tache, dont on vouloit le noircir; puis que le Sage dit, que les opprobres, que l'on dissimule s'éuanouïssent; DIEU cependant permit le contraire; car on le crut coupable, parce qu'il ne justifia pas son innocence: & l'on crut aussi, qu'il auoüoit tacitement le crime, dont on l'accusoit; parce qu'il ne répondit pas fortement; pour se deffendre de la calomnie dont cét homme le noircissoit. Mais nous pouuons dire, qu'il contribua luy-mesme par sa simplicité, à accroistre le soupçon, que l'on auoit de luy; car apres qu'il eut quitté son surpelis, pendant qu'un autre administroit le Sacrement de Baptême à cét enfant dont nous venons de parler, s'adressant à vne des personnes qui estoient presentes; *Cét homme, dît-il, ne veut pas que ie baptise son enfant; parce qu'il croit, que ie suis sorcier; & il craint, que ie ne le fasse mourir. Il a grand tort; ie luy pardonne neantmoins tres-volontiers le soupçon qu'il a contre moy: ie suis mesme bien ayse de son refus, parce que son enfant qui maintenant se porte bien, ne viura pas long-temps; & peut-estre croiroit il, que ce seroit moy, qui luy auroit auancé la mort.*

La chose arriua, comme il l'auoit predite; car l'enfant, qui se portoit bien pour lors, mourut effectivement quelques iours apres. Ce qui donna de nouvelles forces à cette

calomnie, qu'il estoit Sorcier; & que c'estoit par le moyen du demon, qu'il connoissoit les choses secretes, & predisoit les futures. Nostre bon Prestre eut recours au souverain Seigneur, & luy demanda d'estre deliuré de ce calice, si telle estoit sa diuine volonté: apres quoy s'abandonnant aux ordres de sa prouidence, sans donner aucun témoignage d'abbatement, ny de foiblesse en soy, ny d'aersion contre ceux qui en estoient les auteurs, il continua tous ses exercices, avec le mesme zele, & confiance qu'auparauant. Enfin il éprouua, ce que le Fils de DIEU a promis à ses Disciples; quand il leur a dit; que la Verité les deliureroit: car le Seigneur prit le soin de sa reputation; & cette calomnie se dissipant peu à apen, par la solidité de ses instructions, & la saincteté de sa vie; on le reconnut pour vn ouurier Apostolique; qui estoit enrichy de plusieurs graces, & dons extraordinaires; de maniere que ceux-là mesmes, qui l'auoient le plus persecuté par leurs calomnies, furent les premiers à le respecter, & à luy témoigner le plus d'affection.

CHAPITRE XI.

*Il quitte l'étude de la Predication, & la cure
des ames.*

LE grand saint Basile a raison de dire; qu'un homme juste est semblable à vn baume precieux, & odoriférant; dont l'odeur ne s'arreste pas dans la boëte, où il est enfermé; mais il se répand encore au dehors, & se communique aux enuirs: ainsi les habitans de Contignac, ne sont pas les seuls, qui profitent des instructions, des trauals, & des exemples, de nostre fidele, & infatigable Ourier: car il traualle encore dans les bourgs de Quinson, de la Verdieré, de Camps, de Monfort, & en plusieurs autres lieux circonuoisins: preschant, catechisant,

administrant les Sacremens , & faisant du bien à tous, avec grande benediction , & des succès merueilleux.

Mais qui ne craindra , & qui ne veillera soigneusement, selon le conseil de saint Pierre , pour ne se laisser surprendre , à nostre aduersaire commun , qui ne cesse de faire la ronde autour de nous , comme vn lyon rugissant , pour nous deuorer ? Lors que le Pere Yvan traueille avec le plus grand zele pour le salut de son prochain ; le demon luy dresse des embusches , pour le faire décheoir de sa perfection ; sous des pretextes si specieux , & si delicats ; qu'un autre moins spirituel que luy n'eust pû s'en appercevoir. Ses predications toutes de feu , & de zele estant receuës avec approbation , & avec grand profit ; ce rusé serpent tasche insensiblement , de luy persuader ; de s'y appliquer avec plus d'estude ; & de traueillir avec grand soin en leur composition ; de lire pour ce sujet des Liures doctes & polis , pour en tirer de belles pensées ; d'écrire ses Sermons au long ; d'observer les Regles de la Rethorique ; de ne negliger pas la politesse du langage ; & apres cela , de les bien estudier , pour les reciter avec plus d'assurance , & plus de vigueur , luy suggerant que c'estoit tenter DIEU , de faire autrement ; & que ses Predications en seroient mieux receuës , & profiteroient dauantage.

Ces aduertissemens auroient esté necessaires , à vn autre d'une differente conduite , & vocation ; car ce sont les preceptes , qu'on donne aux jeunes Predicateurs , dont le deffaut , est cause que plusieurs font decrier la parole de DIEU , par leur ignorance , & par leur rusticité , sous ce pretexte qu'ils preschent à l'Apostolique. Mais ils estoient pernicioeux à l'estar du Pere Yvan ; car le demon pretenoit luy faire consommer la plus grande partie de son temps , par l'application à l'estude ; & luy oster par ce moyen le loisir de vacquer à son oraison , & aux autres fonctions de sa charge , à quoy il estoit appellé ; & qui le faisoient aduancer à grand pas dans les voyes de la perfection. Que s'il eust vne fois laissé , ou interrompu , l'exercice

xercice de ces vertus là ; le demon esperoit de le porter insensiblement à rechercher le gain , & les honneurs , dans ses Sermons ; à recevoir avec complaisance les loüanges ; & enfin il esperoit de l'entraîner dans le peché ; ou au moins de le faire relâcher de la vie sainte & exemplaire qu'il menoit. Pour peu que ce maudit marchand gagne , il est satisfait : ainsi combien détourne-t'il de personnes de la perfection ; sous le pretexte de l'estude , & de la predication ; à la ruine souuent de leur conscience , au détriment de la charité , du prochain ; quelquesfois au scandale des paroissiens , qui ne reçoivent pas les assistances necessaires de leur Pasteur ; parce qu'il est trop occupé à l'estude , ou à d'autres emplois incompatibles avec sa charge ?

Quoy que le Pere Yvan fust tres-circonspect , en toutes ses fonctions , & qu'il eust toujors de grandes apprehensions d'estre trompé ; neantmoins il n'apperceut pas d'abord les ruses de l'ennemy : car en effet il s'appliqua durant quelque temps avec plus de soin à bien composer , estudier , & reciter ses Sermons : apres quoy , réussissant mieux en apparence qu'auparavant , il ne manquoit pas de faux conseillers , qui l'excitoient à continuer de la sorte ; & qui luy suggeroient des pensées de vanité , & de profit : disans qu'il en seroit plus estimé ; que c'estoit vn moyen de gagner de quoy subsister plus honorablement ; & de paruenir à quelque bon Benefice , qui luy donneroit de quoy faire de grandes aumosnes ; outre la gloire que DIEU en receuroit , & l'vtilité spirituelle du prochain.

Il ne s'arrestoit qu'à ces deux derniers motifs , de la gloire de DIEU , & de l'vtilité du prochain. Cependant il commence à se relâcher dans ses exercices de charité , & de deuotion ; parce que donnant trop de temps à l'estude de la Predication , il n'en auoit pas assez pour les autres pratiques , qui regardoient sa perfection , & la conduite de sa Paroisse. Son interieur n'est plus si tranquille ; parce qu'il semble rechercher quelque chose avec DIEU ; & ne desirer pas avec toute la pureté , & la des-appro-

priation requise , la gloire , & le seul accomplissement de sa diuine volonté. Il y auoit quelque chose d'impur , & d'intéressé dans le desir de réussir à la Predication; ce qui estoit sans doute vne tentation tres-dangereuse , qui luy auroit causé de grandes pertes dans la perfection; si la grace n'eust éclairé son entendement , pour la découvrir; & n'eust donné des forces à sa volonté , pour la vaincre.

Comme doncques il alloit vn iour selon sa coustume, dans la Chappelle de Nostre-Dame de Grace , faire ses prieres; examinant sa conduite , & faisant reflexion , sur le desir qu'il auoit, de bien prescher , & sur les soins extraordinaires , qu'il y employoit , il commença de sentir quelques scrupules , & ie ne sçay quels reproches interieurs ; qui témoignioient que son cœur n'estoit pas bien dégagé de toutes choses. Il en recherche les causes; lorsque tout à coup , il ouyt dans son interieur , ces paroles , qui penetrerent jusques au fond de son ame : *A quoy est-ce que tu t'amuses? cherche DIEU , & ne pense à autre chose.* Cét aduertissement (que nous deuons sans doute attribuer à l'Esprit de Dieu) produisit dans nostre bon Prestre des effets merueilleux : car il luy decouurit d'abord les ruses de l'ennemy , le venin de la tentation, le relâche qui se glissoit dans ses plus saints exercices; & le danger où il s'estoit mis ; de donner entrée dans son cœur à la vaine gloire , à l'ambition , & à plusieurs autres deffauts.

L'on ne sçauroit exprimer la viue douleur qu'il en conceut d'abord; car il en eut vn si grand , & si sensible regret; qu'apres auoir poussé diuers sanglots , & versé des torrens de larmes , il ne pouuoit se consoler , de s'estre exposé au peril , de tomber dans les pieges du demon. Ce déplaisir l'affligea long-temps ; de sorte que durant plusieurs années , le seul souuenir qu'il en auoit , luy tiroit les larmes des yeux. Il double donc le pas; il entre dans la Chapelle de Nostre-Dame de Grace ; & prosterné deuant le Saint Sacrement , & deuant l'Image de

la Sainte Vierge, apres auoir demandé mille fois pardon de sa negligence à connoistre & à vaincre cette tentation, & des deffauts qu'il y auoit commis, il renonça à tous les aduantages humains qu'il auoit pû pretendre; & se resolut de prescher simplement, & de ne chercher purement que DIEU, sans se soucier de l'approbation des creatures.

Mais le regret, & la confusion qu'il eut d'auoir esté trompé, luy inspirerent encore d'autres desseins, bien differens de ceux que la tentation luy auoit suggerez: car comme les dangers nous rendent prudens, & les cheutes nous font veiller sur nos pas, pour ne plus tomber; ce sage Ecclesiastique ne se contenta pas, de se tirer par les saintes resolutions qu'il prit, du peril où il s'estoit exposé; mais il voulut encore pouruoir à l'aduenir, & s'éloigner mesme, autant qu'il luy seroit possible, des occasions d'un semblable danger. Et ainsi apres auoir amèrement pleuré les fautes, qu'il crut auoir faites en cette rencontre, & en auoir souffert de tres-rudes mortifications dont il se punit; apres, dis-je, auoir imploré avec humilité, le secours diuin, il se resolut par vne seconde reflexion, non seulement de quitter l'estude, & l'exercice de la Predication; mais de se démettre mesme de la cure des ames, & de se retirer dans vn Hermitage; pour y faire penitence, le reste de ses jours.

Il sçauoit bien, que les maladies ne se guerissent, que par leur contraire; que comme il n'est rien de plus nuisible à la saincteté, que la dissipation d'esprit, l'empressement, & l'attache à quelque employ exterieur & éclatant; de mesme il n'est rien de plus salutaire que la retraite, le dégagement de tout, & l'vnion avec DIEU: & que pour saints que soient nos exercices exterieurs; il est necessaire, que nous nous recueillions quelquesfois, pour consulter DIEU, pour nous connoistre, pour repa-
rer nos forces, & renouveler nostre cœur; suiuant l'exemple, que le Fils de DIEU nous en a donné; qu'il se retiroit de temps, dans vne solitude, afin de vacquer à la priere.

CHAPITRE XII.

Sa retraite dans vn Hermitage.

IL n'eust pas plustost resolu , de se retirer dans vn Hermitage ; qu'il fut obligé , de soutenir diuers combats , auant que de venir à l'exécution de son dessein. Le demon luy suggera mille tentations , pour l'en destourner ; luy representant qu'il alloit mener vne vie oyseuse , faineante , & sujette à mille illusions ; dans laquelle il ne pourroit rien faire pour la gloire de DIEU , ny rendre aucun seruice au prochain : & qu'au lieu de meriter pour soy , il se rendroit coupable , en negligant les talens , qu'il auoit à prescher la parole de DIEU , & à trauailler vtilement à la conduite des ames. Cét ennemy luy proposa cent autres raisons , pour l'empescher d'embrasser la vie solitaire ; mais ses efforts furent trop foibles ; pour ébranler nostre fidele Ecclesiastique : car le seul souuenir du danger , qu'il auoit couru dans l'estude de la predication , preualut à toutes ces craintes , & à tous les scrupules , que le demon tascha de jetter dans son ame.

Il eut encore plus de peine , à vaincre les raisons , que ses paroissiens , & les amis opposerent à sa genereuse entreprise ; [Que c'estoit vne tentation de l'ennemy , qui voyant le fruit , qu'il faisoit dans les fonctions de Curé , vouloit en empescher la continuation , en luy inspirant l'amour de la solitude : que sa façon de viure estoit assez solitaire ; puis qu'il ne conuersoit avec le monde , que dans la necessité : qu'il pourroit faire tant de penitences qu'il voudroit , estant Curé ; sans quitter l'exercice de sa charge , dans laquelle il glorifioit DIEU , & aydoit le prochain avec tant de succès ; & qu'estant Hermite , il seroit priué de tous ces grands biens : & que s'estant fait Prestre secu-


lier, il deuoit fuiure la vocation de son estat, qui n'est pas, de viure dans vn Hermitage; mais dans vne Paroisse, au seruice du public.] Nostre bon Prestre ne fait qu'une réponse à toutes ces raisons; c'est à sçauoir, *qu'il veut se sauuer; & qu'ayant éprouué les dangers qu'il y a de se damner dans la vie publique, il se sent inspiré d'embrasser la vie solitaire; où il espere pouoir mieux vacquer à soy: adjoustant ces paroles du Sauueur de nos ames; Que sert à l'homme de gagner tout le monde, s'il vient à se perdre luy-mesme.*

Il apprehendoit, de trouuer encore beaucoup de resistance à son dessein, du costé de sa mere; mais il éprouua le contraire: car cette pieuse personne (que nous pouuons appeller vne femme forte; parce que surmontant les infirmités de son sexe & de sa condition, elle n'auoit jamais porté son fils qu'au mépris des biens, & des honneurs de la terre, & à la pratique des plus heroïques vertus du Christianisme.) Cette mere, dis-je, ne consentit pas seulement, à la sainte resolution de son Fils; mais elle l'encouragea, & le fortifia à l'exécuter promptement, dès qu'elle eust connu, qu'il s'y estoit déterminé, pour mieux faire son salut, & s'appliquer avec moins d'empeschement à l'estude de la perfection. Si bien qu'estant confirmé dans son dessein, il ne douta plus que ses intentions ne fussent conformes à la volonté de DIEU: ainsi il s'employa deslors avec soin, à chercher le moyen de les effectuer.

Il y a dans le terroir de Rians vne deuote Chapelle, dédiée à saint Roch, située sur les rochers d'une petite colline; qui semble n'auoir esté bastie, que pour vn Hermite. Yvan l'ayant trouuée tres-commode à sa vocation, eut d'abord desir de s'y retirer: mais parce qu'il n'y auoit point de maison, à l'entour de la Chappelle pour y loger; & que d'ailleurs il n'auoit pas de quoy subsister, ny de quoy entretenir sa mere, en quittant la charge de Curé, qui luy fournissoit pour l'un, & pour l'autre, ses amis luy proposerent encore ces difficultez, pour combattre son dessein, par de nouvelles raisons: Mais il demeura ferme

dans sa premiere resolution ; leur faisant cette réponse , du Patriarche Abraham à Isaac ; *D I E U y pouruoyra* : & comme ce Patriarche ne fut pas frustré dans sa confiance ; Yvan ne le fut pas aussi dans la sienne ; *D I E U* luy donnant moyen d'auoir l'accomplissement de ses souhaits.

En effet les Penitens de Rians, Recteurs de cette Chapelle, ne sceurent pas plustost le dessein de nostre bon Prestre qu'ils en conceurent vne grande joye ; si bien que, sans attendre qu'il la leur demande, ils la luy offrent, avec grande ciuilité ; & de plus ils s'obligerent à luy faire bastir vne petite maison joignant , & à luy donner tous les ans vne certaine quantité de bled, suffisante pour son entretien, & pour celuy de sa mere : d'estoit tout ce que nostre pieux Ecclesiastique pouuoit demander. Aussi accepta-t'il leur offre, avec tres-grande humilité ; s'obligeant de prier *D I E U* pour eux, & de leur rendre seruice dans les fonctions de leur société. On s'employe d'abord à faire bastir son petit logement : cependant il se démet de la charge de Curé, qu'il auoit exercée pendant quelques années dans le lieu de Contignac ; il s'en démet, dis-je, au grand regret de ses paroissiens, qui ne se peuuent consoler de son éloignement. Enfin la maison acheuée, apres s'estre pourueu de diuers instruments de penitence, il s'y retire, & commence la vie angelique, qu'il y a menée durant neuf ou dix ans, plustost par l'appuy de la Grace, que par les forces de la nature.



CHAPITRE XIII.

Des austeritez qu'il pratique dans son Hermitage.

LE Patriarche Moyse ayant receu commandement de la part de **DIEU**, de luy bastir vn Tabernacle dans le Desert, se conforma au modele que **DIEU** mesme luy en fit voir sur la montagne; ce qui nous apprend vn des plus importans secrets de la vie spirituelle; si nous voulons bâtir à **DIEU** vn tabernacle viuant dans nos ames, par l'estude de la perfection: c'est à sçauoir; que nous deuons regarder les exemples de ceux que la sainte Eglise nous propose, comme des originaux de vertu, & des modeles de sainteté: & pour eüiter les illusions de l'esprit de mensonge nous deuons, imiter particulièrement les Saints, qui ont esté de mesme condition que nous; & qui ont vécu dans le genre de vie, où nous nous trouuons engagez. C'est la prudence que nous admirons en la conduite du Pere Yvan, au commencement de sa vie solitaire, & penitente: car il se propose d'abord les Saints que **DIEU** auoit appelez à ce genre de vie.

Et ainsi, ayant resolu d'imiter dans la solitude, les austeritez des saints Anachorettes; & de souffrir autant que ses forces le luy pourroient permettre, à l'exemple des glorieux Martyrs; il s'appliqua serieusement à la lecture, & à la meditation de leur vie: outre ce, afin de grauer plus fortement leurs actions, & leurs souffrances, dans sa memoire, par vne continuelle representation; il en mit des images dans les deux cellules de son petit logement; estalant en l'une, celles des saints Anachorettes; & en l'autre, celles des diuers supplices des saints Martyrs. De plus, ayant vne deuotion particuliere, à saint Antoine, & à saint Hierosme; quoy qu'il en eust les images avec celles des autres Saints, il les peignit encores sur les deux

portes de la Sacristie ; pour les regarder , quand il entre-
roit , & sortiroit , comme deux grands modeles de la vie
solitaire , & penitente. Mais le principal objet de sa
piété , & de son imitation , estant **IESVS-CHRIST** Au-
theur de toute sainteté , & la Sainte Vierge la Reyne de
tous les Saints ; il ne se contente pas , d'en auoir les ima-
ges , & d'en peindre les mysteres en diuers endroits de sa
cellule & de sa Chapelle ; mais encore , il les porte conti-
nuellement sur soy : c'est à sçauoir , vne image du Cruci-
fix de cuiure en bossé , & vne , ou plusieurs de la Sainte
Vierge , tenant son Enfant entre les bras.

La presence des saintes Images , n'est pas moins vtile ; que
celle de representations des-honnestes est dommageable :
parce que nos sens , reçoient les impressions conformes
aux objets qu'ils apperçoient , du vice , ou de la vertu.
En effet , si le demon , prit occasion de la presence du
fruct deffendu , de tenter Eue , de gourmandise ; & Da-
uid d'adultere , de la presence de Bersabée ; nos Anges
gardiens , se seruent de la presence des choses saintes , pour
nous inspirer la sainteté : ainsi que nous lisons d'un Roy ,
qui se conuertit par la representation du Jugement vni-
uersel ; & de saint Martinian Hermite , qui retracta , le
consentement qu'il auoit donné au peché ; émû , par l'i-
mage d'un Crucifix , qu'il apperceut derriere la porte de
sa cellule. Nous voyons encore cette verité en la person-
ne de nostre Solitaire , qui s'excite à imiter les saints Ana-
chorettes , & les saints Martyrs par la presence de leurs
images.

C'est pourquoy non seulement il continuë les peniten-
ces , qu'il auoit déjà pratiquées dans le lieu de Coutignac ;
mais encore il les augmente ; & en adjouste de nouvelles.
Il choisit pour son liét , tantost le marchepied de l'Autel
de la Chapelle , tantost un coffre de bois , qui estoit der-
riere le mesme Autel : & comme cette sorte de liét , n'é-
toit pas assez rude , pour se mortifier selon le dessein qu'il
en a ; l'amour de la penitence luy faisant inuenter un nou-
veau genre de rigueur tout à fait extraordinaire , il ban-

do

de sa teste nuë, avec vn cercle de fer, fait à ressort. Aussi ne pût-il pas continuer long-temps à coucher de la sorte; car la Chapelle estant exposée, à toutes les injures de l'air, & des saisons; pour estre située sur vn lieu esleué, & decouvert de tous les endroits; il tombe malade; en sorte que ses nerfs s'estans retirez; ses jambes deuindrent si foibles, qu'il ne pouuoit presque pas se soustenir. Cette incommodité le contrainst de changer de liêt; mais elle ne peut pas luy faire adoucir sa rigueur: si bien que s'il couche dans la cellule, qui n'est pas, ny si froide, ny si humide que la Chapelle; il continuë de se reposer à terre, n'ayant qu'un ais pour son liêt, & vn morceau de bois pour oreillier.

Il semble, que nostre Seigneur voulut l'obliger, à moderer son austerité; car il tomba malade pour la seconde fois: & pour lors estant contrainst de dresser vn liêt de quelques ais, il les accomoda de telle maniere; qu'ils representoient plustost la biere d'un corps mort, que le liêt d'une personne viuante. Il est vray qu'on peut dire; que la rigueur de son liêt ne l'incommodoit pas long-temps; parce qu'il y demeuroit fort peu; employant la plus grande partie de la nuit, à la priere, ou à la lecture, ou à quelque trauail manuel: avec tant d'assiduité, que quand il estoit pressé du sommeil, auant qu'il eust acheué, ce qu'il auoit resolu de faire, il prenoit la discipline, pour s'empescher de dormir; ou, il faisoit quelque autre sensible penitence, assujettissant ainsi sa chair à l'esprit, & par ses chastimens, la rendant esclau de la vertu.

La penitence de ce genereux Solitaire, est vniuerselle; parce qu'il se mortifie en toutes choses: il continuë, à ne porter aucune sorte de linge, que son rabat, & son mouchoir. Sa tunique pouuoit seruir de haire, à vn corps delicat, & addonné à ses plaisirs; mais elle est trop molle; & trop douce au sien, accoustumé aux souffrances, & à la peine. Aussi dessous sa tunique, quand il quitte la haire de fer blanc, en forme de rappe, dont nous auons déjà parlé, il se charge d'une chemise de fer, ou cotte de maille; du poids de quinze liures, fort longue, & tres-rude;

qu'il serre sur son corps avec des agraffes de fer.


Cette haire qu'il porta sur sa chair, durant plusieurs années luy cauſoit des douleurs insupportables ; ainsi qu'il a luy-mesme aduoüé , à ses plus familiers ; car outre la dureté, & la pesanteur qu'il en supportoit sans relâche, quand il en estoit endossé ; elle luy faisoit sentir, avec violence, les rigueurs de l'Hyuer, & les ardeurs de l'Esté. Si bien que pendant l'Hyuer, quand elle estoit refroidie, elle le faisoit frissonner, comme s'il eust esté plongé dans vn estang de glace ; & l'Esté, lorsqu'elle estoit échauffée, par les ardeurs excessiues de la saison (telles qu'on ſçait estre en Prouence où il residoit) elle luy cauſoit vne chaleur presque aussi violente, que s'il eust esté dans vn four : encore la pressoit-il, par vne chaisne de fer ; dont il ceignoit ses reins, fort estroitement ; pour en mieux sentir la rigueur. Les Religieuses de son ordre de la ville d'Aix, conseruent cherement cette ceinture ; comme les Religieuses de sainte Vrsule de Brignolles, gardent avec respect, sa cotte de maille, & la montrent comme vne relique. En effet on en donne des mailles, pour appliquer sur les malades, dont plusieurs en ont receu du soulagement, & mesme la guerison : ainsi qu'il appert, par les attestations, que nous en auons receuës, par des personnes dignes de foy.

Son abstinence & son ieusne estoient conformes à cette rigueur ; car il continua à ne manger que des legumes, des racines, des herbes, & des fruiçts, sans se substantier d'aucune chose qui cut vie, ou sang ; non pas mesme des œufs, ny du laitage : encore ne mangeoit-il qu'vne fois le iour, apres les quatre heures du soir. Pendant les quatre Carêmes qu'il faisoit, chaque année, il ne mangeoit que de deux en deux jours ; & quelquesfois plus rarement. Enfin les viandes extraordinaires, dont il se seruoit, les Dimanches, & les principales Festes, n'estoient que le pain, & le vin, l'huyle, & le sel.

Mais ce n'est pas encore tout : car il alloit nuds pieds, cachant ingenieusement sa nudité ; comme quand il por-

toit le Saint Sacrement de l'Autel dans Coutignac; pratiquant cette rigueur, mesme pendant l'Hyuer, quoy qu'il n'y eust que des rochers, & des chemins tres-aspres, & tres-difficiles aux enuirs de son Hermitage.

Ses amis qui le venoient voir, se plaignoient à luy, de sa trop grande austerité; & taschoient de luy persuader, d'auoir vn peu plus de soin de sa vie; au moins, de ne pas se pruer de la nourriture, qui luy estoit necessaire: mais il ne leur répondoit autre chose; sinon, *que saint Hilarion, auoit vescu encore plus austerement.* En effet pour bien imiter ce rigide solitaire, nostre bon Pere exerçoit encore contre soy-mesme de plus rigoureuses macerations, que celles que ie viens de raconter. Car il portoit, autour du col, vn collier de fer herissé de pointes, qui luy perçoient la chair en plusieurs endroits; il alloit presque tousiours teste nuë; il adjoûtoit à ses disciplines des mollettes d'esperon; & il s'enfermoit, avec tant de rigueur, que le sang en rejalloit, contre les murs de sa cellule; en sorte que les taches paroissoient sur les Images; ce que plusieurs personnes ont veu & attesté. Il se disciplinoit quelquesfois avec des horties par tout le corps, pour se causer vne douleur vniuerselle: comme s'il eust voulu exprimer sur son corps, les souffrances que le Fils de DIEU auoit endurées sur le sien; & meriter que l'on pust dire de luy, à l'imitation de son MAISTRE; qu'il estoit vn homme de douleur; & que depuis la plante des pieds, jusques au sommet de la teste; il n'y auoit en luy aucune partie exempte de mortification.



CHAPITRE XIV.

Comment il receuoit , & entretenoit ceux qui le visitoient dans sa solitude.

LE dessein principal du Pere Yvan , quand il choisit l'hermitage de saint Roch , pour le lieu de sa demeure , estoit d'y viure caché , & esloigné du commerce des creatures ; pour faire penitence ; & ne s'addonner , qu'à la contemplation des choses diuines : mais , ainsi qu'il est arriué à la plus-part des seruiteurs de DIEU ; il n'y fut pas long-temps , sans estre connu , & visité de plusieurs : l'odeur de sa vertu se répandant par tout , & l'exemple d'une vie si austere , & si extraordinaire se manifestant , à mesure qu'il s'estudioit le plus à se cacher. De maniere que , cét hermitage qui estoit auparauant desert , devint bientôt tres-frequenté des habitans de Rians , & des lieux circonuoisins : en suite dequoy , au lieu qu'il estoit fort pauvre , & presque ruiné , on y fit plusieurs belles reparations. Ce qui nous fait voir , combien la presence des seruiteurs de DIEU est vtile ; & qu'elle répand par tout des benedictions , mesme sur les choses inanimées : ayant des charmes si puissans , pour attirer les personnes ; qu'elle a bien souuent deserté les Villes , & peuplé les lieux les plus deserts.

Plusieurs personnes venoient donc à nostre pieux Hermite ; pour le consulter , & se recommander à ses prieres : il y eut mesme des Prestres , qui allerent demeurer avec luy les semaines , & les mois entiers ; pour profiter de ses instructions , pour estudier sa façon de viure , & tascher à se rendre ses fidelles imitateurs. Mais il n'y eut aucun , qui voulust se lier à luy durant long-temps ; soit que sa vie fust trop austere , & presque inimitable ; soit que DIEU le permist ainsi ; de peur qu'il ne s'arrestast trop longue-

ment, dans ce genre de vie, l'ayant destiné à de plus parfaits, & plus vtils emplois.

Cependant tous ceux qui le venoient voir, en estoient merueilleusement bien édifiez; car ils ne voyoient ny dans sa chambre, ny en sa personne, ny en ses parolles, ny en ses actions, que des marques d'humilité, de simplicité, & de penitence. Il receuoit vn chacun avec vne fort grande simplicité, sans compliment, & sans se seruir des parolles, ny des actions de la ciuilité mondaine. Il parloit fort peu; si ce n'est qu'il fust interrogé, encore ses réponses estoient-elles tres-briefues; mais tres-substantielles, & pleines de l'Esprit de DIEU; & si éloignées de la complaisance, & de l'amour propre; qu'il ne donnoit jamais occasion à aucun, de s'arrester long-temps avec luy; s'il n'y estoit attiré par la necessité, ou par le pur amour de DIEU, ou de la vertu.

Il ne donnoit rien à la chair, ny au sang; son visage estoit graue, serieux, & mortifié; encore qu'il fust accompagné d'une tres-grande douceur, qui témoignoit la paix & le repos de son interieur. Pendant le temps qu'il a demeuré dans cét hermitage, on ne l'a veu que tres-rarement, & tres-modestement; & il répondoit à l'exemple du grand saint Antoine son patron; *Que les visages tristes & mortifiez, ne sont pas ceux que le demon redoute le moins;* quand on luy demandoit, pourquoy il estoit si rigide. Conformant ses parolles à ses actions, il estoit tres-exact dans ses conseils, & tres-seuere dans ses corrections. Il ne parloit presque jamais que de la mort, des jugemens de DIEU, des peines d'enfer, de la griefveté des pechez, du mépris du monde, de la mort de soy-mesme; & presque toujors de l'imitation de IESVS Crucifié. Quand quelqu'un se plaignoit à luy du mal qu'il souffroit, ou des injures qu'on luy auoit faites; apres luy auoir doucement remonstré, que ses pechez meritoient bien plus que cela, & que IESVS-CHRIST & les Saints auoient bien souffert dauantage; il adjoûtoit d'un ton de voix ferme, & affectif; *O plust à DIEU que tu fusses bien mort: qui n'est pas*

bien mort, n'est pas bon Chrestien, ny selon le cœur de DIEU, ny selon l'estat de IESVS Crucifié.

CHAPITRE XV.

Il triomphe de la tentation, apres y avoir succombé.

SI le Fils de DIEU a terminé sa vie par la Croix, & si nous croyons, qu'il terminera le temps, & le monde par la Croix, qui sera le dernier signe de son arriuée, quand il viendra juger les viuans, & les morts; on peut dire; qu'il y a eû des Croix, dans tous les differens estats de nostre excellent Ecclesiastique, dans ses estudes, dans son employ de Curé à Coutignac, & dans sa vie solitaire. Car sans parler des mortifications qu'il souffroit volontairement qui sont les croix que nous choisissons, & qui bien souuent ne sont pas les plus meritoires, ny les plus agreables à DIEU; parce que nostre volonté s'y rencontre. Il en a beaucoup souffertes contre son gré, toutesfois avec vne singuliere resignation & patience; à l'imitation de IESVS-CHRIST, qui ne laissa pas de porter sa Croix amoureusement; quoy qu'il y eust esté condamné par injustice, & mesme contraint en quelque façon, par la violence de ses ennemis.

Il souffrit des tentations horribles, durant presque tout le temps qu'il demeura dans son Hermitage; & particulièrement, contre la continence; par mille violentes suggestions, & mille representations abominables de l'ennemy; lors mesme, qu'il estoit plus esloigné des occasions, & qu'il trauailloit plus fortement, à mortifier sa chair: DIEU voulant le faire vn vray imitateur de saint Antoine, & de saint Hierosme, ses deux patrons; qui ne souffrirent jamais de plus violentes tentations que dans la solitude; & voulant encore le rendre tres-conforme à IESVS-CHRIST son Fils, qui fut principalement tenté dans le

Desert. C'est pourquoy il disoit vn iour à ses plus familiers (parlant des tentations qu'il auoit eues dans sa retraite; *Qu'il faut tousiours craindre, & ne se tenir iamais assésuré, en quelque lieu, âge, & estat que l'on soit: parce que le tentateur se fourre partout, & il nous attaque avec plus de violence, dans le temps, & les lieux, ausquels il semble deuoir estre plus éloigné de nous.*

Mais son ame n'estoit pas la seule, trauaillée de tentations; son corps ressentoit les mesmes peines: il souffroit vne faim extrême, que la rigueur de ses ieusnes luy causoit; & la tentation se meslant avec les necessitez de la nature, il en estoit pressé avec tant de violence, qu'il auroit mesme osté aux chiens ce qu'on leur donnoit, s'il n'eust vsé de force contre soy-mesme, pour se retenir. Il nous a déclaré plusieurs fois, que cette faim a esté vn des plus rudes assauts, qu'il ait soustenu dans sa solitude; & qu'il en auoit esté souuent presque hors de luy-mesme, par la vehemence qu'il en souffroit. *Ma nature, disoit-il, se plaignoit sans cesse, elle enrageoit, & mouroit à chaque moment: mais ie la laissois gronder, & fremir; & c'estoit le Seigneur, qui faisoit cela en moy par sa grace.* Il succomba vn iour à vne tentation, qui le porta à rompre le ieusne volontaire, contre la resolution qu'il auoit prise de le garder: mais il en fit vne estrange penitence.

Ayant ceüilly quelques noix par les champs, le demon prit de là occasion, de le solliciter à les manger, auant que l'heure du repas fust venuë, sous pretexte de sa foiblesse. Il méprisa d'abord cette suggestion, & ne s'en mit pas beaucoup en peine; ayant decouuert la ruse de l'ennemy: mais la tentation redoublant, deuint si forte; que craignant d'en estre surmonté, il eut recours à ce remede extraordinaire. Comme il sçauoit, que le demon n'apprehende rien tant, que les macerations de la chair; & que c'est vn moyen efficace, pour le mettre en fuite, que de menacer sa confidente; prenant les noix d'vne main, & de l'autre vne discipline maillée, & armée de molettes d'éperon, qu'il portoit touiours sur soy; *Regarde, dît-il, par-*

lant à soy-mesme ; *l'un & l'autre : si tu mange celles cy , avant le repas* , disoit-il en montrant les noix ; *il faudra que tu souffre l'autre* ; montrant la discipline ; *durant les sept Pseaumes penitenciaux*. Il semble que le demon apprehenda l'effet de ces menaces ; parce que la tentation relâcha dès aussi-tost : mais ce ne fut pas pour long-temps ; car à peine eut il remis la discipline dans sa poche , sans quitter les noix , qui seruoient d'occasion au tentateur ; que cet ennemy redoubla son attaque ; & accrut tellement ses forces , qu'apres plusieurs resistances , il le fit succomber.

Que l'occasion est dangereuse , mesme dans les moindres choses ? si le bon Pere Yvan eust jetté les noix , ou qu'il s'en fust éloigné , il n'auroit pas seulement affoibly la tentation ; mais il l'eust entierement vaincuë : il la fortifia , en retenant ce qui en estoit le sujet ; & quoy qu'il se roidist pour quelque temps , si est-ce qu'enfin , il en fut surmonté. Je deurois plustost dire ; qu'il en fut victorieux , qu'il ne tomba que pour se mieux releuer , & qu'il ne se laissa vaincre , que pour r'emporter vne plus glorieuse victoire. Car la cheute fut fort legere , veu qu'il n'y eut pas mesme peché veniel ; n'ayant rompu qu'un jeüne volontaire ; mais le gain qu'il en retira , fut tres-aduantageux ; ayant pratiqué la vertu d'une façon illustre , & tout à fait héroïque.

Si le Prophete nous exhorte d'accomplir les vœux que nous auons faits à DIEU , le Pere Yvan estoit tres-fidele à observer jusques à la moindre de ses resolutions : de façon qu'ayant manqué à celle du jeüne , il voulut garder étroitement celle de la penitence , dont il auoit menacé son corps. En effet avant que d'acheuer de manger les noix , reuenant à soy ; il rougit de sa foiblesse : & comme un valeureux soldat , qui voulant effacer la honte d'auoir lâché le pied , r'anime son courage , & reünit toutes ses forces , pour auoir raison de son aduersaire ; il tira vne cruelle vengeance , de l'affront qu'il crut auoir receu , châtiant son corps par cette rude , & extraordinaire maceration.

Il se dépouilla en mesme temps, pour prendre la posture d'un criminel, ou d'un penitent : & sans attendre qu'il fust arriué à sa cellule ; se mettant sous vn arbre, il se donna la discipline avec violence, durant les sept Pseaumes penitentialux. Si bien que nous pouuons dire ; qu'il se traita à la façon que la justice ordonne, contre les voleurs des grands chemins, qu'elle fait punir preuôtablement ; sur les lieux, où ils commettent les crimes : puis qu'il se punît en ce mesme lieu, où il auoit mangé les noix. Il se punît, dis-je, mais avec tant de rigueur, qu'il en fut tout ensanglanté, & presque brisé des coups ; & son corps en demeura si affoibly, qu'à peine pouuoit-il se soustenir. Mais s'il traita son corps avec tant de rigueur, il faut auoier, que le TOUT-PUISSANT l'en recompensa avec vsure ; car on ne pourroit décrire les graces, & les faueurs diuines, que son ame receut en recompense de sa fidelité.

CHAPITRE XVI.

Il est persecuté dans sa solitude.

LE demon n'osant plus seul attaquer nostre genereux Solitaire, pour luy faire rompre son abstinence, & son ieusne, se sert de finesse, & employe mesme la charité de plusieurs personnes, le faisant conuier à manger chez eux, lors qu'il a plus fortement resolu de ieusner : si bien que nostre bon Prestre nous a dit luy-mesme, [Qu'il auoit fait cette remarque ; qu'auant qu'il eust déterminé de ieusner, il n'auoit esté conuié de personne ; mais qu'après sa resolution, plusieurs, & entre les autres le Curé du lieu l'auoient inuité, & sollicité avec empressement, jusques à luy témoigner, qu'ils se croiroient offensez de son refus.] Mais cela ne fut pas capable de le faire relâcher de sa rigueur ; parec que découurant la ruse du de-

mon, il refusa courageusement; quoy qu'il preuist, que l'on interpreteroit son refus en mauuaise part, & qu'il en seroit mortifié.

C'est vne des ruses ordinaires de nostre ennemy; de nous suggerer, & de nous susciter des tentations, contre les vertus que nous pratiquons, ou que nous voulons pratiquer; sçachant bien, que si il peut nous en empescher l'exercice, il pourra nous porter au vice, avec plus de facilité; & moins de resistance qu'auparauant. Comme nous voyons, que les soldats qui assiegent vne place, n'ont plus de peine à s'en rendre les maistres; dès qu'ils ont trouué le moyen de se deffaire de la garnison. C'est la remarque du disert Chrysologue, sur la tentation du Fils de DIEU dans le Desert; quand il dit, que le demon le sollicita à manger, pour luy faire rompre le ieusne qu'il gardoit avec tant de vertu. *Il demande le miracle du pain; parce qu'il craint le miracle du ieusne.* Le rusé serpent attaque de cette sorte nostre bon Solitaire: mais comme il ne peut corrompre sa fidelité; il suscite vne nouvelle persecution contre son honneur; faisant renouueller les calomnies qu'on luy auoit imposées dans Coutignac. Ainsi quelques personnes malignes, ayant tasché de faire passer nostre bon Prestre, pour vn hypocrite; & de persuader à tous, que ses penitences n'estoient que des feintes, & des dissimulations: comme leur dessein ne put reüssir; parce que ses austerez estoient si évidentes dans sa façon de viure, qu'il estoit impossible de les nier; sans estre conuaincus de mensonges: ils eurent recours à d'autres impostures encore plus criminelles.

Ils l'accuserent derechef d'estre Sorcier, & Magicien: & pour appuyer leurs fausses accusations de quelque apparence; ils tâcherent de persuader, qu'il n'habitoit dans les bois, que pour faire ses sortileges; & que ce n'estoit que par art de Magie, qu'il subsistoit si long-temps, parmy ses rudes penitences, & sans prendre vne nourriture nécessaire.

Ces calomnies paroissoient d'autant plus plausibles; &

estoyent en effet d'autant plus dangereuses ; que les Prestres qui seruoient la Paroisse de Rians sembloient les autho-
riser , par les soupçons , & par les défiances , qu'ils témoi-
gnoient auoir contre nostre pieux Ecclesiastique ; car ils
obseruoient , & faisoient expier toutes ses actions ; com-
me celles d'un méchant homme : ils faisoient tenir du
monde sur le clocher , d'où l'on découuroit son Hermi-
tage ; pour voir quand il sortoit , ou quand il entroit
dans sa cellule , & pour connoistre les personnes qui le
frequentoyent ; afin de trouuer occasion de le décrier , &
d'effacer la grande estime que les gens de bien montroient
auoir de sa haute vertu. Mais si au langage du grand Apô-
tre , *La vertu se perfectionne dans l'infirmité* ; c'est à dire
dans les occasions qui semblent la deuoir affoiblir ; Nous
le remarquons dans l'exemple du Pere Yvan , qui sça-
chant tres-bien toutes les choses , que l'on disoit , & que
l'on faisoit contre luy ; ne laissoit pourtant de continuer
ses exercices , avec la mesme ferueur , & la mesme tran-
quillité. Et quoy qu'il en connût les auteurs , & qu'il
n'ignorast pas ; qu'elles estoient leurs intentions ; il n'en
fit toutesfois aucune plainte ; il ne donna pas mesme au-
cun témoignage d'auersion , ou de refroidissement en leur
endroit ; mais au contraire il redoubla ses penitences & ses
prieres pour eux ; ne voulant nullement souffrir quel'on
en parlât mal ; & mesme recherchant l'occasion de leur
rendre seruice.

Il receut encore dans sa solitude vne autre mortification
tres-sensible ; lors que s'estant auancé dans le bois , il
trouua parmy des rochers vne femme fort âgée , qui par
sa posture , ses gestes , & sa parole , luy fit soupçonner
qu'elle estoit vne Magicienne. Car estant à genoux , les
mains jointes , la teste , & le corps profondement incli-
nez , son visage enflâmé , & ses yeux étincellans , alienée
d'esprit , & transportée d'une fureur diabolique , elle ren-
doit hommage au demon , & faisoit à haute voix des inuo-
cations effroyables.

Cette rencontre estonna d'abord nostre Solitaire , & le

toucha d'une douleur tres-sensible , de voir que l'on rendoit au demon , les respects qui ne sont dûs qu'à D I E U ; & il fut encore touché d'une tres-grande compassion de l'aueuglement , & de la perte de cette miserable : si bien qu'ayant inuoqué l'assistance diuine , & s'estant approché de cette méchante femme ; il la fit reuenir à foy , & l'interrogea doucement , de ce qu'elle faisoit en ce lieu-là ; pour auoir occasion de l'instruire , & de la retirer de ce mal-heur. Mais cette Megere , ne l'eut pas plustost reconnu , qu'elle entra dans vne si grande rage , d'auoir esté détournée ; qu'elle vomit contre luy toutes les injures , & toutes les imprecations , que sa malice , & son desespoir luy suggererent. Apres quoy elle s'enfuit , sans entendre nulle réponse ; continuant ses blasphèmes , & ses maledictions , avec d'horribles menaces qu'elle se vangeroit , de l'injure qu'elle pretendoit auoir receüe.

Nostre bon Prestre ne fut point ému de ces menaces , ny de ces imprecations-là , mais il fut touché des blasphèmes qu'elle auoit vomis contre D I E U ; & de l'estat déplorable de son ame ; c'est pourquoy il se mit aussi-tost à genoux pour en demander pardon à D I E U pour elle : & lors qu'il fut retourné dans son Hermitage , il fit plusieurs penitences pour sa conuersion : se vengeant ainsi de cette femme , à la façon des seruiteurs de D I E U ; qui rendent bien pour mal , & benediction pour maledictions.



CHAPITRE XVII.

Il quitte son Hermitage, & accepte la charge de Vicaire de la ville de Brignolles.

DAns l'Histoire sainte, la plus-part des grands hommes dont DIEU s'est seruy pour la gloire de son Nom, & pour le salut des ames, ont esté instruits par l'Esprit diuin dans les bois, ou dans les Cloistres, ou dans quelques autres lieux retirez du commerce des hommes; auant que de paroistre en public, & de s'éleuer aux grands, & illustres emplois de la Maison du Seigneur. C'est ainsi que la Prouidence, en a vsé enuers Moïse, Helie, & Dauid, dans l'ancien Testament; enuers saint Iean Baptiste, les Apostres, & IESVS-CHRIST mesme, dans le Nouveau; & à l'endroit des saints, Hierôme, Augustin, Basile, & les autres plus éminens Peres & Docteurs de la sainte Eglise; qui ont vécu dans la solitude des Deserts, ou dans la retraite, des Cloistres; auant que de s'exposer au public, pour s'addonner à l'estude de leur perfection particuliere; auant que de vacquer au secours, & au salut des fidelles. Nous pouons dire, que l'Esprit de DIEU a conduit nostre Imitateur par les mesmes voyes, que tous ces grands personnages ont suiuiés; puis qu'apres luy auoir fait commencer les fonctions, de la vie publique dans l'Eglise de Coutignac, ce qui n'auoit esté qu'un apprentissage & vn espee de Nouiciat, DIEU l'appella dans la solitude, pour le rendre maistre de soy, & des demons, par les grandes victoires qu'il en r'apporte; & pour le faire deuenir profés dans la science des Saints, & dans l'art de conduire les ames; qui au sentiment de saint Gregoire, est l'Art des arts, & le plus difficile de tous.

En effet, DIEU le r'emplit dans cette retraite, des eaux de la grace; qu'il deuoit répandre sur tant d'ames qu'il

aura sous sa conduite, & il luy fait pratiquer dans ses actions, la vie penitente, qu'il doit enseigner aux autres, par ses paroles. Mais enfin la Prouidence le tire de cette obscurité; pour le mettre au iour, & luy fait quitter cette vie solitaire, pour reprendre sa vie Apostolique. Il viuoit seul retiré dans son Hermitage depuis enuiron dix ans; lors qu'un pieux Ecclesiastique de la ville de Toulon, grand seruiteur de DIEU, l'estant allé trouuer, tâcha par plusieurs raisons de luy persuader, qu'il deuoit quitter cette sorte de vie; que DIEU l'appelloit au secours des ames; & qu'il deuoit s'y resoudre, & s'y disposer; qu'autrement il serendroit indigne de la continuation des graces du Ciel, & coupable de la perte des ames, que DIEU vouloit sauuer par son Ministère. Ce deuot Prestre vsa mesme d'autorité enuers nostre Hermite; le menaçant, que sa vie seroit exposée aux illusions du demon, & qu'il courroit risque de se damner; s'il n'obeïssoit aux ordres de DIEU, dont il se disoit le Messager & l'Interprete.

Le Pere Yvan écouta cet Ecclesiastique, avec le respect qu'un disciple rend à son maistre; receuant ses aduis avec grande humilité; comme d'un homme, qu'il connoissoit estre tres-éclairé, & remply de l'Esprit de DIEU. Toutesfois craignant, qu'il n'y eust quelques embusches de l'esprit malin, qui se transuestît en Ange de lumiere, & se sert quelquesfois des Saints, pour tromper les Saints; il demanda du temps pour consulter DIEU, & pour examiner cette affaire à loisir; comme vne chose de grande importance.

Mais il ne fut pas long-temps; à rechercher la connoissance de la volonté de DIEU dans ce changement; parce que la diuine Bonté la luy declara; luy faisant ouïr vne voix du Ciel, qui luy intima sa vocation à la conduite des ames. Vne seconde luy fit connoistre, que la Charité estant la Reyne des Vertu, vne once en valoit mieux que cent liures de penitence. Enfin visitant la Chapelle de Nostre-Dame de Grace, pour implorer le secours de la Sainte Vierge, vne troisième luy dît sensiblement, & di-

stinctement. *Antoine, Antoine, plus d'amour, & moins de rigueur. Sors de ta solitude, & travaille au salut des ames.* Ces paroles furent assez puissantes, pour le déterminer à l'estat de la vie qu'il deuoit embrasser. Aussi calmerent-elles d'abord tous les doutes, & toutes les apprehensions; que son humilité, & la crainte qu'il a toujours eue de se damner, en travaillant à sauuer les autres, auoient excitées dans son interieur: si bien qu'il ne douta plus qu'elles ne fussent de la part de DIEU, sentant l'effet merueilleux qu'elles produisirent dans son ame. Car il n'ignoroit pas cette difference, que les Theologiens mettent entre la parole de DIEU, & la parole des hommes: que celle-cy n'est que significatiue, & celle-là est effectiue: que la parole des hommes estant sterile, nous fait connoistre la volonté de celuy qui la forme; mais elle n'opere rien: au lieu que la parole de DIEU estant feconde, opere ce qu'elle signifie, & produit elle-mesme l'effet qu'elle demande.

Comme donc il ne restoit plus à nostre Ecclesiastique, que d'accomplir le dessein, que DIEU luy auoit inspiré; il eut recours à DIEU mesme, & luy fit cette demande de saint Augustin: *Seigneur, donnez moy le pouuoir de faire ce que vous me commandez; puis que vous avez daigné m'en donner le vouloir.* Le voilà exaucé: on luy vint offrir dans son Hermitage, ce qu'il deuoit rechercher ailleurs: & on le pressa d'accepter l'employ, qu'il deuoit demander avec instance.

Le Curé de la ville de Brignolle, ayant connu son merite, & le grand talent dont DIEU l'auoit enrichy, pour le seruice d'une Eglise, & pour la conduite des ames; le visita dans sa solitude, & luy offre la charge de Vicaire dans sa Paroisse. Mais ne se contentant pas de la luy offrir, il le supplie instamment de l'accepter, & le presse de telle sorte, qu'il tire son consentement, auant que de le quitter; luy donnant tout le pouuoir, & luy promettant tout le secours, qu'il luy seroit necessaire, pour y travailler avec fruit, & dans toute l'estendue de son zele.

CHAPITRE XVIII.

Le Curé luy permet de continuer ses penitences dans la charge de Vicaire.

NOstre Imitateur deuoit ce semble, changer de façon de vie, dans ce changement de vocation ; & estant obligé à de grands trauaux, & à des soins continuels dans les fonctions de sa charge, retrancher de ses mortifications ; il continua neantmoins presque toutes ces sortes d'austeritez, & ne modera que celles qui estoient incompatibles à sa profession ; & qui l'auroient empesché, de rendre à ses paroissiens, toute l'assistance, que sa charité leur deuoit.

En effet il ne changea pas sa façon de coucher : si ce n'est qu'il la rendit plus austere ; car son liêt estoit la platte terre, son cheuet vne pierre ; & il ne se seruoit que d'un gros manteau de bure à coque-luchon, dont il se couuroit la teste, & tout le corps. Ce Curé en ayant esté aduerti, & l'ayant luy-mesme apperceu, en fut sensiblement touché ; & craignant, que cette rigueur accompagnée des trauaux de la charge, ne rendit son Vicaire incapable de continuer long-temps ; il luy fit dresser vn liêt, de deux pieds de large & six de long, & luy commanda d'y coucher. Ce qu'il fit, mais en telle sorte qu'il n'y mît pas mesme de la paille.

Ce charitable Curé tasche encore, de faire quitter à nostre feruent Ecclesiastique l'vsage de ses cilices, de sa cotte de maille, de ses ceintures de fer, & de ses disciplines : toutesfois il ne put le luy persuader, ny par ses conseils, ny par ses prieres, & il n'osa le luy commander, craignant de s'opposer à l'Esprit de DIEU ; qu'il connut estre dans son Vicaire, par l'humilité, l'innocence, la discretion, & les autres vertus qu'il remarqua en luy ; si

bien

bien qu'après auoir soigneusement examiné sa conduite, & reconnu qu'elle estoit conforme à l'Euangile , il luy permit amplement d'exercer toutes ces rigueurs , & de faire toutes les penitences, que sa deuotion luy suggere-
roit. Aussi ce Curé n'ignoroit-il pas ; que si les inférieurs, doiuent obeyr exactement , pour éuiter les illusions du demon, qui ne craint rien tant que l'obeïssance ; les Superieurs doiuent auoir le don de discretion, pour condescendre aux inférieurs ; quand ils ne découurent aucune tromperie en eux : de peur d'étouffer les lumieres de l'Esprit Diuin, en adherant par trop aux raisons de la prudence humaine ; & de peur d'affoiblir les mouuemens de la Grace, en appuyant plus qu'il ne faut les foiblesses de la nature.

Ces permissions du Curé , encouragent si bien nostre nouveau Vicaire, que ne se contentant de ses penitences ordinaires, il inuente de nouuelles macerations. En effet, il endosse vne haire, dont il ne s'estoit pas encore seruy ; portant vne chemise, tissüe de petits joncs marins, qui estant fort longue, en telle sorte qu'elle couuroit tout son corps, depuis le col jusques aux genoux ; estoit beaucoup plus aspre, que la cotte de maille dont nous auons parlé ; parce qu'il y estoit enfermé, comme dans vne prison : outre que les pointes de jonc, en façon de petits clous, le picquoient bien plus sensiblement en tous les endroits de son corps, que les mailles de fer, qui ne bleissoient que par leur dureté, & leur pesanteur.

Il changeoit de temps, en temps ses instruments de penitence ; employant tantost les vns, tantost les autres ; afin de renouveler ses souffrances par le changement, & d'empescher que son corps n'en fust soulagé, ou moins tourmenté, par l'accoustumance de l'habitude. Il continuoit encore de porter vn collier dentelé, & garny de pointes dont la seule veüe donnoit de la frayeur : de façon que son pauvre corps n'estoit jamais déchargé de ces fardeaux meurtriers ; sinon lors que voulant le matter par vne plus cruelle maceration, il se disciplinoit avec des chaisnes de


fer, & des cordes fines, armées de rosettes; ou avec des orties, avec tant de rigueur, que ses disciplines en estoient toujours ensanglantées. De maniere qu'il semble, selon la remarque qu'en a fait l'Autheur de son Oraison funebre, que cét austere Prestre estoit vn troisiéme Simeon Stilite; que son corps estoit de marbre, ou de bronze; & qu'aux termes de Ieremie, DIEU l'auoit proposé dans son Eglise, comme vne colonne de fer, & d'airain, pour seruir d'exemple de penitence à tous les fidelles; & condamner par la ferueur & l'austerité de sa vie, la lâcheté & dissolution de nostre siecle.

Il ne changea aussi presque rien à son abstinence, continuant à ne manger que du pain, des fruiçts, & des herbes: & si par fois quelque personne deuote, luy enuoyoit de la soupe, comme à vn pauvre Prestre; sçachant qu'il faisoit profession d'une pauvreté Apostolique; il l'acceptoit avec humilité: mais s'il en mangeoit; ce n'estoit que pour receuoir beaucoup plus de mortification, que de plaisir. Car il mettoit ce qu'on luy auoit apporté en lieu, où les chiens, & les chats en pouuoient manger; & apres qu'il connoissoit que les bestes s'en estoient repuës, il prenoit luy-mesme le reste, nonobstant l'auersion, & la repugnance qu'il en sentoit. Et ce qui doit paroistre plus merueilleux; est, que comme il aymoit naturellement la netteté; cette mortification luy causoit vne extrême peine. & neantmoins il la pratiquoit avec tant de force; que quand on l'en reprenoit comme d'une chose trop vile, & trop abjecte; bien loin de s'en émouuoir, il apportoit plusieurs raisons pour justifier son action, & en persuader la pratique aux autres. *Les bestes, disoit-il, ont esté faites par la mesme Main que nos corps; & nos corps sont beaucoup plus vils; il faut donc les humilier, & les soumettre à tout; & les traiter avec moins de douceur que les bestes: parce que celles-cy ne sont pas capables d'offenser DIEU; & ceux-là nous font connoistre plusieurs pechez.*

Il gardoit le ieusne avec autant d'exactitude que dans son Hermitage; si ce n'est, qu'il mangeoit le matin, apres

le Service de son Eglise: afin d'auoir plus de force de tra-
 uailer pendant le iour, à la visite des malades; & aux au-
 tres exercices de la charité; ne prenant le soir, que quel-
 ques morceaux de pain, quand il se sentoit extraordinaie-
 rement foible; mais il luy arriuoit bien souuent, de passer
 les iours entiers sans manger, se seruant d'un merueilleux
 artifice, pour se diuertir de la faim. Car apres s'estre em-
 ployé au service de ses paroissiens, dès qu'il estoit arriué
 dans sa chambre, voulant tromper l'appetit de manger,
 dont il estoit pressé; il s'occupoit à quelque travail
 d'esprit, ou des mains, à la lecture, à l'estude, à grauer des
 moules d'Images de Nostre Seigneur, de la tres-Sainte
 Vierge, ou à peindre quelque tableau de deuotion.

L'heure du disner estant venue, comme il se sentoit en-
 core plus pressé de la faim, il differoit jusques à deux heu-
 res apres midy; de deux heures à quatre; & quelquesfois
 de quatre jusques au lendemain, s'occupant au travail,
 avec tant d'application pendant tout ce temps-là; qu'il per-
 doit quasi la pensée de prendre sa refection; ne se don-
 nant presque pas le loisir, d'écouter les empressements de
 son corps, quoy que pressé d'une tres-grande faim. Si
 bien que nous pouuons dire; que nostre bon Prestre a vou-
 lu se rendre un Martyr de penitence, selon qu'une Reli-
 gieuse de tres-haute vertu, & de ses premieres filles spiri-
 tuelles dans Brignolle, l'appelle dans une des lettres, qu'el-
 le nous en a écrit: & en effet il semble; qu'on ne peut au-
 trement considerer sa vie, que comme un martyre conti-
 nuel; si l'on regarde les diuerses, & rigoureuses macera-
 tions qu'il a exercées contre son corps.



CHAPITRE XIX.

Ses exercices dans la charge de Vicaire.

L'Apostre saint Paul exhortant les Pasteurs ; à trauailler à leur perfection , leur enjoint avec grande raison ; de ne pas negliger le soin , qu'ils doiuent auoir de leurs inferieurs. *Vacquez à vostre salut , & à celuy de vostre troupeau.* Car c'est vn effet de la charité bien ordonnée , de pouruoir à tout ce qui est d'obligation : & c'est encore vne asseurée marque , qu'une ame est dirigée par l'Esprit de Verité , quand elle ne ueglige aucune des fonctions de sa charge ; & qu'elle s'employe avec fidelité , à tout ce que la justice , & la charité en exigent.

Nostre bon Vicaire s'addonnoit à son auancement particulier , sans aucun prejudice du bien de ses paroissiens ; & il s'appliquoit à la sanctification de ses paroissiens , sans aucun interest de la sienne. Ainsi ayant vne ferueur singuliere , il estoit toujours au matin le premier dans l'Eglise ; de façon qu'il deuançoit mesme les Clercs , souuent mesme il sonnoit le Salut , & les Matines : & comme il estoit le premier à entrer dans l'Eglise , & qu'il preuenoit tous les autres par sa diligence ; il les surpasseoit aussi par sa fidelité à y demeurer ; car il n'en sortoit que le dernier , apres que le Seruice estoit acheué , & qu'il ne restoit plus rien à faire : employant ses matinées à prier dans le Chœur , ou en particulier ; à celebrer la sainte Messe , avec les preparations , & les actions de graces ordinaires ; à administrer les Sacremens , à ceux qui se presentoient ; & à attendre avec patience , les personnes qui en auoient besoin ; pour les attirer par sa presence , & par la facilité qu'il leur offroit.

Il n'est pas necessaire que ie repete en cet endroit , ce que j'ay déjà remarqué de sa deuotion , de son zele , & de

sa fidelité, dans tous les deuoirs d'un excellent paroissien, pendant le temps qu'il exerçoit la charge de Curé dans l'Eglise de Coutignac. Car il en auoit encore dauantage dans la Paroisse de Brignolle; & il faut aduoüer, qu'il exerçoit encore avec plus de respect, plus de ferueur, & plus d'exactitude toutes les diuerses fonctions d'un tres-pieux & tres-vigilant Pasteur: sa retraite de dix années dans l'Hermitage de saint Roch, luy ayant donné de grandes connoissances, de l'importance des fonctions Ecclesiastiques; & luy ayant fait acquerir, par l'exercice de l'oraison, & de la penitence, les graces & les dispositions requises, pour s'en acquitter soigneusement.

L'apresdisnée il s'occupoit à visiter les malades, les pauvres, les affligés, & tous ceux qu'il jugeoit auoir besoin de sa presence. Il instruisoit les vns, il encourageoit les autres, il releuoit ceux-cy de leur cheutes, il fortifioit ceux-là dans les voyes du Seigneur: de façon qu'il taschoit de dresser vn chacun dans l'estude de la perfection Chrétienne; sans qu'il témoignast jamais, de lassitude, d'ennuy; ny de dégoust dans ces diuerses & penibles occupations.

Quand ses exercices de charité & de justice luy donnoient quelques heures de loisir; il les employoit, ou à prier dans l'Eglise deuant le Saint Sacrement, & deuant l'Autel de la Sainte Vierge; ou dans sa chambre à estudier, à lire, à peindre, à grauer quelques Images de deuotion; ou à visiter quelque deuote Chapelle des champs, ou des lieux circonuoisins; sans qu'il prist aucun repos, ny aucun diuertissement. Il craignoit mesme de perdre le temps dans les entretiens familiers, ou en des promenades avec ses amis; si ce n'est que l'on parlast de quelques cas de conscience, de quelque sujet de deuotion, ou de quelque autre semblable maniere. De sorte que nous pouons le comparer à ces diuins animaux du Prophete Ezechiel, qui poussez par le mouuement de l'Esprit de DIEU, traînoient le Chariot de la Gloire du Seigneur; sans s'arrester, sans reculer, & sans jamais perdre aucun relasche.

Sa vigilance estoit aussi extraordinaire, mesme pendant la nuit ; car il ne dormoit que deux, ou trois heures ; & se couchoit mesme sans quitter sa soutane, ny ses habits ; afin d'estre plustost disposé à aller secourir les malades ; quand on le viendroit appeller : encore se leuoit-il à la minuit, pour vacquer à l'oraison ; & lors qu'il estoit pressé du sommeil, il se tenoit debout sans s'appuyer ; quelquesfois il sortoit de sa chambre, & s'exposoit aux injures de l'air, & du temps ; mesme au cœur de l'Hyuer ; quoy que le froid fust tres-rigoureux. Bien souuent se faisant violence, lors que son corps auoit plus grand besoin de repos, il alloit à la minuit faire sa priere, & prendre la discipline dans le Cimetiere de la Paroisse, pour le soulagement des Trépassés.

CHAPITRE XX.

Du soin qu'il auoit des pauvres, & de sa charité enuers les malades de l'Hostel de Dieu.

LA charge de Vicaire l'ayant rendu debiteur à tous ; en sorte qu'il pouuoit dire ainsi que le grand Apôtre, disoit de soy-mesme ; *Je suis debiteur à tous.* Il estoit tres-vigilant, à pouruoir aux necessitez spirituelles d'un chacun ; & particulièrement à celles des pauvres : car il ne se mesloit que des besoins spirituels des riches, leur donnant des aduis necessaires pour leur perfection ; encore le faisoit-il avec reserue ; ne les visitant, & ne les entretenant que quand il y estoit contraint par la necessité. Mais il prenoit un grand soin de tout ce qui regardoit les pauvres ; tant dans leurs necessitez spirituelles, que dans leurs besoins temporels. Il les receuoit avec grande affabilité, & tendresse ; il les visitoit avec assiduité ; il s'interessoit dans leurs déplaisirs ; il leur portoit grande compassion dans leurs souffrances ; & leur donnant dans toutes

les rencontres, de veritables marques d'une affection de pere, il taschoit de s'insinuer dans leurs esprits; pour les attirer avec plus de facilité à la priere, à la frequentation des Sacremens; & à la pratique des autres vertus Chrétiennes.

Quelquesfois prenant occasion de leurs miseres temporelles, il leur parloit des maux eternels, qu'ils deuoient apprehender dans l'autre vie; s'ils ne faisoient bon usage de ce que la Prouidence diuine leur faisoit souffrir sur la terre. Il les entretenoit des aduantages de la Gloire preparée à ceux, qui endurent patiemment; il s'estudioit encore, à leur persuader le mépris des choses terrestres, & qu'ils deuoient s'estimer heureux, d'en estre dépoüillez. Mais ordinairement il leur proposoit l'exemple de I E S U S-CHRIST, qui a choisi la pauvreté, qui ne voulut auoir que des pauvres à sa suite; & qui a mesme protesté hautement, que son Pere l'auoit enuoyé principalement pour les pauvres.


Dans ses Catechismes, il s'adressoit plustost aux enfans de basse extraction; qu'à ceux qui estoient d'une condition élevée; & quand il estoit appelé pour administrer les Sacremens aux malades, il sembloit auoir plus de joye & receuoir plus de satisfaction de les conferer aux pauvres, qu'aux riches. Si bien que, quand on luy demandoit la raison de cette conduite; *Il y a plus à gagner, disoit-il, pour le Ciel, avec ceux qui semblent estre l'opprobre, & l'abjection des peuples, qu'avec ceux qui sont dans l'opulence, qui n'est que trop souvent la mere d'iniquité: parce que DIEU donne à ceux-là, plus de biens spirituels; & ils sont mieux disposez; & du moins ils n'ont pas de si grands empeschemens, à profiter des instructions qu'on leur donne.* Outre ces raisons, qui regardent le profit des pauvres; il apportoit deux autres motifs de sa conduite. [Le premier est l'imitation de I E S U S-CHRIST qui a toujours témoigné faire plus d'estat des pauvres, que des riches: puis qu'estant prié de guerir vn pauvre seruiteur du Centenier de Capharnaüm, il s'offrit volontairement de le visiter; & il refusa d'aller

voir, le fils d'un Prince de la mesme Ville, qui se mouroit, encore qu'il en fust instamment supplié.] Son second motif estoit l'amour de l'humilité, & de la mortification. *La nature*, disoit-il, *trouue de la complaisance parmy les riches, & l'amour propre s'y satisfait : il y a de la vanité à craindre, & de l'attachement à apprehender ; au lieu que parmy les pauvres, l'on ne trouue ordinairement que des suiets d'humiliation, & de mortification, & mille sortes d'incommodes.*

Mais comme sa charité ne regardoit pas seulement le besoin spirituel des pauvres, il auoit encore un tres-grand soin de leurs necessitez temporelles ; car il s'informoit diligemment de leur estat, & particulierement des honteux : si bien qu'apres leur auoir donné tout ce qu'il auoit, il faisoit la queste pour eux, & leur distribuoit luy-mesme les aumosnes, la nuict, ou de grand matin, lors qu'il croyoit de n'estre pas apperceu : Quoy que sa charité fust vniuerselle, pour tous les pauvres, en quelque estat qu'ils fussent ; neantmoins elle paroissoit particulierement enuers ceux qui estoient dans l'Hospital ; car il les visitoit tres-souuent, & en auoit un singulier soin. Et ainsi quelque maladie, ou vlcere qu'ils eussent ; il s'employoit à les soulager avec toute la cordialité, qu'un pere scauroit témoigner à ses enfans ; leur donnant à manger, faisant leurs lits, nettoyant leurs playes, leur rendant enfin avec humilité toute sorte de seruire, & embrassant pour eux avec joye toute sorte d'incommodité. Si bien qu'il faisoit connoistre par ses actions ; que son ame estoit embrasée de cette excellente charité ; qui au langage du grand Apostre, souffre tout, supporte tout, ne se rebute de rien ; & ne se lasse jamais.

Entre les diuerses mortifications que le bon Pere Yvan exerçoit, j'en ay obmis vne des plus sensibles, & des plus importunes & qui estoit continuelle, & accompagnée de honte, & de mépris. C'est que cet austere Ecclesiastique n'ayant point de linge que son mouchoir, & son rabat ; & ne portant pour chemise qu'une tunique de grosse étoffe, qu'il

qu'il ne quittoit jamais; que quand elle estoit vſée, & qu'il ne vouloit pas meſme nettoyer, quelque beſoin qu'il en euſt; diſant avec le grand ſaint Hilarion, qu'il ne falloit pas chercher la netteté dans le cilice. Il auoit par tout ſon corps vne horrible quantité de vers; qui le rongeoient ſans ceſſe; & le nombre ſ'augmentant encore par les viſites, qu'il rendoit aux pauvres, & par le ſejour qu'il faiſoit dans l'Hospital; il arriuoit par fois qu'il en paroifſoit meſme ſur ſes habits. L'on ne ſçauroit exprimer, combien il en receuoit de honte, de mépris, & de conſuſion; & outre cela, le martyre tres-importun qu'il en enduroit. Cependant, le deſir de faire penitence, la luy rendoit ſi agreable, qu'il ne vouloit point en eſtre ſoulagé: refusant de laiſſer nettoyer ſes habits, & ne permettant qu'avec peine qu'on luy oſtaſt, ce qui paroifſoit au dehors. *Auſſi, diſoit-il, que c'eſtoient les perles, & les pierres precieſes des pauvres; je ne ſuis, adjouſtoit-il, que de terre qui eſt la demeure des vers; & puis que noſtre corps en doit eſtre mangé, & que c'eſt le partage qu'il aura; il faut l'y accouſtumer de bonne heure, & le faire ſouffrir & mourir continuellement.* C'eſtoit la réponſe, qu'il rendoit à ceux qui ſe plaignoient à luy-meſme, du mépris, & de la trop grande rigueur, dont il vſoit pour ſ'humilier. Nous trouuons quelque choſe de ſemblable dans les Vies de ſaint Simeon Stilite, & de ſaint Thomas Archeueſque de Cantorbie; mais il ſemble qu'on doit pluſtoſt admirer, que ſuiure cette ſorte de mortification.



donnerent bien-tost vne grande estime , & vne confiance filiale ; qu'ils disposerent , à recevoir les semences de l'amour des Vœux , & de la vie reguliere , que ce pieux Directeur , jetta insensiblement dans leurs esprits. Aussi ne les entretenoit-il ordinairement , que de l'abnegation interieure , du renoncement de la volonté , de la mort de soy-mesme , de l'imitation de IESVS-CHRIST pauvre , & obeïssant ; & desemblables vertus ; qui sont attachées à la perfection religieuse.

Entre ces filles , qui auoient vn grand respect , & vne grande confiance au Pere Yvan ; il y en eut des premieres , qui voulurent se soumettre entierement à sa conduite , & ne suiure que sa direction : & ce ne fut pas , par vn attrait humain , ny par vn mouuement de legereté , qu'elles firent ce choix ; mais par vne inspiration diuine , & par la connoissance qu'elles eurent des graces extraordinaires , dont le Pere Yvan estoit enrichy. Car comme elles auoient de la peine , à luy decouurir l'estat de leur interieur ; il le connut par reuelation diuine , si bien qu'auant qu'elles luy en parlassent ; il leur declara tout ce qu'elles auoient dans leur ame , beaucoup mieux , qu'elles n'auroient sceu le declarer elles-mesmes.

Leur soumission volontaire , obligea nostre bon Prestre d'en auoir vn soin particulier : en suite dequoy , faisant des progrès merueilleux , dans les voyes de la perfection , & receuant mesme de la bonté du S E I G N E U R , plusieurs graces , & faueurs extraordinaires , elles se trouuerent enflâmées du desir de faire des Vœux , & d'embrasser la vie religieuse. L'on ne scauroit dire la joye que le Pere Yvan receut , quand elles luy declarerent cette resolution ; ny combien il prit de soin , & de peines , pour les y encourager , pour les fortifier en ce dessein ; & les ayder à vaincre les obstacles qui s'y rencontreroient ; ne cessant de les y exhorter , de viue voix , pendant le temps qu'il demeura dans Brignolles , & continuant de les y porter par ses lettres , quand la Prouidence diuine l'obligea de s'en éloigner. Enfin ces vertueuses filles ayans attiré leurs

compagnes, qui auoient esté disposées par les pratiques, & par les aduis que le Pere Yvan leur auoit donnez ; firent le Vœu de Religion, sous la Regle de saint Augustin, en l'année 1636. & d'une Congregation seculiere, elles se rendirent vne Communauté Religieuse.

Le SEIGNEUR, ayant beny les soins, & les trauaux de nostre excellent Ouurier ; les semences de la vie religieuse qu'il auoit jettées produisirent vne riche, & abondante Maison : en telle sorte, que ces deuotes filles de sainte Vrsule de Bringolle, ayant embrassé par son conseil l'estat religieux, ont attiré par leur exemple, sous la banniere de la Religion, toutes les autres Communautés du mesme Institut estably en Prouence. Si bien que, si la bonté des ruisseaux ; se doit r'apporter à leur source ; nous pouuons dire, que le Pere Yvan participe à l'honneur, & au merite de la Reforme des Congregations de sainte Vrsule de Prouence, puis qu'il en a donné les premieres dispositions.

Mais cette occupation de nostre Imitateur, n'a esté que comme vn essay du grand ouurage, auquel il estoit appelé : DIEU ayant voulu l'employer à reformer vne Maison de filles déjà establies ; parce qu'il deuoit estre le Fondateur d'un nouuel Institut dans son Eglise. Et c'est ainsi, que le SEIGNEUR dispose ses seruiteurs, aux grands emplois, pour lesquels il les a choisis ; en les occupant en des trauaux mediocres, & qui en ont de la conformité : comme nous voyons, que sa Prouidence fit apprendre à son seruiteur Moïse ; la politique dans la Cour de Pharaon, pour la luy faire exercer, dans la conduite de son peuple : & le SAUVEUR de nos ames exerça ses Apostres en des petites missions, dans les bourgs de la Iudée ; pour les disposer à la mission vniuerselle, qu'ils deuoient faire, dans tous les Royaumes du monde.

CHAPITRE XXII.

Comment il se comporte enuers sa mere.

LE grand Apostre exhortant les fidelles, à faire du bien à tout le monde, les excite à auoir vn soin particulier de leurs parens ; sur peine d'estre declarez, plus méchans que les infideles. C'estoit la pratique de nostre Imitateur ; car estant enflâmé d'une charité vniuerselle, pour toutes sortes de personnes, il auoit vn singulier zele, pour le salut de ses plus proches ; ainsi qu'il a témoigné enuers sa mere ; qui l'ayant accompagné dans le lieu de Coutignac, & dans sa solitude, l'auoit aussi suiuy dans Brignolle, & s'estoit logée avec luy. Cette bonne femme, cauoit beaucoup plus d'incommodité à son fils, qu'elle ne luy donnoit de soulagement ; parce qu'estant foible, fort âgée, & pleine d'incommodité, elle estoit presque toujours atteinte de quelque maladie ; & particulièrement les dernieres années de sa vie ; qu'elle tomba dans des si grandes foiblesses, & fut trauaillée de tant de maux, qu'elle auoit de la peine à se tirer de son liét. Nostre pieux Ecclesiastique auoit vn tres-grand soin de la consoler, de l'assister, & de luy fournir avec vn amour filial, tout ce qu'il connoissoit luy estre necessaire, selon sa condition, son âge, & son estat, sans luy auoir jamais témoigné de dégoust, de l'ennuy, ny de refroidissement. Aussi sa charité eust esté mal ordonnée, si donnant tout ce qu'il auoit aux pauures estrangers, par le seul motif de l'amour diuin ; il eust refusé à sa mere, ce qu'il luy deuoit par tiltre de justice : & si exerçant les œuvres de supererogation, qui ne sont que de conseil, il eust manqué à celles qui sont enjointes par exprés commandement ; par vn commandement dis-je qui est le premier de la seconde Table ; & le premier aussi en promesse selon saint Paul.

Cet Apostre disant , que Melchisedech Prestre du SEIGNEVR estoit sans pere , sans mere , & sans genealogie , nous enseigne , que la dignité du Sacerdoce , n'est point attachée , à la chair , ny au sang ; & que si vn Prestre obeït à son pere , & à sa mere , en qualité de fils , il leur doit commander , en qualité de Prestre , & exercer sur eux l'autorité de pere , en ce qui regarde la gloire de DIEV , & leur salut. C'estoit la conduite de nostre fidele Ecclesiastique ; car il obeïssoit à sa mere , & il se comportoit enuers elle avec grand amour , & grand respect , en ce qui touchoit le soin de sa santé , & les choses necessaires à sa conseruation : mais il luy commandoit , & il agissoit avec elle comme pere , dans l'affaire de son salut , & dans le deuoir de sa charge. Elle se plaignoit quelques fois ; de ce qu'il ne demouroit pas assez long-temps auprès d'elle ; & qu'ayant tant de charité , pour s'arrester avec les autres malades , il sembloit qu'il en eust fort peu , pour elle ; parce que pour ne manquer à ses autres fonctions , il n'y demouroit pas si long-temps qu'elle auroit souhaitté. Nostre Imitateur , luy faisant vne réponse , semblable à celle que le Fils de DIEV fit à la Sainte Vierge dans le Temple , *Ma mere* ; luy disoit-il ; *il faut que ie m'employe aux affaires de mon PERE Celeste , & que ie m'acquitte de la charge , que sa Providence m'a donnée. DIEV vous puniroit , adjoustoit-il , & moy encore ; si ie manquois à quelques-unes de mes obligations ; pour vous estre trop condescendant.*

Il regloit en suite ses prieres & ses deuotions ; il l'aprenoit de ses deffauts , & la conduisoit en toutes choses avec l'autorité d'un Directeur : si bien qu'elle luy obeïssoit avec soumission , comme vne de ses plus fidelles filles spirituelles. Mais aussi prenant quelques fois , la qualité de mere spirituelle , elle l'exhortoit avec zele ; & son fils l'écoutoit , avec docilité. De maniere que c'estoit vn entretien également agreable , & exemplaire , que celui de cette pieuse mere , & de ce vertueux fils ; car la nature n'y trouuoit aucune complaisance , la chair , ny le sang n'y auoient aucune part : & l'on n'y pouuoit re-

marquer, que les sentimens de la Grace, & les mouuemens de l'Esprit diuin; accompagnez d'une rare innocence, & d'une merueilleuse simplicité.

Cette bonne mere, qui auoit vn zele admirable, pour le salut de son fils, ne cessoit de l'exhorter, avec des tendresses maternelles; à n'aspirer à aucune dignité Ecclesiastique; à ne vouloir même amasser aucuns biens temporels: mais à continuer sa vie, dans la pauvreté, dans le trauail, & dans vne entiere dépendance de la Prouidence diuine. *Mon fils*, luy disoit-elle avec vne douceur singuliere; *quoy que nous soyons tres-pauvres; toutesfois ie ne desire point, que vous ayez aucun Benefice; mais plustost ie souhaite, que vous soyez tousiours dans la necessité, de seruir l'Eglise. l'ayme bien mieux*, adjoustoit-elle, d'un ton ferme, & qui montrait sa generosité; *vous voir soumis, & obeissant; que si vous estiez Supérieur, & dans l'autorité de commander: car ie scay tres-bien, qu'aucun ne vous portera enuie; tandis que vous serez dans cet estat; que vous jourez d'une plus grande paix; & que vous ferez mieux vostre salut.*

Ses œuvres estoient conformes à ses paroles; car vne personne deuote, ayant voulu donner du bien à son fils, & luy establir vne pension viagere; cette femme forte s'y opposa; & porta son fils à la refuser: disant; *Qu'il seroit assez riche; tandis qu'il seroit fidele à viure en bon Prestre.* Plust à DIEU, que tous les parens qui destinent, ou qui ont déjà introduits leurs enfans dans l'estat Ecclesiastique, eussent des sentimens conformes, à ceux de cette genereuse mere: nous ne verrions pas tant de desordres, ny tant de scandales; l'auarice, & l'ambition, ne feroient pas de si grands rauages dans la Maison du SEIGNEUR!

Mais si nostre pieux Ecclesiastique, profitoit des instructions de sa mere; elle à son tour, receuoit avec fruit, les enseignemens de son fils; qui n'estoient pas moins contraires à la nature, ny moins conformes aux paroles de IESVS-CHRIST. Car au lieu de la consoler sensiblement, par des paroles de complaisance, & par d'autres

sensibles marques de son amour ; il agissoit avec elle , comme avec vne femme forte , & qui ne succomboit pas aux foibleesses de son sexe , ny aux incommoditez de son âge. Aussi , luy disoit-il bien souuent , mesme dans ses maladies , connoissant la force de son esprit , & les dispositions de son cœur : [Qu'elle ne souffroit pas encore assez ; que ses maux estoient trop doux à l'égard de la gloire qu'elle attendoit dans le Ciel ; qu'elle ne se deuoit plaindre ; sinon de ce qu'elle n'estoit pas bien morte ; ny bien crucifiée ; que si elle estoit plus parfaite , elle auroit d'autres épreuves bien plus rudes ; & que le plus grand bon-heur , qu'elle d'eust souhaitter , pendant le reste de sa vie , seroit d'estre accablée de douleurs , d'ennuis , & de tristesses ; & de mourir dans vne mer d'amertumes , & abandonnée de tout secours , à l'imitation de IESVS-CHRIST durant sa Passion.]

Ces conseils de l'yn , & de l'autre , rudes en apparence , & desobligeans , mais en effet solides & salutaires ; n'empeschoient pas , qu'ils ne s'aymassent avec tendresse : car cette bonne mere , n'auoit d'affection que pour son fils ; & elle en donnoit des preuues mesme dans les maladies : veu qu'estant d'ailleurs tres-resignée , aux ordres de la diuine Volonté , elle ne faisoit aucune plainte , si ce n'est de ce qu'elle estoit si long-temps à la charge de son fils. Ainsi par fois la foiblesse de son âge , & ses indispositions , ne luy laissant pas le pouuoir , de se tirer du liect , pour donner ordre aux petites necessitez de la maison : *Mon DIEU* , s'écrioit-elle ; *que dira cét enfant , lors que venant de l'Eglise , tout lassé du travail , il ne trouvera pas mesme du feu dans la maison. Mon DIEU* , ne souffre-t'il pas assez , par ses penitences , & par les occupations de sa charge ; sans que ie luy sois vn surcroist de peine , & d'inquietude , au lieu de le soulager ? au moins il ne croyra pas , que ce soit par paresse , ou par sensualité ; que ie demeure dans le liect. Cestoient des témoignages bien sinceres , des tendresses de cette bonne mere enuers son fils ; qui de son costé , en auoit vne parfaite reconnoissance.

CHAP. XXIII.

CHAPITRE XXIII.

Du décès de la mere du Pere Yvan.

SI le Roy Prophete, appelle la mort des justes, pretieuse deuant le SEIGNEUR ; ce n'est pas seulement, parce que les justes reçoient apres leur mort, le prix qu'ils ont merité pendant leur vie : mais encore, parce que souffrant amoureusement les maladies, & les derniers affauts de la mort, ils amassent en mourant, de nouueaux thresors de graces & de gloire. Nous le pouuons remarquer, dans l'heureux trépas, de la mere de nostre Imitateur, laquelle ayant vécu religieusement, dans les exercices de la pieté Chrestienne, & souffert des maux presque continuels, endura encore beaucoup, & exerça plusieurs éminentes vertus, dans la maladie, dont elle deceda.

Son corps chargé d'années, extenué par les rigoureuses penitences, qu'elle auoit faites, à l'imitation de son fils, & brisé par ses longues, & frequentes maladies, n'estoit plus qu'un assemblage de diuers maux, & un amas de douleurs, en chacune de ses parties : outre qu'elle estoit trauaillée d'inquietude, pour le regard de la peine, qu'elle donnoit à son fils ; & de crainte, de le détourner de quelques-vnes de ses fonctions ; en sorte que sa vie, n'estoit plus qu'une mort languissante, & un martyre continuel. Elle fut long-temps, dans cet estat de langueur ; mais avec une merueilleuse patience, & une parfaite resignation ; comme le bon Tobie dans son aueuglement ; comme Iob sur son fumier ; comme les Martyrs dans leurs supplices ; & comme IESVS-CHRIST sur la Croix.

C'est pourquoy elle n'eut pas de la peine, à se détacher de la terre, où son cœur n'auoit jamais esté attaché ; ny à se resoudre, de quitter son corps, qu'elle n'auoit regar-

dé, & traité que comme son plus cruel ennemy. Sa seule attache, estoit l'amour de son fils ; qu'elle auroit bien voulu, ne quitter pas si-tost, si DIEU en eust ainsi disposé ; craignant qu'après sa mort, il n'aspirast à des Benefices, ou à des emplois éclattans ; & qu'il ne décheust de l'innocence, de l'humilité, & des autres vertus qu'elle reconnoissoit en luy. Voilà sa peine ; voilà son deffaut, mais vne peine meritoire, & vn deffaut qui seroit vne rare perfection, en plusieurs meres, ainsi que saint Hierôme a remarqué, des imperfections de sainte Paule.

La plus-part des parens & des amis, affligent les personnes qui se meurent, au lieu de les consoler ; & au lieu de les ayder, à briser les chaînes de la vie, pour mourir avec plus de liberté, & de resignation ; les empeschent, & les font mourir avec plus de peine, & de violence ; par leurs larmes, leurs sanglots, leurs plaintes, & les autres sensibles marques de leur affection. L'Apostre saint Paul improuva cette façon d'agir ; lors qu'il se fâcha contre les Chrestiens de l'Asie, de ce qu'ils l'affligeoient, voulant par leurs larmes, & par leurs sanglots l'empescher d'aller en Hierusalem, où il se sentoit attiré par l'Esprit du SEIGNEUR.

Comme nostre Imitateur agissoit plustost, par les lumieres de la Grace, que par les sentimens de la nature, il se comporta enuers sa mere, autrement que ne font les personnes du siecle : car il luy témoigna toutes les tendresses que la justice & la charité exigent de luy : mais dès qu'il connut que sa maladie estoit mortelle, il l'en aduertit luy-mesme ; & la disposa à la reception des Sacremens de l'Eglise ; apres quoy il ne cessa de l'encourager à mourir, tâchant mesme de luy oster le desir qu'elle pouuoit auoir de viure plus longuement. Ainsi faisant l'office ; non seulement d'un fils selon la chair, mais encore d'un Pere spirituel ; *Ma mere*, luy disoit il de temps en temps ; d'une voix forte & genereuse ; *comme ie connois, les dispositions de vostre ame ; ie dois vous parler franchement ; car ie sçay tres-bien, que vous le desirez ainsi ; il ne faut pas que vous songiez,*

à vous releuer de cette maladie ; si *D I E V* veut que vous en mouriez , ainsi qu'il y a de l'apparence : car ce seroit commettre une grande imperfection , de desirer une plus longue vie , connoissant par les symptomes de vostre mal , que *D I E V* veut que vous mouriez bien-tost. Aussi que seriez-vous dans le monde , que souffrir , offenser *D I E V* , & estre à charge à un chacun ? vous auez vécû assez long-temps , dans les travaux de la terre , pour souhaitter l'éternel repos du Paradis. Vos peines , & vos ennuy , finiront avec la mort , & vostre bon-heur commencera ; au lieu que si vous recouurez la santé , il faudra que vous soyez derechef malade , & ce sera une seconde peine , plus fâcheuse que la premiere. Je suis bien ayse de vous continuer mes seruices ; mais ne regardez que *D I E V* , & les ordres de sa providence. Ne pensez plus qu'à vous preparer , à comparoistre deuant vostre souuerain luge , & à bien mourir , dans la conformité à la volonté diuine , & dans l'union de la Mort de *I E S V S-CHRIST*.

Ces paroles d'une sainte franchise , & d'une generosité Chrestienne , n'affligeoient point la pauvre malade ; au contraire elle en estoit consolée , & fortifiée ; connoissant tres-bien la pureté d'intention de celuy qui les proferoit , & qu'il n'y agissoit que selon les lumieres , & par les mouuemens de l'Esprit de *D I E U*. Aussi combien d'actions de graces ne rendoit-elle à *D I E U* ? & combien de benedictions , ne donnoit-elle à son fils , de le voir si fort , si détaché du sang , & de la matiere , si conforme à la volonté de *D I E U* , & si zelé pour le bien de son ame.

Elle le remercie de ses aduis , & s'en rejouyt ; elle entre dans ses sentimens , & s'accordant avec luy ; Vous dites , mon fils , répondoit-elle , que *D I E V* veut que ie meure bien-tost ; i'en suis tres-contente : le Nom du *SEIGNEUR* soit beny , & sa sainte volonté soit accomplie en moy. *D I E U* me fera une grande misericorde de me retirer des miseres de cette vie : j'ay un tres-grand regret des offenses que j'ay commises contre luy ; i'espere pourtant que sa bonté me les pardonnera , par les merites de *I E S V S-CHRIST* , & par les intercessions de sa tres-Sainte Mere. Mon enfant , continuoit-elle , soyez toujours

bien humble, ne cessez jamais de craindre; ayez la pauvreté, & la soumission. Soyez fidelle, & charitable, dans les emplois que sa Providence vous donnera. Je prieray DIEU pour vous quand ie seray devant Luy. Souvenez vous de prier pour vostre pauvre mere apres son decés.

Il n'y auoit qu'une seule chose, en quoy elle ne s'accordoit pas avec son fils; C'est à sçavoir touchant le iour de son decés: car elle témoignoit desirer avec ferueur de mourir le iour de Noël; & son fils auoit de la peine, à condescendre à ce desir; craignant, si cela arriuoit, d'auoir trop d'occupations ce jour-là; & ne pouuoir pas l'aider & vacquer aux diuerses fonctions de sa charge dans sa Paroisse. Ils eurent quelques pieuses contestations sur ce sujet, l'un & l'autre, apportant ses raisons avec simplicité; mais enfin la Prouidence du SEIGNEUR les accorda: & nous pouons dire que les souhaits de la mere, & ceux du fils ne furent pas tout à fait rejettez. Car elle ne mourut pas le iour de la Naissance de IÉSUS-CHRIST; ainsi qu'elle l'auoit desiré, mais le iour de la Conception de la Mere de DIEU, qui estoit vn des plus tendres objets de sa deuotion. Le fils fut content, car il assista sa mere, & ne l'abandonna point: & il eut assez de temps & de loisir pour vacquer aux obligations de sa charge: la mere fut aussi tres-satisfaite, de mourir vn iour consacré à la REINE du Ciel; pour laquelle, elle auoit eû toute sa vie tres-grande deuotion: en telle sorte, qu'elle n'auoit jamais passé aucun iour, sans luy rendre ses devoirs, avec vne singuliere confiance en sa protection. De maniere qu'elle sortit du monde, le iour que la sainte Vierge y fit sa premiere entrée; elle quitta la vie du corps, le iour que la Mere de DIEU, receut la vie de l'ame, & celle du corps; & sans doute, qu'elle ressentit les effets de la bonté de cette grande PRINCESS; & qu'en ce dernier moment de sa vie, elle participa aux graces, dont cette incomparable REINE auoit esté remplie, au premier instant de la sienne. En effet elle mourut contrite, contente, conforme à la volonté diuine, & vnée à l'E-

CHAPITRE XXIV.

Il prie pour delivrer l'ame de sa mere du Purgatoire.

L'Apostre écrivant aux Theſſaloniens leur enjoint de ne s'affliger pas avec excès, de la mort des fidelles; leur disant, que cela est propre aux idolâtres, qui n'esperans rien apres cette vie, ont raison de se desoler de la perte de leurs parens & de leurs amis: mais qu'au contraire les Chrestiens doiuent se consoler, & se réjouyr dans la foy qu'ils ont d'une autre vie plus stable, & plus heureuse, & de plus de durée que celle-cy; & dans l'esperance de la resurrection des corps, apres laquelle ils verront en la compagnie de I E S U S-C H R I S T dans la Gloire, leurs parens, & leurs amis qui sont morts en estat de Grace.

Nostre Imitateur pratiquant ce conseil, témoigna une genereuse resignation en la mort de sa mere; car apres avoir donné quelques larmes aux tendresses de la nature, fortifié par la Grace, il remercia la diuine Bonté, de l'auoir tirée des miseres de cette vie, dans de si saintes dispositions; & de ce que par sa mort, estant luy-même deliuré, des soins de sa personne, il auroit à l'aduenir plus de liberté, de s'addonner entierement au Seruice de D I E U, & au secours du prochain. Il pourueut en suite à ses funerailles; à son ordinaire, avec des marques de l'amour qu'il auoit pour la pauureté, & pour la simplicité; apres quoy, à peine commence-t'il à gouster le repos, dont il auoit esperé de jouyr, qu'il a de nouveaux troubles; & la tristesse s'emparant de son cœur, l'oblige à pousser des sanglots, à répandre des larmes, & à s'affliger en diuerses manieres; ayant sceu par des voyes extraordinaires, que l'ame de sa mere estoit detenuë dans les flâmes du Purgatoire. Il en eut connoissance premierement par une

reuelation interieure; qui luy fit voir distinctement les diuerses peines qu'elle enduroit; en second lieu par vn puissant attrait, & par vne tres-forte application, qu'il sentit dans son ame; à prier, à agir, & à souffrir pour le soulagement & la deliurance de sa mere; en troisieme lieu par diuerses autres marques sensibles, c'est à sçauoir par de grands bruits qu'il oyoit de temps en temps dans sa chambre, avec cette impression que c'estoit l'ame de sa mere qui les excitoit, & par des voix semblables à celle de sa mere, qu'il entendoit clairement & distinctement. Si bien que, ce sage Prestre qui estoit d'ailleurs tres-referué, à adjoûter foy à semblables choses; & qui ne disoit rien, qu'il ne jugeast estre tres-veritable; nous a témoigné, qu'il auoit eu quelques fois la pensée, que l'ame de sa mere estoit souuent venue dans sa chambre, pendant le temps qu'elle souffroit les peines du Purgatoire.

L'on ne sçauroit expliquer ses soins, & ses trauaux, pour la soulager; les prieres qu'il fait & qu'il procure estre faites; les bonnes œuures qu'il exerce; les vertus qu'il met en pratique; les larmes qu'il répand; les penitences, & les diuerses mortifications qu'il endure pour ce sujet. A l'imitation de sainte Therese, il offre à la Iustice, & à la Misericorde diuine, pour le soulagement de l'ame de sa mere les merites, qu'il a acquis, & toutes les satisfactions qu'il a faites depuis l'usage de la raison. Outre cela, redoublant ses prieres, sa ferueur, & ses penitences, il ne cesse de solliciter la misericorde de IESVS-CHRIST, la pieté de la Sainte Vierge, & les intercessions des Saints, jusques à ce qu'il apprit que cette ame deliurée des peines du Purgatoire, jouît des contentemens de la Gloire.

Mais il ne reçoit cette heureuse nouuelle, que trois mois apres sa mort, par les mesmes voyes qu'iluy auoient fait connoistre ses souffrances. Si bien que cette ame bienheureuse se fit ouyr, appellant sa niepce, trois diuerses fois par son nom, si clairement, & si distinctement, que sa niepce courant à nostre charitable Prestre; *Ha mon oncle,* s'écria-elle; *voilà ma grande mere, qui m'appelle:* & l'ayant

ouye luy-mesme; *Ma mere*, s'écrie-t'il encore, *estes-vous icy? demandez-vous quelque chose?* Elle ne répondit rien: mais par le ton de voix avec lequel elle auoit prononcé le nom de sa niepce, & par vne certaine communication de sa presence, elle répandit vne odeur si suauue, & vne ie ne sçay qu'elle douceur de Paradis; qu'elle remplit l'ame de son fils d'une joye singuliere, & d'une confiance extraordinaire. Si bien qu'il se persuada à l'heure mesme, qu'estant deliurée de ces peines, elle venoit prendre congé de luy, & s'en alloit jouyr de la felicité eternelle.

Le mesme iour, sans qu'il fit aucune reflexion sur ce qui estoit arriué, l'application continuelle qu'il auoit eüe à prier pour elle depuis sa mort, luy fut entierement ostée; car il recita son Office, celebra la sainte Messe, & fit tous ses exercices ordinaires; sans en auoir vne seule pensée. Il en perdit mesme le souuenir, jusques à ce qu'ayant visité vne Religieuse d'une vertu approuuée, à qui **DIEU** auoit auparauant reuelé les peines de la deffuncte; il apprit d'elle, en quelle maniere **DIEU** luy auoit aussi reuelé sa deliurance; & le bon-heur, qu'elle possedoit dans le Ciel.

CHAPITRE XXV.

Il est persecuté.

LA vertu du bon Pere Yvan est trop éclattante, pour n'estre pas enuiée; & le demon reçoit de trop grandes pertes, à l'occasion des pecheurs, qui se conuertissent par son zele, & des ames deuotes, qui s'auancent en la perfection; par ses exemples, & par ses conseils; pour ne pas exercer sa rage contre luy. Aussi cét ennemy ne differe-t'il pas long-temps de luy susciter des persecutions, employant des personnes mal intentionnées; qui par ignorance, ou par malice, condamnent la conduite de nostre

ouurier Apostolique , taschant de le déchirer par leur médisance , & attaquant mesme sa personne ; jusques à le mal-traiter par des coups.

Je passe sous silence , l'enuie de quelques-vns de ses confreres , & leurs secrettes jalousies ; de ce qu'il est plus estimé , & plus aymé qu'eux ; & de ce que tout le monde , se porte à luy , attiré par le fruiçt de sa doctrine , & par la bonne odeur de sa vie. I'obmets les paroles d'injure & de mépris , par lesquels on s'efforce de noircir sa façon de viure ; l'accusant d'hypocrisie , & de singularité ; parce qu'il mene vne vie retirée , & separée du commerce des seculiers. Je ne dis pas aussi ; qu'on l'accuse encore d'indiscrétion , de ce qu'il reprend le vice avec liberté ; de rudesse , & de seuerité ; de ce qu'il exerce , de trop rigoureuses penitences ; & de rusticité & d'abjection ; de ce qu'il fait profession d'estre pauvre. Je laisse aussi à dire , mille autres contradictions que l'on suscite contre luy , pour le troubler dans l'exercice de sa charge , & le faire relascher dans sa conduite , qui est vne accusation secreete & vne condamnation de celle de ses enuieux.

Nostre genereux Prestre supporte ces attaques , avec tant d'humilité , de patience , & de tranquillité d'esprit ; qu'il ne témoigne pas mesme y prendre garde ; car continuant ses fonctions avec vne paix égale , & avec sa ferueur ordinaire ; bien loin de donner aucune marque de haine , ny d'auersion , ou de refroidissement , contre ceux qu'il sçait en estre les auteurs ; au contraire , rendant bien pour mal , il leur fait mille ciuilitéz ; il en parle auantageusement ; il cherche mesme avec sincerité , les occasions de leur rendre seruice.

Sa maniere de viure , pauvre , vile , & simple , le rendant méprisable , à tous ceux qui ne l'enuisagent , que des yeux du monde , & qui n'en jugent que par les sentimens de la chair , luy fait receuoir mille affronts , & injures de plusieurs libertins ; qui imputoient sa simplicité à niaiserie ; son humilité à bassesse de cœur ; sa pauvreté à folie , ou à deffaut de jugement ; & ses mortifications à extrauagance.

ce. Ce bon seruiteur de DIEU imitant la douceur de son MAISTRE s'en réjouit, & prenant de là sujet de prier pour eux, il offre à DIEU les Sacrifices, & ses penitences, pour en obtenir leur conuersion.

Merueille? souuent la diuine Bonté l'exauce; & ayant égard, aux merites de son fidele Ministre; elle accorde beaucoup de graces, à ceux qui taschent à luy faire beaucoup de mal; les conuertissant, & les rendant capables de pratiquer en eux-mesmes, ce qu'ils condamnoient en autrui. En quoy sans doute je puis dire, qu'il imitoit les abeilles, qui tirent la douceur du miel, de l'amertume des herbes; & qu'il trouuoit veritable, ce que le grand Apôtre promet à celuy qui donne à boire, & à manger à son ennemy; lors qu'il dit qu'il mettra des charbons ardens sur sa teste: c'est à dire, qu'il impetrera de la Misericorde diuine, les mouuemens du Saint Esprit; pour sa conuersion, & des Graces, pour le disposer, à receuoir les flâmes de l'amour de DIEU, & du prochain.

Le Fils de DIEU se plaint dans l'Euangile de l'ingratitude des Iuifs; qui au lieu d'estre reconnoissans, & de le remercier des grands biens qu'il leur departoit, guerissant leurs malades, & ressusitant leurs morts, tiroient de ce mesme bien occasion de le vouloir lapider. Son Imitateur peut faire la mesme plainte contre ceux qui le persecutent le plus rudement dans la ville de Brignolle; car ce sont des personnes qui en reçoient de plus grands seruitices, & qui luy ont de plus sensibles obligations: de maniere qu'il est calomnié, méprisé, repris, & menacé injurieusement, par des peres & des meres; à cause que par ses aduis, & sous sa conduite, leurs filles s'addonnans à l'oraison, frequentans les Sacremens, & pratiquans les autres vertus du Christianisme, paroissent moins galantes, & moins attachées au luxe, & aux autres vanitez de leur sexe.

Il y a des maris, qui estans encore moins raisonnables, & plus malicieux, que ces peres, & meres, dont nous venons de parler, le chargent publiquement d'injures, & de reproches; l'appellant fol, extrauagant, hypocrite, &

forcier. Il y en a mesme de si insolens , qui le cherchent jusques dans sa maison , pour l'intimider par leurs menaces , & le battre à coups de bastons ; n'ayant point d'autres motifs , sinon , de ce que leurs femmes suiuant ses conseils , quittent la vanité , renoncent au jeu , s'éloignent des danses , deuiennent modestes en leurs habits , viuent retirées dans leurs maisons , s'approchent souuent des Sacremens ; & ne paroissent plus dans le grand monde avec tous les vains agrémens , que la corruption du siecle peut demander.

Entre ceux-cy , il y en eut vn , dont la femme , preuenue de la Grace du S E I G N E U R , auoit fait de si grands progrès dans la pieté , que sa vie estoit exemplaire : en telle sorte que les plus vertueux la consideroient , comme vn modele de deuotion. Le mary en deuoit estre le plus satisfait , parce qu'il en estoit mieux seruy , & mieux obey ; & son mesnage en estoit plus paisible. Il deuoit encore remercier nostre bon Directeur , qui estoit l'instrument dont D I E U se seruoit pour l'auancement de sa femme ; mais au contraire , possédé par ie ne sçay quel demon de superbe , de rage , & de malice ; apres auoir vomy mille menaces , & milles injures contre luy ; il le cherche , à dessein de le frapper rudement , d'un gros bâton qu'il portoit : en effet dès qu'il l'eut trouué , l'interrogeant brusquement , & avec furie ; *Est-ce vous , luy dit-il , qui receuez ma femme à confesse , & qui la conseillez ? ie viens vous rompre les bras & les épaules avec ce bâton.*

Le genereux Ecclesiastique ne s'estonnant point de ces menaces , & ne s'effrayant nullement , par la crainte d'estre frappé , suiuit le conseil de l'Euangile : car sans s'excuser , ny se justifier , il presente genereusement les épaules à ce furieux , adjoustant ces mots ; *Tenez , voilà mes épaules : frappez tant que vous voudrez.* L'on n'a pû bien sçauoir si cet emporté le frappa , bien que quelques personnes dignes de foy l'ayent asseuré : quoy qu'il en soit , le patient Confesseur souffrit cette attaque , avec humili-

té, & avec amour; sans en auoir jamais formé aucune plainte, ny témoigné aucune sorte de ressentiment: si ce n'est celuy-cy, qui montra la solidité de sa vertu. Estant interrogé, s'il estoit vray, que ce temeraire l'eust frappé; parlant avec son humilité ordinaire & selon ses sentimens de mépris qu'il auoit pour soy: *Quand il m'auroit frappé,* répondit-il, *il n'auroit frappé qu'une grosse beste.* Cét homme furieux deuoit estre touché de la douceur, & de la patience du Pere Yvan, & se soumettre luy-mesme à sa conduite; bien loin de vouloir le détourner de la direction de sa femme: mais au contraire il s'anima dauantage contre luy, de telle maniere, qu'il continua de le persecuter, jusques dans la Maison de DIEU; & mesme dans le Tribunal de la penitence, lors qu'il en exerçoit les fonctions.

En effet sa femme, qui profitoit de toutes les occasions, pour vacquer à ses exercices de pieté, sans qu'il s'en aperceust, le voyant vn iour hors de sa maison, & se persuadant qu'elle auroit assez de loisir, auant qu'il retournast, court promptement à l'Eglise pour se confesser, & communier. Elle ne faisoit que d'y arriuer; & à peine se dispoit-elle à commencer sa confession, que son mary estant de retour dans la maison, & ne l'ayant pas trouuée, entra dans ses furies ordinaires; & croyant qu'elle seroit dans l'Eglise, cette pensée qui auroit appaisé la colere d'un autre, aigrit la sienne; si bien qu'il s'y transporta, à dessein de charger d'injures, & de coups sa femme, & le Pere Yvan, quand mesme il les trouueroit dans le Tribunal de la penitence.

Mais que peut la rage du demon, & la malice des hommes contre ceux qui viuent sous la protection du TOUVERAINT? Cette pieuse femme, est aux pieds de son Confesseur, lors que le mary écumant de colere passe, & repasse deuant le Tribunal. Le Pere Yvan l'apperçoit, & connoissant d'abord son intention, en aduetit la penitente, pour l'encourager à se confier en DIEU; & à se résoudre, de souffrir constamment le mal dont elle estoit

menacée; en luy disant, que pour luy, il y estoit déjà préparé.

La priere des justes est efficace, quand elle est accompagnée d'une amoureuse confiance: le Confesseur, & la penitente éleuerent leurs cœurs à DIEU, qui les rendit inuisibles; répandant des tenebres sur les yeux de cet homme, de telle sorte, qu'il ne les vid point, ou du moins il ne pût pas les reconnoître; bien qu'il y regardast de fort près, & avec attention: le S^{AI}GNEUR renouelant ce qu'il auoit fait jadis en faueur du Prophete Elisée, de saint Loup Euesque de Tours, & de saint Zenon solitaire sur la montagne d'Antioche. Mais le miracle fut encore plus grand; car DIEU ne changea pas seulement la veuë exterieure de cet homme furieux, mais aussi les dispositions de son cœur; ainsi il sortit de l'Eglise adoucy, & appaisé, de telle façon, qu'estant de retour en sa maison, & y trouuant sa femme; non seulement il ne la menaça pas plus, mais il ne luy parla pas mesme, du sujet, qu'il auoit crû auoir, de se mettre en colere.

Nous ne pouuons pas dire en détail, combien de fois nostre charitable Pasteur a esté mal-traité à l'occasion de son zele & de sa priere; mais nous en pouuons, en quelque façon juger, par la réponse du pieux, & sçauant Ecclesiastique, qui luy succeda en la direction de ses penitentes. Car estant prié, en l'absence de nostre bon Prestre, par les personnes qu'il auoit auoit conduites, de prendre le soin de leur direction, *Je le feray de bon cœur*, répondit-il; *mais à condition, que vos parens n'usent pas de la violence, dont ils ont usé contre le Pere Yvan: car ie ne croy pas auoir assez de vertu, pour supporter les mépris, les iniures, & les autres mauvais traitemens qu'on luy a faits.*

Cette réponse nous fait voir que nostre patient Ecclesiastique auoit esté mal-traité par diuerfes fois, & qu'il auoit esté persecuté mesme publiquement: cependant il ne relascha jamais dans ses exercices, & il ne cessa de faire sa charge, ny de continuer ses soins, & ses trauaux, pour le bien des ames, en tout ce que la justice, la charité, & la

discretion exigeoient de luy. Il témoignoît mesme, auoir des tendresses particulieres, pour celles, qui estoient la cause de ses persecutions: de maniere qu'il continua de les conduire par ses lettres, durant long-temps; apres mesme que la Prouidence diuine, l'eut contraint de s'en éloigner, & d'établir sa demeure dans Aix.

CHAPITRE XXVI.

On luy conteste la Cure de Brignolles, dont il est pourueu.

Saint Iean Chrysostome a tres-bien remarqué, dans vne de ses Homelies sur saint Matthieu, que la vie des Saints est tissüe d'une merueilleuse varieté, de bien, & de mal; de joye, & de tristesse, de douceur, & d'amertume; & que DIEU, ne leur fait pas toûjours sentir ses caresses, ny ses rigueurs: mais que sa Prouidence les conduit, dans vne continuelle vicissitude; pour les rendre conformes à IESVS-CHRIST; dont la vie n'a esté composée que d'une reuolution; qui luy apportoit sans cesse, de la gloire, & du mépris; du bien, & du mal; de la consolation, & des angosses.

Nous pouons dire; que nostre bon Vicaire a éprouué ce changement, en tous les estats de sa vie: car il a souuent esté estimé comme Saint; & souuent il a esté méprisé, comme vn scelerat, haï & persecuté par les vns, aymé & protégé par les autres. En effet s'il estoit persecuté dans la ville de Brignolles par quelques libertins, qui ne pouoient souffrir l'éclat de ses actions, ny la force de ses discours; il estoit soutenu, & caressé de tous les gens de bien, qui reconnoissoient sa vertu, & admiroient les fructs merueilleux qu'il produisoit par ses instructions, & par ses exemples. Le Curé qui prenoit plus de part que tous les autres, dans la façon de viure, dans les succès de ses tra-

uaux, l'ayant choisi pour son Vicaire, afin de se reposer sur luy du soin, & de la conduite de sa Paroisse, estoit celui qui le deffendoit avec plus de zele, & qui luy témoignoit le plus d'affection. Aussi n'obmît-il aucune des choses qui dépendoient de luy; pour l'attacher à la direction de son Eglise, & l'obliger par ses civilités, d'y continuer toute sa vie ses services, & ses travaux.

Il ne luy auoit conféré la charge de Vicaire, que pour vne année; mais ayant connu pendant quelques mois, qu'il y traualloit d'une façon Apostolique, il la luy donna pour toute sa vie; s'obligeant par vn Contract public, à ne la luy oster tant qu'il viuroit, & à le deffendre contre tous ceux qui entreprendroient, de le molester. Il luy témoigna en suite toute sorte d'affection, durant dix ans qu'il exerça cette charge: & se sentant proche de sa mort, il luy donna encore de plus grandes marques de sa reconnaissance; car il resigna sa Cure en sa faueur: en telle sorte que pour luy faire la grace entiere, ayant fait sa resignation, il enuoya querir les Prouisions, & les fit annexer au Parlement de Prouence à ses propres dépens sans l'en aduertir, jusques à ce que les luy presentant, il le pria instamment de les vouloir accepter.

Le Pere Yvan receut la resignation, que le Curé luy auoit faite de son Benefice; & prit possession de la Cure, avec les formalitez, & les ceremonies requises; si bien qu'il commençoit d'en faire les fonctions; lors que DIEU permit que l'on formast des oppositions contre luy, & qu'on luy suscitast vn procès, pour le dépouiller de cette charge.

Il auoit déjà connu, par diuerses lumieres, que luy, & d'autres deuotes personnes auoient eues, que DIEU l'appelloit à vn autre employ, que la conduite d'une Paroisse: mais parce qu'il tenoit les voyes extraordinaires pour suspectes & dangereuses, il ne les suiuit pas, de peur d'estre trompé; jusques à ce que se voyant attaqué, & que l'on vouloit luy oster sa Cure par procès, il fut confirmé, que DIEU l'appelloit ailleurs: de manie-

re qu'il voulut aussi-tost s'en démettre : toutesfois il en différa l'exécution ; pour condescendre aux prieres deses amis, & des plus zelez de la Paroisse ; qui le supplians de ne point ceder son droict à personne , luy offroient leurs assistances , & luy promettoient vne prompte & heureuse issue de son procès. Il leur obeît durant quelque temps ; mais cela ne seruit qu'à exercer sa patience , & à luy faire donner des marques de son humilité , de son dépouillement , & des autres vertus qu'il pratiqua en cette rencontre.

En effet bien loin de témoigner d'estre fasché contre l'Ecclesiastique qui auoit impetré son Benefice, ny contre ceux qui le protegeoient ; il leur montra beaucoup d'affection , priant pour eux , leur continuant ses ciuilitéz , parlant à leur aduantage ; sans vouloir mesme souffrir qu'on les blâmât. Ainsi comme vn iour les filles de sainte Vrsule , dont il estoit Directeur , luy faisant des plaintes , contre ceux qui le trauersoient dans cette affaire ; *Mon Pere, disoient-elles , on vous fait grand tort , de vouloir contester vostre Benefice ; puis que vous en estes si capable , & que vous vous en acquitez si dignement. Il faut que vous plaidiez , & que vous employiez tous vos amis , & toutes vos forces pour vous deffendre.*

Nostre bon Pere les regardant avec vn souris simple , & innocent , qui condamnoit l'empressement de leur affection ; *Mes filles, leur dît-il ; le Fils de DIEU nous a laissé son Euangile ; où nous trouuons tous les conseils que nous deuons suivre : Et que nous y enseigne-t'il ? si ce n'est , de donner plus à nostre prochain qu'il n'exige de nous ; nous ordonnant de bail-
ler nostre pourpoint , outre le manteau qu'on nous demande. Gardons ces conseils , puis qu'il n'y en a point de plus salutaire ; laissons de bon cœur toutes choses , pour obeyr ; aymons la Croix , puis qu'on nous la presente ; & ne nous attachons qu'à l'accomplissement de la diuine volonté.*

L'on peut encore mieux juger , par l'exemple suiuant , quelle estoit son indifferance , pour la Cure qu'on luy disputoit : quelle estoit encore la moderation de sa condui-


te; & sa douceur enuers ceux-là mesmes qui le persecutoient. Car comme, vn homme de condition, President, des Thresoriers generaux en la Generalité de Prouence, s'estant declaré le plus ouuertement contre luy, eut épousé le party de son aduersaire, avec tant de chaleur, que le procès ayant esté éuouqué, hors de Brignolles, il s'y porta pour le solliciter, & employer tous ses soins, & tous ses amis contre la cause du Pere Yvan : Tant s'en faut, que ce bon Prestre s'en émût, ou qu'il monstra auoir aucune aigreur, non pas mesme aucun sentiment contre luy, qu'au contraire comme quelques personnes luy parlant de ce Gentil-homme, voulurent luy persuader qu'il estoit son ennemy & son persecuteur; *Vous vous trompez*, leur répondit-il; *se le tiens pour vn de mes veritables amis; & croy qu'il n'a agy dans cette affaire que selon les desseins de la Providence diuine.* On peut dire que le SEIGNEUR voulut recompenser cette patience, & cette charité de son seruiteur; car il luy donna pour lors l'Esprit de Prophetie; par laquelle il predict la mort de ce Thresorier general, & le bon estat dans lequel il mourroit. Ainsi continuant à parler de luy; *Laissez-le faire*, adjousta-t'il, *laissez le solliciter contre moy, j'espere qu'il mourra en la grace de DIEU.*

Quoy qu'il parla en vn temps, auquel la conuersion de ce Gentil-homme paroissoit encore tres-éloignée, & tres-difficile; attendu sa façon de viure hautaine, & libertine; la prediction ne laissa pas d'auoir son accomplissement. Car il se conuertit en effet deux années deuant sa mort; s'adonnant à la frequentation des Sacremens, aux œuures de Misericorde, & aux autres exercices du Christianisme; avec tant d'assiduité & de bons exemples; que tout le monde en estoit merueilleusement édifié. Ce changement fut suiuy d'une mort, telle que le Pere Yvan auoit predite; car comme vn iour ce mesme Gentil-homme estant en bonne, & parfaite santé, eut accompagné le tres-adorable Sacrement de l'Autel que l'on portoit à des malades; & qu'en suite il eut visité le Pere Leard, de la Compagnie de IESVS qui auoit accoustumé de le receuoir à confesse;

fesse ; immédiatement apres qu'il eust confessé ses pechez , & receu l'absolution , il mourut subitement entre les bras de son Confesseur.

Sçauroit-on esperer vne mort plus heureuse , apres vne vie libertine ; que de mourir apres auoir accompagné L' A V T H E V R de la Vie ; d'aller rendre compte de son ame deuant D I E U , apres auoir mis ordre aux affaires de sa conscience ; d'expirer entre les bras du Confesseur , apres s'estre muny des Sacremens de l'Eglise ; & de jouyr de toutes ces graces si aduantageuses ; sans maladie , sans douleurs , sans peines , & sans agonie ? Nous deuons attribuer ces faueurs aux prieres , & aux merites du Pere Yvan , qui ne cessoit dans ses Sacrifices , & dans ses autres prieres , de demander au S E I G N E V R , les biens du Ciel ; pour ceux qui tâchoient de luy faire souffrir les persecutions de la terre.





L A
 TROISIÈME PARTIE
 DE
 LIMITATEUR
 DE
 IESVS-CHRIST,
 OV
 DE LA VIE
 DV VENERABLE PERE
 ANTOINE YVAN,
 PRESTRE, FONDATEUR,
 & Instituteur de l'Ordre des Religieuses
 de Nostre-Dame de Misericorde.
 OV EST CONTENUE L'HISTOIRE
 de la Fondation du mesme Ordre.

SOMMAIRE.

Nous entrons dans la plus belle , & la plus illustre Partie de nostre Imitateur : les deux precedentes n'ayans esté que les dispositions à celle-cy , où DIEV a fait en luy , & par luy de plus grandes merueilles , & a montré les plus riches traicts de la conformité de sa vie , avec celle de IESVS-CHRIST. En effet nous voyons que le plus grand Ouvrage du Fils de DIEV durant sa vie mortelle , a esté l'establissement de son Eglise , dans le choix des Apostres qui ont annoncé sa parole dans tous les Royaumes de la terre ; car il semble qu'il n'auoit trauaillé que pour soy dans sa vie cachée , & qu'il ne s'estoit employé dans sa vie publique , que pour les Villes de Jerusalem , de Capharnaum , & pour les autres lieux qu'il a honorez par sa presence , esclairez par sa doctrine , & enrichis par ses miracles : du moins n'y auoit-il pour lors que les habitans de ces villes , & des lieux circonuoisins , qui en profitoient. Mais il faut aduoüer que quand il a estably son Eglise , & enuoyé ses Apostres , il a trauaillé pour tous les hommes , non seulement pour tous ceux qui viuoient en ce temps-là , mais encore pour tous ceux qui viuront iusques à la consommation des siecles.

Nous auons montré dans la premiere Partie de la vie du Pere Yvan , qu'il auoit imité les miseres de l'enfance de IESVS-CHRIST , & les trauaux de sa vie

cachée. Nous auons declaré dans la seconde comment il a suiuy sa vie publique, & ses penitences. Il reste à faire voir dans cette troisieme, de quelle façon, estant Fondateur de l'Ordre des Religieuses de Nostre-Dame de Misericorde, il s'est rendu conforme à ce diuin Prototype, dans l'establissement de son Eglise; & a trauaillé pour tous les fideles, & pour les siecles auenir. Car nous deuons auoir ce iuste sentiment de la future estendue, & multiplication de l'Ordre de Nostre-Dame de Misericorde; si nous iugeons de ses progrès par sa Fondation que nous rapportons icy: puis qu'elle a esté si merueilleuse, qu'on ne la peut regarder, que comme effets de la Prouidence diuine, & un témoignage illustre de la protection toute puissante de la MERE de DIEU.

CHAPITRE I.

*Il se démet de sa Cure, & s'arreste dans la ville
d'Aix.*



E ne scaurois mieux commencer la troisieme Partie de cette Histoire, qu'en admirant les secrets ressorts de la diuine conduite, & les differentes voyes, dont elle se sert pour arriuer à sa fin. Le Prophete a raison de nous dire, que DIEU fait éclatter la lumiere, de l'épessseur des tenebres, & que l'obscurité de la nuit, est autant rayonnante entre ses Mains, que la lumiere du iour: pour nous apprendre, qu'il mene ses seruiteurs par des routes qui leur sont inconnuës, & fait reüssir en eux ses desseins,

par des moyens, qui semblent deuoir les détourner. L'on ne pouuoit presenter vn plus puissant motif au Pere Yvan, pour l'arrester dans la ville de Brignolles, ny l'attacher par vne plus forte chaisne, dans le seruice de cette Paroisse; que de luy en faire accepter la Cure, que le sieur Boutillieri luy auoit resignée. Il voyoit que DIEU benissant ses traualx, les faisoit fructifier, nonobstant les contradictions de l'ennemy: il auoit déjà la connoissance de tous les paroissiens; il en estoit aussi connu, & par consequent aymé; il estoit pourueu d'une charge honorable, qui luy fournissoit suffisamment dequoy subsister. N'y auoit-il pas apparence, que c'estoit l'employ où DIEU l'appelloit; & que sa Prouidence s'estoit voulu seruir de cette resignation, pour l'arrester le reste de ses jours dans cette ville-là?

Cependant il arriua tout le contraire; & cette resignation ne seruit que pour le faire sortir de Brignolles. Car dès qu'il eut pris possession de sa Cure, l'Ecclesiastique que nous auons appelé sa partie, s'en faisant pouruoir par la nomination des Religieuses Benedictines du Conuent de la Selle; le fit appeller deuant les Iuges, pour se voir condamner à la quitter, & à luy en laisser la pleine, & entiere disposition.

Nostre bon Prestre voulut d'abord pratiquer le conseil de l'Euangile, & ceder son Benefice à celuy qui le demandoit: mais ses amis, & son conseil de conscience, comme ie viens de le dire, l'obligerent à deffendre sa cause en Iustice; & ce fut le moyen dont la diuine Prouidence se seruit pour l'attirer dans la ville d'Aix. Car le procès y ayant esté porté, il fut contraint d'y venir, pour produire ses deffenses; & en suite DIEU disposa les choses de telle sorte, qu'il se trouua arresté dans cette Ville, pour y passer le reste de sa vie; comme dans le lieu de son plus long séjour, & sur le theatre de ses plus belles actions.

Il n'est rien qui fasse mieux paroistre l'attachement; ou le mépris qu'une personne prudente, & soigneuse a des biens, ou des hommes de la terre; que la maniere dont elle

pour suit ses procès, dans lesquels il s'agit des vns, ou des autres. Le bon Pere Yvan ne témoigna aucune inquietude, ny apprehension de l'éuenement du sien; la poursuite ne luy fit obmettre aucun de ses exercices spirituels; & bien loin de perdre, ou de diminuer la paix, & la joye dont il jouyssoit dans son interieur: il en eut, & en montra davantage, esperant que s'il perdroit sa cause, il seroit deliuré du fardeau de la cure des ames; si bien qu'il auroit plus de loisir de continuer ses penitences, & de vacquer à la contemplation des choses diuines.

Mais à n'en point mentir, il ne sçauoit ce que c'estoit que de procès, ny comment il les falloit entreprendre, ou les poursuiure; il ne sçauoit dis-je, refuser ce qu'on luy demandoit par Iustice; ayant touiours donné liberalement, ce qu'on exigeoit de luy par charité: & il estoit tellement accoustumé à plaider deuant D I E U, les interests spirituels de son salut, & de son prochain, qu'il ne sçauoit pas agiter deuant les hommes la cause temporelle de son Benefice. Ainsi quand il fut arriué dans Aix, au lieu de songer à son affaire, & aux choses qui estoient necessaires pour sa deffense; il passa plusieurs jours à faire ses deuotions dans les Eglises; à s'entretenir des choses spirituelles avec ses amis; & à songer aux moyens de seruir D I E U, & le prochain dans cette Ville: comme s'il eust connu par esprit prophetique, qu'il y deuoit faire sa principale demeure.

Cependant ses amis, & plusieurs d'entre ses paroissiens qui s'interessent dans sa cause, le presserent de choisir vn Procureur, & mesme, pour le luy persuader ils employerent des personnes d'autorité, & de vertu, qui auoient grand pouuoir sur son esprit. Il obeit enfin; mais en telle sorte, qu'il fait connoistre, combien il est détaché des creatures; & qu'il ne met son appuy, & ses pretensions qu'en I E S U S Crucifié, lors mesme qu'il porte son sac à vn Procureur, qui se trouuant pour lors occupé, luy promet de le voir, & de lire les pieces vn autre iour. En effet ce Procureur satisfit dès le lendemain à sa promesse: mais

premiere occasion qu'il en auroit; si bien qu'il ne tarda long-temps à l'effectuer. Car comme il auoit protesté, que le Crucifix estoit tout son appuy; le Crucifix l'appuya, en luy procurant vn paisible & fauorable accord. Ainsin vn honneste Ecclesiastique de Brignolles, luy ayant fait proposer de vouloir permuter la Cure, pour deux petits Benefices à simple tonsure; il accepta avec grande joye les propositions de ce traité; remettant ses interets à des personnes capables, & pieuses; qui enfin terminerent l'affaire dans les formes de la Iustice; avec le consentement, & la satisfaction des parties.

CHAPITRE II.

Il reçoit la direction de la Chapelle de Nostre-Dame de Beauvezet.

Dés qu'il se fut démis de la Cure de Brignolles, par l'accommodement dont nous auons parlé; ayant remercié le SEIGNEUR, la Sainte Vierge, & saint Michel son patron, de l'auoir déchargé de ce pesant fardeau, & deliuré des troubles de son procès, il se presenta à DIEU, comme vne victime deuouée à sa gloire, pour estre employée de la façon qu'il plairoit à son adorable Prouidence; le priant instamment de luy faire donner le lieu qui luy seroit propre, pour connoître, & executer sa volonté. Sa priere fut bien-tost exaucée par vne occasion dont voicy le sujet. Il y a vne Chapelle sise au milieu de la ville d'Aix, fort petite, mais tres-deuote; dédiée à la Mere de DIEU, sous le tiltre de Nostre-Dame de Beauvezet: c'estoit la plus commode Station que le Pere Yvan pouuoit demander; soit qu'il voulust trauailler pour le prochain; soit qu'il ne desirast s'appliquer qu'à sa propre perfection.

Il la demanda donc premierement à DIEU, par les
R

prieres de Nostre-Dame sa bonne Aduocate , & des Saints Protecteurs de la ville d'Aix: puis il la fit demander par ses amis, à Messieurs du Chapitre de saint S A V V E V R de qui elle dépend; qui non seulement la luy accorderent avec facilité, estans déjà informez de son merite, & des fruicts qu'il auoit faits par tous les lieux, où il auoit demeuré; mais ils témoignèrent mesme de la joye, de r'emplir leur Chapelle d'un si excellent Prestre, & d'acquérir dans leur Ville par ce moyen vn si fidele, & si digne ouurier.

Je ne repeteray pas icy, ce que j'ay déjà remarqué en diuers lieux touchant ses penitences, & ses austeritez: il en continua la plus grande partie, ne quittant que celles qui auroient paru au dehors, & celles qu'il jugeoit incompatibles, avec les desseins que D I E U luy auoit inspiré. Ainsi son manger & ses habillemens estoient austeres dans Aix, comme ils l'auoient esté ailleurs: son liét estoit si étroit, qu'il ressembloit plustost à la biere d'un corps mort; qu'au liét d'un homme viuant: ce qui a donné occasion à plusieurs, qui ont eü le bien de le connoistre en ce temps-là; de publier; qu'il auoit couché quelques années dans vne biere.

Il trouua neantmoins vne inuention nouuelle de mortifier son goust, qu'il n'auoit pas encore pratiquée: car sa simplicité; & sa profession de viure en pauvre Prestre estant connue; comme plusieurs personnes deuotes luy enuoyoit des aliments, il les mesloit ensemble; quoy qu'ils fussent de diuerses sortes, & de different goust. Encore n'en prenoit-il pas, que quand le meslange les auoit rendus si dégoûtans, qu'il sentoit de la repugnance à les manger; car lors qu'il les trouuoit agreables au goust, il se priuoit de la satisfaction qu'il auroit eüe à les manger, pour en faire l'aumosne à des pauures.

C'estoit sa coustume de fuir ce qui pouuoit flatter les sens; & d'embrasser les choses qui leur estoient contraires: de maniere que quand ses amis luy demandoient, pourquoy il faisoit ce meslange, dont la seule veüe causoit du

dégoust; & mesme vne espece d'horreur : *Nôtre ventre,* répondoit-il ; *est un cloaque plein d'ordure , & de vilenies ; toutes les viandes s'y meslent , apres que nous les auons mangées ; pourquoy donc ne les meslerons-nous pas , auant que de nous en substantier ? Il ne faut pas ,* adjoustoit-il , *que la bouche soit plus delicate , que l'estomach , puis que l'une & l'autre partie ne sont que pourriture , & que corruption.*

Mais il arriuoit peu souuent que nostre bon bon Prestre mangeast des aliments qu'on luy apportoit , quand c'estoient des viandes , ou des œufs , ou du poisson ; parce que s'estant accoustumé à ne se nourrir que d'herbes , de legumes , & de fruiçts ; il auoit de très-grandes difficultez quand il estoit contraint de se substantier d'autres viandes. De sorte que quand il surmontoit ces difficultez , c'estoit pour obeir à ceux qui le luy commandoient : ou pour endurer dauantage par la violence qu'il se faisoit : tant il auoit de zele à se mortifier , & à se procurer des souffrances , afin d'imiter par les siennes celles de son adorable EXEMPLAIRE.

CHAPITRE III.

Il repare son logement & s'associe des Prestres.

IL ne se fut pas appliqué long-temps , au Service de la Chapelle de Nôtre-Dame de Beauuezer , qu'il y fit paroistre des marques de sa liberalité , & de sa deuotion ; car il employa aussi-tost de ses biens pour la reparer , l'orner , & la faire seruir : encore qu'il sceust que ce n'estoit pas à luy à faire les reparations necessaires : mais comme il estoit affectionné au seruice de la Sainte Vierge il n'auoit point d'autre veuë que celle de son honneur , & de la gloire de son Fils. Ainsi il fit bastir quelques chambres joignant la Chapelle , pour y associer de bons Ecclesiastiques , & procurer par leur ayde , que le Service en fust mieux fait ;

qu'on y celebrast plus de Messes ; & qu'on y chantast Vêpres, les Dimanches, & les Fêtes : afin que les fideles y trouuant de quoy satisfaire à leurs deuotions, vinssent rendre leurs deuoirs à la Mere de DIEU ; & qu'il eust moyen d'exercer son zele, en leur preschant, les receuant à Confesse, & leur donnant toute sorte d'assistance spirituelle.

Son dessein reüssit de la maniere qu'il auoit projeté ; car ayant admis en sa compagnie quelques Ecclesiastiques de sçauoir, & de pieté, qui s'employoient avec zele au profit des ames ; la Chapelle deuint bien-tost vne des plus frequentes de la Ville ; en sorte que le plus souuent elle ne pouuoit contenir le monde qui venoit y faire ses deuotions. Mais c'estoit principalement l'odeur de la vie exemplaire du Pere Yvan qui attiroit ce grand monde ; joint la ferveur, avec laquelle il exhortoit à l'amour de la perfection, tous ceux qui s'adressoient à luy : outre qu'il prenoit vn singulier soin de leur direction.

Mais ce concours de peuple s'accrut extraordinairement ; dès qu'ayant entrepris de prescher la parole de DIEU, on goustâ la solidité de sa doctrine ; & la force de l'esprit de DIEU qui l'animoit ; car nous pouuons dire que le SEIGNEUR commença pour lors à le mettre comme sur le Chandelier dans la ville d'Aix : pour le faire connoistre par le zele & par les fruiçts de ses predications. Si bien qu'on le receut comme vn Predicateur Apostolique, qui ne preschoit pas les sciences humaines, ny les paroles des hommes ; mais la science du salut, & les paroles de l'Euangile : qui ne se preschoit pas luy-mesme, mais qui preschoit IESVS Crucifié ; non par des raisonnemens, ou par des paroles choisies de la sagesse, & de l'éloquence prophane ; mais dans la simplicité du style, & dans la force de l'Esprit diuin, qui manifestoit sa vertu, par des effets extraordinaires, dans les ames de ceux qui assistoient à ses Predications.

Quelques sages du monde, personnes animales, qui ne conçoient pas les productions de l'Esprit de DIEU, ainsi

que l'Apostre nous enseigne, se mocquoient de luy, & faisoient des sujets de raillerie de sa façon de prescher; comme les Epicuriens, & les autres Philosophes d'Athenes se mocquoient de saint Paul, quand il commença à publier l'Evangile; mais les personnes vraiment deuotes, & solidement vertueuses y accouroient avec empressement: DIEU commençant par cette approbation generale des plus vertueux, & principalement des pauvres qui assistoient à ses Sermons avec plus d'attention, à jetter les fondemens de l'estime qui luy estoit necessaire, pour l'Institution de l'Ordre de Nostre-Dame de Misericorde, qu'il deuoit bien-tost entreprendre. Il est vray qu'il n'auoit pas encore ce dessein, quand il fit bastir des chambres auprès de la Chapelle de Nostre-Dame de Beauuezet, & qu'il s'associa quelques Ecclesiastiques: car il desiroit y establir vne espece de Communauté pour y former des Prestres; & leur faisant pratiquer des vertus conuenables à leur profession; les rendre ouuriers capables de trauailler avec fruit dans la vigne du SEIGNEUR. En effet il en receut quelques-vns qui retirerent de grands profits de ses discours, & de sa conuersation: aussi ses exemples estoient-ils des leçons ordinaires de la plus haute perfection, & sur tout de la mortification des sens, & de l'amour de l'oraison.

Il exigeoit vne vertu bien éminente des Ecclesiastiques; de façon qu'il ne vouloit rien moins d'eux, qu'une fidele imitation de IESVS-CHRIST, & qu'ils fussent transformez en IESVS-CHRIST par vne parfaite conformité. *C'est l'estat, disoit-il, où les Prestres doiuent aspirer. Car puis qu'ils succedent à la dignité, au pouuoir, & à l'employ du Fils de DIEU; ils doiuent aussi succeder à sa sainteté. Mais, qu'il y en a peu, adjoustoit-il avec vn profond sentiment, qui ayent ce genereux dessein, & encore moins qui l'exécutent!* L'on eût dû souhaiter que DIEU eût enuoyé à cét excellent Maistre de la vie spirituelle, beaucoup de disciples capables de profiter de ses exemples, & de ses enseignemens.

Mais ce n'estoit pas pour lors sa vocation ; & le SEIGNEUR l'appelloit à d'autres choses, ainsi que le temps a fait voir. Nous pouuons cependant remarquer que DIEU inspire souuent à ses seruiteurs des desseins , qu'il ne veut pas estre executez en eux jusques au bout : comme nous lisons dans la vie du bien-heureux Iean d'Auila , que DIEU luy auoit inspiré vn dessein approchant de celuy de la Compagnie de IESVS , que le grand saint Ignace entreprit & acheua heureusement. Quelquesfois aussi DIEU inspire le mesme à plusieurs qui l'entreprennent , & il le fait reüssir par ceux qu'il luy plaist ; comme nous voyons dans l'Institution des Prestres de l'Oratoire , que plusieurs ont entreprise ; à sçauoir saint Philippe Nery en Italie, le bien-heureux Cesar-de-Bus dans le Comté d'Avignon, le Reuerend Pere Romillon en Prouence, & l'Eminentissime Cardinal de Berule en France.

Ainsi le Pere Yvan auoit touîjours eû de feruens desirs de s'employer à la Reforme des Ecclesiastiques : de maniere que comme il y a heureusement trauaillé en sa personne ; il voulut encore s'y employer en celle des autres, principalement depuis qu'il eut estably sa demeure dans Aix.

CHAPITRE IV.

*On le persecute dans la Chapelle de Nostre-Dame
de Beannezet.*

LE demon preuit sans doute par le commencement du zele & de la discretion de l'Imitateur de IESVS, quel en seroit le progrès & la suite ; s'il n'y mettoit de l'empeschement, en suscitant contre luy quelque dangereuse persecution : c'est pourquoy comme il auoit attaqué ses mœurs dans Coutignac, le faisant accuser d'estre Sorcier ; comme il auoit assailly sa personne dans Brignol-

les, le faisant mal-traiter par des menaces, & par des coups; il se prit dans Aix, à sa capacité, & à sa conduite; le faisant accuser d'ignorance, d'indiscretion, & d'inhabilité en la direction des ames. Cette accusation fut receüe par plusieurs, & mesme par des personnes de science, & d'autorité, qui croyans bien faire & n'apperceuans pas les ruses du demon, se declarerent ouuertement contre nostre pieux Ecclesiastique. Cette méprise arriue souuent aux gens de sçauoir & de deuotion, quand ils abondent en leur sens, & ne prient pas assez le SEIGNEUR, pour obtenir de sa Sagesse des lumieres necessaires; afin de discerner le faux du vray, & l'apparent du reel. Ces personnes, dis-je, persecuterent l'homme de DIEU, au lieu de le proteger; l'accuserent, au lieu de le deffendre, & au lieu qu'elles se deuoient employer pour le faire maintenir dans ses fonctions: s'efforcerent de luy faire interdire la Predication, & l'administration des Sacremens, & de s'ingerer en aucune façon dans la conduite des ames. Pour ce sujet ils tâcherent en premier lieu de le décrier, par plusieurs bruits injurieux, qu'ils firent courir contre luy; afin de le décourager, & de retirer insensiblement de sa conduite, les personnes qui sembloient y auoir le plus d'attachement. Cela fut cause que nostre bon Prestre receut plusieurs sensibles afflictions, sans qu'il laissast pourtant, de continuer ses exercices, avec la mesme ferueur, & le mesme zele que s'il eust esté applaudy. Aussi pouuons-nous dire que le SEIGNEUR recompensa sa fidelité, & patience; car les ames deuotes bien loin de quitter sa conduite s'y affermirent dauantage, & l'on vid insensiblement augmenter le nombre des personnes qui recherchoient sa direction. C'est pourquoy ses aduersaires voyant que la premiere attaque qu'ils auoient donnée contre le Pere Yvan, auoit eü vn succès tout contraire à celuy qu'ils en esperoient; eurent recours à vne autre inuention: ils s'adresserent aux Superieurs & porterent des plaintes contre luy, & contre sa conduite au seigneur Alphonse du Plessis de Richelieu pour lors Archeuesque d'Aix; &

depuis Cardinal & Archeuesque de Lyon.

Il n'est pas difficile de faire condamner vn innocent, quand il ne se justifie pas, & qu'estant accusé par des personnes puissantes, il n'est protégé par aucun. Ainsi, quoy que nostre bon Prestre, preuoyant l'orage dont on le menaçoit, eût pû l'éviter, s'il eust voulu preuenir l'Archeuesque, & employer pour ce sujet des personnes de vertu & de credit aupres de luy : toutesfois voulant pratiquer ce qu'il conseilloit aux autres ; il s'abandonna à toutes sortes d'injures, & de mépris, pour l'amour de IESVS-CHRIST ; afin d'imiter ce diuin SAVVEUR, qui s'est abandonné à toutes sortes de maux pour l'amour de nous. Il s'abandonna, dis-je, aux conduites de la Prouidence diuine ; laissant tous ses interests en la protection de la Sainte Vierge ; sans se mettre en peine, que de bien travailler, & de bien souffrir : de maniere que ne se deffendant nullement, il fut presque tout à fait opprimé. L'Archeuesque écoutant les plaintes que l'on forma contre luy, crut ce que l'on en disoit ; qu'il estoit ignorant, grossier, & incapable de conduire les ames, & qu'elles receuoient plus de dommage, que de profit de sa direction. C'est pourquoy il luy interdît l'exercice de la Predication, l'administration des Sacremens de Penitence ; & le traita avec mépris, & d'une façon tout à fait imperieuse. L'on ne scauroit dire combien apres cela nostre bon Prestre essuya d'injures & d'affronts ; DIEU permettant qu'il fust affligé jusques au bout, & que la persecution allast si auant que l'on voulut l'obliger mesme à sortir de la Ville, comme vne personne méchante, & pernicieuse.

Mais ce n'estoit pas le moyen de l'obliger à cette retraite, que de le mépriser, & de l'humilier ; puis que c'estoit luy procurer ce qu'il recherchoit avec le plus de ferueur : aussi bien loin de quitter la Ville parce qu'il y estoit persecuté ; il ne témoigna jamais plus de constance à y vouloir demeurer, travailler & souffrir ; jettant toute sa confiance en DIEU le Protecteur des justes, qui ne différera pas long-temps de luy faire sentir les effets de sa protection.

Car

Car l'Archeuesque, poussé sans doute par vn secret mouuement de l'Esprit de DIEU, voulut plainement s'informer de la conduite du bon Pere Yvan, & enestre éclaircy, par des personnes de foy & de probité. L'ayant donc fait appeller, & examiner en sa presence; ayant encore lû, & fait lire ses écrits par des personnes capables; il découurit les ruses du demon, & la tromperie de ceux qui l'auoient accusé; il reconnut que ce pieux Ecclesiastique, bien loin d'estre grossier & ignorant dans la vie spirituelle, estoit vn des plus sçauants & des plus habiles de son Diocese; que la pureté de sa vie répondant à la sainteté de sa doctrine, les ames ne pouuoient faire que de tres-grands profits sous sa direction; qu'il estoit vn vray Israélite & vn veritable homme de DIEU: Apres quoy non seulement il luy permît de prescher, d'ouyr les confessions, & de diriger les ames; mais encore il l'y exhorta avec plusieurs témoignages d'estime, & d'affection; luy offrant de l'appuyer, & de le proteger en toutes sortes de rencontres.

CHAPITRE V.

*DIEU exalte les humiliations du Pere
Yvan.*

SI le Prophete Dauid demande à DIEU de luy rendre la tribulation fauorable; en sorte qu'elle-mesme luy serue de secours: *Seigneur, secourez-nous par la tribulation*; Il faut aduoüer que cette priere fut efficace en la personne du Pere Yvan, parce qu'il retira de tres-grands aduantages, de la persecution qu'on luy auoit suscitée. Car outre les graces qu'il merita par sa patience, par son humilité, & par ses autres vertus, il acquit beaucoup de faueurs mesme exterieures. Son innocence parut avec plus d'éclat, & sa capacité à conduire les ames

fut mieux connuë. Il gagna encore l'affection , & l'estime de plusieurs , & particulièrement du Seigneur Evêque son Supérieur. Ainsi au lieu qu'avant cette persécution il n'estoit ordinairement fuiuy dans ses Sermons que par la populace ; apres que l'orage fut passé , les plus sçavants & les plus considerables de la Ville se rendirent ses auditeurs. L'Archevesque voulut l'honorer luy-mesme de sa presence , & autoriser sa doctrine par son assiduité : il vid l'affluence de monde qui accouroit à ses Predications ; il remarqua par l'attention extraordinaire de l'auditoire l'estat que l'on faisoit de ses paroles , & l'approbation avec laquelle on les receuoit ; il les goûta & il en éprouvoit les effets , sentant dans son ame les impressions de l'Esprit Diuin , qui parloit par sa bouche. C'est pourquoy non seulement il refusa d'écouter les personnes qui le calomnioient , mais encore il devint hautement son panegyriste , & se declara son protecteur.

Le mesme Archevesque ayant vn iour chez soy vne tres-illustre compagnie de diuers Prelats , & de plusieurs autres personnes de grande condition , comme il les eut conuiez au Sermon de nostre zelé Predicateur , la Chapelle où il preschoit se trouua presque remplie d'Archevesques , d'Evêques , & d'un bon nombre de personnes de grande qualité : il fit vn Sermon de tres-grande édification , & d'un merueilleux profit ; de sorte que l'Esprit de Dieu se manifestant par le zele de ses paroles , & par la force de ses inouuemens , tous les auditeurs en furent touchés. Chacun témoigna d'en auoir receu vne satisfaction particuliere , & l'Archevesque qui sembloit y prendre plus de part que tous les autres , apres quelques paroles qui montroient son admiration , aduoüa hautement au milieu de cette illustre assemblée , que le Pere Yvan n'estoit pas connu , & qu'il n'auoit rien de grossier que sa robe ; qu'il paroïssoit pauvre , & ignorant au dehors ; mais qu'il auoit vn interieur tres-riche , & tres-éclairé : & que l'on pouuoit à bon droit dire de luy , que

c'estoit vn diamant enchassé dans du plomb.

Messire de Barreau Archeuesque d'Arles, l'un des plus grands Prelats de la France à raison de son sçauoir, & de sa pieté, rendit en mesme temps vn semblable témoignage de l'estime qu'il faisoit des merites de nostre bon Prestre; car apres auoir assisté à quelques-vns de ses Sermons; & auoir eû quelques particulieres conferences avec luy, sur les plus importantes matieres de la vie spirituelle, il en conceut vne si haute opinion; qu'il en parloit comme d'un homme Apostolique, & comme d'un Prestre tres-sçauant dans la Theologie mystique: disant parmy les louanges qu'il luy donnoit, qu'on le deuoit comparer à vne ruche de mouches à miel; dont le dehors est rude, raboteux, & mal poly: mais qui ne laisse pas de contenir au dedans de la cire, & du miel, faits avec vne merueilleuse industrie. La comparaison de cet illustre Prelat, est vne des plus naïues images que l'on pust faire du Pere Yvan.

Mais l'Archeuesque d'Aix, de qui nous auons parlé, ne se contenta pas de témoigner seulement par ses paroles l'estime qu'il faisoit du bon Pere Yvan, il luy en donna encore des preuues par les effets. Il auoit dans vne salle de son Palais vne grande, & tres-belle image de Nostre-DAM^E de Misericorde, représentée dans vn estat de douleur, & d'amertume; enuironnée des mysteres de la Passion de son FILS, avec cette inscription au plus haut du tableau: *Amaritudine plena sum. Je suis remplie d'amertume.*

Il falloit qu'il y eust à cette image quelque chose de diuin, car d'abord que nostre pieux Ecclesiastique la vid, il la trouua si belle, & si deuote, qu'il ne pouuoit se lasser de la venir voir, & d'y faire ses prieres. Il sembloit mesme qu'il en fust charmé, & qu'il y eust quelque chaisne inuisible, qui l'attirast; puis que tous les matins apres auoir célébré la sainte Messe, il venoit passer quelque temps deuant cette Image, avec des demonstrations de joye, qui découuroient assez les mouuemens, & les transports de son interieur.

Vn iour l'Aumônier de l'Archeuesque ayant pris garde à l'assiduité & à la deuotion de nostre bon Prestre enuers ce tableau, l'attendit en cachette, à l'heure qu'il auoit accoustumé d'y venir. Il ne manqua pas à sa visite ordinaire; comme donc il estoit dans l'ardeur de sa priere, qu'il accompagnoit de regards, & de soupirs amoureux; l'Aumônier l'embrassant tout d'un coup par derriere; *Mon bon Pere*, luy dit-il, *ie vous sursprends dans le pieux larcin; qu'à mon aduis vous desireriez faire de cette Image, dont vous montrez estre fort passionné. Vous avez raison*, répondit le bon Pere Yvan; *i'en suis si amoureux; que ie ne scaurois passer une seule iournée sans luy venir rendre mes hommages. Il faut*, poursuivit l'Aumônier; *que ie dispose Monseigneur à vous le donner. Ah mon bon Monsieur*, repliqua le Pere; le regardant d'un œil reconnoissant; *que ie vous serois obligé? & que ie prierois de bon cœur la Mere de DIEU pour vous; ie fais plus d'état de cette Image, que de tous les autres biens de l'Archeuesché.*

En suite l'Archeuesque ayant esté aduertty, & disposé par son Aumônier, & voulant estre luy-mesme tesmoin de la ferueur du Pere Yvan enuers son Image de la Sainte Vierge; se mit dans vn lieu, d'où il pouuoit le voir sans estre apperceu. Il admire les tendresses, & les respects que ce seruiteur de la Mere de DIEU tesmoignoit auoir pour sa souveraine Maistresse; il en est touché; & la Grace acheuant les dispositions que son Aumônier luy auoit déjà données, il se resolut de luy en faire vn present. Et ainsi s'étant fait voir, & s'approchant de luy avec vn visage riant, & d'une façon obligeante. *Ie pense*, bon Pere, luy dit-il, *que vous estes amoureux de ma Vierge; puis que vous venez tous les iours luy faire la Cour, comme à vostre Princesse. Il est vray*, Monseigneur, répondit le Pere; *que ie l'ayme de tous mon cœur; & ie sens ie ne sçay quel attrait, qui m'attire à elle si tendrement & si puissamment, que i'aurois de la peine à me contenir de la venir voir tous les iours. Je ne veux pas*, repliqua cet illustre & genereux Prelat; *que vous ayez d'oresnauant cette peine; ie vous la donne; à con-*

dition, que vous la priez pour moy. En mesme temps ayant appelé vn de ses domestiques, il luy commanda de la faire porter à cette heure là mesme, dans la chambre du Pere Yvan. Je ne scaurois dire quelle fut la joye de ce bon Prestre, & les sentimens de reconnoissance qu'il montra à ce magnifique Prelat, qui en effet luy donnoit la plus rare piece de son Palais, en luy donnant cette Image dont il faisoit vn estat singulier; l'ayant fait venir d'Italie comme vn ouvrage extraordinairement beau. Nostre seruent Ecclesiastique l'accompagna donc par les ruës, avec plus de satisfaction, que si on luy eust fait vn present de la Croix Archiepiscopale.

Mais que l'on ne s'estonne pas de l'amour, & de l'attrait de nostre bon Prestre enuers l'Image, dont nous auons parlé; puis que nous pouuons dire, que c'estoit vn effet de l'inspiration diuine, ou vne marque de l'esprit de prophetie dont il estoit doié. Car il deuoit bien-tost entreprendre l'Institut de Nostre-DAME de Misericorde, & ce portrait representoit, ainsi que nous auons déjà dit, la Sainte Vierge sous cette auguste qualité; de maniere qu'il estoit pousé par l'Esprit diuin à la desirer, & à la demander; comme vn bien qui deuoit estre sa lumiere, son azile & sa consolation. En effet ce fut par cette mesme Image, que DIEU l'encouragea plus fortement à travailler à l'Ordre de ses Religieuses: car comme il y faisoit ses prieres, il en receut les plus claires connoissances, & les plus puissans mouuemens. Elle luy seruit mesme de refuge dans les persecutions dont il fut assailly; de façon que la seule presence de ce tableau l'animoit à poursuiure les desseins de sa Congregation; n'obstant les empeschemens que le demon s'efforçoit d'y apporter. Il la donna en suite à ses premieres filles, quand elles commencerent à s'assembler: à qui elle fut encore vn bouclier, & vn fort azile contre les assauts du demon, & les persecutions des hommes. aussi y auoient elles recours dans tous leurs besoins, de telle sorte que leur confiance estant efficace; la Sainte Vierge faisoit vne infinité de merueilles, en faueur des prieres qu'elles luy offroient deuant ce tableau.

Depuis qu'elles sont Religieuses, elles le conseruent dans l'interieur de leur Monastere de la ville d'Aix, comme vne tres precieuse relique, & vne source de benediction; par laquelle la Mere de **DIAY** continuë de répandre sur elles ses graces, & ses faueurs. Apres quoy qui doutera que le Pere Yvan ne fust pousé par l'Esprit diuin, à aymer cette Image, à l'honorer, & à la desirer puis qu'il en deuoit receuoir tant de bien? Sur quoy nous pouuons faire cette remarque; que comme il y a des lieux où **DIEU** se communique plus abondamment que dans les autres, encore qu'il soit partout: il y a aussi des Images, deuant lesquelles particulièrement il veut estre prié, & où sa bonté exauce plus facilement les prieres.

CHAPITRE VI.

Sa charité enuers les pauvres honteux, & les pauvres malades.

QVand nous lisons que les eaux du deluge qui abbatoient toutes les choses éminentes, eleuerent l'Arche, & l'auolinerent du Ciel; nous pouuons dire, que c'est vne image de l'aduersité, & de la persecution: car les hypocrites en sont abbatus; parce qu'ils perdent courage, & laissent leurs deuotions, dès qu'il y a du mépris ou quelque autre mal à souffrir: mais les justes, qui sont sous la protection diuine, comme dans l'Arche, s'eleuent par les humiliations, & se fortifient par les aduersitez. Comme nostre Imitateur, qui estant deuenu plus courageux, & plus feruent par la persecution qu'il auoit endurée; continua avec ardeur les exercices de sa pieté; s'addonnant mesme avec plus de zele qu'au parauant aux œuures de misericordie. Ainsi outre les secours spirituels qu'il donne à ceux qui s'adressent à luy; sa plus grande occupation, est de s'appliquer au secours des pauvres, pour l'ame, & pour le corps. Il ne se contente pas de

donner l'aumône à ceux qui la luy demandent, ny d'assister ceux qui viennent decouvrir leur misere dans sa maison; il s'informe des pauvres honteux; il tâche de sçavoir leur maison; & de connoistre leurs necessitez: puis il les visite charitablement, & s'efforce de pourvoir à leurs besoins, avec vn amour, & vne benignité paternelle. Il leur porte luy mesme sous sa robe des pots pleins de bouillon, des paniers de pain, des fruiets, & autres aliments; faisant ces actions de misericorde de grand matin, auant qu'il y eût du monde par les ruës; ou le soir fort tard, quand la plus-part des personnes estoient retirées dans leurs maisons; pour n'estre point veu, & pour éviter en se cachant, les occasions de vanité; & pour ne pas faire rougir les pauvres honteux, en decouvrant leur indigence, par les aumônes.

Entre ceux-cy il auoit vn soin particulier des malades, qui estans detenus dans leurs lits, ne pouuoient pas se secourir, ny rechercher l'assistance qui leur estoit necessaire. Il les visitoit avec assiduité pour les encourager à souffrir; il contribuoit en tout ce qu'il pouuoit leur fournir pour les soulager: & prenant l'occasion de leur maladie corporelle; il s'estudioit à leur faire connoistre l'infirmité de leur ame, & à les instruire des remedes dont ils deuoient se seruir. Quand il s'estoit épuisé, & qu'il n'auoit plus rien à donner, il exhortoit les personnes deuotes, qui s'adressoient à luy à concourir à ces œuures de misericorde.

Sa charité auoit encore plus d'estendue; car il faisoit luy-mesme des questes particulieres par les maisons, pour ayder les pauvres malades; leur distribuant en suite avec grande discretion, ce qu'on luy auoit departy. Outre ces questes, il en faisoit vne generale par toute la Ville, pour trouuer des draps, des seruiettes, & toute autre sorte de linge necessaire au soulagement des pauvres infirmes. De maniere qu'ayant connu par experience combien cette quete de linge estoit necessaire aux pauvres malades, il s'y addonna, & aux autres œuures de misericorde, avec tant d'amour, & d'application; que quand il voulut entrer dans la Congregation des Peres de l'Oratoire, il n'apprehendoit rien tant, sinon

qu'ils ne voulussent pas luy permettre de les continuer. Ce n'est pas qu'il ne fust tres obeïssant à ses Superieurs : encore que dans cette Congregation il n'y aye point de Vœu d'obeïssance ; mais la charité preualoit en luy , & il sembloit qu'il aymast mieux laisser la pratique des autres vertus , que de celle cy , qui est la Reine de toutes.

Il pratiqua neantmoins les vnes , & les autres ; car auant que d'estre receu dans cette Congregation il obtint des Superieurs la permission de continuer ses charitez , ses visites , & ses autres œuures de misericorde enuers les pauvres honteux , & les pauvres malades ; ainsi qu'on peut le voir dans vne lettre , qu'il écriuit pour lors à vne de ses filles spirituelles de Brignolles , où il luy marque son dessein d'entrer en la Congregation des Peres de l'Oratoire , & l'apprehension qu'il auoit eüe qu'on ne l'obligeast à des exercices incompatibles , avec ceux qu'il pratiquoit enuers les pauvres : adjoustant sur la fin de sa lettre , qu'il esperoit qu'on le laisseroit en liberté , suiuant la promesse qu'il en auoit receüe.

CHAPITRE VII.

Il a soin de la Confrerie de la Misericorde.

LE bon exemple accompagné de la Grace diuine , n'est pas moins efficace , que le mauuais , pour attirer des imitateurs ; car si vne bluete peut causer vn grand incendie , & si vn mal qui est petit en son commencement , se grossit par la suite , quand il n'est pas arresté ; nous pouons asséurer la mesme chose des bonnes œuures , & des entreprises de pieté ; dont les commencemens sont petits ; mais dont les progrès sont merueilleux ; quand on les commence avec pureté d'intention , & qu'on les poursuit avec fidelité. Si bien que c'est le grain de moustarde de l'Euangile , qui estant le moindre dans les semences , deuient le plus grand de tous les arbrisseaux.

Nostre

Nostre charitable Ecclesiastique n'exerça pas long-temps seul les œuvres de miséricorde; son exemple attira bien-tost plusieurs personnes de pieté; qui se joignirent à luy pour auoir soin des malades & des honteux. L'on auoit déjà entrepris dans Aix vne espece de Confrerie, pour le mesme sujet; mais comme elle estoit encore dans les foiblesses de son commencement; la diuine Prouidence enuoya dans la Ville, nostre bon Prestre, pour l'affermir, & la perfectionner. Ce fut d'abord vn de ses principaux emplois; car ayant attiré par ses Predications, & par ses exemples, diuerses personnes charitables à la pratique des œuvres de miséricorde; il les vnit avec celles qui estoient déjà enrôllées dans cette Confrerie; & fortifiant leur bonne volonté par les communs exemples, & la sainte émulation des vns, & des autres; enfin par ses soins, & par ses trauaux il establît cette pieuse Compagnie, appelée de la Misericorde, qui est la plus vtile en son genre de la ville d'Aix, & sans doute vne des plus necessaires de l'Eglise, à l'assistance des pauvres; tant pour le bien de leurs ames, que pour le soulagement de leurs corps.

Cette deuote Societé est composée d'hommes de toutes sortes de condition. Il y a des Ecclesiastiques, & des Nobles; les gens de Iustice y entrent aussi; & les Bourgeois s'y trouuent, meslez avec les Marchands. Ces Messieurs ont accoustumé de s'assembler au iour déterminé, pour contribuer leurs soins, leurs aduis, & leurs aumônes au secours des pauvres malades, & des pauvres honteux, pour lesquels leur Confrerie a esté establie: & pour auoir plus abondamment de quoy les ayder, & faire charitablement contribuer ceux-mesmes qui ne leur sont pas associez; les plus qualifiez, & les plus zelez d'entre les Confreres, font publiquement la queste dans les Eglises, les Dimanches, & les Festes pendant le diuin Seruice.

L'experience a fait voir, que ceste sorte de queste n'est pas seulement profitable aux pauvres, qui en reçoient beaucoup d'assistance; mais encore à ceux qui la font, par le merite des vertus qu'ils pratiquent en cette rencontre, joint que le peuple mesme, reçoit vne tres-grande édification du

bon exemple de ces personnes de qualité ; & du zele qu'ils témoignent auoir pour l'assistance des pauvres : & comme ce sont des personnes de probité & de conduite qui ont l'administration de cet argent ; ils le distribuent avec tant de prudence ; que tous les pauvres en sont soulagez en leurs miseres. Aussi vſe-t'on de diuers moyens , pour faire qu'il n'y en aye aucun , qui ne soit secouru selon son besoin : car on a vn rolle de toutes les familles , & de tous les particuliers , qui doivent estre assistez ; de plus on visite tous les jours les pauvres malades , & les autres necessiteux pour connoistre leur besoin , & augmenter , ou diminuer l'aumosne selon qu'on le juge à propos : outre qu'on s'informe diligemment en tous les endroits de la ville , pour decouvrir les necessitez des familles , & des particuliers.

Le principal soin de cette Confrerie est de faire assister par des personnes sages , & discrettes les pauvres qui n'osent pas declarer leur indigence ; si bien qu'on s'étudie à ne pas faire connoistre leur besoin , de peur de les faire rougir de confusion ; ce qui leur seroit vn espece de supplice que l'on doit soigneusement éviter. Il y a encore des personnes establies , pour fournir aux malades toute sorte d'assistance ; car les Confreres ont le soin de distribuer des bouillons , du pain , de l'argent , du linge & d'autres choses necessaires : l'on commet aussi des Medecins , des Apotiquaires , & des Chirurgiens ; qui gratuitement , ou aux depens de la Societé , les visitent , ordonnent , & font ce qu'ils jugent estre conuenable à leur santé.

Enfin pour le secours spirituel , qui est le plus grand & le plus important de tous , & celuy auquel tous les autres doivent se rapporter ; la Confrerie establit vn Prestre qui en est membre , & qui a son logement dans les chambres que le bon Pere Yvan fit bastir , joignant la Chapelle de Nostre-DAME de Beauuezer ; & l'occupation de ce Prestre consiste ; à visiter les pauvres malades , à les instruire , à les consoler , & à les disposer à recevoir les Sacrements , quand il juge expedient d'en faire aduertir Messieurs

les Curez , si bien que les pauvres sont assistez en toutes choses tres-soigneusement , & avec grande charité.

L'on ne sçauroit exprimer les biens immenses , que cette deuote Confrerie a faits & qu'elle procure continuellement. Combien nourrit-elle de particuliers , & combien entretient-elle de familles entieres? que de pauvres malades qu'elle a conseruez en vie , qui seroient morts faute de secours dans leurs maladies? A combien de pauvres hommes , femmes , & filles a-t'elle sauué la vie , l'honneur , & la conscience? les retirant de la necessité extrême , qui peut-estre les auroit precipitez dans de tres-grands malheurs. On ne sçauroit encore dire le nombre de malades , qui peut-estre seroient decedez sans auoir receu les Sacrements , si ceux qui les visitent , de la part de cette pieuse Compagnie , n'auoient pris le soin de les instruire , & de faire appeller auprès d'eux les Curez , ou leurs Vicaires. Toutes ces bonnes œuvres doivent estre attribuées au bon Pere Yvan , comme à celui qui en a esté le principal Directeur ; qui par ses conseils , ses exemples , & ses soins , l'a affermie , & perfectionnée de la façon qu'elle est maintenant.

Ce fut luy qui pour lier plus fortement les Confreries de cette Société , & pour augmenter plus fortement leur ferueur par la participation des tresors Ecclesiastiques , obtint le premier de nostre saint Pere des Indulgences plenieres en leur faueur , dans l'Eglise de Nostre-DAME de Beauuezer , où il demouroit ; & où cette Confrerie est erigée. Et pour la rendre encore plus ferme , & de plus de durée par la protection de la plus puissante de toutes les creatures ; il persuada aux Confreres de consacrer leur Compagnie à la Sainte Vierge , sous le tiltre de Nostre-DAME de Misericorde. Il les porta aussi à celebrer chaque année dans cette Chapelle la Feste de Nostre-DAME de Misericorde le Vendredy de la semaine de la Passion , qui est le iour auquel la sainte Eglise nous la propose , de façon que l'on a depuis obserué cette Feste dans la mesme Chapelle , avec grande ferueur de la part des Confreres.

& avec grande affluence de peuple qui y accourt de toutes parts.

L'on ne pouuoit donner vn nom plus conuenable à cette Societé que celui de la Misericorde, parce que l'on y exerce toutes les œures de misericorde, tant spirituelles, que corporelles; c'estoit aussi la vertu que le Pere Yvan aymoit plus tendrement, & qu'il pratiquoit avec plus de zele; particulièrement depuis qu'il ouït par vne voix du Ciel; que **DIEU** luy feroit misericorde, quand il auroit fait la Misericorde. Ce qui est sans doute tres-merueilleux; qu'ayant tant de rigueur, & de seuerité pour soy, il eut enuers les autres vne ardente charité, & vne benignité tout à fait singulière.

CHAPITRE VIII.

Il a vne grande maladie.

Pendant que nostre pieux Ecclesiastique s'addonnoit aux œures de misericorde, & tâchoit d'y porter les personnes qui viuoient sous sa direction; **DIEU** voulut luy faire exercer la patience; & le mettre à vn estat, où il eust besoin que l'on exerçast en sa personne, les mesmes œures qu'il auoit accoustumé d'exercer en celle de son prochain. Il fut assailly d'une grande, & violente maladie, qui le reduisit bien tost à l'extremité, par vne fièvre ardente, & maligne; qu'il auoit peut-estre contractée en la visite des autres malades. Son corps extenué par les abstinences, & par les jeûnes; meurtry par les haïres, les ceintures, les cilices, & autres instruments de penitence; & épuisé par les veilles, & par les trauaux continuels, ne pût long-temps résister à la violence du mal; si bien qu'en peu de jours ses forces s'affoiblirent; & la maladie augmenta de telle sorte, que les Medecins desespererent de sa guerison.

T

Il éprouua dans cette maladie, ce que le Fils de DIEU nous a promis : que nous serons traitez de la mesme maniere, que nous traiterons nostre prochain ; parce qu'ayant toûjours eû vne grande charité ; & pris de grands soins pour les pauvres malades, DIEU suscita diuerses personnes, qui eurent la mesme charité, & prirent le mesme soin pour luy, durant sa maladie. Mais leur assistance ne seruoit pas de beaucoup, parce que le malade ne vouloit pas estre seruy : car quoy qu'il eust besoin de bons bouillons, & de quelques aliments delicats, neantmoins il les refusoit, ne voulant pas rompre la rigoureuse abstinence qu'il obseruoit depuis plusieurs années.

Les Medecins, & les autres personnes qui s'interressoient en sa santé, n'oublierent rien pour luy persuader, d'vser de toutes les choses qui estoient necessaires à sa guerison : il perseuera neantmoins à ne vouloir relâcher de son abstinence ; quelque raison qu'on luy apportast ; & quelque danger de mort qu'on luy fist apprehender. Aussi disoit-il, *que son corps n'estoit qu'une beste, & qu'on le devoit traiter sans aucune delicatesse ; comme une beste de charge, qu'il n'auoit nourrie que de viandes pauvres, & grossieres.* Il est vray, qu'il ne s'estoit substanté que de cette sorte d'aliment, à l'exemple de IESVS-CHRIST ; dont la nourriture, selon le Docteur Seraphique, a toûjours esté pauvre & grossiere.

Quelques-vns estoient de son sentiment, craignant que s'estant accoustumé à ne manger que des herbes ; & des fruiçts, son estomach ne püst supporter d'autres viandes : mais le puissant motif du refus qu'il en faisoit, c'estoit la crainte d'estre trompé ; & que le demon ne voulust se seruir de l'infirmité de son corps, pour luy faire violer son abstinence : de mesme qu'il auoit voulu se seruir de la faim du Fils de DIEU dans le desert, pour luy faire rompre son jeûne ; ainsi que le disert Chrysologue a remarqué. Les libertins, & les ames imparfaites profitent des moindres pretextes, & qui souuent ne sont qu'apparens, pour enfreindre les Commandemens de l'Eglise, au contraire

les justes, & les consciences bien timorées, n'osent pas se dispenser de la pratique des conseils de la perfection; lors mesmes qu'ils en ont des motifs raisonnables & tres-pres-fans; si ce n'est que l'autorité de leurs Superieurs les y oblige.

Ce fut le moyen auquel les amis de nostre bon Pere eurent recours. Ils scauoient l'affection que l'Archeue-que auoit pour luy, & l'interest qu'il témoignoit prendre en sa conseruation: ainsi il ne leur fut pas difficile d'obtenir de luy vn commandement à nostre malade, tel qu'on le pouuoit souhaiter. Ce charitable Prelat n'eust pas plutôt appris l'estat de sa maladie, & le danger auquel son esprit de mortification l'exposoit; qu'il luy enuoya vn des siens; avec ordre exprés de luy commander de sa part, de se nourrir de toutes les viandes qu'on luy presenteroit: non seulement durant sa maladie, mais encore quand il auroit recouuré sa santé; & qu'à l'aduenir il ne gardast plus ses jeûnes & ses abstinences extraordinaires. Il obeit à ce commandement, avec toute la soumission que la parfaite obeissance peut exiger. Il obserua en suite tous les ordres des Medecins: & s'abandonna tout à fait à leur conduite pendant sa maladie. Il n'eut pas moins d'obeissance apres le recouurement de sa santé; car au lieu qu'il faisoit auparavant vne profession publique d'vne vie penitente & rigoureuse, il modera ses austeritez en telle sorte; qu'il ne pratiquoit que celles qu'il pouuoit cacher, s'estudiant à rendre sa façon de viure, conforme à celle des autres deuots Ecclesiastiques.

Si les Peres du desert conurent, que la penitence inouïe de saint Simeon Stilite sur la pointe de sa colonne, estoit vn ouurage de l'Esprit diuin; en ce qu'il condescendit à la quitter, au premier commandement que le Superieur luy en fit faire; on eut la mesme connoissance de celle du Pere Yvan; qui ayant resisté comme vn Lion, tandis qu'il auoit apprehendé que ce ne fust vne tentation de l'ennemy; ou vne surprise de son amour propre; il obeit comme vn agneau; dès qu'il connut que c'estoit la volon-

ré de DIEU, qui luy estoit manifestée par celle de son Supérieur; sçachant tres-bien que la voye de l'obeyssance est la plus asséeurée de toutes, puis qu'elle est autorisée par la parole de IESVS-CHRIST qui a dit à tous les Supérieurs: *Lui obeït à vos paroles, obeït à la mienne; & qui méprise vos commandemens, méprise les miens.*

Je ne parleray pas de la patience, qu'il témoigna pendant sa maladie; car il portoit trop de haine à son corps, pour se plaindre du mal qu'il enduroit; & il aymoït trop les mortifications, & les souffrances; pour ne pas accepter avec joye & action de grace; celle que la Prouidence diuine luy enuoyoit. Sa maladie luy tenoit lieu des rudes mortifications, dont il se châtoit; & il y trouuoit de l'aduantage, en ce qu'il estoit soulagé de la violence qu'il auoit coustume de se faire. Enfin il souffroit avec d'autant plus de resignation, & de conformité; que receuant son mal immédiatement de la Main du SEIGNEUR, il ne pouuoit pas douter qu'il ne fust agreable à sa volonté.

Mais il ne faut pas que j'obmette les marques qu'il donna pendant sa maladie du dépouillement des biens de la terre. J'ay dit qu'on luy auoit conféré vn petit Prieuré, pour la Cure de Brignolles; les habitans du lieu de ce Benefice se confiant en sa facilité; luy demanderent d'abord des reparations plus grandes, que les reuenus qu'il en perceuoit: outre qu'ils s'efforcèrent à luy persuader, qu'il estoit obligé à la residence. Ces propositions luy ayant causé vn scrupule de manquer à son deuoir, il desira aussitost auoir quelque occasion de se démettre de son Prieuré, pour n'auoir aucun sujet de trouble dans sa conscience.

Il fit des prieres durant quelque temps à ce dessein, ainsi que luy-mesme nous a dit: & en suite estant tombé dangereusement malade, il creut que ses vœux auoient esté exaucez; & que c'estoit l'occasion qu'il auoit demandée, ce qui fut vne des consolations qu'il receut dans sa maladie. Il se démet donc de son Benefice en faueur d'vn de-

uoit & ſçauant Eccleſiaſtique, ſans nulle reſerue de penſion: rendant mille actions de graces au SEIGNEUR de l'auoir déchargé de ce fardeau, & deliuré de cette occaſion de trouble, & d'inquietude. Mais ce qui fait voir qu'aſſeurément il ne reſigna pas ſon Benefice par la crainte de mourir, mais pour l'amour du repos de ſa conſcience, & de la plus grande perfection: eſt, qu'ayant recouuré la ſanté, comme cet Eccleſiaſtique qui en eſtoit pourueu, voulut encore le reſigner en ſa faueur, il l'en remercia, & le refuſa genereuſement.

Si le Fils de DIEU nous a enſigné qu'il falloir arracher l'œil & retrancher le bras, qui nous ſert d'occaſion de ſcandale; ne deuons nous pas dire qu'il faut quitter les biens qui nous ſont matiere de ſcrupule, & nous mettent dans le danger d'offenſer DIEU; & qu'il eſt bien plus auantageux de meriter le Ciel, par le dépouillement des biens de la terre, que de ſe mettre au hazard d'eſtre damné par la poſſeſſion des richesses du temps.

Nôtre bon Eccleſiaſtique n'auoit pas d'ailleurs de quoy ſubſiſter honorablement, ſans le reuenu de ce Prieuré; neantmoins il ſe ſeruit de ſa maladie pour ſ'en démettre; & refuſa la reſignation qu'on luy offrit apres ſa conualeſcence; parce qu'il craignoit que ſa conſcience n'en fuſt embarrasſée; & en effet quelques années apres s'entretenant ſur ce ſujet avec quelques-vns de ſes plus familiers, il leur dit: qu'il connoiſſoit tres bien que DIEU vouloit qu'il vécût en pauvre Preſtre, & qu'il trauiſſaſt à la ſueur de ſon viſage: puis qu'ayant eû ce petit Benefice, ſa Prouidence l'auoit ſi fortement preſſé à ſ'en démettre, & à ne plus l'accepter: qu'en cela il reconnoiſſoit une tres-grande miſericorde en ſon endroit.



CHAPITRE IX.

Il expose sa vie pour le service du prochain pendant la maladie contagieuse.

IL ne fut pas plustost releué de sa maladie , & à peine auoit-il recouré ses forces ; qu'il reprit ses exercices de deuotion & de charité , avec plus de ferueur qu'au parauant ; il retrancha de ses penitences , pour obeyr au commandement de son Superieur : mais il redoubla ses soins & ses trauaux enuers le prochain , tant en la direction des ames , qu'en l'assistance des pauvres. Ses amis voulant moderer son zele , luy representoient : { Que s'il auoit esté dange-reusement malade , son infirmité n'auoit esté causée , que par ses frequentes visites , & par ses continuels trauaux ; & que s'il retomboit dans vne semblable maladie , il se met-toit en peril de n'en pouuoir plus releuer.

Il ne laissa pas de continuer ses charitables offices à toutes sortes de personnes , à toute heure , & en tout temps : & pour répondre à l'objection de ses amis : il leur disoit ; *Qu'il ne souhaittoit rien tant , que mourir pour DIEU ; ou à l'occasion du prochain pour l'amour de DIEU : que ce seroit le plus grand bon-heur qui luy pust arriuer ; & qu'il n'esperoit pas pouuoir iamais meriter vne si grande misericorde.* C'est vne merueille , que ce genereux Ecclesiastique ait touiours eü de grandes apprehensions de la mort , fondées sur la crainte des jugements de DIEU ; en sorte que la seule pensée le faisoit trembler , ainsi que nous dirons ailleurs ; & cependant il n'a jamais refusé aucune sorte de trauail , de peine , ny d'incommodité ; il n'a mesme jamais témoigné nul empressement , ou soin extraordinaire de se conseruer ; qu'autant qu'il a crü y estre obligé par la prudence Chrestienne. Il a mesme braué la mort , en s'exposant au danger évident de mourir , lors qu'il s'est agy de la

gloire de D I E U , ou du service de son prochain. Ce qui nous fait d'autant mieux connoistre en luy , la force de la grace diuine, & la solidité de sa vertu , & que ce n'estoit pas par inclination , ny par aucun mouuement naturel qu'il se conduisoit, mais par les principes de la Foy. Et par les mouuemens de l'Esprit diuin , & ainsi quelque temps apres quil eut recouuré la santé , qui fut enuiron l'année 1630. la ville fut affligée de sa maladie contagieuse , d'une façon violente & extraordinaire. C'est vne des incommodités de Prouence , d'estre souuent frappée de ce fleau du Seigneur , à cause du commerce que les Prouençaux ont avec l'Egypte , & beaucoup d'autres pays du leuant & du midy , où cette maladie est presque continuelle. Dans vingt années la ville d'Aix en a esté infectée trois fois ; en chacune desquelles le pere Yvan a donné d'illustres marques de son zele. & de sa generosité. Car il s'est tousiours exposé au danger de mourir pour le service du peuple : mais particulierement en la premiere de 1630. durant laquelle le mal fut si violent , & fit de si grands rauages dans cette ville là ; que dans vne année , & quelques mois , elle emporta la plus grande partie des habitans.

Le bon pere Yvan fut vn des premiers , qui s'exposèrent pour le salut du prochain , quoy qu'il n'eust aucune obligation de resider dans la ville , & qu'on luy fournist milles occasions d'en sortir. La seule charité euers les pauvres , & le zele du salut des ames , furent les chaisnes qui le retinrent , tandis que la plus part des habitans , & presque tous les Prestres , & les Religieux s'enfuirent. Mais il ne s'arresta pas ainsi que plusieurs , pour s'enfermer dans vne maison , ou dans vn Cloistre , & ne souffrir aucune communication : mais pour s'exposer à toutes sortes de personnes , & les ayder dans tous leurs besoins spirituels.

Il estoit dans sa cinquante cinquième année : lors qu'il s'offrit au grand Vicaire , qui receut vne joye singuliere du secours d'un si sage, si fort, & si accomply Ecclesiastique ; dont la conduite ne pouuoit luy estre suspecte , ayant desia veu tant des marques de sa discretion , & de sa probité. Aussi donna-t'il des témoignages de l'estime , & de l'attente qu'il en auoit : car

il le logea dans le poste le plus difficile ; luy donnant pour sa station, la plus grande Eglise de la ville, & la plus dangeteuse en ce temps-là, à cause de l'affluence du Peuple qui y accouroit de toutes parts.

C'est l'Eglise Metropolitaine de Saint Sauueur, la premiere, & la principale de la ville d'Aix; & l'une des plus celebres, non seulement de Prouence, mais encore de France: tant pour son ancienneté, ayant esté fondée par S. Maximin, l'un des Disciples du Fils de DIEU, que pour les grandes reliques qu'elle enferme, & pour la deuote Chappelle de Nostre Dame d'Esperance, l'une des plus celebres de tout le pays.

Le pere Yvan fut estably dans cette Eglise, comme vn ouurier puissant, & infatigable, en vn lieu où le travail estoit tres-grand, & tres-difficile. De maniere que c'est dans ce poste honorable, & sur ce theatre glorieux, qu'il donna des preuues de sa force à mépriser la mort, de son zele pour la gloire de DIEU, & de sa charité enuers le prochain: car il exerça la charge de Curé, celebrant la Messe, instruisant le peuple, & administrant les Sacremens, à tous ceux qui se presentoient. Quelques deuots Ecclesiastiques, & Religieux, trouuilloient avec luy, dans le secours des habitans qui estoient demeurez: mais nul ne s'exposa avec tant d'ardeur, & moins de reserve que luy. Aussi receuoit-il toutes sortes de personnes sans faire aucun discernement des sains, ou des malades; quelque iuste apprehension qu'il pust auoir de gagner ce mal contagieux: apprenant chaque iour, & presque à toute heure, que plusieurs de ceux avec lesquels il auoit communiqué, en estoient morts, ou atteints. Cette connoissance que l'on eut de luy, qu'il apprehendoit moins de s'exposer que les autres, luy attira vne plus grande affluence de monde; chacun estant asseuré d'en estre receu avec amour & cordialité. En effet il ouyt luy seul à confesse la plus grande partie de ceux qui estoient restés dans la ville, selon le témoignage que nous en auons de personnes de grande autorité, & d'une probité approuuée, & de ceux mesmes qui l'auoient admis à cet employ.

Mais son zele n'estoit pas borné dans l'Eglise de S. Sau-

ueur, il administre les Sacremens par la ville; il va de rue en rue, & de maison en maison, pour s'informer de l'estat des sains & des malades, pour sçavoir les necessitez des familles, & des particuliers, & pour donner assistance à tous ceux qui en ont besoin; La charité de Iesus-Christ le presse comme Saint Paul; ainsi est il dans vne sainte ardeur, & dans des sollicitudes continuelles de suruenir, & mesme de preuoir que nul de ceux qui ont l'usage de la raison, ne meurent sans auoir receu l'absolution de ses pechez & que le Sacrement du Baptisme soit administré sans aucun delay; car c'est vne desolation de ce temps déplorable, que toute sorte de commerce estant interdit, Plusieurs enfans meurent sans recevoir ce premier Sacrement de la Sainte Eglise, à moins que l'on aye vn soin extraordinaire de le leur conferer promptement.

Sa charité s'estendoit encore au besoin temporel des pauvres: car il leur faisoit de grandes aumosnes, & il auoit tres-grand soin de les soulager par soy ou par les autres, dans toutes leurs necessitez. Aussi sçauoit-il tres bien qu'il n'est point de temps auquel l'aumosne soit plus necessaire, que durant le mal contagieux; parce que les pauvres sont pour lors reduits à la derniere extremité, n'ayant aucun moyen de gagner leur vie, & estant priuez du secours charitable des Riches, que la peste contraint de fuir. Et quoy qu'il n'ignorast point, que c'est en ce temps-là particulierement que l'aumosne est tres-dangereuse à celuy qui la donne, en ce que les pauvres estant contraints de s'exposer à tout pour trouuer à viure, & ne pouuant se conseruer, mettent en vn tres-grand peril les personnes qui s'en approchent; cette consideration neantmoins ne fut pas capable d'arrester la ferueur de sa charité. Car il donnoit l'aumosne à tous ceux qui la luy demandoient, & il la portoit mesme dans les maisons des pauvres malades, qui n'estoient pas en estat de la luy demander, & dans les logis des honteux, qui n'osoient pas declarer leur indigence.

Mais l'enceinte de la ville ne pouuant contenir l'ardeur de son zele, il va par les champs, il cherche les pauvres dans

leurs hutes, il leur fait des exhortations tres briefues, & tresferuentes, il les entend à confesse, sur des gazons, ou sous des arbres; apres quoy il leur donne quelque piece d'argent, ou il leur fait quelque autre gratification, selon le besoin qu'il reconnoist estre en eux.

Enfin son zele n'estoit pas encores satisfait; car les Superieurs Ecclesiastiques qui estoient pour lors, nous assurent, qu'il voulut s'exposer dans les Infirmeries pour le service des pestiferés, qu'il s'y estoit preparé, & qu'il en témoigna vn grand desir: mais ils ne voulurent pas le luy permettre, le reseruant pour l'extreme necessité, comme vn ouurier fidelle, dont ils connoissoient les merites, & duquel ils pouuoient se seruir dans le besoin; s'il arriuoit que ceux qu'on y auoit establis estant morts ou frappez de la maladie, on ne pust trouuer aucun autre pour succeder à leur place. Il y eut de ses bons amis qui le sollicitèrent à sortir de la ville, pour eui-ter le danger de mourir de la peste, luy offrans tout ce de-quoy il auroit eubesoïn: mais il les remercia genereusement, témoignant par ses Lettres son mépris pour la mort, le peu d'estat qu'il faisoit de soy-mesme, & de la vie presente, & la grande confiance qu'il auoit en Dieu. Il ne voulut pas mesme se seruir de quelques remedes preseruatifs, qu'on luy auoit indiqués pour sa conseruation, ainsi que nous trouuons dans vne de ses Lettres, que j'ay voulu rapporter icy, pour faire connoistre par ses paroles les vertus & les graces dont il estoit enrichy.


LETTRE SIXIESME.

MA fille, j'ay receu vos Lettres, lesquelles dans l'ombre de la mort m'ont grandement resiouy, & contenté, entendant le soin que vous auez de nous. Nous vous en remercions, & vous prions de continuer. Sur tout demandez à DIEU, que si nous mourons (du mal contagieux) ce soit en sa paix, en sa bonne grace, & pour luy, & resignez dans les douleurs que cause le mal: le n'ay peur que de ce costé. Je vous recommande sur tout

Monsieur N. Car il est nécessaire qu'il soit souvent par la ville avec les Consuls, pour les affaires du Public; j'ay grande peur qu'il ne prenne le mal, ce que ie ne voudrois pas, pourveu que DIEU en soit content. Pour moy quand ie serois mort il y a trente & quarante ans, il en seroit mieux pour mon salut. Il me semble aussi qu'il vaudroit mieux que ie mourusse maintenant que d'attendre davantage. Car au lieu de profiter, ie ne fais que perdre; toutesfois ie renonce à mon vouloir, & à mon sentiment, & me mets entre les mains de DIEU, qu'il fasse de moy selon son bon plaisir. Saluez vostre parent, & remerciez-le pour moy de la métairie qu'il m'a offerte pour m'y retirer: Car il faut que ie ne bouge de cette ville, iusques à ce que la peste y ait cessé, ou pour mourir ou pour viure. Grand dommage à l'Eglise de Dieu, quand le Pere Tvan seroit ensevely il y a cinquante ans. Seulement, priez bien Dieu pour moy.

Dans la dixneuvième qu'il écriuit aussi en ce temps-la, il témoigne les mesmes sentimens de resignation entre les mains de DIEU l'indifference pour la mort, & du mépris de soy en ces termes.

J'ay receu vos Lettres qui m'ont resiouy dans les tenebres de nostre estat, & j'ay receu la boîte, & vous en remercie, puisque Dieu m'a conserné iusques à maintenant sans artifices ny remedes, ny preseruatif aucun. Je passeray outre dans les mains de DIEU: le luy ay desia dès long temps souvent donné ma vie, mort, maladies, peines, peurs. Je suis d'aduis de ne faire aucune recepte pour viure davantage, que les ordinaires que Dieu veut: comme manger, boire, dormir. Je vois que ie ne fais pas grand cas pour la gloire de Dieu: au contraire ie peche & cours danger de me perdre davantage, il m'est tout vn de mourir d'une peste, ou de quelque fièvre chaude. Nous sommes bien peu de chose, & faisons encore moins pour Dieu qu'aucun ne se glorifie de rien qu'il soit, de rien qu'il fasse, de rien qu'il vueille, ou ne vueille. O que tout cé qui n'est pas Dieu, est bien peu.



CHAPITRE X.

Il est estably Vicaire de la Parroisse de Sainte Magdelaine, & il veut quitter la ville d'Aix.

LA maladie contagieuse commençant à cesser dans Aix, & toutes choses se reſtablissant dans leur premier estat; lors que le Pere Yuan deuoit eſperer quelque repos apres vn ſi long, & ſi dangereux trauail, on luy donna vn employ qui l'obligea à reprendre ſes exercices, & à continuer ſes ſoins envers le prochain. L'Eglise de Sainte Magdelaine, qui eſt vne Parroisse de la ville, ſe trouua ſans Pasteur, & ſans Prestre; La maladie ayant eſté ſi violente qu'elle auoit fait mourir la plus part des Parroissiens, ſans épargner aucun des Ecclesiastiques qui la ſeruoient: enſorte que les quatre Vicaires que le Chapitre de S. Sauueur, qui en a la Cure primitive y auoit eſtably eſtoient morts, & encore trois Prestres qui s'eſtoient genereuſement aſſociez à eux, pour les aſſiſter dans leurs fonctions.

Ce fut vne des plus conſiderables pertes que la maladie cauſa, que la mort de ces ſept Ecclesiastiques, dont la vie auoit eſté exemplaire; & qui en mourant dans le ſeruice des Parroissiens, auoient laiſſé d'illuſtres marques de leur zele, & de leur charité. Entre ceux-cy, que nous pouons appeller des martyrs de charité, il y en auoit vn de qui la perte fut d'autant plus regrettée, qu'il auoit veſcu dans vne plus haute eſtime de vertu, & s'eſtoit acquitté de ſa charge de Vicaire avec vne fidelité accomplie. Si bien qu'eſtant ſur le point de mourir, il dit à ſon Confesseur [qu'il reſſentoit vne joye ſinguliere, d'auoir exercé la cure des Ames, & qu'il n'auoit aucun regret d'auoir paſſé vne partie de ſes iours dans cét employ: mais qu'aucontraire il en beniſſoit Dieu, & rendoit mille aſſions de graces à ſa diuine Prouidence, de l'y auoir appellé, & de luy auoir donné vne ſi belle vocation, & de ſi abondantes graces; qu'il ne ſçauoit pas d'auoir iamais man-

qué, ou différé volontairement de rendre à ses Parroissiens aucune sorte de service nécessaire : & que mesme il ne se souuenoit pas d'auoir iamais senti aucune notable repugnance à faire les fonctions de sa Charge, quelque peine, & quelque incommodité qu'il y eust à souffrir.]

Cet excellent Ecclesiastique, & tous ses Collegues estant decedez par la violence du mal contagieux, le Chapitre de S. Sauueur-tette les yeux sur le Pere Yvan, pour en remplir la premiere place, & le prie de prendre le soin de cette Eglise desolée. Nostre sage Prestre sentit de tres-grandes repugnances, à accepter l'employ qu'on luy offroit, comme s'il eust preueu les difficultez qu'il y rencontra depuis, si bien qu'il le refusa d'abord, & fit quelque resistance auant que donner son consentement. Neantmoins les Superieurs l'ayant fort pressé, & usé mesme de commandement, il plia le col sous le joug de l'obeyssance, & s'estant logé dans le Cloistre de la Parroisse, il commença d'exercer les fonctions de Vicair avec grand fruit pour les Parroissiens, mais avec de tres-grandes peines de son corps. Tous les Prestres qui la seruoient auparavant estant morts de maladie contagieuse, ainsi que ie viens de dire, & la peste n'ayant pas encore tout à fait cessé, si bien qu'il y auoit encore du danger, on ne trouuoit que tres-difficilement des Ecclesiastiques qui voulussent s'y exposer, & ainsi le Pere Yvan fut contraint durant quelque temps, d'en porter seul tout le fardeau, comme vn ouurier infatigable faisant seul l'office, enterrant les morts, administrant les Sacremens, & s'acquittant seul des autres exercices d'un vigilant Pasteur, sans l'assistance d'aucun.

Pendant qu'il travailloit dans cette Parroisse, & que par ses soins & sa vigilance il taschoit de reparer les degasts, que le desordre de la peste auoit fait dans les ames, qui n'auoient pas eu pendant ce temps-là toutes les instructions, ny les autres secours spirituels, qui leur estoient necessaires, Dieu luy fit connoistre que ce n'estoit pas son dessein qu'il s'arrestast dans cette charge, & que sa Prouidence l'auoit destiné à d'autres employs.

Vn Prestre de grande probité luy vint annoncer dans sa
chambre

chambre, qu'il ne demeureroit pas long-temps dans le gouvernement de cette Eglise, & que DIAV auoit d'autres intentions sur luy; il en eut luy-mesme de grandes connoissances dans l'Oraison, & pendant le S. Sacrifice de la Messe: toutesfois il n'osa pas encore se determiner, craignant d'estre trompé, s'il suiuiot l'aduis d'un seul, ou ses connoissances particulieres, contre le sentiment de ses Superieurs qui l'auoient logé dans ce lieu-là. Il eut donc recours à la priere, à la penitence, & principalement aux intercessions de la Sainte Vierge sa bonne Mere: ainsi qu'il auoit accoustumé dans les choses douteuses; en suite dequoy, Dieu luy fit clairement connoistre sa volonté, & luy en facilita l'execution de cette sorte. Dès que le mal contagieux eut cessé, on luy donna des compagnons pour le soulager dans le seruice de son Eglise: mais au lieu d'en estre secouru, il en receut un surcroist de peine & de trouble; parce que les Superieurs ne voulurent pas luy permettre de choisir des Prestres selon son desir, & selon la connoissance que DIAV luy en donnoit, qui estant portés d'un mesme esprit auroient vescu de bonne intelligence avec luy, & eussent sans doute fait de tres-grands fruiets. Mais on luy en associa, entre lesquels il y en eut un, dont les mœurs, la conduite & les intentions se trouuerent entierement opposées aux siennes; si bien que preuoyant que cet Ecclesiastique détruiroit ses bons desseins, & rendroit ses trauaux inutiles, apprehendant encore d'autres choses, que la suite du temps a decouuertes, il se resolut de quitter son employ, & d'en chercher quelque autre, où il peust trauailler avec moins d'empeschemens, plus de liberté, & par consequent plus de profit: agissant en cette rencontre selon la prudence Chrestienne, qui nous oblige à nous separer de ceux, dont la compagnie nous peut causer du desordre, ainsi que le Patriarche Abraham se separa de Loth, pour euitter les contestations de leurs Bergers. Mais craignant qu'on ne s'opposast à son dessein, si on le découuroit, & qu'on ne luy permist pas de quitter sa charge de Vicaire s'il témoignoit de le desirer; il se resolut de sortir mesme de la ville le plus secrettement qu'il pourroit, desirant se retirer à

forte, il creut que c'estoit vn effet de sa Prouidence, pour luy faire connoistre sa valonté. Le voylà dans les prieres, & dans la pratique de ses penitences; puis il consulte des personnes de grande pieté, qui le font resoudre à demeurer dans Aix; puis que le SEIGNEVR sembloit ne vouloir pas permettre, qu'il en pust sortir. Mais ayant toujourns de plus grandes repugnances, & de plus fortes inspirations de ne pas continuer sa charge de Vicaire dans la Paroisse de sainte Magdelene, apres beaucoup de prieres, & apres auoir pris conseil des mesmes personnes, il delibere enfin de se retirer dans la Congregation des Reuerends Peres de l'Oratoire, où DIEV l'appelloit pour quelque temps; afin de commencer son grand Ourage de l'Institut de Nostre-DAME de Misericorde.

Ces diuers changemens donnerent vne ample matiere à nostre Imitateur pour exercer sa patience, son humilité, & ses autres vertus: en telle sorte qu'on ne scauroit croire les troubles & les angoisses d'esprit qu'il endura. Il se fit vne grande violence quand il accepta la charge de Vicaire; sa peine fut encore beaucoup plus grande; quand il fut contraint de la quitter, parce qu'il essuya les plaintes, les murmures, & les reproches de tous ceux qui s'opposèrent à sa retraite: Le refus du billet pour sortir de la ville d'Aix luy causa vn extrême déplaisir, & son entrée mesme dans les Peres de l'Oratoire ne fut pas sans croix de la part de ceux qui l'en blasmerent, mais il receut le tout des mains du SEIGNEVR avec vne parfaite resignation. Voicy comme il en parle luy-mesme dans ses Lettres qu'il escriuit pour lors.

Lettre 25. Ceux qui ne m'ont voulu croire s'en sont grandement repentis, s'en repentent, & s'en repentiront; ils ont tort de ce qu'ils n'ont fait comme ie voulois, de quoy ie suis grandement affligé. C'est sur le suiet des Prestres qu'on auoit choisi contre sa volonté, entre lesquels il y en eut vn qui par sa mauuaise conduite obligea les Superieurs à le chasser ignominieusement, au grand scandale de plusieurs, qui lo respectoient comme vn Saint.

Lettre 26. Escriuant des troubles qu'il souffroit à raison des

changemens auxquels il estoit cointrainct; l'ay, dit il, un peu le cœur gros, mais ie le range à la volonté de DIEV, & renonce à tout ce qui luy est contraire & me range à la verité: & enfin me défant de moy-mesme, & m'humiliant, ie demeure content dans mes petitesse & bassesse, mes impuissances, aux affaires d'importance pour la plus grande gloire de DIEV. Je voy bien ce que ie suis, ce que ie puis, ce qu'on m'estime, ce que ie voudrois: mais ie dois suivre DIEV, où il m'appelle, & demeurer là où il me laisse; & quand ie me plains, & gronde, & voudrois; ie voy que j'ay tort, & me repose seulement à loisir en la volonté de DIEV, ne le pouvant faire tout à coup: & avant que cela soit, c'est de l'or qui n'est pas pur & fait quelque fumée, qui salit le creuset.

Lettre 29. l'ay esté grandement mortifié, quand on ne m'a voulu donner le billet, pour vous aller voir. Monsieur le President de la Roque, a fait faire cela, voulant que ie ne m'ostasse point de la Paroisse de sainte Magdelene: si ils m'eussent laissé choisir des Prestres, i'eusse encore un peu continué; & peut-estre tousiours: mais me voyant embarqué avec des gens de diners esprits; helas ie me faschay contre N. N. Helas! pauvre, que n'ay-je pas fait pour les tous contenter? Je leur ay tout conserné, & donné ce que j'ay pû; ie me suis mis à la mort dans la Paroisse de sainte Magdelene durant la maladie contagieuse; faisant le Service seul, enseuelissant les morts tout seul; & puis vous voyez comme tout va. Ils vouloient que ie retourasse à Nostre-DAME de Beauneuxer, & ils m'en auoient osté pour me mettre à sainte Magdelene; & j'ay choisi & me suis mis chez les Peres de l'Oratoire me retirant hors de tous les soins. Maintenant ils se fâchent contre moy; mais ie ne m'en soucie pas. Priez pour moy que DIEV me fasse misericorde.

Dans ces mesmes Lettres il apporte diuerses raisons, pour lesquelles il se retirachez les Peres de l'Oratoire; ie ne les repete pas icy de peur d'estre trop long, on pourra les lire dans le lieu allegué.

CHAPITRE XI.

Il est receu dans la Congregation des Peres de l'Oratoire.

IL ne trouua nulle difficulté dans l'exécution du dessein qu'il auoit pris, d'entrer chez les Peres de l'Oratoire; car il auoit déjà esté receu dans cette celebre Congregation à Auignon, par le venerable Pere Cesar-de-Bus: comme nous auons remarqué: outre que ces Peres auoient assez de connoissance de sa vertu, & de son merite, pour le recevoir, comme vn digne suiet, & vn excellent ouurier. Il fut donc admis par le Reuerend Pere Iober, pour lors Supérieur de la Maison d'Aix, avec l'approbation, & le consentement de tous les autres Peres, & mesme de toute la Ville. Mais s'il ne trouua pas de la peine à y estre receu, il en sentit beaucoup en y demeurant: estant contraint de laisser la vie priuée qu'il auoit menée jusques alors, pour s'accommoder aux Regles, Coustumes, & pratiques de la vie commune. En effet dès qu'il fut receu, comme on l'obligea de relâcher de ses exercices particuliers, pour suiure ceux de la Communauté; & de quitter plusieurs de ses mortifications, & mesme de moderer son zele enuers le prochain, pour se trouuer aux heures des exercices de la Maison: ces choses luy firent beaucoup de peine, & causerent de tres violentes repugnances dans son ame: ce qui fut vne conduite singuliere de l'Esprit diuin, pour la perfection de son seruiteur: car ayant fidelement trauaillé à mortifier son corps; DIEU voulut qu'il mortifiast son esprit, & qu'ayant surmonté les passions de l'appetit sensitif, il se dépoüillast encore de ses desirs propres, & des affections particulieres de sa volonté. Enfin l'habitude qu'il auoit acquise à se vaincre, & à embrasser les choses les plus penibles, luy donna des forces; qui jointes à la Grace luy firent surmonter toutes les repugnances, & les difficul-

tez en telle sorte qu'il y trouua vn tres-grand repos, & tant de satisfaction qu'il estoit fâché de n'estre plutôt entré dans cette deuote Congregation. C'est ce qu'il en écriuit pour lors à vne Religieuse de sainte Vrsule en ces termes: parlant de son entrée chez les Peres de l'Oratoire: *Je suis marry de ce qu'il n'y a pas plus longtemps que ie suis avec eux. Je n'ay plus tant de rompement de teste, &c.* Et dans la mesme Lettre il leur témoigne auoir vne si grande estime de ces Peres de l'Oratoire avec lesquels il viuoit, qu'il les appelle des Bien-heureux; & dans vne autre Lettre qu'il écrivit à la mesme Religieuse, il proteste qu'estant parmy les Peres de l'Oratoire il luy semble estre aux pieds de Nostre SEIGNEUR, pour dire qu'il y trouuoit vn grand repos, & vne grande consolation. Aussi se soumettoit-il à tout comme le plus humble, & le plus feruent des Confreres; si bien qu'estant le premier au trauail, & aux exercices de deuotion; il ne laissoit pas de prendre la derniere place dans le Chœur, dans le Refectoir, & par tout ailleurs.

Ayant obtenu la permission de son Superieur, auquel il obeït comme vn Nouice, il continuë ses charitez: tous les jours au matin il distribuë l'aumône de sa propre main aux pauvres qui se presentent, leur faisant encore quelques instructions salutaires; outre qu'il continuë aussi ses visites aux pauvres malades, & aux pauvres honteux; les consolant, & les encourageant, non seulement par sa presence, & par ses paroles, mais encore par les charitez qu'il leur distribuoit. Si bien qu'il entretenoit par ses aumônes secretes plusieurs familles de condition, qui n'osant decouurer leurs necessitez, auroient souffert les dernieres miseres; s'il ne les eust secouruës par sa vigilance, & par ses soins.

Il continuë encore avec plus de ferueur ses trauaux pour le bien des ames; car outre le grand nombre de personnes qui viennent à luy à confesse de toutes parts; il est appellé pour les malades de tous les endroits de la Ville, de nuict, & de iour. Et quoy qu'il n'exerce

plus la charge de Curé ; les malades neantmoins ne laissent pas de recourir à luy , parce qu'ils sçauent bien, qu'en quittant la Cure , il n'auoit pas quitté le zele & la charité de Pasteur. En effet il ne refuse aucun , il se donne à tous , il court par tout , où il est appelé , en quelque temps , & à quelque heure que ce soit ; sans nulle obligation , que celle de la charité ; & sans nul interest , hors celuy de la gloire de DIEU , & du salut des ames.

Ces frequentes visites , qu'il estoit obligé de faire aux malades , ou aux autres personnes qui le faisoient appeller pour des necessitez pressantes , qui regardoient le seruice de DIEU , & le bien du prochain , donnerent au commencement de l'incommodité aux Peres de l'Oratoire. Car ne pouuant sortir de la maison sans auoir vn Confrere , il en demande au Superieur toutes les fois qu'il est contraint de faire des visites. Le Superieur le luy accorde avec facilité : mais enfin voyant qu'il est obligé de sortir presque à toute heure , & que les Confreres ne peuuent pas si souuent l'accompagner , estant detenus par les autres occupations de la Maison , il luy permet de faire seul ses visites ; & il luy accorde encore , de sortir sans en demander la permission ; parce qu'il n'a pas quelquesfois le loisir : outre que bien souuent cela retarde des œuures de charité , dont l'execution est tres-presante.

Nous pouuons dire que nostre excellent Ecclesiastique faisant toutes ses actions à la veuë du CREATEUR , n'auoit pas besoin des regards d'une creature ; & que la presence d'un homme ne luy estoit pas necessaire , pour le détourner du mal , & le contenir dans la pratique du bien : puis que viuant dans vn profond recueillement , & dans vne presence actuelle , & continuelle du SEIGNEUR ; il ne faisoit , que ce qu'il connoissoit estre agreable aux Yeux de son infinie Majesté. Et nous pouuons adjoûter , que le compagnon , qui auoit seruy d'appuy , & de guide à vn autre , luy estoit vn empeschement : car les pau-

ures honteux, dont il prenoit vn tres-grand soin, n'osoient luy declarer deuant vn témoin leurs necessitez; aussi librement que quand il estoit seul. Il n'osoit pas luy-mesme faire en presence d'vn autre, plusieurs actions de charité, de mépris de soy-mesme, & semblables; pour ne pas estre estimé deuant les hommes, des choses qu'il ne faisoit purement que pour DIEU. Ainsi ce qui auroit esté utile à vn autre, estoit vn obstacle au Pere Yvan: tant il est vray, que les voyes de DIEU sur la conduite de ses seruiteurs, sont tres-diuerfes, & que l'on peut dire de chacun ces paroles du Sage. *Non est inuentus similis illi, &c.*

CHAPITRE XII.

De ses Catechismes, & de ses Predications.

IL n'eut pas demeuré long-temps parmy les Peres de l'Oratoire, que le Superieur connoissant son zele, & estant informé de son talent à prescher avec fruit la parole de DIEU, le regardant d'ailleurs comme vn ouurier fort, & robuste; par dessus ses autres occupations, que nous venons de représenter; luy ordonna de faire le Catechisme tous les Dimanches. Il receut cét ordre de son Superieur, avec toute la joye possible, comme vne chose qu'il auoit desirée avec ardeur: si bien qu'il en commença l'exercice dans vne Chapelle de l'Eglise de l'Oratoire; où il n'eut durant quelque temps que de la jeunesse à instruire. Mais le Saint ESPRIT découurant par sa langue les thresors de lumiere, & de grace dont son ame estoit remplie; pour enseigner & pour émouuoir les fidelles; son auditoire s'accrut insensiblement; en telle sorte que le nombre des personnes auancées en âge qui venoient l'ouyr, estant beaucoup plus grand que celuy de la jeunesse qu'il catechisoit; il fut bien-tost obligé de

de mesler des exhortations dans ses Catechismes , pour exciter les Peres & les meres , en instruisant leurs enfans.

Le Seigneur donnant des nouvelles benedictions au travail de nostre zelé Predicateur, il attira vne si grande foule, non seulement de la populace, mais encore des plus sçauans, & des plus considerables de la ville ; qu'au lieu qu'il catechisoit dans vne Chappelle , il fut contraint de monter en la chaire de la nef de l'Eglise, & de changer ses instructions familières, en de grandes, & seruantes predications. Mais l'Eglise se trouua encore trop petite pour contenir son auditoire : Car il y eut vne si extraordinaire affluence de personnes , qui se pressoient pour ouyr les Sermons ; qu'une partie estoit contrainte de s'en retourner, pour ne pouuoir entrer dans le lieu où il preschoit : toutes les places se trouuans remplies , plusieurs heures auant qu'il commençast sa predication. Aussi la façon de prescher estoit elle extraordinaire, eu égard à la maniere, dont la plus part se seruent ; quoy que nous deuions l'appeller ordinaire, si nous considerons comment les Apostres, & les hommes Apostoliques ont annoncé la parole de DIEU. Le Docteur des Gentils remercie DIEU dans son Epistre aux Corinthiens , de ce qu'ayant le don des langues, il parloit le langage commun & vulgaire de tous ceux qu'il instruisoit. C'estoit vn des charmes innocens , qui attiroient tout le monde aux predications de nostre zelé Ecclesiastique : Car pour se rendre intelligible à toutes sortes de personnes, & particulièrement aux pauvres, qui estoient le premier, & le principal sujet de ses instructions, il prêchoit en langage vulgaire du pays.

Vne personne de condition donna ce conseil à nostre bon Pere, de faire le Catechisme , & de prêcher en Prouençal, pour s'accommoder à l'ignorance des pauvres : mais apprehendant que cette nouvelle façon d'annoncer la parole de DIEU ne rebutast les personnes, au lieu de les attirer, le zele & la charité de cette mesme personne luy suggera vne sainte inuention ; faisant trouuer bon à nostre Predicateur, de donner l'aumosne à tous les pauvres qui assisteroient à ses

Catechismes, & fournissant elle mesme pour ce pieux auis, l'argent qui estoit necessaire. La chose reussit merueilleusement bien; car le Pere Yvan ayant commencé les Catechismes en Prouençal dans l'Eglise des Religieuses de Sainte Ursule, le Concours y fut d'abord tres grand, non seulement des pauvres, dont on pouuoit douter s'ils venoient pour recevoir l'aumône, ou pour profiter de la parole de DIEU; mais encore des personnes Riches de toute sorte d'âge, & de condition.

Plusieurs creurent que cette foule extraordinaire des personnes qui venoient assister aux Catechismes, & aux predications du Pere Yuan, estoit attirée par la nouveauté; ven que l'on n'auoit pas encore accoustumé d'ouyr la parole de DIEU en langue vulgaire. Quelques-vns y alloient pour rire, & se gauffer de la simplicité du Predicateur; qui pour se rendre plus intelligible, cherchoit mesme les mots les plus grossiers. Il y en eut aussi qui voulurent blâmer cette façon de prescher, comme trop basse, trop rauallée, & iniurieuse à la dignité, & à la grauité de la parole de DIEU: mais la suite fit voir qu'il n'en est point de plus utile, pour instruire le peuple; ny de plus efficace pour l'émouuoir, & que ce n'estoit pas la seule curiosité qui attiroit vn si nombreux Auditoire: mais le grand profit que l'on en receuoit. En effect ayant continué le reste de sa vie à faire ses Sermons de cette maniere vulgaire, son Auditoire a tousiours esté si grand, que les plus vastes Eglises n'estoient pas capables de le contenir: de maniere que quand on sçauoit qu'il deuoit prescher dans quelque lieu, les places estoient retenues plusieurs heures auparauant. L'on a conté dans ses Sermons tout à la fois iusques à cinq, ou six Prelats; le Gouverneur de la Province y assistoit presque tousiours: Il estoit ouy de plusieurs sçauans Ecclesiastiques, & Religieux, & d'une si grande foule de peuple, qu'on estoit quelquefois contraint de mettre des Gardes aux portes des Eglises, pour empescher le desordre, & la confusion.

Mais ce n'estoit pas seulement à l'égard du langage, que la façon de prescher de nostre bon Pere estoit singuliere; il se faisoit admirer encore dans les matieres qu'il proposoit, &

qu'il traitoit auffi d'une façon qui n'estoit propre qu'à luy. Car il ne preschoit ordinairement que des sujets de crainte, & de terreur, de la mort, des jugemens de DIEU, des rigueurs de la Justice Divine, de l'enfer, des punitions du peché, du petit nombre des sauvez, du grand nombre des pecheurs, de la briéveté de la vie, des tentations du diable, du mépris du monde, de la haine de soy-mesme, des souffrances de JESVS-CHRIST, de la penitence des Saints, de la griéveté des pechez, des grandes satisfactions qu'il faut faire pour en auoir le pardon; & semblables matieres capables de faire trembler les plus courageux.

Ainsi quelque sujet qu'il traitast, mesme de joye & de consolation; comme lors qu'il preschoit les Festes de JESVS-CHRIST, ou de la Sainte Vierge, il y mesloit toujours quelque digression seuer, & quelque sentence, ou quelques histoires terribles, pour imprimer la crainte du SEIGNEUR. Il preschoit suiuant les mouuemens de son cœur, quand il excitoit tout le monde dans ses Sermons, à auoir vne grande crainte de la justice de DIEU; parce qu'il estoit luy-mesme conduit par les voyes de la terreur des Jugemens Diuins; si bien que faisant toutes choses par amour, il viuoit neantmoins dans vne apprehension continuelle, & trembloit sans cesse deuant le SEIGNEUR; comme les Seraphins qui par vne crainte respectueuse, se voilent la face deuant le Throsne du TOUT-POISSANT.

Il ne se seruoit ordinairement dans ses Catechismes, & dans ses Predications, que des Passages & des Histoires de l'Ecriture sainte; il les apportoit en tres-grand nombre, & les recitoit avec grande naïfveté dans le sens litteral. Mais quand il expliquoit le sens mystique, qui regarde les perfections de la DIVINITE', les mysteres de la vie de JESVS-CHRIST, & de la Sainte Vierge; l'œconomie de l'Eglise, la conduite des Saints, & les bonnes mœurs, il appliquoit ces mesmes Passages, & ces mesmes Histoires de l'Ecriture sainte, avec tant de solidité, & vne si pro-

fonde doctrine ; qu'il paroiffoit bien qu'il eftudioit plutôt dans l'école de L'ESPRIT de DIEU, que dans celle des hommes ; & qu'il apprenoit beaucoup plus au pied du Crucifix par la contemplation ; que dans la lecture des Liures , & dans la conuerfation des fçauants. Tous fes difcours eftoient pleins de belles , & riches moralitez , accompagnées de plufieurs agreables , fortes , & tres-familieres comparaiſons , dont il eftoit tres-abondant. On pouuoit appeller ſes Catechiſmes des Predications ; parce qu'il ne s'arreſtoit pas tant à inſtruire l'entendement , qu'à toucher , & émouuoir la volonté : & ſes Predications pouuoient eſtre appellées des Catechiſmes ; parce qu'il s'eſtudioit à eſtre populaire , & intelligible ; & à ne prêcher que de matieres neceſſaires , pour l'inſtruction & la conuerſion de ſes auditeurs.

Si les animaux qui traînent le Chariot de Gloire de DIEU, dans les Propheties d'Ezechiel , ſont les images des Euangeliftes , & des Predicateurs Euangeliques , qui annoncent l'Euangile , pour faire glorifier DIEU : nous pouuons dire que le Pere Yvan ſuiuoit leurs démarches dans ſes Predications ; car bien ſouuent il ne s'arreſtoit au même ſujet ; mais il parloit de diuerſes choſes , ſuiuant les diuerſes lumieres , & les diuers mouuemens de ſon zele : ſi bien qu'on pouuoit luy appliquer ces paroles du Prophete Ezechiel ; *Vbi erat impetus ſpiritus , ibi gradiebatur* ; Il marchoit où il eſtoit porté par l'impetuoſité de l'eſprit. Auſſi auoit-on reconnu bien ſouuent , que les digreſſions auoient notablement profité à quelques particuliers.

En effet comme vn iour certaines perſonnes , à l'iſſuë d'vne Predication de cét ouurier Apoſtolique blâmoient ſa façon de preſcher , en preſence de Pierre Gaſſendy perſonnage ſi celebre par ſon rare ſçauoir , celui-cy tres-verſé dans les ſaintes Lettres , & qui a eſté reputé vn Oracle de noſtre ſiecle , dans les ſciences humaines , leur répondit tres-judicieuſement ; *Qu'ils auoient tort de condamner la maniere de preſcher du Pere Yvan : qu'au contraire,*

ils deuoient l'approuuer, & l'ouyr avec veneration; comme estant conforme à celle des Prophetes, des Euangelistes, & de l'Apostre saint Paul dans ses Epistres; tous lesquels traitent diuerses matieres dans vn mesme Chapitre, & le plus souuen, sans nulle suite & nulle liaison apparente. Adjoustant, que c'estoit vne preuue évidente, que le Pere Yvan prêchoit selon l'Esprit de DIEU. Nostre pieux Ecclesiastique faisoit luy-mesme cette réponse, lors qu'estant interrogé pourquoy il preschoit avec tant de simplicité, tant de zele, & tant de ferueur; *Je ne veux pas, disoit-il, prescher la parole des hommes, mais la parole de DIEU; ny à la façon des hommes du monde, mais à la façon des Prophetes & des Apostres; non pas par des paroles persuasives de la sagesse humaine, mais par la vertu, & la manifestation de L'ESPRIT Diuin. Non persuabilibus, &c.*

Il ne se preparoit à prescher, que par la lecture de l'Escripture sainte, par la priere, & par les penitences qu'il faisoit deuant, & apres ses Sermons; pour le salut de ceux qui le deuoient ouyr. Il n'écriuoit aussi ses Predications qu'en abrégé, ne mettant sur le papier que les Chefs principaux dont il deuoit traiter; *afin, disoit-il, de n'empescher l'Esprit de DIEU, & d'estre plus libre pour recevoir ses lumieres, & suivre ses mouuemens.* C'est pourquoy il auoit accoustumé de se recueillir profondement, mesme pendant ses Predications, pour écouter la voix de DIEU dans son interieur; tandis qu'exterieurement il faisoit ouyr la sienne. Il se dispoisoit, dis-je, à recevoir les lumieres de L'ESPRIT Diuin, lors mesme qu'il les communiquoit au peuple: de maniere qu'il se rendoit attentif aux mouuemens de la Grace, au mesme temps que l'auditoire écoutoit ses paroles avec attention.

L'on remarquoit effectivement en luy ce que ie viens de dire, par la modestie, par son recueillement exterieur, & par les diuers enthousiasmes dont il estoit souuent émû tout à coup, & quelque fois hors de propos en apparence; mais toujours avec le profit de quelqu'un qui estoit diuinement touché. Mais il le découurit luy-mesme vn iour, au mi-

lieu de sa Predication, en cette sorte. Comme il preschoit vne Feste solemnelle, outre le tumulte des personnes qui se pressoient, pour l'ouyr; il y auoit des petits enfans qui pleurans, & crians l'obligerent d'interrompre son discours, afin de prier les meres, & les nourrices de les appaiser; & leur remontrer le desordre qu'elles causoient, & qu'elles faisoient tres-mal de les emmener au Sermon.

Après cette briève remonstrance, il continua sa Predication; mais les enfans ayans repris par diuerses fois leurs pleurs & leurs cris avec grand trouble des auditeurs: ce zelé Predicateur se plaignant avec simplicité du peu de respect que son auditoire rendoit à la parole de DIEU; & s'adressant à celles qui auoient les enfans, & qui faisoient difficulté de sortir, pour ne perdre le reste de la Predication; *Hé bon DIEU*, dît-il, *vous n'avez point de pitié de moy: qu'est-ce peut faire un pauvre homme qui est attentif à écouter DIEU en vous parlant, & qui tâche de receuoir du Saint ESPRIT le Pain de la Parole Divine, lors mesme qu'il vous la distribue? Comment peut-il faire l'un & l'autre si vous le détournez, & si vous l'interrompez par vostre immodestie, au lieu de l'ayder par vostre attention?*

Peut-estre que le demon auoit excité ce bruit, pour empescher le profit du Sermon de ce Predicateur Apostolique; mais DIEU s'en seruit pour tirer de sa bouche ces belles paroles, & nous decouurer par icelles l'estat éminent de son interieur, & les excellentes dispositions qu'il auoit en preschant sa sainte parole: car il est bien facile de connoistre par ces mots, qu'il faisoit deux personages tout à la fois; de Disciple, & de Maistre; d'auditeur, & de Predicateur; qu'il estoit en mesme temps dans le Ciel, & sur la terre; à soy, & aux autres; qu'il se tenoit ensemblement & dans le centre & dans la circonference comme les roues mystérieuses du Chariot d'Ezechiel, qui estoient tout à la fois au milieu & à l'extrémité: & qu'il imitoit les Anges Gardiens, qui contemplent la face de nostre PERE qui est dans les Cieux; lors mesme qu'ils travaillent pour nous sur la terre.

Après quoy qui s'estonnera s'il auoit plus de soin de fuir dans ses Sermons , & dans ses Catechismes les phrases choisies , & les beaux mots , les pointes , & semblables ajoûtemens de la Rhetorique prophane ; que plusieurs n'en ont pour les rechercher ? Mais s'il preschoit simplement ; il faut aduoüer qu'il annonçoit la parole de **DIEU** solidement , & avec des fruits merueilleux. Car il disoit la verité à toute sorte de personnes , sans respect humain , & sans aucune acception. Il crioit sans cesse contre le péché ; il découuroit les vices au peuple pour l'exciter à l'amandement : suiuant cet ordre que **DIEU** a donné à tous les Predicateurs ; *Criez , ne cessez point , & annoncez les méchancetez à mon peuple , & ses pechez à la maison de Iacob.*

Qui pourroit en suite declarer les fruits que **DIEU** fit par ses Catechismes & par ses Predications ? que de pecheurs qui se sont conuertis ? que d'ames deuotes qui ont esté fortifiées : & qui ont fait des progrès admirables dans la pieté ? que de larmes répandues : que de soupirs , & de gémissemens , lors mesme qu'il preschoit ? que de restitutions ? que de reconciliations ? enfin que de changemens de vie par l'efficace de sa parole ? L'on ne doit pas s'estonner si tout le monde couroit apres luy ; & si les plus grandes Eglises n'estoient pas capables de contenir son auditoire : puis qu'il faisoit tant de fruiets dans les ames de ceux qui l'écoutoient. Ce n'est pas qu'il n'y eust des mocqueurs qui blasmoient l'ardeur de son zele , & qui se rioient comme j'ay déjà remarqué , de la simplicité de ses paroles ; mais il est souuent arriué que ceux-là mesmes estans aux Sermons de ce deuot & feruent Predicateur , à dessein de se moquer de luy , & de retenir de ses paroles pour en faire des railleries ; ils en estoient viuement touchez ; si bien que changeant de vie , ils admiroient ce qu'ils auoient condamné ; publiant par tout que ce bon Prestre dont ils s'estoient mocquez , estoit vn vray homme de **DIEU** , & vn Predicateur Apostolique.

CHAPITRE XIII.

DIEU luy adresse la premiere fille de l'Ordre de Nostre-DAME de Misericorde.

NOus voicy enfin arriuez au plus grand ouurage du Pere Yvan , que nous pouuons appeller son chef-d'œuvre , le couronnement de tous ses desseins , & le principal employ , auquel DIEU l'auoit destiné ; en sorte que tout le reste de sa vie , semble n'en auoir esté qu'une precedente disposition. C'est l'Ordre des Religieuses de Nostre-DAME de Misericorde , son cher Benjamin , le plus doux fruit de ses trauaux , la plus riche recompense de ses vertus , le plus beau fleuron de sa couronne , la plus precieuse couronne de ses victoires , le plus illustre monument de sa gloire , le caractere ineffable de ses merites , & le dernier traict de la ressemblance de sa vie avec celle de IESVS-CHRIST.

Si le SAUVVEUR de nos ames commença l'établissement de son Eglise , par le choix des Apostres , qui en deuoient estre les fondemens ; c'est par où nostre Imitateur commence aussi la fondation de son Ordre ; c'est à sçauoir par le choix des personnes dont il veut se seruir : avec cette difference , que le Fils de DIEU choisissant ses Apostres , les rendoit propres , & capables de l'Apostolat ; mais tout ce que peut le Pere Yvan , est de discerner les premiers sujets , que DIEU a choisis pour l'Ordre de la Misericorde ; & de cultiuer les graces , & les talens que sa Sagesse leur a departies , pour les disposer à vn dessein si grand , & si extraordinaire. Ce sont aussi ses occupations , & les premiers fondemens qu'il jette durant quelques années , pour l'establissement de son Institut.

Il n'y auoit pas long-temps qu'il estoit entré dans la Congregation des Peres de l'Oratoire , & qu'il exerçoit son
zele,

zele , & sa charité en la maniere que nous auons dite ; lors que DIEU luy enuoya la premiere fille de son Institut : mais d'une façon merueilleuse. Cette fille (de qui l'humilité , & la modestie m'imposent le silence ,) se sentant appelée à vne haute perfection , & à quelque chose d'extraordinaire, demandoit à DIEU depuis long-temps vn Confesseur fidelle , qui fust selon ses diuines intentions ; & qui l'aidast à accomplir sa sainte volonté : vn Confesseur , dis-je qui fust auancé en âge , qui eust l'experience , & qui fust mortifié , & tres-exact , & qu'il inspirast le détachement des creatures , & l'amour de la mortification. Chose admirable ! elle demandoit le Pere Yuan sans le connoistre , parce qu'il auoit toutes ces qualités dans vn degré eminent. Mais la merueille est encore plus grande, de ce qu'en mesme temps le Pere Yvan demandoit à DIEU cette fille , sans l'auoir iamais veüe que dans l'Oraison. Cependant Dieu différa d'exaucer leur demande ; & ce ne fut qu'apres plusieurs mois qu'il la leur accorda.

Vn soir doncques cette deuote fille apres auoir fait son examen , & ses prieres accoustumées , se sentit interieurement pressée d'aller le lendemain à confesse chez les Peres de l'Oratoire ; mais pressée si sensiblement , & avec tant de force , que n'ayant peu dormir de toute la nuit , elle eut de la peine d'attendre le iour pour se leuer. Neantmoins parce qu'elle estoit encore fort ieune , la modestie ne luy permettant pas de sortir seule de son logis ; elle fut contrainte d'attendre vne Damoiselle avec qui elle auoit accoustumé d'aller. Mais bon Dieu ! quelles inquietudes ne souffrit-elle pas durant ce peu de temps ? Car à peine a-t'elle la patience que sa compagne soit habillée , qu'elle la contraint de venir avec elle chez les Peres de l'Oratoire. Pendant le chemin elle ne se sentoit pas , elle marche comme si elle estoit portée par vne main invisible , sans toutesfois sçauoir pourquoy elle est si fort pressée , si ce n'est qu'elle sçait bien qu'elle a resolu d'aller à confesse.

La voila arriuée dans l'Eglise des Peres de l'Oratoire , où elle n'a pas loisir de faire longues prieres , parce qu'aussi-tost elle est puissamment inspirée d'entrer dans vn Confessionnal,

Elle en approche ; & à mesme temps son cœur se trouue faisi, d'une sainte frayeur meslée de ie ne sçay quelle ioye ; qui luy fait attendre quelque extraordinaire événement. Toutesfois sans faire aucune reflexion sur ces mouvemens-là, qu'elle sent dans son cœur, elle passe outre, & se ietto aux pieds du Confesseur, qu'elle ne connoist point, & de qui elle ne croit pas estre connuë : mais elle apprend bientôt, que L'ESPRIT de DIEU l'a pleinement informé de tout ce qui la regarde. En effet ce Confesseur estoit nostre V. Prestre, le Pere Antoine Yvan, qui ayant sceu par revelation diuine, que cette vertueuse fille devoit venir à luy ce iour-là, ayant encore sceu par la mesme voye son nom, les dispositions de son interieur, & les instructions qu'il falloit luy donner, s'estoit logé dans son Confessionnal dès la pointe du iour, pour l'attendre, & pour la recevoir. Aussi-tost donc qu'elle se fut iettée à ses pieds, l'appellant par son nom quoy qu'il ne l'eust iamais veüe, ny ouy parler d'elle ; N. luy dît-il, *voulez-vous pas bien aymer DIEU ?* Il profere ces paroles d'une maniere si efficace, & accompagnée d'une onction si abondante de L'ESPRIT de DIEU ; qu'elles produisent d'abord des effets merueilleux dans l'ame de cette fille : aussi sont-elles receuës dans son cœur comme la rosée, ou la pluye ; quand elle tombe sur un bon champ, bien cultivé ; mais sec & aride depuis long temps.

La fille se trouue fort surprise, d'ouyr prononcer son nom par ce Confesseur, qu'elle n'a iamais veu, & de qui elle n'a iamais ouy parler : mais son estonnement s'accroît, lors que ce mesme Confesseur luy decouvre ce qu'elle a dans son interieur, iusques à la moindre de ses pensées, & de ses affections ; beaucoup mieux qu'elle n'auroit sceu le luy declarer elle-mesme. Ainsi dès qu'elle eut receu l'absolution de ce Confesseur inconnu, l'interrogeant avec simplicité ; *Mon Pere*, luy demande-elle, *comment me connoissez-vous m'ayant appelée par mon nom, & m'ayant déclaré l'estat de mon interieur ? ie ne sçache pas de vous avoir iamais veu, ny que vous m'ayez iamais parlé.* Ah ma fille, s'écrie le Pere, qu'il y a long-temps que DIEU m'a donné la connoissance, & de


*voſtre nom & de voſtre eſtat, & qu'il m'a reuelé que vous de-
 niez venir à moy, pour les deſſeins que ſa Prouidence a or-
 donnez? il m'a encore commandé d'auoir vn ſoin ſingulier de
 vous, & c'eſtoit par ſon ordre, que dès le matin ie vous ay
 attenduë dans ce lieu. Soyez la bien venue: ô que i'ay de la ioye
 de voſtre arrivée! ſoyez fidele, & croyez bien ce que ie vous diray
 pour voſtre ſalut.*

L'on ne ſcauroit rapporter l'impreſſion, que châque pa-
 role de ce ſeruent Preſtre faiſoit dans l'eſprit, & dans le
 cœur de ſa penitente; le changement qu'elle ſentit dans
 ſon interieur; & les diſpoſitions qu'elle receut pour ne
 vouloir plaire qu'à DIEU, ny trauailler à l'aduenir qu'à
 l'eſtude de la perfection: elle connut clairement, que
 c'eſtoit icy vn homme de DIEU, & vn homme remply de
 ſon Saint ESPRIT; éprouuant en ſoy que les paroles qu'il
 diſoit, operoient viuement & efficacement, penetrant
 avec plus de vigueur qu'un coûteau tranchant de deux
 coſtez, & s'inſinuant juſques dans les moëles de ſes os, &
 au plus ſecret de ſon cœur; ce que le grand Apoſtre attri-
 buë à la parole diuine. De maniere qu'il n'en fallut pas da-
 uantage, pour la perſuader que DIEU exauçant ſes prieres,
 luy auoit accordé le Confefſeur, qu'elle luy auoit deman-
 dé depuis long-temps; vn Confefſeur que nous pouuons
 appeller le parfait diſciple de ſaint Charles Borromée, dont
 on celebroit la feſte ce jour-là: puis qu'il en imitoit ſi
 bien l'oraïſon, le zele, la penitence, & les autres vertus.
 Ainſi la fille ne différa point de ſe mettre entierement ſous
 ſa direction; mais à l'heure meſme elle le pria de vouloir
 prendre le ſoin de ſa conduite; luy promettant de ſuiure
 ſes aduis, avec vne confiance acheuée, & vne parfaite ſou-
 miſſion.

DIEU vnit deſſors étroitement par le lien de la Grace,
 & de la Charité, ces deux perſonnes, dont ſa prouidence
 vouloit ſe ſeruir pour l'accompliſſement de ſes deſſeins: &
 cette fille fut de plus en plus confirmée dans l'eſtime, &
 dans la confiance qu'elle auoit pour ſon Confefſeur, dé-
 couurant de iour en iour, les threſors de vertu, & de gra-

ce dont il estoit enrichy. Car si elle auoit vne entiere disposition à luy obeïr, & à le croire; il auoit aussi des dons particuliers; & des lumieres extraordinaires pour la conduire: si bien qu'il sçauoit mieux qu'elle tout ce que DIEU operoit dans son ame, auant qu'elle luy en parlast; luy découurant les tentations qu'elle auoit & que par vne certaine timidité elle n'auroit osé declarer: & mesme dans la confession generale qu'elle fit deuant luy (ainsi qu'elle nous a declaré) il luy découurit plusieurs choses dont elle ne se souuenoit pas & que DIEU seul pouuoit reueler.

Depuis ce premier entretien le Pere Yvan a touïours eû vn tres-grand soin de cette vertueuse penitente, ayant continué jusques à ce qu'il est mort, de la conduire, & de la proteger. Car nonobstant les difficultez qu'il a fallu vaincre, & les persecutions qu'il a esté contraint de souffrir; sa charité ne s'est jamais refroidie enuers elle; puis qu'il a mesme voulu sur la fin de sa vie, endurer les fatigues, & les incommoditez d'un long & penible voyage, pour la consoler par sa presence. En effet il est venu d'Avignon à Paris à l'âge de septante-huit ans pour la visiter; pour l'assister de ses aduis, pour mourir auprès d'elle & en mourant luy donner les dernieres marques de son affection & de ses tendresses paternelles. Cependant nous pouuons appeller la premiere entreueuë du Pere Yvan, & de cette vertueuse fille le commencement de l'Ordre de la Misericorde; parce qu'elle vnit les deux pieuses personnes, qui en ont esté les premiers, & les principaux fondemens.



CHAPITRE XIV.

Predictions de l'Ordre de Nostre-Dame de Misericorde auant son establissement.

LEs hommes n'osent pas decouvrir leurs entreprises, parce qu'ils craignent, encore qu'ils soient tres-puissans, que quelqn'un les sçachant n'y mette obstacle: mais le SEIGNEUR reuele les plus grands desseins, plusieurs années, & mesmo plusieurs siecles auant que de les executer; parce qu'estant Tout puissant il ne craint pas qu'aucune creature puisse empescher l'accomplissement de sa volonté. Et c'est vne marque de la grandeur de quelque entreprise, & vne preuue qu'elle tire son origine des Idées eternelles du CREATEUR, plutôt que des inuentions de la creature; lors que DIEU la manifeste par des reuelations extraordinaires, comme vn futur ouvrage de ses mains. C'est en effet vn des argumens que les Peres apportent de la grandeur de la sainte Eglise; en ce qu'elle a esté predite par les Prophetes, plusieurs siecles auant sa fondation: de sorte que ie puis dire le semblable avec proportion de l'Ordre de Nostre-Dame de Misericorde: qu'il est plustost vn ouvrage du Ciel, qu'une production de la terre; & que DIEU en est le principal Autheur; puis que sa Prouidence a voulu par des voyes extraordinaires en faire connoistre l'establissement; & le progrès, plusieurs années auant qu'on songeast de l'entreprendre: si bien que ce n'a esté qu'en suite de ces diuines, & frequentes inspirations, que nostre bon Prestre y a trauaillé.

- Il exerçoit la charge de Vicaire dans Brignolles, lors qu'il eut la premiere reuelation; mais si obscure, qu'il n'en comprit pas le veritable sens, que quelques années apres. Car comme il ruminoit ces paroles, qu'il auoit ordinairement en la bouche, en preschant & en conuersant: *A peine le juste sera sauné*; & quen suite ému de la crainte des jugemens de DIEU,

il faisoit cette priere selon sa coustume ; *Mon DIEU faites moy misericorde* ; il ouyt vne voix claire & intelligible qui luy répondit en ces termes : *ie te feray misericorde , quand tu auras fait la misericorde.*

Il n'entendit pas d'abord le sens de ces dernieres paroles ; Aussi estoit-il trop humble , & trop deffiant de soy-mesme , pour auoir pû s'imaginer , que Dieu se seruiſt de luy pour fonder vn Ordre de Religieuses dans son Eglise. Il connut pourtant , que la réponse qu'il auoit ouye estoit de l'Esprit de verité ; parce qu'elle produisit des effets merueilleux dans son ame , & principalement vn desir extraordinaire d'honorer la Sainte Vierge , sous le titre de Nostre-Dame de Misericorde ; & de pratiquer soigneusement les œuures de Charité. Il s'occupoit desia à ce dernier employ ; mais depuis il en continua l'exercice avec plus de ferueur. Et pour satisfaire à ce qu'il croyoit que le Ciel luy ordonnoit , touchant le seruice de la Mere de Dieu ; il voulut faire bastir dans Brignolle vne Eglise sous le tiltre de Nostre-Dame de Misericorde : mais n'en ayant pas eu le moyen pour lors , il s'employa à faire reuerer cette Reine du Ciel sous cét auguste nom de Misericorde , dès que la Diuine Prouidence , l'eut estably dans Aix , en ayant fait instituer vne Feste de deuotion dans la Chappelle de Nostre-Dame de Beauueser , ainsi que nous auons desia dit : mais la reuelation exigeoit de luy quelque chose de plus eminent , & de plus auantageux à l'honneur de la Sainte Vierge à l'edification de toute l'Eglise.

Quelque temps après qu'il eut ouy ce que nous venons de dire , vne de ses penitentes appelée Louise de Vacherez femme solide , & d'une tres-haute vertu , qui est decedée depuis quelques années en odeur d'une singuliere pieté , eut vne vision en l'Oraison qui donna quelque éclaircissement à la reuelation precedente ; en cette sorte [La Sainte Vierge prioit son Fils de prendre en sa protection vn venerable vieillard qu'elle luy presentoit semblable au P. Yvan , & tout rayonnant de lumiere ; qui tenoit par la main vne fille vestué en Religieuse ; mais d'un habit qu'elle n'auoit pas encore veu. Il sembla à cette femme que le Fils de Dieu faisoit d'abord quel-

que difficulté d'y condescendre : mais apres elle vit qu'estant fléchy par les prieres de sa tres-Sainte Mere , non seulement il témoigna de vouloir protéger le vieillard , & la ieune fille : mais encore qu'il recommanda à cette puissante Reine d'en auoir elle-mesme vn soin particulier ; comme de deux personnes dont il vouloit se seruir pour l'augmentation de sa gloire , & pour le salut de plusieurs ames.) Nostre bon Pere n'eust pas plustost ouy le recit de cette vision , de la bouche de sa Penitente à qui elle estoit arriuée ; que la comparant avec les paroles qu'il auoit luy-mesme ouyes dans sa priere , il commença à croire que Dieu vouloit l'employer à la direction de cette fille qui auoit paru dans la vision ; pour quelque grand ceuvre à l'honneur de Nostre D. de Misericorde , sans pouuoir neantmoins encore se determiner precisément.

La vision de la Damoiselle de Vachetiere fut confirmée par vne autre fille spirituelle du P. Yvan , Religieuse de Sainto Vrsule , dans la mesme ville de Brignolles , qui eut en esprit cette apparition [elle vit vne vaste campagne qui estoit en frische , couuerte d'herbes & d'arbres ; où elle apperceut qu'on sema vn grain de Millet : ce grain creut en fort peu de temps , & deuint vne plante : mais à deffaut d'eau il secha , perdant presque toute sa vigueur ; il y auoit encore à l'entour de cette plante des ronces , buissons & autres herbes qui croissant luy causoient vn notable dommage. C'est pourquoy le Maistre du champ en donna le soin à vn venerable vieillard , qui fit aussi-tost l'office de lardinier : mais comme la plante de Millet luy auoit esté plus recommandée ; il eut aussi vn particulier soin de la bien cultiuer ; l'arrousans , & beschant sans cesse tout à l'entour pour en arracher les herbes nuisibles. Ainsi par les soins , & les trauaux de cét fidele lardinier , la plante de Millet deuint bien-tost vn arbrisseau ; & quelque temps apres vn tres-grand arbre , qui estendoit ses brâches fort loin , & qui par communication des eaux dont il estoit arrousé , faisoit fructifier toutes les autres plantes du champ. Les oyseaux venoient se percher , & faire leurs nids sur les rameaux ; & parce qu'il y auoit des bestes dommageables qui s'approchoient de cét arbre pour le ronger ; le lardinier les chassa , & leur osta le pou-

voir d'y venir , en y faisant à l'entour vne tres-belle haye d'épines.]

La Religieuse ayant veu ces choses dans son ravissement , & en ayant demandé l'intelligence à nostre Seigneur, elle fut exaucée de telle sorte que DIEU luy en donna cette interpretation. [La vaste campagne signifioit vn Ordre nouveau , qui deuoit bien-tost estre estably dans l'Eglise ; la plante de Millet signifioit la fille , qui deuoit estre la pierre Fondamentale , & le chef de l'Ordre ; le vieillard qui auoit esté commis pour en auoir soin representoit nostre Fondateur ; la secheresse , les mauuaises herbes , & les animaux nuisibles à la plante de Millet , monstroient le besoin que l'Ordre , & la premiere fille auoient de la direction de nostre V. Pere de qui les soins charitables estoient exprimez par la vigilance , & par les travaux du Jardinier. Enfin la haye d'épines exprimoit le Liure de la conduite , & des conseils du mesme Pere Yvan ; Liure que nous pouuons tres-bien nommer épineux , parce qu'il n'enseigne que les plus difficiles vertus du Christianisme ; mais tres fort contre les ennemis du salut ; parce qu'il donne des armes pour les combattre.]

Mais ce n'est pas seulement à nostre zélé Ecclesiastique, & à ses filles spirituelles , que DIEU reuela la Congregation de Nostre-Dame de Misericorde auant son establissement : il la predit encore à des personnes qui ne connoissoient pas le Pere Yvan. Vne Religieuse professe d'un Ordre tres-celebre , ayant esté preuenue d'un accident si estrange , qu'elle ne donnoit plus aucune marque de vie , de maniere qu'elle estoit incapable de recevoir aucun Sacrement ; sa Superieure , & toutes les Religieuses du Monastere où elle estoit , craignant qu'elle ne mourust dans cet estat , firent ce vœu à DIEU , que s'il luy donnoit la force de reuenir de sa deffillance , elles receuroient à la Profession vne pauvre fille , sans en exiger aucun dot. A peine le vœu fut acheué . que la Religieuse reuint à soy ; elle ouure les yeux , elle parle , & dit plusieurs belles choses que Dieu luy auoit fait connoistre , durant le peu de temps qu'elle auoit esté priuée des fonctions de ses sens , & entre les autres , elle declara , *que le vœu fait à son occasion*
auoit

DE N. DAME DE MISERICORDE. 185

auoit esté tres-agreable à DIEV, qui luy auoit rendu les forces pour faire cette declaration de sa part ; & qu'il y auroit bien-tost dans la sainte Eglise un ordre de Religieuses, qui feroit une profession expresse de recevoir de pauvres filles de condition pour l'amour de DIEV, & à l'honneur de la Royne du Ciel. Apres quoy elle retomba dans son accident, si bien qu'elle en mourut : sans qu'on pût la faire reuenir, quoy qu'on employast toute sorte de remedes. Entre les personnes qui furent présentées à cet accident, & qui ouyrent ce que cette Religieuse declara ; il s'y trouua vne fille tres-vertueuse, qui demeuroid dans le mesme Monastere en qualité de pensionnaire ; laquelle se sentant viuement touchée de ce qu'elle venoit de voir, & d'ouïr, conceut d'abord vn si grand amour pour l'Ordre futur de Nostre-Dame de Misericorde ; qu'elle se resolut de n'estre jamais Religieuse que dans cemelme institut. En effet dès qu'elle sceut que le P. Yvan l'entreprenoit, elle s'y consacra auant mesmes qu'il fust estably.

La Religieuse de sainte Vrsule dont nous auons parlé, eut la consolation de voir l'accomplissement des choses que DIEV luy auoit fait connoistre touchant l'ordre de Nostre Dame de Misericorde : & la Damoiselle de Vachieres, iouyt particulièrement de cette faueur ; car dix ou douze années apres la connoissance qu'elle auoit eüe de nostre Institut, ayant appris qu'il estoit commencé, elle vint à Aix pour s'en coniouyr avec le P. Yvan ; & pour glorifier le Seigneur, & sa sainte Mere, de l'accomplissement de leurs promesses. De maniere qu'estant transportée de ioye dès qu'elle apperceut la premiere Religieuse de cet Ordre : *Ha ma filie ! s'écria-telle ; qu'il y a bien long-tëps que ie vous connois, vous ayant veüe il y à plus de dix années reue-
stüe de l'habit que vous portez, entre les mains de la sainte Vierge, qui vous presentoit à son fils avec le Pere Yvan. Que
DIEV soit eternellement beny ; & que la Mere de DIEV Mere
de Misericorde, soit aussi à iamaïs benite ! de ce qu'ils comman-
cent d'accomplir leurs desseins en vous.* En suite elle raconta sa vision ; & ayant sceu ce qu'il estoit arriué au P. Yvan, & aux pre-
mieres filles de son Ordre, elle prit des nouueaux sujets de
glorifier DIEV, & d'admirer sa bonté infinie dans l'execution
de ses promesses.

CHAPITRE XV.

Apparition de deux ames du Purgatoire qui predisent l'Ordre de Nostre-Dame de Misericorde.

S'Il est permis de comparer l'Ordre de Nostre-Dame de Misericorde, qui n'est qu'une Congregation particuliere de filles, à l'Eglise vniuerselle, qui est l'assemblée de tous les fideles; entre plusieurs rapports de l'une & de l'autre; on peut particulièrement remarquer celui-cy: que comme le Seigneur, à qui toutes choses sont connuës, ne s'est pas contenté de reueler à ses Prophetes, l'establissement de son Eglise plusieurs siecles auparauant; mais encore il en a donné des reuelations à saint Pierre, & aux autres, dans les Actes des Apostres; lors qu'on commençoit d'y trauailler: Ainsi il a fait connoistre l'establissement de l'Ordre de la Misericorde, plusieurs années auant qu'on y trauaillast; & de plus, il en a encores donné diuerses veuës, lors qu'on a commencé d'y mettre la main.

Entre les Religieux qui s'exposèrent volontairement au service du prachain dans la ville d'Aix, pendant la maladie contagieuse des années 1628. & 1629. il y eut diuers Peres de la Compagnie de Iesus, qui donnerent de pieux témoignages de leur zele, & de leur charité Apostolique; & particulièrement le R. P. Isnard, Recteur du College de Bourbon de la mesme Ville, & le R. P. N. son compagnon. Ces deux Religieux vrais enfans de saint Ignace, apres auoir rendu leur memoire illustre, par mille exemples d'une singuliere vertu, moururent du mal contagieux, comme des Capitaines victorieux; qui en mourant triompherent de leurs ennemis, & meriterent les palmes, & la couronne de la gloire immortelle.

J'en fais icy mention, par ce que le Seigneur s'en est seruy pour contribuer à l'establissement de l'Ordre de la Misericorde: ils auoient eu vn dessein conforme à celui de nostre Fon-

dateur, touchant ce mesme Institut; ils auoient declaré leurs intentions à plusieurs personnes d'autorité & de vertu, ils auoient mesme voulu l'entreprendre: mais le Seigneur se contentant de leur bonne volonté, & reseruant l'execution de ce grand ouurage à nostre pieux Ecclesiastique, les appella à soy dās l'exercice de leur charité; de façon qu'il ne les employa, que quelque tēps apres leur mort; en la maniere qui suit. Cōme nostre bon Prestre inspiré de trauailler à ce nouuel Ordre faisoit pour ce sujet de continuelles prieres, le P. N. de la compagnie de Iasus dont ie viens de parler, qui souffroit encores les peines du Purgatoire, apparut (ainsi que rapportent de personnes dignes de foy) à vne fille de grande pieté pour luy demander l'assistance de ses prieres, & l'esclaircir des doutes que le Pere Yvan luy auoit communiquez touchant son nouuel Institut. Cette pieuse persōne estoit grādement trauaillée de crainte que le dessein d'un nouuel Ordre dans l'Eglise de DIEV ne fust vne illusion; lors que ce bon Pere Iesuite luy apparoisant luy dit d'abord: que DIEV l'enuoyoit pour estre secouru par ses prieres, & pour lay donner l'éclaircissement dont elle auoit besoin: & poursuiuant son discours; DIEV m'a reuelé, adiousta-t'il, le dessein du Pere Yvan touchant l'Ordre de N. D. de Misericorde. Qu'il aye bon courage, & ne craigne point d'estre trompé car ie vous declare que c'est l'esprit diuin qui le luy a inspiré. I'ay voulu moy-mesme y trauailler, avec le Pere Isnard, pendant que i'estois en vie; mais le Seigneur en a reserué la gloire au P. Yvan; qu'il continué de s'y appliquer avec confiance: ie vous promets que DIEV fera reüssir son œuvre, & pour l'assurance de ce que ie vous dis, vous en verrez bien-tost le commencement.

La personne craignant d'estre trompée, demanda à cette ame son nom, la profession qu'elle auoit exercée dans le monde, le temps, le lieu, & les autres circonstances de sa mort; ayant dessein de declarer le tout à son Superieur, afin d'en apprendre la verité par son moyen. En effet le bon Pere Yvan n'eust pas plustost sçeu ces choses; qu'il en fist vne exacte recherche, & trouua veritable tout ce que l'ame auoit dit; de son nom, de sa profession, du temps, du lieu, & des autres

circonstances de sa mort ; & mesmes de quelques secrets particuliers qu'elle auoit aussi reuelez. La ioye de nostre bon Prestre fut tres grande , voyant les soins que la diuine prouidence prenoit de luy faire connoistre ses intentions , par des voyes si extraordinaires : mais sa reconnoissance enuers le P. N. ne fut pas moindre ; car celebrant le saint Sacrifice de la Messe & faisant plusieurs penitences & prieres , pour son soulagement , il ne cessa de trauailler pour le repos de cette ame souffrante , iusques à ce qu'estant deliurée du Purgatoire , elle s'apparut vne seconde fois pour remercier le Pere Yvan de l'assistance qu'il luy auoit donnée par ses prieres , & le confirma derechef , dans les choses qu'elle luy auoit fait esperer touchant l'Ordre de Nostre Dame de Misericorde.

On rapporte encore vne autre vision semblable à la precedente ; qui arriua à vne ame esleuée dans l'Oraison. Cette personne estant fort pressée par de gens de pieté , de se rendre Religieuse dans l'Ordre de la Visitation de sainte Marie , quoy qu'elle se sentist appelée à vn autre Ordre nouveau , faisoit ses prieres à DIEU , avec ferueur & mesme avec beaucoup de larmes , de luy faire connoistre sa sainte volonté : lors que le Seigneur luy accorda ce qu'elle demandoit ; l'esclaircissant de son doute , par vne ame du Purgatoire qui vint luy demander l'assistance de ses prieres.

Ce fut l'ame d'une Religieuse de la Visitation , decedée depuis peu dans vn Couuent de ce mesme Ordre , qui se montrant à elle , luy fit connoistre ses peines , & combien elle auoit besoin d'estre secouruë ; la priant instamment de l'assister. La personne luy ayant demandé son nom , sa qualité , & la cause pour laquelle elle estoit détenuë dans le Purgatoire ; l'ame lo luy apprit fort simplement : adioustant vne chose de grande instruction , & qui merite d'estre sceuë de tout le monde ; & particulierement des personnes qui s'adonnent à l'estude de la perfection. *J'auois merité, dit cette ame, par les negligences, & les infidelitez de ma vie, vn plus rude purgatoire, que ie ne souffre pas : mais m'estant priuée pour l'amour de DIEU, d'une consolation sensible que l'on m'offroit quelques heures auant ma mort, j'obtins par la misericorde du Seigneur la deliurance des*

plus griesues peines que sa iustice m'auoit preparées. C'est qu'estant malade à l'extremité Madame N. que vous connoissez, qui m'aimoit tendrement, & pour qui j'auois vne parfaite reconnaissance, ayant la permission d'entrer dans le Monastere, demanda à me voir dans l'estat où j'estois. Ma Superieure m'en ayant fait la proposition, ie me sentis fort portée à l'accepter, & sans doute j'aurois receu de sensibles consolations de sa presence: neantmoins ayant esté à l'heure mesme fortement inspirée de me mortifier pour l'amour de DIEU, ie refusay de voir cette Dame, & me resolus de renoncer à toutes les douceurs de la vie, & ne plus desirer, à l'imitation de IESVS-CHRIST mourant sur la Croix, que l'amertume de la mort, que ie voyois m'estre tres-prochaine. Ah ma fille (s'écria cette ame, continuant son discours) que cette legere mortification m'a deliurée d'horribles tourmens.

Les paroles de la Religieuse souffrante firent vne tres-forte impression dans l'ame de la personne qui l'écoutoit pour la faire renoncer à toutes les consolations sensibles des creatures, & luy faire embrasser la mortification: mais ce ne fut pas l'unique profit, qu'elle receut de ses entretiens. Car continuant de l'interroger, Ma Sœur, luy dit-elle, puisque vous estes de l'Ordre de la Visitation, ignorez-vous qu'on me sollicite d'y demander l'habit de Religion? & le Seigneur qui vous a permis de venir à moy, ne vous a-t'il point fait connoistre, si telle est sa sainte volonté; ou si ie dois attendre vn nouuel Institut, que l'on espere de voir bien-tost estre estably dans son Eglise? Ma fille (respondit la Religieuse.) Je sçay que l'on vous presse de demander l'entrée dans nostre saint Ordre, & voila pourquoy la diuine bonté m'a fait venir vers vous: elle m'a aussi fait connoistre, que vous n'y estes pas appelée, mais dans l'Ordre de Nostre-Dame de Misericorde, dont vous verrez bien-tost l'establissement, & le progres sous la conduite du Pere Tvan. Apres cette response l'ame disparut; & la personne ayant raconté toutes ces choses à nostre prudent Ecclesiastique, il s'informa discrettement & avec soin de ce que l'ame auoit déclaré, & de sa mortification, & de sa mort; si bien qu'il le trouua tres-veritable ce qui accreut

son esperance de voir bien-tost l'accomplissement de ce qu'elle auoit predit touchant la nouvelle Congregation.

CHAPITRE XVI.

Deux visions extraordinaires touchant l'Ordre de Nostre-Dame de Misericorde.

VNe tres-vertueuse fille de la ville d'Aix, nommée Anne de Berenguier fut appelée dans l'Ordre de Nostre-Dame de Misericorde, auant qu'il fust commencé; par vne vision extraordinaire qu'elle à racontée plusieurs fois, & que nous auons apprise, mesme de la bouche du P. Yvan. Il y auoit long-temps que cette pieuse fille se sentant attirée à la vie Religieuse, faisoit de grandes prieres au Seigneur pour connoistre à quel maison Religieuse elle se deuoit determiner.

Son inclination la portoit au Monastere des Carmelites, comme à celuy qu'elle auroit choisi plus volontiers; neantmoins elle ne pouuoit s'y resoudre, & quelque desir qu'elle en eust, elle sentoit neantmoins ie ne sçay quelle crainte, que ce ne fust pas la volonté de DIEU; & vne certaine confiance, qu'elle estoit appelée à vne Congregation naissante qu'elle ne connoissoit pas encore. Cette crainte, ce desir, & les autres mouuemens dont elle estoit trauaillée dans son interieur sur ce sujet, l'obligeoient à redoubler ses prieres; & à continuer les exercices de deuotion; pour estre entierement esclaircie: enfin comme elle prioit avec grande ferueur, dans l'Eglise des Carmelites de la ville d'Aix, le iour, & feste de la glorieuse sainte Therese, demandant à DIEU avec des empressements extraordinaires, la connoissance de l'estat Religieux qu'elle deuoit choisir; elle fut rauie en extase pendant le saint Sacrifice de la Messe; si bien que DIEU luy decouurit d'une maniere admirable, ce qu'elle desiroit sçauoir.

L'Esprit du Seigneur luy monstra tous les Ordres Religieux qui sont dans l'Eglise; les faisant passer, comme en pro-

cession devant elle, les vns apres les autres; chacun dans son rang, & selon l'ancienneté de sa fondation. Elle les considéra avec grande attention, & vne ioye singuliere: mais sa ioye ne dura pas long temps, parce qu'elle ne se sentit attirée à aucun de tous ces Ordres Religieux qui auoient passé; de façon que cela la iettant dans vn profond estonnement, commençoit à luy causer vn sensible déplaisir: lors que la procession estant finie, elle apperceut vne grande foule de peuple, qui regardoit de loin, admirant l'arriuée de quelque chose extraordinaire.

C'estoit vn grand nombre de Religieuses qui suiuiot Iesus CHRIST crucifié, vestuës de l'habit, & de la façon que le sont presentement les Religieuses de Nostre Dame de Misericorde: & les Religieuses ne parurent pas plustost que la fille qui estoit en rauissement, sentit son cœur tout épanouy de ioye, & sa volonté fortement attirée à estre de leur compagnie: receuant cette impression, que c'estoit l'Ordre Religieux qu'elle deuoit embrasser. Estant reuenue à soy apres le rauissement, comme elle faisoit reflection à ce qu'elle auoit veu dans son extase; elle se sentit fort affligée, de ne pas connoistre les dernieres Religieuses qui auoient paru, & de ne pas sçauoir si elles estoient establies dans l'Eglise, ou si elles le seroient bien-tost.

Mais son affliction fut dissipée dès qu'elle eut déclaré au P. Yvan son Confesseur ce qui luy estoit arriué en son extase; parce que ce bon Pere luy dit d'abord, *que c'estoit vne nouvelle Congregation, qu'on appelleroit de Nostre Dame de la Misericorde, qu'il esperoit de voir bien tost estre establie; que plusieurs personnes de pieté en auoient eu des connoissances conformes à la sienne; & qu'il croyoit qu'elle s'y deuoit consacrer.* Cette vision eut bien tost son effect; car nostre Fondateur ayant commencé de trauailler à son Institut; cette fille s'vnt avec les premieres qui s'y estoient votées anant qu'il fust estably: & quelque temps apres y ayant fait sous le nom de sœur Marie de S. Michel son Nouciat & sa Profesion dans le premier Conuent qui en fust estably dans Aix; elle fut enuoyée à la Fondation du second Conuent estably dans Marseille: où

ayant passé le reste de ses iours dans vne penitence rigoureuse, & dans vne estroite obseruance de ses regles & constitutions, elle est decedée en odeur de sainteté.

Enuiron ce mesme temps vne autre vertueuse fille eut vne vision presque semblable, qui produisant en elle les mesmes effets que la premiere auoit operés en la fille dont nous venons de parler, luy fit connoistre l'Ordre de la Misericorde, qui n'estoit pas encore estably; & luy persuada qu'elle y estoit appelée. Vn soir comme elle prioit *DIEU*, & qu'elle luy demandoit avec grande ferueur, iusques à répandre beaucoup de larmes, qu'il luy manifestast sa sainte volonté, & luy donnast des forces pour l'accomplir, elle fut exaucée en cette maniere.

Le Pere Eternel luy apparut, monstrant à Iesus-Christ son Fils vn venerable vieillard reuestu d'un surplis, d'une blancheur, qui ébloüissoit la veüe: en mesme temps les premieres filles de la Congregation de N. Dame de la Misericorde, qui s'estoient desia assemblées, viuant encore en habit seculier, parurent aussi chascune selon le rang de sa reception. La fille à qui l'esprit de Dieu monstroit ces choses demanda avec grande simplicité à Iesus-Christ que signifioit cette vision; quelles estoient ces filles & ce vieillard; & pourquoy celuy cy estoit couuert d'un si beau surplis.

Le Fils de Dieu répondant à sa seruante, luy dic; *que cette vision signifioit un Ordre nouveau qu'il vouloit establir dans son Eglise, sous le tilre de Nostre Dame de Misericorde; que les filles qu'elle voyoit, estoient les premieres qui receuroient l'habit Religieux, & feroient profession dans la mesme Ordre: que le vieillard estoit un bon Prestre, appelé le Pere Tvan, qui conduisoit ces filles; celui que son Pere celeste auoit choisi pour l'establissement du mesme Institut, & que ce surplis si blanc, dont il estoit reuestu, signifioit la pureté de ses intentions.* Ce diuin Sauueur, adiousta encore pour la consolatio, & pour l'instruction de sa seruante, *qu'il l'auoit choisie pour estre Religieuse dans ce nouuel Institut; & qu'elle y seroit receüe; nonobstant la resistance qu'elle auroit de la part de ses parens, & les tentatiōs qu'elle souffriroit de la part du demon.*

A peine

A peine eut elle ouy ces dernieres paroles du Fils de DIEU que la vision disparut ; laissant des effets merueilleux dans son ame ; & entr'autres vn si ardent desir de se joindre avec les filles du P. Yvuan, qu'elle en souffroit vne inquietude extraordinaire iusqu'à ne pouuoir presque plus dormir , ny prendre sa refectiion : aussi eut elle durant quelque temps des peines extremes , à surmonter les resistances de son pere , & de ses autres parens ; & à vaincre les tentations interieures dont elle fut trauaillée. Mais en fin elle esprouua la verité des promesses de IESUS. CHRIST ; & vid l'accomplissement de la reuelation qu'elle auoit eüe : par ce qu'elle fut receüe dans nostre Congregation , auant qu'elle fust vn Ordre regulier ; & ce mesme Ordre ayant esté estably quelques années après , elle y fit profession , & y perseuera en qualité d'vne bonne & vertueuse Religieuse. Les autres premieres filles de la Misericorde ont eu de semblables faueurs , ou d'autres graces extraordinaires ; par lesquelles DIEU les appelloit dans cet Ordre sous la conduite du P. Yvuan : Magdelene Feruelle penitente de ce sage Confesseur , priant par son Ordre dans la Chapelle de Nostre-Dame d'Esperance pour recommander à cette Reine des Cieux le dessein de sa Congregation , ouyt distinctement vne voix qui luy dit de la part de la Mere de DIEU , de rapporter au P. Yvuan son Directeur que ce grand ouurage pour lequel il luy auoit commandé de faire des prieres , commenceroit bien-tost , & qu'elle l'auoit choisi pour s'en seruir dans ce dessein. DIEU fit encore connoistre la mesme chose à diuerses personnes de grande pieté par d'autres voyes merueilleuses qui seront vn iour rapportées dans les chroniques des Religieuses de Nostre-Dame Misericorde : c'est pourquoy ie les obmets icy craignant d'estre trop long.



CHAPITRE XVII.

*Le Pere Yvan differe d'entreprendre l'Ordre de
Nostre-Dame de Misericorde.*

IL semble que nostre bon Prestre ne deuoit faire nulle difficulté de travailler à l'Institut de Nostre-Dame de Misericorde, & qu'il ne deuoit pas reuoker en doute, non pas mesme deliberer; si le Seigneur se vouloit seruir de luy dans le commencement, & dans la conduite de ce grand dessein; puisque le Ciel luy en auoit donné tant de marques certaines, & manifestes; puis qu'il en auoit desia receu luy mesme tant de lumieres; & que D I E U auoit reuelé ses intentions sur ce sujet, à diuerses personnes, en diuers temps, en diuers lieux, & en diuers façons. Car si vne seule peut se tromper dans ces connoissances; il arriue tres rarement, & presque iamais; que l'illusion ait lieu, lors que plusieurs personnes de vertu, & d'Oraison ont des veuës extraordinaires d'une mesme chose, qui tendent à vne mesme fin: ce qui arriuoit en cette rencontre; où toutes les reuelations que D I E U auoit données de l'Ordre de Nostre-Dame de Misericorde, portoient que le Pere Yvan deuoit l'entreprendre, & en estre le Fondateur. Neantmoins il n'est pas croyable combien ce prudent Ecclesiastique résista; les raisons qu'il apporta pour s'en excuser, les prieres, les penitences, & les autres exercices qu'il fit, pour en estre dispensé; & les saintes violences dont il fallut vser, pour l'induire à y mettre la main.

Dés qu'il eust la conduite de la premiere fille de l'Institut, il en prit des soins extraordinaires; comme d'une personne que I E S U S-C H R I S T, & la sainte Vierge luy auoient singulièrement recommandée: de maniere qu'il n'oublia aucune sorte de peine ny de travail, pour la preparer à l'accomplissement des desseins de la diuine Prouidence; la faisant frequenter tres-souuent les Sacremens de la Confession, & de la Communion;

vacquer à l'Oraison, & au recueillement; exercer les mortifications, & pratiquer les autres vertus de la plus solide perfection. L'on ne scauroit aussi exprimer l'exacritude de ce sage Confesseur à corriger avec souuereté les moindres defauts de la penitente; ny son zele à la faire auancer avec forceur, dans les pratiques de la sainteté.

Cependant elle se confirme de plus en plus dans la croyance que cet excellent Ecclesiastique luy a esté donné du Ciel pour la direction, par ce qu'il luy predit beaucoup de choses, & particulièrement le succès d'une affaire qui regardoit l'estat de vie, qu'elle deuoit choisir. Car comme elle luy témoigne d'auoir grande inclination pour l'Ordre des Capucines, cet éclairé Directeur luy répond que ce n'est pas la vocation, & que DIEU à d'autres desseins sur elle: *Neantmoins, adiouste t'il, ie suis bien aise que vous esprouniez si vous y pourrez estre receue, parce que vous reconnoistrez mieux la volonté du Seigneur, par la facilité, ou par la difficulté que vous trouuerez dans l'exécution de vostre dessein: j'espère pourtant, continue il que vous en serez destournée.*

L'euenement fit voir la verité de cette prediction; car la fille s'estant adressée aux personnes qui pouuoient la faire recevoir dans le Couuent des Capucins de Marseille (qui est le seul de c'est Ordre là en Prouence) elle en fust dissuadée par ces mesmes personnes; en sorte qu'elle changea de dessein. Quelques iours apres, comme elle eut rendu compte au P. Yvan, de ce qui s'estoit passé; *Ma fille, luy dit ce prudent Confesseur, ie scauois bien ce qu'on vous diroit, & les empeschemens qui vous seroient proposez: toutefois i'ay voulu que vous l'ayez appris, de la bouche des autres afin que vous fassiez mieux esclairsir de la volonté de DIEU, par le témoignage de plusieurs de ses seruiteurs.*

A quelque temps delà comme le Seigneur continuoist par des voyes extraordinaires, de faire connoistre à quelque personnes fort zelées, le dessein de l'Ordre de la Misericorde, & qu'il vouloit se seruir du P. Yvan, pour le commencer: on le propose avecque simplicité, au mesme P. Yvan qui en auoit aussi de continuelles inspirations: mais le bon Prestre usant de

sa prudence, qui estoit tousiours accompagnée d'une salutaire crainte, & d'une iuste défiance; escoute les discours qu'on luy en fait avec grande froideur: il ne les rebute point, de peur de décourager les personnes qui luy en parloient, & ne mettre quelque empeschement aux desseins du Seigneur; mais aussi ne donne-t'il nulle marque d'estime, ou d'admiration d'une chose si extraordinaire; craignant que le demon ne prenne delà occasion de luy dresser quelque piege. Ainsi répondant simplement & avec solidité, il faut, dit-il; *Nous humilier grandement, nous devons tousiours craindre, & croire que de nous mesmes nous sommes incapables de toute bonne chose: il ne faut pas, adiouste-t'il, penser à cette grande affaire; ny en parler de long temps; mais faire penitence, & prier sans interruption dans le silence, & la retraite: attendant en patience le moment du Seigneur.* DIEU est tout puissant, poursuit-il, pour faire son œuvre quand, comment, & par qui il voudra; & nous ne sommes que de creatures foibles, & inutiles.

Quelques mois se passent apres cela, pendant lesquels, ce Directeur continuë d'exercer ses penitentes, dans les voyes de la vie spirituelle; les faisant passer par toutes les espreuves de la Theologie mystique, selon la grace qu'il decouvre en elles, & les lumieres que DIEU luy en communique. Cependant il ne veut pas permettre qu'on luy parle de son grand dessein, ny qu'on en traite qu'avec DIEU dans son Oraison; quoy qu'il sçache tres-bien, qu'on en est fortement pressé, & quoy que luy-mesme en soit puissamment sollicité dans son interieur: mais il suiuit ce conseil de l'Apostre saint Paul, qu'il ne faut pas croire à toute sorte d'esprits; & qu'il faut les espreuuer s'ils sont de DIEU, ou du demon. Or le temps est vn des meilleurs moyens qu'on puisse employer pour faire ce discernement; parce que les ruses du demon se decourent, & ses œuvres se dissipent avec le temps: au lieu que les desseins de DIEU, vont tousiours se manifestant de plus en plus, comme les rayons du Soleil leuant; & ses diuins ouurages subsistent par l'appuy de sa toute-puissance.

Ce fut la response que le docteur Gamaliel fit dans l'assemblée des Princes de la Synagogue: touchant le progres de

l'Eglise naissante, qu'ils vouloient empêcher: car ce Docteur dit tres-sagement qu'apres auoir usé des precautions necessaires, il ne falloit pas faire tant de bruit, contre la nouuelle Religion de IESVS de Nazareth: mais qu'il falloit recourir au temps, & auoir patience: adioustant que si elle estoit de DIEV, toutes les forces humaines ne pourroient pas s'y opposer; que si elle n'en estoit pas, elle se destruiroit d'elle-mesme.

C'estoit aussi la pensée de nostre sage Prestre, lors qu'il differoit de vouloir adherer à ses lumieres & mesme decouter les inspirations des personnes qui le sollicitoient, touchant le dessein de son Ordre; car il esperoit que le temps luy en donneroit de plus claires connoissances, & que le Seigneur fortifieroit son entreprise, & la feroit reüssir si elle estoit selon sa diuine volonté: sinon, qu'il l'affoibliroit, & la rendroit absolument nulle. *Aussi a-t'il dit plus de cent fois ces paroles: Si l'Ordre de Nostre-Dame de Misericorde est l'œuvre de DIEV; il la fera reüssir, & subsister; mais s'il est l'œuvre du Pere Yvan, ou de quelque autre creature, il sera dissipé & aneanty.*

CHAPITRE XVIII.

Sa profonde humilité, refusant d'entreprendre l'Institut des Religieuses Nostre-Dame de Misericorde.

Quelque Sainte que soit la prudence des hommes, elle ne pût rien contre les conseils du Tres-haut: plus le Pere Yvan résiste aux mouuemens de l'esprit de DIEV, touchant l'Institut de la Misericorde; plus il en est viuement poussé; & plus il en veut retarder l'exécution, plus il est pressé de se hâster, & de le cōmencer au plustost: si bien que les empressements interieurs qu'une de ses penitentes en ressent, & la peine qu'il luy donne par ses résistances, l'affoiblissent en sorte, qu'elle en tōbe malade; & se trouue contrainte durant plusieurs mois de tenir le lit, ou la chambre: sans pouuoir sortir de sa maison, que pour aller ouyr la Messe dans vne Eglise voisine. Le demon prit

occasion de cette maladie, de s'opposer au dessein de nostre nouvelle Congregation; suscitant des calomnies contre ceux qui deuoient l'entreprendre & en être les principaux fondemēs.

En effet dès que l'infirmité de cette personne fut sceuë, on commença à la calomnier comme folle, & extrauagante; & comme n'ayant point d'autre incommodité que les réueries de son esprit; il est vray que la nature de sa maladie sembloit donner lieu à cette detraction; parce que la cause qui en estoit extraordinaire, n'estoit connuë que du Pere Yvan; qui deffendoit expressément à la fille d'en parler à aucun. Ainsi les Medecins, les parens, & plusieurs autres qui la visitoient; mesme des Prestres & des Religieux l'imputoient à folie ou à foiblesse d'esprit: il y en eut mesme qui passerent plus auant; faisant des iugemens tres iniurieux à l'honneur de cette innocente, & vertueuse personne.

Mais la calomnie ne s'arrestant pas à elle, s'estendit iusques au Pere Yvan, de maniere qu'il en souffroit les plus rudes assauts: car toutes les plaintes qu'on faisoit contre la fille, tomboient sur ce bon Pere, qu'on accusoit estre l'auteur des folies de sa penitente; les vns disoient qu'il estoit vn bon homme; mais qu'il commençoit à radoter, & qu'estant ignorant, & ne sçachant pas bien la façon de conduire les ames; il les faisoit deuenir folles par trop de penitence, & par trop de deuotion; les autres adioustoient, qu'il auoit grand tort d'entretenir cette fille dans ses imaginations, qui la rendoient malade; que les Superieurs deuoient l'oster de sa direction; & qu'autrement elle perdrait entierement l'esprit, sans nulle esperance de remede.

Nostre patient Ecclesiastique sçauoit tres bien les plaintes qu'on faisoit contre luy, car il les oyait mesme de ses propres oreilles; & en receuoit de diuerses personnes mille reproches, mille mépris, & vne tres-grande confusion: mais bien loin de se rebutter, & d'abandonner sa penitente; il luy redoubla ses soins & visites: ne passant presque aucun iour, sans la consoler par sa presence; la fortifier par ses instructions: la visitant mesme plusieurs fois le iour quand il le iugeoit necessaire.

Où il est bien vray, que toutes choses cooperent au bien de ceux qui aiment Dieu : car si le demon se seruoit de la maladie de la fille, dont nous parlons, pour la perdre de reputation ; & par ce moyen détourner le Pere Yvan de sa conduite : le Seigneur se seruit de la mesme infirmité pour rendre cette fille plus chere , & plus recommandable à nostre bon Pere, & pour l'obliger d'en auoir plus de soin : luy faisant voir que sa penitente étoit plus infirme par l'abondance de ses graces, que par les deffailances de la nature. En effet tout le temps de sa maladie ne fut presque autre chose qu'un continuel recueillement , où Dieu l'attira , pour l'instruire pleinement du dessein de l'Ordre de Nostre Dame de Misericorde , & des moyens qu'elle deuoit employer avec le Pere Yvan, pour l'établir. Ce qui estoit un puissant motif à nostre zelé directeur , pour luy continuer ses charitables soins , nonobstant les injures , les affronts & les autres persecutions, que le demon suscita contre luy.

Cependant il est contraint de donner audience à la fille , & de luy permettre, de decouurir les connoissances , & les sentimens que Dieu luy donnoit , touchant la Fondation de Nostre Dame de Misericorde , aussi ne pouuoient ils plus ny l'un ny l'autre resister aux mouuemens , & aux impressions extraordinaires de l'Esprit de Dieu : mais c'est icy où nostre bon Prestre donne des marques de son humilité , & du mépris qu'il a pour soy mesme : car il écoute sa penitente avec attention , tandis qu'elle ne parle pas de luy ; il témoigne mesme d'approuuer ce qu'elle luy communique : mais dès qu'elle proposoit que c'est luy que Dieu a choisi pour fonder cette nouvelle Congregation ; & que le Ciel luy reserue l'honneur de l'établir ; cet humble Prestre paroît extrêmement affligé. Il ne peut souffrir qu'elle continuë son discours ; il luy impose silence , & il la reprend bien souuent avec seuerité ; luy apportant plusieurs raisons contraires qu'il tire de la difficulté de cette affaire , & des oppositions qu'il y prenoit, il la mortifie mesme quelquesfois tres-rigoureusement , luy racontant des histoires affligeantes arriuées à de nouvelles Congregations pour la détourner de luy en parler , il la me-

nace mesme de la quitter, & ne prendre plus aucun soin de sa direction; si elle continuë de luy parler de cette entreprise, qu'il dit estre vn projet temeraire & presumptueux: mais les grandes oppositions procedoient de sa rare modestie, & de sa profonde humilité. Ainsi baissant les yeux, comme s'il estoit honteux d'estre containt de parler de soy; *O fille, luy dit-il, vous avez grand tort de vouloir me persuader que DIEU ait dessein de se servir de moy, dans un si saint, & si relenë employ, que celui de la fondation d'un Ordre Religieux; vous vous trompez grandement de le croire; puisque vous sçavez bien, que ie ne suis qu'un pauvre Prestre, ignorant, un grossier, & un homme incapable de tout bien, DIEU est trop sage, poursuit-il avec simplicité) pour se fier de moy en quelque bonne chose.*

Maistant s'en faut que ces resistances du P. découragent la fille, à luy faire les mesmes propositions, qu'au contraire, elle y est tousiours plus portée; connoissant de mieux en mieux, les perfections de son Confesseur, & le choix que la Mere de DIEU en a fait; comme d'un de ses plus fideles seruiteurs: aussi continuë t'elle à le presser, par ce qu'elle est elle-mesme si fortement pressée dans son interieur, qu'elle en perd presque le manger & le dormir. Mais nostre prudent Ecclesiastique continuë à resister, ne faisant ordinairement que ceste responce, qui témoigne non seulement vne profonde humilité, mais encore vne innocence enfantine, & vne vraye simplicité de Colombe; *Je ne suis, dit il, qu'un pauvre Prestre, & un grand pecheur, & redisant presque le mesme, qui suis-je, adiouste t'il, pour entreprendre quelque chose de grand? helas un pauvre Prestre d'époureu de toute assistance, & qui n'a que de defauts: ie vous commande, continuë t'il en ces propres termes, qui montrent vne simplicité inouïe (& que ie n'oserois rapporter s'ils ne m'auoient esté donnez par escrit & attestez par la mesme personne à laquelle il les declara) de dire à nostre Seigneur, & à sa sainte Mere, que ie les prie de tout mon cœur, de ne me plus faire ces propositions; & que ie leur conseille d'en choisir quelque autre. Helas! ie suis un pecheur. Ce sera un grand miracle, si DIEU par son infinie misericorde me veut pardonner mes pechez.*

Ces

Ces paroles partoient du fonds de son cœur, & n'estoient qu'une naïve expression des sentimens de son ame: si bien que l'on n'en pouvoit pas douter; quand on n'auroit observé que son extérieur. Car il les prononçoit d'un ton de voix si touchant, & d'une façon si humble, & si modeste, même si craintive: qu'il sembloit se vouloir aneantir. Certes la penitente en estoit sensiblement esmeue, de façon que recourant à DIEU, & à la sainte Vierge; elle leur exposoit avec simplicité la résistance de son Directeur: & pour obeyr ponctuellement à ce qu'il luy avoit enjoint, s'adressant à JESUS-CHRIST & à la sainte Mere; elle leur exposa simplement ce qu'il luy avoit esté commandé par son Confesseur de luy dire, la suite fera voir combien cette simplicité du Confesseur & de la penitente estoient agreables à DIEU. En effet la sainte Vierge fortifiant la fille de plus en plus, luy fit connoître qu'elle ne devoit se lasser à importuner le Pere Yvan; mais luy reiterer la même proposition, jusques cent fois: si bien qu'elle continua les instances durant plus d'une année; sans se rebuter de ses résistances, ny de ses delais.

Il sembloit que nostre pieux Ecclesiastique vouloit s'opposer aux intentions du Seigneur, que d'y résister si long temps: mais ce n'estoit que pour éviter les tromperies du demon, & pour connoître plus évidemment la volonté de DIEU: en quoy il suivoit l'exemple de tous les plus grands Saints, qui étant appelez à de hauts emplois, ont résisté de toutes leurs forces: jusqu'à ce qu'ils y ont esté contrains, ou par la violence des hommes, ou par la crainte de l'offense de DIEU. C'est ce que nous voyons en la personne de Moïse résistant à l'Ange qui luy commandoit de la part de DIEU, d'aller en Egypte delivrer son peuple de la servitude de Pharaon: même la sainte Vierge la plus humble & la plus obeyssante de toutes les pures creatures, différa de donner son consentement aux paroles de l'Archange; jusqu'à ce qu'elle les eut examinées, & que le même Archange l'eut pleinement informée des moyens, & des circonstances du mystere qu'il annonçoit, jusqu'à luy proposer un exemple domestique de sa parente sainte Elizabeth, pour obtenir son consentement. Il est certain que DIEU appreuve

nos resistances ; quand elles sont fondées sur vne sainte Prudence , & vne sincere humilité ; par ce que l'on n'employe ces vertus , que pour mieux connoistre & executer les Ordres de la diuine volonté.

Cependant nostre sage Directeur employoit les iours , & les nuits en prieres , en penitences , & en autres exercices de pieté & de mortification ; pour demander à DIEU par l'intercession de la Roynne des Cieux , la grace d'estre bien éclairé , & de le déterminer en vn affaire de si grande importance. Il la recommandoit encore aux prieres de toutes les personnes de pieté de sa connoissance , en escriuant mesme à celles qui estoient esloignées de luy ; si bien que parmy ses lettres qu'on a imprimé , nous trouuons la 84. qu'il enuoya à vne fille de grande pieté pour luy recommander cette affaire importante , dont il luy specifie les motifs , & les difficultez. L'ay creu de croire l'insérer ce lieu , par ce qu'elle confirme ce que j'ay dit cy-dessus.

MA fille en IESVS-CHRIST, Noscum Prole pia benedicat Virgo Maria.

Je vous trois vne fille prudente & fidele , & qui veut craindre & aimer DIEU , & chercher en tout son bon plaisir ; & pour ce j'ay vne grande affaire à vous communiquer dans le secret : afin que vous la recommandiez à DIEU , & à sa tres-sainte Mere , & que vous faciez quelques Communions , & Penitences pour ce sujet. Il y a vne de nos filles spirituelles malade depuis long-temps , en laquelle maladie se passent de grandes choses , & merueilles , lesquelles quand elles seront accomplies , & acheuées , & le tout veu & examiné & approuué par l'Eglise de DIEU , on les mettra au long ; & resiouiront tous les gens de bien. Or cette fille estant au lit fort malade , & ne parlant qu'avec grande peine , m'a dit : Mon Pere , hélas ! & que doivent faire les pauvres filles , si aucune ne peut estre Espouse de DIEU , que les riches & celles qui ont vne dot ? & que deviendront les filles des Nobles , des Bourgeois , & des Marchands ruinez , desquels tout le monde est plein , qui n'ont rien pour se marier , ny pour se faire Religieuses ; & qui sont contraintes le plus souuent pour s'entretenir , d'offenser DIEU , & s'abandonner au peché ? Mon Pere , il faut,

s'il vous plaist faire une Maison de ces pauvres filles, de celles qui seront sages, de bonne reputation, de bon sens & entendement, & de meilleure volonté. Nous travaillerons toutes, & tascherons de gagner nostre vie, & ainsi DIEU nous aidera. Entendant ces paroles, & voyant l'affaire estre grandement difficile & de grande peine, & un œuvre de saints personages & de puissantes mains, ie fus estourdy, & aussi-tost luy respondis, Fille, il ne faut pas parler de cela; car ce que vous dites est une tres grande affaire, & d'une tres-puissante main; vous estes encore un enfant, ie suis un pauvre Prestre vieux, ne me parlez plus de cela, il faut qu'une puissante main le fasse. La fille s'est tenue; mais quinze iours apres estant inspirée, dauantage, elle m'a attaqué de la mesme chose, & m'a fait la mesme demande. Je me mis en colere, la mortifiant sans misericorde, disant que tout cela n'estoit que superbe, que si elle en parloit vne autre fois, ie la quitterois; & pour la destourner d'en parler dauantage, ie luy racontay une chose qui l'a faite toute trembler: c'est à scauoir qu'en vne riche ville une personne de mon temps, & que i'auois connuë auant que ie fusse Prestre, auoit fait une compagnie de filles qui dans quelques temps furent le scandale de la ville par leurs mauuais deportemens. La fille desolée s'est consolée avec nostre Seigneur, & sa tres-sainte Mere de Misericorde; mais quelques iours apres estant encore fortement inspirée de me dire la mesme chose, & ne rien faire sans ma licence, elle me dit avec grande peine & mortification: Mon Pere pardonnez moy, il faut que ie vous die encore une fois que DIEU voudroit cette maison de pauvres filles, & si vous le trouuez bon ie commenceray. Helas fille! considerant une telle affaire en un temps de guerre, pauvreté, mépris, & mortifications, & voyant la fille si ieune; car elle n'a pas encore dix-huit ans, & me voyant impuissant ie luy dis en soupirant, ayez patience; il faut qu'une puissante main le fasse. La fille a respondu. Mon Pere vous commencerez, & la main puissante vous aydera, commençons. Je l'ay quittée en paix, & m'en suis allé. Voila cette affaire que ie vous prie de recommander à DIEU. Bien est veritable, que ie vois le grand besoin & necessité de cette entreprise dans l'Eglise de DIEU, & que l'on feroit un grand plaisir à DIEU, de faire des Maisons Religieuses pour y

mettre les filles de condition, & autres qui n'ont pas de quoy se marier, ny se faire Religieuses & qui causent de grands desordres & maux dans les villes. S'il n'y a que les riches qui se puissent faire Religieuses? Hé que deviendront les autres pauvres? faut-il les laisser perir? Je croy bien que tout le monde doit s'aider à faire cette grande miséricorde de sauver la vie, & la pureté de tant de pauvres Vierges. Helas, il y a bien long temps que j'ay la mesme inspiration que cette fille. Mais j'ay grande peur de moy, & ne me fie en rien qui soit en moy. Cette fille me dit des merveilles, sur ce que DIEU, & la sainte Vierge feront pour cette grande œuvre, & elle a une confiance merueilleuse qui m'encourageroit beaucoup, si cela regardoit un autre. Mais que j'entreprenne cette grande œuvre, & ie ne suis qu'un pauvre Prestre grossier & simple & ignorant. Helas faites moy la charité de bien prier pour moy que j'aye bon conseil, & que ie ne fasse jamais que la volonté de DIEU, & son bon plaisir.

CHAPITRE XIX.

Il se determine par une voye merueilleuse à commencer l'Ordre de Nostre-Dame de Misericorde.

NOnobstant tout ce que ie viens de raconter dans les Chapitres precedens nostre Fondateur eut de la peine à se déterminer à son entreprise; iusqu'à ce qu'il y fut presque contraint par cette merueilleuse rencontre. Un iour visitant cette fille dont il parle dans sa lettre, qui estoit encore infirme; dès qu'il fut entrée dans la chambre, elle le pria instamment, de se porter à la maison du grand Vicaire; luy disant qu'elle auoit esté fortement inspirée de luy faire cette priere, & qu'elle esperoit qu'il y trouueroit de quoy se consoler, & de quoy s'esclaircir dans ses doutes & ses apprehensions. Le bon Pere condescendant aux paroles de la fille partit à l'heure mesme, & s'en alla en diligence au lieu qu'elle luy auoit proposé.

Que DIEU est bon enuers ceux qui ont le cœur droit, &

qui marchent avec pureté d'intention ! par ce qu'il leur fait insensiblement connoître sa sainte volonté, & leur donne suavement les moyens de l'accomplir. C'est la voye ordinaire dans l'Eglise de DIEU, d'assembler les Docteurs, & les personnes pieuses ; pour résoudre les difficultez importantes qui regardent le service de DIEU, & le bien du prochain : & cette conduite est bien raisonnable. Car si l'on fait des assemblées d'Aduocats, pour la decision des causes temporelles ; si l'on en fait des Medecins, pour la santé du corps ; & si l'on assemble mesme d'artisans, pour des desseins mécaniques : combien plus est il necessaire d'assembler des gens de sçauoir, & de pieté, pour des affaires spirituelles ; & particulièrement quand elles sont d'une tres-haute importance ; ainsi que l'est vn Ordre Religieux ? Certes le diable ne craint rien tant que ces consultations ; par ce qu'il est tres-difficile qu'il se cache aux yeux de plusieurs, qui ioignent la science, avec la pieté : & il est encore plus difficile, que les ruses de ce serpent subsistent, apres qu'elles sont decouvertes.

Ainsi le Pere Yvan ne devoit pas se fier aux seules reuelations, que luy, & plusieurs personnes deuotes auoient eues de son Orde, sans les faire examiner par de personnes capables : estant indubitable que les choses extraordinaires doiuent estre soumises aux voyes ordinaires, & reglées par les voyes communes ; qui sont le conseil & le iugement des gens doctes, & vertueux : selonc ce que l'Apostre saint Paul en ordonne quand il dit que l'esprit des Prophetes soit soumis aux Prophetes. Il falloit donc que N. B. Pere assemblast des personnes capables, pour leur communiquer son dessein : mais il auoit de la peine de s'y résoudre, craignant avec raison ; de ne donner occasion à l'ennemy de susciter des oppositions contre l'œuvre de DIEU : s'il la manifestoit auant le temps. Comme donc il estoit dans cette peine ; le Seigneur y pourueut : car lors qu'il ne s'y attendoit pas ; il trouua que l'assemblée, & la consultation qu'il desiroit, & qu'il n'osoit entreprendre, estoit desia commencée par vn trait admirable de la prouidence diuine.

Il trouua dis-je, dans la maison du grand Vicaire vn nombre

des plus sçauans, & des plus vertueux Ecclesiastiques de la ville d'Aix; qui s'estoient assemblez pour deliberer sur vn dessein que le R. P. Isnard de la Compagnie de I E S U S, & l'autre Pere de la mesme Compagnie, desquels nous auons parlé, auoient eu auant leur mort. Et ce qui fait voir vne conduite merueilleuse de l'esprit de DIEU en cette rencontre; c'est que le dessein de ces Reuerends Peres Iesuites estoit le mesme, que celui de N. B. P. tendant à faire vne Congregation de filles conforme à celle que DIEU luy auoit inspirée: de maniere que ces Ecclesiastiques qui estoient assemblez chez le grand Vicairre, deliberoient touchant cette affaire; & cherchoient les moyens de l'executer: lors que le P. Yvan entra dans le lieu où ils estoient. S'ils furent d'abord estonnez de son arriuée; parce qu'il n'auoit pas esté appelé, leur estonnement fut bien plus grand; lors que luy ayant déclaré la fin de leur consultation, & leurs sentimens; ils apprirent de sa bouche, que depuis longtemps il auoit le dessein qu'ils propoisoient; & que depuis environ deux années, DIEU l'auoit inspiré à quelques filles qui estoient sous sa conduite, & le pressoient de l'executer. Comme ces personnes qui escoutoient nostre sage Prestre, témoignoiēt vne ioye extraordinaire de ce qu'il leur disoit; il creut que DIEU vouloit bien qu'il fist vne plus ample declaration de l'estat des choses: ainsi baissant modestement les yeux comme s'il eut eu de la confusion de ce qu'il alloit dire, *Tout est disposé, adiousta-t'il, & il ne tient plus qu'à moy de l'entreprendre: mais connoissant tres-bien que ie suis incapable, & indigne d'une si grande entreprise; ie n'ay pas osé y mettre la main: ie voudrois fort, poursuiuit-il, que quelque autre s'y employast; Car i'ay bien de la peine de croire que DIEU se veuille seruir de moy; n'estant qu'un pauvre Prestre, sans appuy, & sans autorité.*

L'on ne sçauoit exprimer la ioye que toute l'assemblée receut des paroles de nostre bon Prestre: ils remercièrent tous la diuine misericorde, d'auoir desia disposé les choses qu'on croyoit estre bien éloignées; ils luy dirent tous vnaniment, qu'il deuoit traualler pour faire reüssir cette œuvre; & que la volonté de DIEU estoit assez manifeste dans cette affaire, pour n'en point douter. Chacun en particulier l'encouragea, & lo

fortifia encores par ses discours : & il n'y en eut pas vn, qui ne luy offrit ses prieres, son appuy, & son assistance ; pour l'accomplissement d'une si charitable, & si illustre entreprise. En fin le tout fut conclu & arresté ; & pour lors mesme nostre fervent Ecclesiastique resolut avec le conseil de ces personnes-là, d'achepter vne maison, & y assembler les premieres filles ; & là, leur faire essayer les pratiques de sa nouvelle Congregation ; selon ce que DIEU en auoit inspiré.

CHAPITRE XX.

Le commencement de la Congregation de Nostre-Dame de Misericorde.

LEs doutes, & les craintes de nostre Fondateur touchant le dessein de son Ordre, ayant esté dissipées par les aduis de cette docte, & pieuse assemblée, dont nous venons de parler ; il s'employa ce iour là mesme avec quelques-vns de la compagnie, à chercher vne maison ; afin d'y assembler les premieres filles : & en ayant trouué vne ; il en arresta le prix, & l'acheta ce mesme iour ; ne differant qu'au l'endemain, d'en passer le contract, & en deliurer l'argent.

On ne scauroit exprimer la consolation que receut sa penitente, qui l'auoit pressé d'aller chez le grand Vicaire, lors que ce bon Pere l'ayant visitée le soir du mesme iour, luy raconta tout ce qui s'estoit passé. Cette bonne fille en tressailloit de ioye iusqu'à pleurer de consolation ; voyant si heureusement reüssir les intentions du Seigneur, par la sage & forte conduite de sa prouidence. Le bon Pere de sa part en témoigna aussi vne satisfaction singuliere, & tous deux ensemble en donnerent mille benedictions à DIEU, à la sainte Vierge Mere de Misericorde.

Le lendemain sans perdre vn moment de temps, nostre vigilant Ecclesiastique, passa le contract du logis qu'il auoit acheté, & en paya le prix dont il estoit demeuré d'accord ; dispo-

fant à mesme temps la premiere fille à s'y retirer, pour commencer la Congregation. Mais parce qu'il y auoit plusieurs presentes difficultez à resoudre, & encore plus à preuoir pour l'aduenir; & que pour cét effet, il falloit qu'il conferast longtemps avec la mesme fille; il trouua bon avec le consentement de ses parens, qu'elle sortist de sa maison paternelle pour quelques iours; & se retirast chez la Damoiselle de Barthelemy, la seconde Religieuse de l'Ordre: pour y pouuoir resoudre les choses plus secrettement, avec moins d'obstacle, & plus de liberté. Outre que quelques mauuais esprits ayât desia murmuré, des frequentes visites qu'il rendoit à cette deuote penitente: il estoit à craindre qu'il ne prissent occasion d'accroistre leur mesdisance; veu qu'il estoit contraint de les continuer, & mesme de les redoubler: pour conclure avec elle ce qu'il falloit touchant leur dessein; en quoy il se comporta suiuant les regles de la prudence Chrestienne qui ne nous oblige pas seulement, selon le grand Apostre, de faire le bien deuant DIEU; mais encore deuant les hommes: pour ne pas blesser la conscience de nos freres infirmes, & ne faire perir par nostre indiscretion, les ames pour lesquelles IESVS CHRIST est mort.

La maison de la Damoiselle de Barthelemy étant donc tres-commode pour euitier tous ces inconueniens, la fille y passa quelques iours: pendant lesquels ayant arresté avec son Directeur tout ce qui estoit necessaire pour leur nouuelle entreprise; elle se retira dans le logis qu'il auoit achepté, accompagnée de la mesme Damoiselle de Barthelemy, & de Damoiselle Taulane, la troisieme Religieuse de l'Ordre. Mais la Damoiselle de Barthelemy ayant esté contrainte par la necessité de ses affaires de demeurer encore dans la maison de feu son mary, ne pût s'arrester pour lors avec ses compagnes: ce qui n'empeschoit pas qu'elle ne les visitast tous les iours, & ne se comportast en toutes choses, comme vne vraye fille de cette nouuelle Congregation.

Cependant les deux qui auoient resté commencerent le genre de vie, qui a seruy de fondement à tout l'Institut; vne vie, disie, plustost Angelique, qu'humaine. Aussi leur charitable Pere sçachant le besoin qu'elles auoient de sa presence, pour
estre

estre encouragées ; & preuoyant les diuerſes attaques qu'elles deuoient auoir ; les viſitoit. t'il pluſieurs fois chaque iour, & il ſ'arreſtoit avec elles, autant que ſes autres occupations pouuoient luy permettre ; les conſolant, & les fortifiant par ſes inſtructions. Il leur donna d'abord quelques regles à obſeruer dans leurs exercices de pieté, & dans la conduite de leurs actions ; mais des regles d'une perfection heroïque, & qui ſurpaſſoient les foibleſſes de la nature ; qui neantmoins ont eſté fidellement obſeruées par ces genereuſes filles : iuſques à ce que leur nombre ſ'eſtant accru, l'Ordinaire les obligea d'en moderer la rigueur.

CHAPITRE XXI.

De la vocation merueilleuſe des trois premiers ſujets que le Pere Yvan receut dans ſa Congregation.

LEs Euangelistes qui nous ont décrit l'hiſtoire de **I**ESVS-**C**HRIſT le Sauueur de nos ames, n'ont pas obmis celle des Apoſtres, qui ont eſté les premiers diſciples de ce diuin Maître ; nous faiſant ſçauoir leurs noms, leur pays, leur vocation, & leurs ſingulieres prerogatiues. Ainſi il m'a ſemblé qu'il ne ſeroit pas hors de propos, ny vne choſe éloignée de la ſuite de mon deſſein ; ſi eſcriuant la vie du P. Yvan, le Fondateur de l'Ordre de Noſtre-Dame de Misericorde ; ie parlois des premieres filles qu'il receut, & qui dans le premiet eſtabliſſement de ſon Ordre, ſemblent eſtre en quelque façon ce que les Apoſtres ont eſté dans le commencement de l'Egliſe naiſſante ; & i'eſpere que le Lecteur n'en ſera pas ennuyé parce qu'il y a des merueilles à voir dans la vocation de chacune.

J'ay deſia rapporté de quelle façon la diuine Misericorde adreſſa la premiere fille de cet Ordre au Pere Yvan, & reuela à ce digne Confeſſeur les deſſeins dans ſon cœur ; & tout l'eſtat de ſon interieur. Mais ſa modeſtie ne me permettant pas d'en dire dauantage, j'adiouſteray ſeulement, que ſ'eſtant retirée

avec vne compagne dans le logis que le P. Yvan auoit acheté, elle se disposa à l'establissement de sa Congregation; de la façon que le Fils de DIEU se prepara à la publication de son Euangile. Car comme ce diuin Sauueur se retira dans vn desert l'espace de quarante iours, ieusnant, priant, & faisant penitence : nostre vertueuse fille, & sa compagne passerent quelques mois seules dans vne continuelle retraite: priant sans relasche, ieusnant avec rigueur, & faisant d'autres sensibles mortifications.

Le Pere Yvan leur ordonna vn silence si estroit, qu'elles furent long-temps sans dire vne seule parole, que dans l'absoluë necessité : leur pauvreté volontaire estoit extreme; car elles estoient priuées non seulement des commoditez, mais encore des choses necessaires à la vie: n'ayant ny lit, ny chaise, ny table, ny bois, ny feu, non pas même du pain; comme si elles eussent esté dans vne cauerne de rocher, à l'imitation de sainte Magdelaine penitente; ou dans vn desert inhabitable à l'exemple de IESVS CHRIST, pendant son ieusne de quarante iours. L'on peut iuger par cette rencontre de l'indigence où elles s'estoient amoureusement reduites; ayant trouué vn panier plein de morceaux, & des miettes de pain, que l'on auoit recueilly des restes des repas, peut estre depuis plusieurs années, la plupart moisi, dur comme de la pierre, & noir comme du charbon; elles le firent bouillir avec de l'eau dans vn chauderon; si bien qu'elles en composerent vne espeece de mets, qui leur seruit de nourriture durant plusieurs iours; sans qu'elles eussent aucune autre sorte d'aliment, non pas même du pain. Mais le Seigneur enrichit leur pauvreté Euangelique des thresors de sa grace; car cet aliment, dont la seule veüe deuoit causer du dégoust, & de l'auersion, leur seruit d'un remede salutaire, qui guerit les infirmités corporelles qu'elles auoient: & comme si c'eust esté vne espeece de manne; elles y trouuoient vn goust delicieux, & en receuoient des douceurs ineffables. Ce qui montre la conduite ordinaire du Seigneur qui remplit de richesses, & de contentemens du Ciel, les âmes qui se priuent pour son amour des commoditez, & des satisfactions de la terre.

Aussi nos genereuses filles cachotent-elles leur pauvreté, comme vn grand thresor ; ne voulant pas mesme souffrir qu'aucune personne s'en apperceust ; non par honte, ou par respect humain : mais par la vertu qui la leur faisoit aimer, & par la crainte qu'elles auoient, qu'on ne leur permist pas de continuer en cét estat. En effet dès qu'on reconnut l'extreme indigence qu'elles auoient volontairement embrassée, on leur osta le moyen d'y perseuerer ; les obligeant de prendre leur nourriture, & de se seruir des autres commoditez qui sont necessaires à la vie. Cependant nostre zelé Directeur estoit ruy du courage, & de la vertu, de ses filles ; de façon qu'il ne pouuoit se lasser de benir le Seigneur, des forces que sa grace leur départoit ; faisant semblant de ne pas connoistre leurs besoins, ny leurs souffrances, afin de les mieux espreuer, & par cette espreue, iuger plus solidement de la fermeté de leur esprit, & de la constance qu'il en deuoit esperer.

La seconde personne que la prouidence diuine appella dans l'Ordre des filles de Nostre-Dame de Misericorde, fut la Damoiselle Anne de Bontemps, veufue du sieur de Barthelemy, de la ville d'Aix, decedée dans la mesme Ville, le premier du mois de Novembre de la presente année, 1661. dès ses premieres années, elle auoit donné des marques du choix que DIEU en auoit fait, pour estre vn des premiers sujets de cet Institut : car deslors viuant dans vne singuliere pieté, & grande reserue, il paroissoit bien qu'elle estoit plustost portée à embrasser l'estat Religieux ; qu'à s'engager dans le mariage. En effet ses parens eurent de la peine de la faire resoudre à se marier ; si bien que l'ayant promise à son insceu, au sieur de Barthelemy, elle ne donna son consentement que par pure soumission & obeyssance, apres plusieurs importunités qui luy en auoient esté faites par ses plus proches. Mais changeant d'estat, elle ne changea point ses exercices de deuotion : de maniere qu'elle continua dans le mariage les pratiques de pieté quelle auoit estant encore fille ; & son exemple ioint à ses discours fut si efficace enuers son mary, que d'vn hōme mondain & addonné aux vanitez du siecle, elle le rendit vn tres-pieux & tres-deuot Chrestien. Estant restée veufue fort ieune, ello

voulut d'abord se retirer dans vne maison Religieuse : mais le bon Pere Yvan son Confesseur l'en détourna ; iusqu'à ce qu'ayant formé le dessein de sa Congregation, il l'associa à sa premiere fille, comme vn sujet tres digne & tres-capable, & dont il se promettoit beaucoup, pour l'auancement de son œuvre ; ainsi que la suite a fait voir. Car elle a rendu de tres-grands seruices à son Ordre y ayant tousiours exercé les charges ou de Prieure ou d'Assistante, avec grande benediction : aussi a-t'elle tousiours esté vne des plus mortifiées Religieuses de son Ordre ; vne des plus appliquées aux exercices de pieté ; vne des plus zelées pour la perfection de ses Sœurs ; & vne des plus exactes à l'obseruation de sa regle & de ses constitutions : ainsi qu'il sera plus amplement rapporté dans les Chroniques de ce mesme Ordre.

Ses affaires ne luy ayant pas permis d'accompagner la premiere fille de cette Congregation, quand elle se retira dans la maison que nostre Fondateur auoit achetée, comme nous auons desia dit ; elle se vint joindre à elle quelques mois apres ; emmenant avec soy vne sienne ieune fille, & apportant quantité de biens. Mais comme si ce bien eust esté contraire à l'esprit de paureté, que **DIEU** exigeoit des filles de nostre Congregation naissante ; elle ne s'y arresta pour lors, que fort peu de temps : la nécessité de ses affaires l'ayant obligée de retourner à la maison de feu son mary, avec ce qu'elle en auoit apporté. Mais c'est vne chose remarquable, que deux ou trois iours avant sa sortie, **DIEU** le fit connoistre à vne des deux premieres, qui estoient desia dans la maison. Car comme elle estoit en priere ; le Seigneur luy manifesta, qu'il exigeoit vne si grande paureté des filles de Nostre Dame de Misericorde, au commencement de leur Congregation ; qu'il vouloit qu'elles n'eussent presque aucune commodité de la vie, non pas mesme de sieges pour s'asseoir, ny de tables pour manger : afin qu'elles commençassent par le defect de toutes choses ; comme **IESVS-CHRIST** auoit commencé sa vie par la paureté extreme de sa naissance. **DIEU** luy fit encore voir, que sa sagesse dépoüilloit la Dämoiselle de Barthelemy de ce qu'elle auoit de plus cher ; qu'elle seroit obligée de retourner dans la maison de

feu son mary, & que sa fille mourroit dans six mois. La personne qui auoit ces connoissances extraordinaires, demeura saisie d'une grâde crainte, que les biens que l'on auoit apportez dans la maison, n'empeschassent ce que DIEU vouloit establir dans la pauvreté Euangelique; elle le declara en effet à son Directeur, qui l'encourageant par ses discours, & par la benignité de son regard, luy respondit; qu'il falloit attendre l'issuë, par laquelle on connoistroit mieux la verité de la reuelation, & la volonté du Seigneur.

Quelques iours apres, la fille de la Damoiselle de Barthelemy estant tombée malade, les parens de feu son pere obligèrent sa mere de la ramener dans sa maison, & d'en auoir soin. Le P. Yvan y consentit, & mesme l'encouragea à le faire pour éviter les plaintes, & les murmures qu'elle auroit causez, si elle eust fait autrement. Ainsi estant retournée dans sa maison, elle prit toute sorte de soin pour la guerison de sa fille; ce qui n'empescha pas qu'elle ne mourust dans les six mois; ayant fait auant que de mourir, les vœux simples de la Religion, entre les mains du bon Pere Yvan son Confesseur: de maniere qu'elle mourut d'une si sainte façon; avec tant de resignation, & tant de marques de ioye, & d'allegresse; qu'elle consola grandement sa mere, & ses autres parens; leur ostant par l'exemple de ses vertus, vne partie du regret, & de l'amertume de sa mort. Mais la consolation de sa mere fut toute extraordinaire; lors que sa fille, reuestuë des marques de la gloire celeste, parut apres sa mort à celle-là mesme qui en auoit eu la reuelation; apres quoy sa mere n'ayant plus d'empeschement dans le siecle, y renonça entierement, & se retira avec les filles de la Misericorde dans leur petite maison.

Le troisieme sujet de cette Congregation fut Damoiselle Taulane, issuë de tres-honnestes parens de la ville de Berre. Nous pouuons l'appeller la fille de la Prouidence, & la premiere qui a esté receuë dans l'Ordre de la Misericorde, selon le vray esprit de son institution, qui est vn esprit de charité. Car ses parens estant tombez dans l'aduersité, qui est l'espreuue ordinaire des gens de bien; le Seigneur eut vn soin particulier de la faire éleuer par de personnes charitables: & la sagesse

diuine qui a accoustumé de tirer la grandeur de la bassesse, la plénitude du vuide, & le tout du neant, fit que la pauvreté de cette fille, seruit d'occasion pour remplir son ame des richesses spirituelles.

La Mere de la premiere Religieuse de cet Ordre, le tenant chez soy comme si elle eut esté son enfant, luy procura le bonheur qu'elle eut : car comme sa fille, dont nous auons parlé, se retira dans la petite maison, elle l'emmena avec soy, pour estre sa compagne : sans pourtant luy communiquer aucune chose de son dessein. Mais elle ne fut pas seulement compagné de corps ; elle le fut encore d'esprit, & de vertu : Car se comportant comme vn Ange, par son innocence, & par sa simplicité ; elle supporta constamment diuerses austeritez, & penitences extraordinaires ; & à l'imitation de sa compagne, elle obserua fidèlement les pratiques d'une tres haute pieté que le P. Yvan auoit ordonnées. Si bien que sa vertu la fit trouuer digne d'estre receuë la troisieme dans l'Ordre, sous le nom de sœur Marie du saint Esprit : où elle est decedée quelques années apres sa profession ; ayant exercé la charge de maistresse des Nouices, avec grande edification ; & laissé en mourant de tres-rars exemples de vertu.

CHAPITRE XXII.

La vocation merueilleuse des cinq autres filles que le Pere Yvan receut dans sa Congregation

LA quatriesme fille que nostre Fondateur receut dans sa Congregation appelée Magdelene Ferriole, fut attirée par la responce qu'elle eust dans la Chapelle de Nostre Dame d'Esperance, de laquelle nous auons parlé : car ayant appris quelque temps apres, que le P. Yvan luy auoit enioint de prier la sainte Vierge, pour vn Ordre nouveau qui deuoit estre estably dans l'Eglise de **DIÉV**, sous le tiltre de Nostre Dame de Misericorde, & sous la direction du mesme P. Yvan, elle s'y

deuoia, & y fust receuë auant meſme que l'Inſtitut fust eſtably. Le nom de Religion qu'on luy donna le iour de la veſture, fut tres-conuenable à ſa vertu; car elle fut nommée ſœur Marie des Seraſins; parce qu'elle imitoit la ſainteté de ces bien heureux eſprits, par la ſublimité de ſa contemplation, & par la pureté de ſes mœurs: ſi bien que le demon ne pouuoit demeurer deuant elle; & c'eſtoit aſſez de ſa preſence, pour le faire fuyr. Auffi a-t'elle donné pendant ſa vie des preuues d'une vertu ſinguliere, & d'une tres-haute perfection, tant en qualité d'inférieure, que dans les charges de maiſtreſſe des Nouices, d'Assiſtante, & de Supérieure, quelle à dignement exercées.

La vocation de la cinquieſme appellée Anne de Berenguier, à eſté encore plus admirable: elle auoit veu en extaſe (ainſi que nous auons dit) l'Ordre de la Misericorde, auant qu'il fust commencé, lors qu'elle prioit dans vne Eglise des Carmelites pour les intentions de N. B. P. & ſuiuant le commandement que ce zelé Confeſſeur luy en auoit fait. Cette veuë luy auoit oſté le deſir d'eſtre Carmelite; & l'auoit puiffamment attirée à embrasser le meſme Ordre de la Misericorde: mais ſes parens n'y voulant point du tout conſentir, ne pouuoient ſe reſoudre à luy accorder le congé qu'elle leur demandoit. Il n'eſt pas croyable combien cette genereuſe fille témoigna de force, & de courage, à reſiſter aux efforts que ſes parens faiſoient pour la deſtourner de ſa pieuſe reſolution: cependant elle ne ceſſoit de prier, pour ce ſuiet, de pleurer, & de faire des penitencer; iuſqu'à ce qu'enfin elle fut exaucée, & DIEU la rendit victorieuſe par vne meueille extraordinaire.

Elle fut vn iour rauie deuant ſon pere, & ſa mere; en telle ſorte qu'elle perdit l'vſage des ſens, & preſque toutes les marques d'une perſonne viuante. Ses parens qui ne connoiſſoient pas l'operation de l'eſprit de DIEU dans l'ame de leur fille, croyant qu'elle s'en alloit mourir, firent vœu de conſentir qu'elle ſe fiſt Religieuſe ſuiuant les inſpirations qu'elle auoit, ſi DIEU luy rendoit la ſanté. Admirable, & douce conduite de la prouidence diuine! Les parens n'eurent pas pluſtoſt proferé leur vœu, que la fille reuint à ſoy, & parut plus ſaine, & plus contante qu'auparauant. Certes ſi la conſolation des parens fut

grande de voir leur fille dans vne plaine santé, lors qu'ils la croyoient estre dans l'agonie ; la fille receut vne ioye tout à fait extraordinaire, quand elle apprit qu'on auoit fait vn vœu qui luy donnoit la liberté entiere d'entrer dans la Congregation des filles de Nostre Dame de Misericorde, où elle se croyoit appelée par l'esprit diuin. En effet quelque temps apres elle y fut receuë, & y ayant perseueré iusques à ce que la Congregation fut erigée en vn Ordre Religieux ; elle prit l'habit, & y fit profession, sous le nom de sœur Marie de saint Michel ; estant morte quelques années apres en odeur d'une tres-bonne & tres-fidelle Religieuse.

Le bon Pere Yvan appella la sixième, d'une façon tout à fait admirable. Cette fille estant vn iour venue dans l'Eglise des Peres de l'Oratoire, pour y faire ses deuotions, n'eust pas plustost fléchy les genoux, & adoré le tres saint Sacrement ; qu'elle fut comme transportée dans vn Confessionnal, où estoit pour lors nostre pieux Ecclesiastique, qu'elle ne connoissoit pas, & de qui elle n'estoit pas aussi connuë : elle sçauoit non plus aucune chose de nostre Congregation ; qui ne faisoit que de commencer.

Dés qu'elle fut dans le Confessionnal, nostre Fondateur luy demanda son nom : la fille toute surprise, sans neantmoins estre troublée ; respondit qu'on l'appelloit Marie Peculier. *Hé bien Marie, poursuit le Pere, voulez vous pas bien aimer DIEU ? ou y mon Pere, repartit cette fille, ie le desire de tout mon cœur ; & ie voudrois fort sortir du monde, pour faire vne retraite ; mais ie souhaiterois grandement me retirer dans vne maison des filles de la sainte Vierge. Apres cette reponse N. B. P. continuant à l'interroger : nos filles, repliquat-il, de Nostre-Dame de Misericorde, qui sont assemblées en Congregation, n'ont personne pour les seruir, voudriez vous leur faire cette charité ? tres-volontiers, repartit la fille : apres quoy continuant son discours ; hé mon Pere adiousta-t-elle, d'un ton animé, & qui donnoit à connoistre les feruens desirs de son cœur ; que ie vous seray obligée ; si vous me procurez vn si grand bien : car ie ne souhaite rien tant que d'estre dans vn lieu, où ie puisse seruir IESVS-CHRIST & la sainte Vierge sa digne Mere.*

Le

Le Pere luy fit encore d'autres demandes touchant ses parens, ses commoditez, & l'estat de son interieur ; si bien qu'ayant conneu par ses réponses qu'elle estoit vne pauvre fille orpheline, priuée des biens de fortune ; mais qui par sa pieté monstroît qu'elle estoit tres-riche des biens de la grace, & de la vertu, il luy promit de la receuoir dans sa Congregation. En effet quelques iours apres, executant sa promesse, il l'associa à ses filles, en qualité de conuerse. Cette vertueuse personne ne vescu que trois ou quatre années, au seruice des sœurs de nostre Communauté : mais nous pouuons dire d'elle, ce que le Sage dit du Patriarche Enoch ; qu'ayat esté bien-tost consommée, elle a rempli l'espace de plusieurs ans, parce qu'elle a pratiqué tant de vertus durant ce peu de temps, & elle a donné de si beaux exemples de la perfection Religieuse ; qu'elle nous a laissé assez de matiere pour en composer vne belle vie.

Saint André ayant esté receu en la Compagnie du Fils de DIEU, y appella Pierre son frere : diray ie que cette sixième fille de la Misericorde eut vn zele semblable ? car dès qu'elle eut le bien d'estre receuë dans nostre Congregation, elle voulut en faire participante Marguerite Peculier la sœur, qui viuoit encore dans le siècle, & estoit en danger, se trouuant ieune orpheline, douée des qualitez aduantageuses de la nature : mais destituée des commoditez necessaires pour subsister. Ainsi Marie qui estoit desia receuë s'employa pour l'attirer, & la faire receuoir : commençant pour venir à bout de son dessein, par les prieres & les autres exercices de deuotion.

Mais voyez son obeyssance ; combien elle estoit attachée à la pratique de cette vertu, & le grand estat qu'elle en faisoit : elle n'osa commencer de prier, ny de faire aucune penitence pour Marguerite, qu'elle n'en eust obtenu la permission du Pere Yvan, & de la Superieure de la Congregation. Aussi le Seigneur exauça-t'il ses vœux, & il accomplit ses desirs : car quelques iours apres qu'elle eut commencé ses prieres, & ses penitences, selon la licence qu'elle en auoit eue, la Diuine bonté fit la merueille qui suit, pour la vocation de la Sœur.

La Supérieure l'ayant appelée vn iour de bon matin, *Mari*e, luy dit-elle, *allez, mais allez visiblement chez vostre sœur Marguerite: D I E V m'a fait connoistre qu'elle va tomber dans vn grand danger, & que vous le détournerez par vostre présence.* La fille obeissant promptement, part d'abord, & avec la plus grande diligence qu'elle put, se rend dans la maison de sa sœur. Elle void bien tost le peril évident, que sa Supérieure en auoit predict; car entrant dans la chambre, elle trouue Marguerite encore couchée, & profondement endormie; & elle rencontre dans la mesme chambre vn ieune homme, qui en estant passionnement amoureux, & n'ayant pû par ses longues poursuites ébranler la vertu de cette chaste fille, auoit trouué le moyen d'ouurir la porte de sa chambre, & de s'y glisser à cette heure-là.

Ce ieune homme ne faisoit que d'entrer, lors que *Mari*e y arriuant faillit à pasmer; tant elle fut estonnée de le rencontrer en ce lieu, & trouuer sa sœur encore dans le liét endormie. La surprise du ieune homme ne fut pas moindre, de voir son mauuais dessein découuert par vne voye si extraordinaire: mais l'on ne sçauroit exprimer la confusion qu'eut la fille qui estoit endormie; lors qu'estant éueillée par les cris & par les efforts de sa sœur, elle connut le danger qu'elle auoit couru, & le moyen merueilleux par lequel elle en auoit esté desliurée. Elle ne sçauoit dire les plaintes qu'elle fit contre ce ieune homme, avec des paroles si touchantes, & d'vne maniere si forte, qu'il paroïssoit bien qu'elle estoit sensiblement outrée de sa temerité: elle le bannit pour tousiours de sa maison; elle luy fist cent menaces; adjoustant que si elle auoit eu iusques alors, de l'indifference pour luy; elle en auroit à l'aduenir vne hayne acheuée, & vne horrible auersion, comme d'vn ennemy de son repos, & de son salut. *Mari*e prenant la parole apres qu'vne iuste colere l'auoit presque interdite à sa sœur; elle fist encore des plaintes à ce mesme ieune homme; mais comme elle estoit fort pieuse, elle luy apporta cent raisons pour luy faire reconnoistre le mauuais estat de sa conscience; pour le porter à s'en repentir, à se confesser, & à mener vne vie plus Chrestienne. De façon que le ieune homme parut touché: mais estant cou-

uert de honte, & de confusion, en sorte qu'il ne sçauoit bonnement que répondre; il se retira, apres leur auoir demandé pardon, & leur auoir fait quelques excuses sur l'excès de sa passion; promettant de faire penitence, & de mener vne vie plus raisonnable & plus Chrestienne. Apres quoy ces deux sœurs benirent DIEU, & rendirent mille actions de grace à N. D. de Misericorde, de la protection qu'elle leur auoit départie en cette rencontre. Depuis ce temps-là, Marguerite qui estoit encore dans le monde, se resoluant d'en sortir, demanda au Pere Yuan la grace d'estre receuë dans sa Congregation, & ne cessa de poursuire avec humilité, & avec zele, cette faueur, iusques à ce qu'on la luy accorda. Elle est la septième de l'Ordre, vne fille de tres-grand merite, & qui rend presentement de grands seruices à sa Religion, par ses soins, par sa conduite, & par les rares exemples de sa vertu.

La huitième fut receuë estant encore fort ieune; mais déjà tres-auancée en vertu: comme ayant esté preuenue des benedictions du Seigneur dès ses plus tendres années. Le Pere Eternel, & IESVS-CHRIST son Fils; ainsi que nous auons remarqué, luy donnerent la connoissance du Pere Yuan, & des filles qu'il auoit déjà assemblées dans sa Congregation; depuis ce temps là, elle eut vn si grand desir d'estre receuë parmy ces filles; qu'elle passoit & les iours, & les nuits entieres en prieres; pour demander cette grace au Seigneur, & à la Mere de DIEU. Elle employoit aussi ses larmes, ses importunitéz, & tout ce qu'elle pouuoit aupres de son pere; pour auoir de luy congé d'aller à Aix vne seule fois; esperant par ce moyen de se presenter au Pere Yuan, & le prier de la recevoir.

Mais elle ne pût iamais rien gagner sur l'esprit de son pere; parce que l'aymant tendrement, il ne pouuoit se resoudre qu'elle s'éloignast de luy; craignant mesme (ce qui estoit vray) qu'elle voulust se rendre Religieuse, à quoy il n'auroit iamais voulu consentir. Et ainsi elle se déroba vn soir, en la compagnie de la Presidente de S. Martin, Dame de tres-grande Vertu, & vn modele de la Pieté de son sexe; qui l'ayant menée, & logée dans sa maison, la conduisit le lendemain dans le Confessionnal de nostre pieux Fondateur. Ce bon Pere ne la vit pas

plustost; que s'estant tourné vers elle, & l'appelant par son nom; comme s'il en eust eu vne pleine connoissance; quoy qu'il ne l'eust iamais connuë; N. *Ma fille*, luy dit-il, *veux-tu pas aymer Dieu? Ouy mon pere*, répondit-elle tout simplement; *i'en ay grand desir. Mais où est-ce que tu cherches DIEU*, poursuit le pere; *pour l'aymer, & pour le prier? N'est-il pas vray que tu le cherches dans l'Eglise, ou dans quelque Chapelle, ou parmy les Images? Veux-tu que ie t'enseigne où il est? le veux-tu sçavoir? tu seras bien estonnée quand ie te l'auray déclaré. Dites-le doncques bien-tost*, repliqua la fille, d'une maniere hardie, & qui montrait l'empressement de son cœur; *dites-le tost, afin que ie le trouue, & que ie l'ayme: car ie ne desire rien autre. Il est dans ton cœur*; continua le Pere, *il est dans toy; il est au milieu de toy; tu es toute en luy, & il est tout en toy. Je sçauois bien*, repartit la fille, *qu'il est par tout, & qu'il est en moy. Ayme-le donc bien en toy*, adjousta le Pere, d'un ton feruant, & tout embrasé, *embrasse-le bien, conserue-le bien; & sans le chercher en autre lieu, caresse-le bien dans ton cœur.*

Ces paroles toutes de feu, prononcées d'une façon ardente, embrazerent le cœur de cette fille; qui d'ailleurs estoit tres-bien disposée; & n'auoit aucun empêchement. Apres donc qu'elle se fut confessée, elle demanda au Pere Yvan la grace d'estre receuë dans sa Congregation, disant qu'elle en auoit ouïy parler; & taisant la reuelation qu'elle en auoit eue; dont le souuenir luy auoit fait reconnoistre nostre Fondateur, dès qu'elle l'auoit apperceu, comme aussi elle reconnut de la même façon les premieres filles de la Congregation. Comme doncques elle demanda d'estre receuë; le Pere la regardant d'un air graue; mais accompagné d'une certaine douceur, qui montrait qu'il auoit beaucoup de bienveillance pour elle: *Tu es encore trop ieune*, luy dit-il, *& tu parois trop delicate. Et qu'est-ce que nous ferions de toy? adjousta-t'il d'un ton plus serieux, voulant l'épreuuer: car tu ne nous pourrois rendre aucun service.* La fille ne s'estonnant point de ce refus; mais paroissant mesme plus courageuse qu'auparauant: *Mon bon pere*, répondit-elle, avec vne grande confiance; *receuez-moy, s'il vous plait. Je feray tout ce que ie pourray; & j'espère que la*

sainte Vierge me donnera des forces pour satisfaire à ce que l'on me commandera : Mais la maison de nos filles est si estroite ; continua le pere, qu'il n'y auroit pas de la place pour y mettre un liét pour toy. Et qu'importe mon Pere, repartit encore la fille, ie suis fort menuë, & petite : il ne faudra pas un grand espace pour moy. Je coucheray fort bien, & tres volontiers sur une table, ou à la plate terre. Enfin le Pere luy ayant objecté plusieurs autres difficultez, & elle les ayant surmontées par ses réponses ; il luy promit de la recevoir la premiere fois qu'elle retourneroit. Elle auroit bien voulu s'arrester cette fois-là : mais vn de ses freres que son pere auoit enuoyé apres elle pour la ramener, fit tant de bruit, & forma tant de plaintes ; qu'elle fut contrainte mesme par le commandement du Pere Yvan, de s'en retourner avec luy : Mais son desir continuant, & s'augmentant de plus en plus ; elle se déroba vne seconde fois, en la compagnie encore de la mesme Dame Presidente : & s'estant présentée à nostre bon Pere, & à ses filles ; elle fut receuë dans leur Congregation.

Il y eust encore deux filles qui furent receuës dans la petite maison de nostre Congregation par le Pere Yvan ; à sçauoir Louyse de la Brillane, & Elizabeth Martelly : dont la premiere eut vne vocation bien particuliere : car elle estoit déjà Nouice de l'Ordre de saint Benoit, dans vn Monastere où les Religieuses n'ayant pas la Reforme, auoient permission de sortir : & ainsi ayant vn iour visité, avec la Dame de la Brillane sa mere, nos vertueuses filles déjà assemblées dans la petite maison ; elle fut tellement touchée de leur façon de viure, que dès lors elle pria, pressa, & importuna pour y estre receuë, ne cessant ses poursuites, iusques à ce qu'elle eust obtenu ce qu'elle demandoit. Elle trouua mille peines à souffrir, & mille difficultez à vaincre ; mais enfin, par sa patience, & par sa perseuerance, elle en vint heureusement à bout : ayant depuis vescu dans l'institut avecque grande edification, & exercé dignement la charge de Maistresse des Nouices durant plusieurs années ; iusques à ce qu'estant venue à Paris pour y seruir son Ordre ; elle y est decedée au grand regret de toutes les Religieuses ; apres auoir donné de tres-rare exemples de patience, & de resigna-

tion, dans la longue, & fâcheuse maladie dont elle est morte. Voila les dix premieres filles de nostre Congregation.

CHAPITRE XXIII.

De la fin principale de l'Ordre des Religieuses de Nostre-Dame de Misericorde.

I'Ay assez parlé dans les Chapitres precedents de cette Histoire, touchant la Congregation, ou l'Ordre des Religieuses de Nostre-Dame de Misericorde; pour avoir fait naistre le desir au Lecteur d'en auoir vne connoissance particuliere, & d'en sçauoir la fin & les moyens qui le distinguent des autres Instituts. Je desire le satisfaire; & ie m'y sens d'autant plus porté, qu'il me semble qu'il a déjà eu plusieurs fois cette pensée dans son esprit: Pourquoi vn Ordre nouveau de Religieuses dans l'Eglise de Dieu, comme s'il n'y en auoit pas assez pour toute sorte de personnes, en quelque estat qu'elles soient appellées, soit austere, soit doux, ou mitigé: de la Vie active, de la Vie contemplative, ou de la Vie meslée? n'y en a-t'il pas de toutes ces façons? Pourquoi est-ce donc qu'on en veut instituer des nouveaux; au lieu de perfectionner les anciens?

Je répons à cette objection, que ce ne sont pas les creatures qui ont trouué le dessein de cét Ordre; mais le Createur; duquel nous deuons venerer les Ouurages avec respect, sans en examiner les desseins avec presumption. Les Predictions, & les Reuelations que j'ay apportées de diuerses personnes dignes de foy, faites en faueur de cét Ordre, plusieurs années auant son commencement, monstrent que le Tout Puissant en est l'Authéur: car il n'y a que luy seul, qui puisse reueler avec certitude les choses futures, qui dépendent du libre arbitre des hommes.

En second lieu, les personnes que la Prouidence a employées pour entreprendre cét Ordre, confirment, que c'est vn ouurage Diuin; puisque ces personnes d'elles-mesmes auoient

presque aussi peu de capacité, & de disposition pour ce grand Ouvrage; que les Apostres en auoient eu auant la descente du saint Esprit, pour la publication de son Euangile. Ce que chacun pourra facilement remarquer dans la lecture de cette Histoire, pour peu qu'il y fasse de reflexion. Les SS Peres, & les premiers Docteurs se sont seruy de ces deux Argumens, cest à dire de la predi&tion des Prophetes, & de la predication des Apostres, pour prouuer contre les Iuifs, & les Payens, la verité de la Religion Chrestienne. Ils ont encore employé vne troisieme preuue, tirée des miracles que Dieu faisoit, pour la protection & la propagation de son Eglise: c'est la plus forte raison qui nous contraint d'auoier, que l'Ordre de la Misericorde est vn Ouvrage du Ciel, plustost que de la terre, & vne inuention de Dieu, & de la sainte Vierge, plustost que du Pere Yuan, & de ses filles; si nous considerons les merueilles que Dieu a operées en sa faueur, les benedictions qu'il y a versées, & que sa Bonté continuë encore d'y répandre.

Mais quand il n'y auroit rien eu de surnaturel, ny d'extraordinaire dans l'entreprise, & l'establissement de cet Institut; la seule connoissance de sa fin particuliere, & de son employ, fait assez voir quelle en est l'excellence, l'vtilité, & si ie l'ose dire, la necessité: outre sa difference d'auec les autres Ordres Religieux. Car par dessus les fins communes à tous les Ordres, & à toutes les Congregations; de viure dans l'exercice continuél de la Religion de Iesus-Christ, par l'obseruance des vœux de Pauvreté, Chasteté & Obeysance; & par l'application à l'Oraison aux Offices, aux Sacremens, & aux autres pratiques de Pieté, & de perfection. Outre cette intention, qui est aussi commune, de prier Dieu avec instance, & assiduité, pour la conuersion des Pecheurs, l'extirpation des heresies, l'augmentation de la Foy Catholique, pour les Ames du Purgatoire, pour les agonisans, pour les malades & pour la Paix, des Princes Chrestiens &c. Les filles de N. D. de Misericorde doiuent particulièrement s'appliquer à la priere; pour l'extirpation des heresies qui s'eleuent en ce temps-cy & pour demander à Dieu, qu'il luy plaise enuoyer des bons Ouuiers

steres, ny assez de bien pour se marier selon leur rang si-bien que les Religieuses de cét Ordre font vne profession singuliere, & expresse, de les recevoir avec ce qu'elles peuvent apporter : pourveu qu'on reconnoisse en elles les qualitez requises, & que le Monastere aye dequoy subsister.

Au reste, cét amour de la pauvreté, & des pauvres Demoiselles, est tellement propre à cét Institut de la Misericorde, que le bon Pere Yvan a écrit dans les premieres Constitutions de l'Ordre ; que les pauvres Demoiselles en sont les enfans legitimes, & que les riches n'en sont que les enfans adoptifs. Et afin que cét esprit de recevoir les pauvres Demoiselles avec le peu qu'elles ont, perseuere dans cét Ordre, & qu'il ne soit pas mesme permis aux Religieuses d'iceluy de s'en dispenser sans des causes legitimes : outre les trois Vœux de la Religion, elles en font vn quatrième ; par lequel elles s'obligent de ne refuser jamais leur suffrage à vne fille ; pour la seule insuffisance de sa dot, selon leur Bulle & Constitutions : c'est à dire selon les moderations que les Superieurs y ont mises. Ce seul point sur lequel ie ne m'estens pas presentement, fait voir la dignité, la necessité, l'vtilité de cét Ordre ; puis qu'il semble n'y en auoir point dans l'Eglise, qui fasse vne profession plus conforme à l'esprit charitable de **I E S U S C H R I S T**, ny plus vtile au public ; tendant au soulagement des pauvres familles nobles, & autres d'honeste condition, pour l'establissement de leurs filles ; qui est la chose la plus importante, & la plus delicate des Villes, & des Royaumes.

La question est, de trouuer les moyens de faire subsister cét Ordre estably pour les pauvres filles ; ce qui paroist d'autant plus difficile à la Prudence humaine ; qu'il n'est point permis aux Religieuses de cét Institut, de demander l'aumône, ny de faire des questes ; ny d'estre à charge en aucune façon, ou au public, ou au particulier. Comment donc faire subsister vne Communauté de filles, qui ne sont pas obligées d'auoir vne dot suffisante ? les coffres de la Prouidence Diuine sont inépuisables, & **D I E U** est fidelle dans ses promesses ; par lesquelles il s'est amoureusement obligé de faire subsister cét Ordre ; qui n'a esté commandé que par son commandement,

sous les auspices, & la protection de sa sainte Mere de Misericorde.

Neantmoins pour ne pas manquer aux regles de la Prudence, & ne sembler pas vouloir tenter DIEU; Nostre Fondateur, & ses filles, ont pourueu aux moyens de faire subsister leur Institut, dans la pureté de sa fin principale. Car premièrement, les Religieuses de la Misericorde ne doiuent s'establi^r que dans les meilleures Villes : en second lieu, elles doiuent auoir quelque fondation auant leur establissement ; troisièmement, elles ne refusent pas les filles riches, que la Diuine Prouidence leur enuoye, pourueu qu'elles soient bien appelées ; & ce secours, non plus que le precedent, ne leur a point encore manqué dans les Monasteres qu'elles ont dans les villes d'Aix, de Marseille, de Paris, & dans les autres Villes où elles subsistent avec honneur, & fleurissent avec progrès, & benediction. Mais le principal appuy de leur subsistance, est le profit qu'elles retirent du trauail manuel. Car comme dans le commun sentiment des Peres, la sainte Vierge apres l'Ascension de IESVS CHRIST, travailloit avec ses pauvres compagnes, & gaignoit sa vie par le trauail manuel : ce trauail est vn des principaux emplois des filles de la Misericorde ; pour suppléer par le gain qu'elles en reçoient, à l'insuffisance de la dot des pauvres filles qui sont receuës : & cette occupation du trauail leur est d'une telle importance, qu'elles y employent tout le temps qui leur reste apres leurs exercices de Religion, & de necessité. Mais cette obligation va encore plus loin : car quand mesme les maisons de cét Ordre seroient suffisamment rentées, pour pouuoir entretenir vn nombre precis de Religieuses sans nulle dot : elles ne seroient pas moins tenuës de travailler, pour imiter les actions de la Mere de Dieu ; & pour lors, le profit de leurs ouurages seroit distribué aux autres maisons du mesme Institut, qui en auroient besoin, ou au soulagement des pauvres Monasteres des autres Ordres, ou des Familles indigentes.

Je laisse aux Predicateurs qui parleront de cét Ordre, à publier les éloges que cét esprit du trauail luy rend propres, & singuliers. Car ils auront sujet de dire, que c'est l'Esprit de

Penitence, que Dieu a imposée à tous les hommes en la personne d'Adam; quand il le condamna de viure à la sueur de son visage: & que c'est l'esprit des premiers Religieux de l'Eglise, qui ne viuoient que du gain de leur trauail. Ils pourront adiouster, que c'est encore l'esprit du grand Apostre saint Paul, qui gaignoit sa vie, & celle de ses compagnons, par le trauail de ses mains; & qui exhortoit ses disciples à faire le mesme. Ils diront aussi avecque raison, que c'est vne vraye imitation de la Vie de saint Ioseph, & de la sainte Vierge: & la fidelle Pratique de cette belle, & illustre Maxime de IESVS-CHRIST, rapportée par le grand saint Paul, Qu'il est beaucoup plus noble de donner que de receuoir.

Je me contente de dire, que pour encourager les filles à travailler avec moins d'incommodité; le Fondateur par le consentement des Superieurs, a choisi vne regle fort douce, qui est celle de saint Augustin: & il adresse des Constitutions fort moderées, touchant la vie, le vestir, & le dormir; & mesme pris vn Office court, & facile à reciter; à sçauoir le petit Office de la sainte Vierge. Il est vray que la Closture & les Parloirs y sont tres seneres, & que l'on y obserue exactement l'exercice de l'Oraison, du silence & des autres Vertus religieuses: Mais ces pratiques leur sont absolument necessaires, pour l'accomplissement de leur dessein; puis qu'elles doiuent imiter la Vie que la Mere de Dieu a menée apres l'Ascension de son Fils; qui a esté sans nul doute tres retirée, éloignée de la frequentation des seculiers, & meslée d'action & de contemplation. Voila la fin, & l'employ des Religieuses de l'Ordre de Nostre Dame de Misericorde, que le Pere Yvan a instituée vne fin tres Chrestienne, & vn employ tout à fait Apostolique.



CHAPITRE XXIV.

Des Vertus que le Pere Tyan faisoit pratiquer aux premieres filles de sa Congregation.

I'Appelle l'assemblée des premieres filles de la Misericorde, du nom de Congregation ; parce que n'ayant pas encore obtenu des Superieurs les Prouisions necessaires pour faire les Vœux, & embrasser l'estat Religieux elles viuoient ensemble, portant mesme des habits seculiers : mais sous ces habits du siecle, leur Fondateur leur faisoit pratiquer les plus eminentes Vertus de la Religion. J'ay dit que la Reigle & les Constitutions de cet Ordre sont fort douces ; ouy presentement, que les Superieurs ont absolument voulu les moderer : mais elles estoient si austeres dans le commencement ; que ç'a esté vne grande merueille, comme ces pieuses filles ont eu le courage, & la force de continuer durant plusieurs années, vn genre de vie qui paroissoit plustost Angelique qu'humain, & plus conuenable à des esprits détachez de la matiere, qu'à de filles ieunes & delicates ; dont la pluspart estoient grandement foibles, & infirmes.

Aussi leur Fondateur ne cessoit-il iamais de les instruire ; & de les exhorter à l'estude de la Vertu. Il leur faisoit chaque iour des Conferences spirituelles de la plus éminente perfection ; & tant par ses discours, que par ses exemples, se feroient Directeur les animoit si puissamment, à se rendre de plus en plus agreables à D I E U, selon les desseins de sa diuine Prouidence ; que ces genereuses filles sembloient ne trouuer iamais assez à faite, ny à souffrir. Ainsi le ieusne, le cilice, le silence, la retraite, l'Oraison, le travail, & semblables exercices, que l'on ne pratique que de temps en temps, dans les Religions les plus reformees ; estoient continuels dans cette naissante Congregation des filles de la Misericorde.

Elles ne faisoient qu'un repas chaque iour, le matin enuiron

midy ; ne prenant le soir , que quelques morceaux de pain , & vn peu de frui&t les iours de Dimanche , & des grandes Fêtes ; encore ne mangeoient-elles pas le matin , autant qu'il leur auroit esté necessaire pour leur nourriture : car le desir d'imiter le ieufne , & l'abstinence qu'elles sçauoient que leur Confesseur auoit obserué toute sa vie ; les incitoit si puissamment à mortifier sans cesse leur goust ; qu'outres qu'elles prenoient fort peu d'alimens , elles mangeoient tres rarement de la chair , & se priuoient de viandes exquisés , & delicates , comme volaille , venaison , &c.

Parlant de la sobriété , & de l'abstinence de ces vertueuses filles ; je ne dois pas obmettre cét exemple qu'elles en donnerent. Vne personne de condition ayant donné charge à son seruiteur de porter vn present magnifique , de perdrix , de phaisans & autre venaison tres-delicate , & tres-exquisé , à vn grand Seigneur qui ne faisoit que d'arriuer dans la ville ; ce seruiteur n'ayant pas bien entendu ce commandement , porta ce present aux filles de la Misericorde , & les pria de la part de son maistre de l'accepter. La Superieure ayant regardé ce qu'il portoit , *Mon enfant* , luy dit elle , *ce present n'est pas pour nous : prenez garde que vostre maistre ne vous ait commandé de le porter ailleurs.* Ce seruiteur ayant répondu qu'il ne se trompoit point ; comme il s'opiniastra à soustenir que c'estoit à elles qu'on l'auoit enuoyée , la Superieure le renuoya avec le present , le faisant suiure par vne Tourriere ; pour remercier son maistre , & luy faire sçauoir que leur Profession ne leur permettoit pas de manger de ces sortes de viandes si cheres , & si delicates.

L'on ne sçauroit dire l'estonnement , & la surprise de celuy qui auoit mandé le present , d'vne rencontre si inopinée : car il ne sceut d'abord s'il deuoit se fâcher de la méprise de son seruiteur ; ou se réjoûir de la moderation des filles de la Misericorde : il fit pourtant l'vn , & l'autre ; il dit quelques paroles de colere à son seruiteur , & il en dit plusieurs à la loüange de ces vertueuses filles ; publiant par tout le grand exemple qu'elles luy auoient donné de leur temperance , & discretion. Mais il leur donna plus que de paroles ; car pour recompenser leur refus , (sans quoy il n'auroit pû gratifier le Seigneur qui estoit arriué)

il leur enuoya des beaux ornements pour la décoration de leur Chapelle, & le service de leur Autel. Outre que se rendant plus affectionné à ces filles, il leur rendit depuis mille bons offices : les ayant favorisées, & secouruës par plusieurs dons, & diuerfes gratifications. O qu'il est bien vray ce que le Fils de Dieu a promis dans son Euangile ! Que ceux qui laissent quelque chose pour son Amour, en reçoient le centuple dans cette vie mortelle, outre la recompense qu'ils doiuent en esperer dans le Ciel.

Nos pieuses filles se mottifioient encore en la quantité des aliments ; car ordinairement elles cessoient de manger, lors qu'ayant excité leur appetit, elles y prenoient plus de goust & plus de satisfaction. Ainsi pour l'ordinaire elles se retiroient de table avecque la faim, & leur ieusne estoit d'autât plus difficile à la Nature, & plus agreable à DIEU ; qu'estant toutes fort ieunes, & en vn aage qui exigeoit vne plus grande nourriture ; elles souffroient en cette rencontre vne tres rude penitence, par la faim continuelle dont elles estoient trauaillées. Mais quoy que la Nature se plaignit par des violences extrêmes, qui estoient accompagnées de tres rudes tentations ; toutesfois l'amour de la Penitence les rendoit si courageuses à souffrir ces attaques ; qu'elles les rejettoient comme vne foible & lasche suggestion de l'ennemy. Nous auons sceu ces choses de la bouche mesme du Pere Yvan, & des personnes dignes de foy, qui frequentoient nostre naissante Congregation ; si bien qu'il y en eut mesme, qui ayant eu desir de s'y engager ; ne l'oserent pas faire, craignant de n'estre pas assez fortes pour vn ieusne si rigoureux. Cela arriua particulièrement à vne ieune veuve de condition, & de grande Pieté ; qui touchée des exemples de Vertu qu'elle vid dans la façon de viure des filles de la Misericorde, eut de tres forts desirs d'estre receuë dans leur Congregation. Elle en fit la demande à nostre Fondateur ; mais elle en fut bien tost découragée : car dès la premiere fois qu'elle luy en fit la proposition ; *Je ne crois pas*, répondit ce seuer Directeur ; *que vous soyez assez forte pour mener la vie que vous desirez embrasser ; parce que nos filles (continua-t'il) ne regardent le manger, & le boire, que comme vne aspre peni-*

tence; & elles ne vont au Refectoir, que pour se mortifier, cessant de manger, quand elles ont meilleur appetit; & se leuent presque toujours de table avec la faim: Regardez, adjousta-t'il, si vous auriez le courage de faire de la sorte. Cette Dame m'a depuis auoué à moy-mesme, que ces réponses de nostre bon Pere l'auoient estonnée; de façon que ne se sentant pas assez forte, elle n'auoit pas osé perseuerer dans son dessein.

Il laisse les autres mortifications corporelles, les disciplines, les haires, les cilices, la dureté de leurs grabas, leurs genuflections, & semblables rigueurs que tiennent plus des forces de la Grace, que de celles de la Nature. Ces courageuses filles ne quittoient presque iamais leurs cilices, ou leurs haires; encore qu'elles fussent d'une tres tendre & delicate complexion. Les disciplines estoient si frequentes, qu'on les prenoit pour la penitence des moindres fautes, & des imperfections ordinaires; & elles estoient si rigoureuses, que les murailles estoient quelquefois toutes teintes de sang, que les coups faisoient rejaler de leurs corps: de sorte que le Pere Yvan leur Directeur, qui leur auoit suggeré cet esprit de penitence conforme au lieu, témoignoient souuent d'estre fasché contre-elles de leur innocente cruauté; & il auoit mesme de la peine de moderer leur ferveur.

Cependant ces rigueurs corporelles, & les infirmités qu'elles en receuoient, n'empeschoient point leur ardeur, & leur forte application au travail manuel: car elles s'y addonnoient avec toute la diligence possible, comme à un des points principaux de leur Congregation. Aussi ne perdoient-elles pas un seul moment; la recreation ne les en diuertissoit point, non pas mesme la priere: puisque quand elles auoient beaucoup de besogne à faire, elles abregeoient le temps de l'Oraison pour l'employer au travail; & souuent elles taschoient de faire l'un & l'autre, travaillant pendant l'heure de la meditation, mais à genoux; s'efforçant d'écouter la voix de DIEU dans leur interieur, tandis qu'elles s'occupaient exterieurement au travail; imitant les enfans d'Israël, qui apres leur retour de la captiuité de Babylone, tenoient d'une main leur espée nue contre les ennemis, & travailloient de l'autre à bastir la maison

du Seigneur. Ces bonnes filles veilloient bien souvent plusieurs heures la nuit, pour le mesme sujet, employant l'argent qu'elles retiroient du travail, à la subsistance des pauvres filles, qu'elles auoient receuës par charité dans leur Congregation; & quand il y en auoit de reste, elles le distribuoient à de pauvres familles honteuses.

Mais les mortifications d'esprit qu'elles pratiquoient étoient encore plus austeres que celles du corps; car elles faisoient trois heures d'Oraison chaque iour; c'est à sçauoir vne heure de matin, de quatre à cinq heures; vne autre le soir deuant la collation; & la troisième à minuit. Cette dernière leur estoit tresincommode; parce que ne pouuant se coucher qu'à neuf heures, & estant obligées de se leuer à quatre, elles ne pouuoient dormir que trois heures de suite; ce qui sans doute les incommodoit sensiblement, & particulierement dans le temps d'Hyuer.

Leur silence, & leur recueillement estoient continuels; car il ne leur estoit permis de proferer vne seule parole hors le temps de la recreation, que par vne pure necessité: & s'il arriuoit que quelqu'une y eust manqué, elle en auoit d'abord vne tresseuere correction. Il y auoit de plus sans interruption, vne de leur compagnie en retraite durant vingt quatre heures; apres quoy les autres suiuiroient à leur tour, & puis on recommençoit: comme si l'esprit de Dieu eut voulu leur faire imiter la conduite de Moïse, & de Josué, dans le desert, dont l'un leuoit les mains, & les yeux au Ciel, tandis que l'autre combattoit les Ennemis de son Peuple. Ainsi vne de ces filles estoit continuellement en prieres, eleuant son cœur, & ses mains à DIEU, tandis que ses sœurs travailloient par leurs diuers exercices, à establir les fondemens de leur Congregation: & pour rendre la retraite de nos filles plus vtile, en la rendant plus vniuerselle, & plus charitable; le Pere Yuan leur ordonnoit, de demander misericorde pour tous les hommes, de prier sans cesse pour la conuersion des Infideles, pour l'exaltation de la Foy, & particulierement pour ceux & celles qui persecutoient leur Congregation.

Je ne parle pas du zele avec lequel nostre ardant Directeur reprenoit

reprenoit leurs imperfections & defauts, ny de l'exacte fidelité qu'il en exigeoit. Les moindres fautes estoient reputées pour grandes, & châtiées par des rudes, & humiliantes mortifications. Ce seuer Confesseur ne laissoit rien d'impuny en ses Penitentes; desirant les rendre fortes & courageuses à souffrir toute sorte de mortification. & les dépouillant d'elles mesmes, les reuestir de I E S V S crucifié. Quoy encore? cét esprit de zele du Directeur se communiquant à ses filles, chacune d'entr'elles auoit grand soin, non-seulement de sa perfection, mais encore de celle de ses compagnes; se faisant mutuellement des corrections tres charitables, & tres fortes; & s'accusant avec sincerité & franchise les vnes les autres deuant la Superieure, de tous les defauts qu'elles auoient remarquez.

Mais quoy que le Pere Yvan les exhortast à la pratique de toutes les Vertus Chrestiennes & Religieuses conuenables à leur estat; il les exerçoit particulièrement dans la simplicité la soumission, l'abnegation interieure, la mort des sens, la pureté, & l'innocence: & ces obeïssantes filles estoient si fideles & si exactes à tout ce que ce bon Directeur leur ordonnoit, qu'elles viuoient comme des Anges, en sorte que leur maison sembloit vne Image du Paradis. Aussi le mesme Pere Yvan a t'il dit plusieurs fois, que durant quelques années il ne trouuoit presque point de matiere dans les Confessions des premieres filles de sa Congregation, pour leur donner l'absolution du Sacrement; si grande estoit la pureté, & la saincteté de leur vie.

L'Apostre saint Paul se glorifie avec les premiers Chrestiens, de ce qu'ils auoient les premices de l'Esprit de I E S V S-CHRIST; parce que cette prerogatiue d'estre des enfans de l'Eglise naissante, leur donnoit de grands auantages. En effet, ils estoient beaucoup plus parfaits dans la pratique des Vertus Euangeliques, plus puissans dans les merueilles qu'ils operoient, & ils semblent auoir eu plus de grace, que les autres Chrestiens qui les ont suiuy plusieurs siecles apres. Nous pouons faire la mesme remarque dans les fondations des Ordres Religieux, qui sont comme les Images de l'Eglise; où nous voyons que D I E U

semble auoir répandu plus de grace sur leurs premiers sujets, que sur ceux qui leur ont succédé. Aussi y trouuons-nous plus de ferueur dans le commencement, que dans la suite.

CHAPITRE XXV.

Confirmation des deux precedens Chapitres tirée des écrits du Pere Yvan.

POur plus grand éclaircissement, & plus grande confirmation des deux precedens Chapitres touchant la fin principale de l'Ordre des Religieuses de Nostre Dame de Misericorde, & la grande perfection que le Pere Yvan en exigeoit; j'ay creu deuoir inserer dans ce lieu ce que j'en ay trouué dans vn cayer des écrits du mesme Pere Yvan, composé par luy-mesme, écrit, & signé de sa propre main. Voicy doncques les propres termes de ce grand homme, par lesquels il declare quelle est la fin de son Institut, & la haute perfection qu'il exigeoit de ses Religieuses. Ses paroles sont fort simples, mais elles sont efficaces, & montrent clairement la plenitude de l'esprit de DIEU dont il estoit animé.

„ Tout le monde est plein de pauvres filles de toute sorte de
 „ condition, de noble, de mediocre, & de basse; qui à faute de
 „ moyens ne peuuent se marier, ny se faire Religieuses; ce qui
 „ est la cause que plusieurs se perdent, & font de grands maux
 „ dans l'Eglise. Tellement que qui pourroit enfermer de celles-
 „ là dans vn Cloistre, les plus beaux esprits, & les meilleurs iu-
 „ gemens, feroit vn grand plaisir à Dieu. S'il n'y a que les ri-
 „ ches qui se puissent marier, ou estre Religieuses, que doiuent
 „ deuenir les autres? faut-il les laisser perdre? Non. Mais tout
 „ le monde doit contribuer à faire cette grande misericorde, de
 „ sauuer la vie, & la pureté à tant de vierges.
 „ Ce qui est la cause que j'ay trouué bon pour la gloire de
 „ DIEU, & pour le salut de tant d'ames, d'éprouuer si DIEU
 „ voudroit cela, & que Magdeleine prit vne maison avec ses

compagnes, pour y viure ensemble, comme les pauvres filles “
 viuoient avec la Mere de D I E V, apres que son cher Fils fut “
 monté au Ciel, ou comme quand elle estoit au Temple, tra- “
 uillant pour gagner sa propre vie. “

Et auons trouué bon que si Dieu benissoit son entreprise, “
 elles fissent la charité aux pauvres filles de bonne volonté, & “
 bien appellées, de bon & entier iugement, & d'un sens sage, “
 venerable, & d'experience, sans regarder ny grande dot, ny “
 amis, ny faueur, ny richesses : mais l'esprit soumis, sage, & “
 obeïssant. Et qu'elles meinent ensemble vne vie d'amour, “
 humble, sage, venerable, chaste, modeste, conforme au pau- “
 ure estat de Nostre-Seigneur, & de sa Tres-sainte Mere : vne “
 vie de Paix, & d'exemple ; & toujours en la presence de D I E V “
 amoureuse, avec honneur, respect, crainte, comme les sept “
 Anges qui sont au Ciel, en la presence & deuant la face de “
 D I E V, & comme la Mere de D I E V, quand elle auoit le Ver- “
 be Diuin en son ventre, & viure en verité & fidelement deuant “
 D I E V, & tout le monde. “

Et qu'elles prennent la sainte Vierge Mere de Misericorde “
 pour Patrone, & Mere, & Superieure, & Fondatrice ; & pour “
 regle ses tres-saints Exemples, sa Vie pauvre & humble. Et “
 qu'elles fondent & establisent leur vie sur la façon de viure “
 que la Mere de D I E V exerçoit avec les pauvres filles qui “
 estoient avec elle, apres que son cher Fils fut monté au Ciel, “
 & en la vie Sainte que ces pauvres filles menoient avec la Mere “
 de D I E V ; à aimer, trauailler, souffrir, obeïr, patienter, “
 prier, & estre ainsi avec la Mere de D I E V comme elle, avec “
 honneur, crainte, amour, reuerence, respect, silence, simple, “
 des-apropriée, des-interessée, sans voir, ny esperer, ny desirer “
 ny vouloir chercher en tout que le seul bon plaisir de D I E V, & “
 de sa Mere, & qu'elles ne s'estudient qu'à imiter l'estat pur, “
 net, chaste, simple, innocent, humble, amoureux, pauvre, “
 caché, inconnu, prudent, souffrant, mortifié, & trauillant “
 de la Mere de D I E V. Et qu'elles tiennent pour leurs ri- “
 chesses, & souuerain bien, d'auoir cét estat, & suiure la Vie, “
 & l'Esprit de Nostre Seigneur, & de sa sainte Mere. “

Qu'elles vivent dans la presence continuelle de D I E V, “

„ avec vn grand amour , charité , honneur , respect , secours ,
 „ aide , & compassion d'une avec l'autre , comme des Anges.
 „ Qu'elles quittent tout à fait toutes affections des parens & au-
 „ tres creatures qui les puissent troubler , & oster la paix , & le
 „ repos de l'ame , & la presence de D I E U : Mais qu'elles s'ense-
 „ uelissent dans vn oubly de toutes les creatures , & de tout le
 „ passé , & aduenir , & se tiennent dans le present tout D I E U
 „ amoureux de nous. Qu'elles vivent en leurs corps comme si
 „ elles n'en auoient point , qu'elles disent leurs fautes , se confon-
 „ dent , & se facent honte deuant toutes , & soient tousiours pre-
 „ stes d'estre reprises , & corrigées de tous sans se iustifier , qu'el-
 „ les auancent tous les iours en l'estat pauvre , humble , & souf-
 „ frant , de Nostre Seigneur , qu'elles rejettent leur volonté , &
 „ tout ce que le monde aime , & n'embrassent que ce que Nostre-
 „ Seigneur & sa sainte Mere cherissent, &c.

Voilà vn échantillon de ce que le Pere Yvan exigeoit des filles de sa Congregation , écrit de sa propre main. Voicy le Vœu particulier qui comprend la fin de leur Institut ; Vœu qu'il fit faire aux huit premières de la Congregation, le iour & Feste de saint Michel, de l'année 1636. il est couché tout au long dans ses œuvres , écrit , daté , & signé de sa propre main, en ces termes :

*Le Vœu qu'ont fait pour tout iamaïs les pauvres filles de
 Mere de D I E U , Mere de Misericorde
 1636. iour de S. Michel.*

„ Nostre fondation est pour les pauvres filles , sur tout orphe-
 „ lines , de haute ou mediocre condition ; mais qui ne se peuuent
 „ iamaïs marier , ny se faire Religieuses pour estre pauvres , &
 „ n'auoir vne dot suffisante à cela , estant leurs maisons deuenues
 „ pauvres ; comme ces pauvres Demoiselles auxquelles saint
 „ Nicolas donna dequoy se loger. Et pourtant pour la plus gran-
 „ de gloire de la Tres-sainte Trinité , & pour son bon plaisir , &
 „ pour l'honneur & gloire de la Tres-sainte Mere de Misericor-
 „ de , & pour la réjouissance & honneur de saint Michel , saint
 „ Gabriel , tous les Seraphins & bien-heureux esprits , & pour
 „ saint Pierre & saint Paul , & tous les Apostres , & pour toute
 „ l'Eglise de D I E U Triomphante & Militante , & pour saint

Ioseph, saint Antoine, sainte Magdeleine, saint Fran-
 çois, saint Dominique, saint Bernard, saint Benoist, «
 saint Charles, saint Philippe, sainte Therese, sainte Ca-
 therine de Sienne, Job, Moïse, Elie, Jeremie, Abraham, «
 & toute la sainte Famille; faisons Vœu tres exprès à sa Di- «
 uine Majesté, & à sa sainte Mere, & nous le faisons toutes «
 pour tout iamais, & pour toutes celles qui seront receuës «
 au temps aduenir dans nostre Congregation, ou Ordre, d'ob- «
 seruer cette nôtre Fondation des pauvres filles, quand DIEU «
 nous aura donné vne maison, & que nous serons esta- «
 blies. Nous promettons aussi que nous n'aurons égard «
 qu'aux beaux & bons esprits, sages, meurs, posez, paissi- «
 bles, obeïssans, prudens, libres, dégagez, dénuez, & ca- «
 pables, suivant nos reglemens. Et que nous prendrons plû- «
 tost les pauvres, & celles qui sont en danger de leur salut, «
 que les riches, & celles qui sont en assurance; avec le peu «
 qu'elles auront, sans nous arrester à la dot, ny à amis, ny «
 à parens, ny à autres respects humains. La pauvre donnera «
 le peu qu'elle aura, & la riche donnera par aumosne ce qu'elle «
 aura, afin qu'elle soit receuë comme pauvre, & qu'elle «
 trauille pour gagner sa vie, à l'imitation de la Mere de «
 DIEU, & qu'elle demeure humble avec les pauvres filles «
 de la Mere de DIEU, selon la Fondation de cette Compa- «
 gnie de la Mere de Misericorde. Or les pauvres filles, & «
 particulièrement les honteuses, (c'est à dire celles qui sont «
 de condition, deuenuës pauvres) seront receuës com- «
 me les vrayes filles de cette Congregation ou Ordre, & les «
 compagnes de la Mere de DIEU; & les riches comme asso- «
 ciées & sœurs des pauvres. Or celles qui ont fait ce Vœu, «
 sont Magdeleine Martin, Anne Bon-temps, Magdeleine «
 Ferruel, Anne de Berenguier, Marguerite Taulani, Mar- «
 guerite, & Marie Peculier, & Claire Teissier. Témoin le «
 Pere Yvan de l'Oratoire de IESVS 1636. & le 29. de «
 Septembre, en la maison du Puis-neuf. «

Voilà le Vœu particulier que les filles de Nostre Dame de
 Misericorde firent au commencement de leur Congregation
 entre les mains du Pere Yvan leur Directeur. Je n'ay fait que

le transcrire des écrits du mesme Pere Yvan, sans y rien changer, sans aussi y rien adjoûter, ny retrancher.

J'ay encore creu à propos de transcrire du mesme cayer de ce deuot Ecclesiastique, & inserer en ce lieu le discours suiuant, qui nous fait voir quelle estoit la pureté d'intention, & l'vnion intime qu'il auoit avec DIEU; & celle qu'il exigeoit de ses filles.

*RESOLUTIONS, INTENTIONS, DESIRS,
Protestations & derniere Volonté des filles de la Mere de DIEU,
Mere de Misericorde, pour le bon plaisir de la sainte Trinité.*

„ **N**OUS n'auons, & ne voulons aucun bien, ny gloire, ny
 „ fin derniere, que la volonté, & bon plaisir de la sainte
 „ Trinité, & les souhaits & desirs de Nostre Seigneur crucifié,
 „ en son Pere, & en nous : ainsi que le soir de sa Passion il
 „ luy demanda. *Mon Pere, que tous soient vne mesme chose,*
 „ *comme vous; mon Pere, estes en moy, & ie suis en vous, de*
 „ *mesme qu'ils soient vne mesme chose en nous. Je leur ay don-*
 „ *né la clarté que vous m'avez donnée, qu'ils soient vne mesme*
 „ *chose, comme nous ne sommes qu'un; Je suis en vous, & vous*
 „ *en moy, qu'ils soient consommez en un.* Ainsi sont nos desirs
 „ pour le contentement de DIEU, & de sa Tres-sainte Mere,
 „ eternellement, inuiolablement, irreuocablement, en nous
 „ priuant de nos desirs, fins, volonte, estre, vie, cœur, &
 „ prenant en sa place tout l'estat & bon plaisir de DIEU, & la
 „ volonté de sa sainte Eglise Apostolique & Romaine. Et
 „ nous disons avec Nostre-Seigneur crucifié, *non mea volun-*
 „ *tas, &c.* & tant que pouuons par efficace de volonté & af-
 „ fection amoureuse; nous nous vnissons à la volonté Diuine,
 „ afin que nous ne soyons plus nous-mesmes, & ce qu'estions
 „ auparauant, mais toute la volonté de DIEU, & DIEU en
 „ DIEU, en nous deïfiant à l'imitation de l'vnion du Fils de
 „ DIEU avec le Pere, en laissant tout entierement nostre es-
 „ prit, & adherant tout pleinement & parfaitement à celuy
 „ de DIEU, pour ne sentir plus iamais nous mesmes, comme

n'estant plus en estre ny en nos volonte, mais perduës dans
 DIEV, & dans sa volonte. Et en nos desirs, œuures, &
 entreprises, nous ne voulons que le seul accomplissement
 de la volonte Diuine & de sa Mere, d'une telle sorte que ne
 voulons rien tant soit-il Sainct, de nostre volonte, ny par
 elle, ny en elle, mais de celle de DIEV; & par elle, & pour
 elle; & en elle faite la nostre, pour mieux faire tout,
 & son bon plaisir; par entiere resignation, conformité, ad-
 hesion à elle, la nostre dans la sienne; que l'une semble l'au-
 tre, que la sienne soit faite nostre, & la nostre transformée
 en la sienne: ainsi comme celle du Fils de DIEV avec celle
 de son Pere, & celle de la Mere, celle du Pere & de son
 Fils.

Et ainsi s'il se peut en nous, comme la Puissance & la Sa-
 gesse de DIEV ne sont qu'un, & comme la Justice & la Mis-
 ricorde ne sont qu'un DIEV, comme un vase d'eau jetté dans
 un tonneau de vin, tout est de la couleur du vin: ainsi desi-
 rons-nous faire cette conformité avec DIEV, par amour
 ardent, profonde humilité, prompte & ponctuelle obéis-
 sance, pureté d'intention, & par la presence continuelle
 amoureuse de DIEV.

CHAPITRE XXVI.

Le Pere Yvan est persecuté sur sa nouvelle Congregation.

NOstre Fondateur auoit un iuste sujet de se réjouir de sa
 nouvelle Congregation, considerant qu'après mille dif-
 ficultez, le commencement en estoit heureux, outre que les
 vertus éminentes qu'il voyoit pratiquer à ses filles, luy faisoient
 esperer que DIEV beniroit son entreprise, & la feroit heu-
 reusement reüssir à la plus grande gloire de son saint Nom:
 mais il ne tarda pas de preuuer ce que l'esprit de DIEV nous
 enseigne par la bouche du Sage, que la joye est suivie de la dou-
 leur; car ce fut pour lors qu'il commença d'estre plus sensible-

ment affligé , & de souffrir de plus terribles persecutions.

Il y eut d'abord vn murmure presque vniuersel dans toute la ville , contre cette nouuelle Congregation ; comme lors que sainte Therese voulut establir le premier Monastere de la Re-forme , dans la ville d'Auila en Espagne. Chacun en parloit selon son sentiment ; mais vn sentiment injurieux à l'œuvre de DIEU , parce que on ne le regardoit que selon la prudence humaine , les maximes de la Politique du monde ; ainsi les vns disoient que c'estoit vne extrauagance de ces filles , de vouloir viure comme des Religieuses Reformées , estant encore dans le siecle : les autres les accusoient de superbe , & de presumption ; disant qu'elles n'entreprenoient vne vie extraordinaire , que pour se faire estimer dauantage. Ceux cy demandoient de quel Ordre elles faisoient profession , & de quel nom on deuoit les appeller ; adjoustant qu'on les verroit bien tost changer de resolution , & de façon de vie , & qu'elles ne tarderoient pas d'estre vn objet de risée , & de moquerie à tout le monde. Tous blâmoient principalement nostre bon Pere , de ce que prenant le soin de diriger ces filles , il leur permettoit vn genre de vie qui caufoit tant de bruit , & tant de murmure.

Mais le Demon ne se contente pas de faire attaquer la reputation des filles de la Misericorde , par des paroles de blâme & de mépris , il fait inquieter leur personnes par outrages. Car quand elles sortent de leur maison pour assister à la Messe , parce qu'elles sont voilées , & qu'estant profondement recueillies en la presence de DIEU , elles se comportent avec vne modestie Angelique ; au lieu du bon exemple , & de l'edification que l'on en deuroit receuoir , plusieurs témoignent en estre scandalisez , & leur font mille affronts par les ruës ; iusques à leur dire les dernieres injures , & bien souuent les arrester mesme par leur robe , & leur oster leur voile avec opprobre pour les faire rougir de confusion. Le mépris avecque nos patientes filles sont traittées va mesme auant , que les petits enfans à l'imitation de ce qu'ils voyent faire à ceux qui sont plus auancées en aage , courent après elles avec des cris & des paroles

paroles outrageuses , comme si elles estoient des folles , ou des personnes publiquement scandaleuses.

Outre cette persecution generale , ces vertueuses personnes en souffrent encore de particulieres : Car tous leurs parens & leurs amis s'empressoient fort à leur donner des aduis , qui ne tendoient qu'à les détourner de leur pieux dessein. Et ainsi que ne leur dit-on pas ; pour leur faire quitter ce qu'elles ont entrepris , sous pretexte de leur donner de charitables conseils ? Qu'elles sont la fable de la Ville , & la risée des compagnies ; que leurs parens en crient , & que leurs amis en sont sensiblement affligés. Il n'y a pas mesme iusques aux Prestres , & aux Religieux qui ne se messent de les inquieter , leur apportant mille raisons , les vns à bonne intétion , les autres par enuie pour les distraire de leur nouvelle Congregation. Enfin , tous s'efforcent de leur persuader que leur dessein est vne tentation du Demon ; qu'elles sont trompées par leur Directeur ; que leur entreprise ne réussira iamaïs ; & qu'elles sont obligées en conscience de tout quitter , pour faire cesser les murmures dont elles sont cause , & ne pas s'exposer davantage aux illusions de l'esprit de mensonge.

Mais ces genereuses filles ne sont pas attaquées en leur honneur , & en leur esprit seulement. Elles souffrent beaucoup d'incommoditez corporelles , en ce que la persecution est cause qu'elles manquent de ce qui est necessaire à leur subsistance. Vne partie des personnes qui composent nostre Congregation est de pauvres filles que le Pere Yvan a receuës par charité ; & les autres qui pouuoient auoir vn honeste entretien de leur maison , n'osent s'adresser à leurs parens , à cause qu'elles demeurent contre leur gré dans cette nouvelle Societé. Outre que la ville d'Aix estant pour lors trauaillée d'une grande disete qui rehaussa extraordinairement le prix des dārées , ce leur fut vn nouveau surcroy de peine dans leur indigence , ne receuant d'ailleurs presque aucun secours , parce que la calomnie faisoit qu'elles estoient abandonnées de tout le monde.

Cependant nostre bon Ecclesiastique se trouue le princi-

pal but de toute cette persecution : c'est contre luy particulièrement que l'on forme des plaintes, comme celuy que l'on connoit l'Autheur de tout le desordre; ainsi appelloit-on la nouvelle Congregation. Les libertins prennent de là occasion de se moquer de luy, & de le mépriser. Les sages du monde l'accusent de tromperie, & d'illusion; disant qu'il agit selon son esprit, & non pas selon les regles de la prudence; & qu'il fait plus d'estat de son opinion, que du sentiment de ceux qu'il deuroit consulter; diray-je que mesme par vn secret iugement du Seigneur, les plus vertueux se laissant emporter au sentiment de la multitude, se declarent contre nostre bon Pere, & le blasment de temerité & d'imprudence, de commencer vne affaire qui à leur aduis ne réussira iamais; mais qui, selon qu'ils en iugent, échoüera avecque la honte & la confusion de ses Autheurs.

Mais de plus ceux-là mesme qui auoient porté nostre Fondateur à entreprendre cét œuure, changeant de sentiment, par vn Ordre inconnu de la Prouidence adorable, se bandent aussi contre luy, desaduotant ce qu'ils ont approuué, & s'efforçant de détruire ce qu'ils ont aidé à bastir. Il semble que le Seigneur se plaist d'exercer la vertu de nostre bon Prestre, permettant qu'il soit persecuté, & presque accablé de toutes parts. Car il est contraint de répondre à tous, & pour soy, & pour ses filles; & lors mesme qu'il auroit plus de besoin d'estre consolé, & conforté, il est obligé de consoler & de conforter les autres, & de les encourager, tant par ses paroles, que par ses exemples. Mais la plus grande affliction consiste à voir que ses filles n'ont pas tout ce qui estoit necessaire à leur subsistance; sans pouuoir les secourir, & sans oser leur procurer du soulagement par soy-mesme, ny par autrui: parce qu'il ne veut estre onereux à aucun, ny permettre aussi qu'elles soient à charge à personne; de peur qu'on ne le blasme d'interest, & que l'on ne croye qu'il a entrepris la Congregation pour quelque profit temporel. Il est vray qu'il se sert de cette occasion, pour mieux exercer la confiance de ses filles, & connoistre luy-mesme les soins que la Diuine Prouidence en auroit; disant touïours que si D I E U est Autheur de cette Con-

gregation , il la feroit subſiſter ; ſi non , qu'il eſt bien-aiſe qu'elle ſoit diſſipée.

Ce n'eſt pas pourtant encores la plus grande croix. Les afflictions domeſtiques ſont beaucoup plus ſenſibles que les eſtrangères ; auſſi la plus rude perſecution que noſtre bon Preſtre reſſent en cette rencontre , conſiſte en ce que ſes Collegues n'approuuant pas ſon deſſein , trauaillent autant qu'ils peuuent ſur ſon eſprit pour l'en deſtourner , & y mettre de l'empêchement. Ils aggrauent le bruit que ſon entrepriſe excitoit contre ſa reputation ; ils exagerent les plaintes & les murmures de toute la ville : & pour le toucher du coſté de la conſcience , ils luy propoſent le tort que cela fait à la maiſon où il demeure , adiouſtant encore pour l'intimider , qu'eſtant d'un corps , il ne doit pas agir ſans le conſeil & le conſentement des autres membres ; que Dieu ne benira pas ſes œuvres , parce qu'il ſe rend particulier ; qu'il eſt meſme de mauuiſe édification dans la compagnie ; parce qu'eſtant diuertie ailleurs , il ne peut pas bien en garder les Conſtitutions , ny en faire exactement les exercices.

Enfin l'on ne pourroit iamais raconter les peines & les travaux que noſtre imitateur , à l'exemple de ſon diuin Maïſtre a endurez dans le commencement de ſa Congregation , les meſpris qu'il a eſſuyez , les iniures qu'on luy a faites , les raille-ries , & médiſances dont on l'a noircy , ny les rebuts , oppoſitions , & contrarietez qu'il luy falut ſurmonter. Si ſa vertu & celle de ſes filles eſtoit vne Image de la vie des premiers Chreſtiens ; ne pouuons-nous pas dire que les contradictions qu'il ſouffroit auoient du rapport aux perſecutions de l'Egliſe naiſſante ? Auſſi cét excellent Eccleſiaſtique imitoit il , & faiſoit il imiter à ſes penitentes la force , l'humilité , & les autres perfections de ces premiers ſoldats de I E S U S C H R I S T ; car ſans former nulle plainte , ny témoigner aucune impatience des diuerſes perſecutions qu'il ſouffroit , il mettoit tout ſon appuy , & toute la conſolation de ſes filles à biégarder le ſilence à ſ'humilier profondement , à endurer avec patience , & avec confiance en D I E U , & en la ſainte Vierge , à verſer des larmes , &

CHAPITRE XXVII.

*Le Demon fait la guerre au Pere Yvan, & aux filles de la
Misericorde.*

L Ous quel'Apostre Saint Paul nous enseigne que nous
n'auons pas guerre contre la chair, & le monde seule-
ment, mais encore contre les Demons, qu'il appelle les Prin-
ces des tenebres; il veut nous apprendre que les persecutions
que le Demon fait par soy mesme, sont beaucoup plus à crain-
dre, & plus difficiles à surmonter, que celles qu'il suscite par
l'ignorance, ou par la malice des hommes. Nostre genereux
Ecclesiastique a souffert de toutes ces façons en sa personne,
& en celle des filles de Nostre-Dame de Misericorde: car le
Demon connoissant que tous les mépris, iniures & contradi-
ctions qu'il auoit suscitées contre luy, & contre sa Congrega-
tion ne pouuoient le décourager, ny le faire desister de son en-
treprise, qu'aucontraire il en deuenoit plus fort, & plus cou-
rageux; cét ennemy dis-je, se mit luy-mesme sur le rang, & luy
liura vne horrible guerre en la personne de ses filles, tant par
des tentations interieures, que par des illusions, & appari-
tions effroyables.

Premierement ce malin esprit trouua à troubler nos ver-
tueuses filles par des suggestions interieures, obscurcissant
leur esprit par mille tentations, & s'efforçant de leur persua-
der par ses ruses, de quitter le dessein qu'elles auoient entre-
pris d'establir vne nouuelle Congregation, pour y receuoir de
pauures filles. Et ainſi les molestant sans cesse; *A quoy pen-
sez-vous? leur disoit-il, que faites-vous icy? c'est bien a vous
de commencer un nouuel Institut dans l'Eglise de Dieu, comme
si vous auiez de grands moyens, & de puissants appuis, ou que
vous fussiez de grandes saintes. C'est vne temerité, & vne*

foiblesse d'esprit, qui vous a icy assemblées. N'est-ce pas tenter Dieu, que d'entreprendre des choses impossibles ? voulez-vous qu'il face des miracles, pour vous protéger contre les murmures de tout le monde, & contre les oppositions sans nombre que l'on vous fait : & que l'on vous fera dorenavant ? quittez tout, & retirez-vous dans vos maisons, pour éviter la honte & la confusion que vous allez souffrir dans l'eschouement de vostre dessein. Vous suivez les avis du Pere Yvan vostre Directeur. C'est un bon homme, desja vieux, qui vous fait entreprendre des choses, qui ne pourront jamais réussir. Et cependant il vous expose aux mépris, & aux iniures de tout le monde.

Ce n'est qu'une partie des tentations que le tout puissant permettoit à l'Ange des tenebres, de suggerer aux servantes de la Sainte Vierge, pour les éprouver, & pour les épurer. Aussi ces genereuses personnes souffroient-elles beaucoup par cette sorte de tentations, qui estoient tres-violentes & continuelles, en sorte qu'elles ne les laissoient presque jamais en repos. Et ce qui augmentoit leurs peines, c'estoit qu'elles n'osoient les decouvrir au bon Pere Yvan, de peur de le decourager, parce qu'elles sçauoient qu'il estoit d'autre part assez travaillé par les persecutions du dehors, & qu'il ne manquoit pas aussi de sentir de fâcheuses, & rudes tentations dans son interieur.

C'estoit une seconde ruse du Demon plus dangereuse que la premiere, parce qu'elle la fortifioit ; priuant ces filles des forces, & des moyens qu'elles auroient receu de leur Directeur, en luy decourant leurs tentations. Aussi cet esprit de tenebres, qui est contraint de s'enfuyr, dès que ses ruses sont decouvertes, s'efforce t'il autant qu'il peut de se tenir caché, empeschant sous des pretextes specieux que l'on ne declare, ses ruses aux personnes qui les connoissant, n'ignorent pas les moyens convenables pour les surmonter.

Mais nostre Fondateur sceut les peines de ses filles par une autre voye plus assurée ; le Seigneur les luy ayant reuelées, lors qu'elles n'osoient les luy manifester. Et ainsi decourant leurs tentations avant qu'elles luy en parlassent : *Filles, leur disoit-il de temps en temps, il faut avoir bon courage, & ne*

vous laisser pas de combattre contre les assauts du Demon : ce malin esprit fait tous ses efforts pour nous troubler, & pour détruire l'œuvre de DIEU : Mais le Seigneur nous aidera, & fera reussir en son temps le dessein qu'il nous a inspiré. Ayons recours aux prieres de la Sainte Vierge nostre Mere de Misericorde, & mettant toute nostre confiance en sa bonté, abandonnons-nous entierement à sa protection toute puissante. Ces paroles de nostre bon Prestre faisoient vne impression merueilleuse dans l'esprit de nos filles : car elles dissipoiēt leurs tentations, les fortifioient, & les rendoient inuincibles contre les assauts de l'ennemy.

Cela n'estoit encore que le commencement de la guerre; car le Demon ne pouuant rien gagner dans l'interieur des filles, les attaque au dehors. Il excite la nuit, & mesme pendant le iour des bruits horribles, & épouuantables en diuers endroits de la maison. Il remuē parfois toute la batterie de la cuisine, & les meubles des chambres, ensorte qu'il semble que toutes ces choses doiuent estre brisées en mille pieces. D'autresfois il sembloit secouer les murs, & vouloir renuerser la maison pour les écraser sous les ruines. Il vſa encore d'autres ruses pour épouuenter ces pauvres innocentes, tantost il mugit comme vn taureau, parfois il rugit comme vn Lion, bien souuent il siffle comme vn Serpent, d'autresfois il hannist comme vn cheual échappé, & represente les cris, & les hurlemens de plusieurs autres furieux animaux. Parfois aussi il se plaignoit & lamentoit comme vne personne grandement affligée. Et souuent il frappoit à la porte de leurs chambres, & contrefaisoit la voix des sœurs pour les éveiller, & les faire leuer, comme si c'eust esté l'heure de l'Oraison, & aussi tost qu'elles estoient leuées, il excitoit de nouveaux bruits pour leur faire connoistre qu'elles s'estoient trompées, & pour les inquieter dauantage.

La malice de cēt ennemy passa encore plus auant : car il ne se contenta pas de les effrayer par l'ouye; il s'efforça encore de les épouuenter par les yeux, prenant diuerses formes horribles, & se faisant voir sous des figures épouuantables, tantost d'vn cheual fougueux qui ruoit furieusement, tan-

toft d'un Serpent qui iettoit son venin, tantost d'un Centaure, moitié homme, & moitié cheual, prenant beaucoup d'autres figures si hideuses, qu'il est impossible de pouvoir les représenter. Que l'on ne demande pas si ces pauvres filles estoient saisies de frayeur. Il n'y a que DIEU qui sçache les apprehensions, les troubles, & les peines qu'elles souffrirent au commencement de ces furieuses attaques; mais le Seigneur, & sa Sainte Mere ne tarderent pas de les fortifier: outre que leur Directeur, qui ne cessoit de travailler pour leur conseruation avec des soins, & des tendresses de Pere, les visitant châce iour, les exhortant, & les assistant de ses prieres, les rendit en peu de temps si courageuses, qu'elles ne s'émouuoient nullement de toutes ces allarmes, ainsi elles continuoient leurs exercices avec la mesme assurance, & la mesme tranquillité qu'auparavant. Enfin elles deuinrent si fortes, & si courageuses par le secours de la grace, & l'appuy de leur Confesseur, qu'elles se rioient des astuces du Demon, l'accusant mesme de foiblesse, de ne pas pouvoir par tous les efforts, & toutes les ruses de sa malice, vaincre de ieunes filles, non pas mesme troubler leur repos.

Le Lecteur sera peutestre bien aise d'apprendre quelques apparitions particulieres de ce mal-heureux, qui prend toute sorte de formes, sans pouvoir reprendre la bonne, dont sa superbe l'a dépouillé. L'en d'écriray donc quelques vnes, dont on a particulièrement gardé le souuenir, & que j'ay apprises du Pere Yvan, & des personnes à qui elles sont arriuées.

Vne de nos filles passant vn iour sur le tard par vne petite allée pour se retirer dans sa chambre, vid le long de cette allée vn corps mort étendu; mais vn mort laid, difforme & horrible à voir: comme la fille estoit recueillie en son interieur, & presque absorbée en la presence de DIEU; elle regarda simplement ce mort, sans faire autre reflexion, si ce n'est qu'elle sentit ie ne sçay quelle horreur, & extreme repugnance contre ce fantôme, qui tira ces paroles de sa bouche: *O le vilain mort, o que ce mort est hideux & difforme!* Ainsi sans s'étonner ny s'effrayer dauantage, elle continua son chemin, lors qu'une autre fille des premieres de la Congregation, passant par la

mesme allée , & apperceuant ce cadaure , se prit d'abord à crier de frayeur : mais s'estant remise vn peu apres , & fortifiée par la presence de sa compagnie , qui l'entendant crier , s'estoit arrestée ; elle reconnut que c'estoit vne illusion du Demon , laquelle se dissipa dès qu'elles eurent recours à DIEU , & à la Sainte Vierge , & qu'elles formerent le signe de la Sainte Croix.

Vne autrefois cét esprit de mensonge parut sous la forme d'un Serpent extraordinairement difforme & épouventable : car outre qu'il estoit d'une grosseur prodigieuse , il auoit vne couleur noire avec des taches rouges & jaunastres , on y voyoit plusieurs pattes à la façon des lesards , la teste horriblement hideuse , & la gueule beante , iettant vne écume liuide. Cét horrible Serpent parut donc à la mesme fille , & s'approchant d'elle , lors qu'elle lauoit les vases de la cuisine , il tâchoit de luy faire peur , pour l'obliger à quitter sa besoigne , avant qu'elle l'eust acheuée , la détourner de l'action d'humilité & d'obeyssance qu'elle pratiquoit , & la faire manquer au commandement qu'elle auoit receu de sa Supérieure.

Mais la fille ayant aussi tost discerné l'astuce du Demon , le méprisa & continua sa besoigne avec la mesme tranquillité qu'auparauant , ne s'en mettant non plus en peine , que quand il luy auoit paru sous la forme de mort. Le Serpent monta par trois fois sur l'euiet où elle lauoit , & s'approcha de ses mains comme s'il eust deu les deuorer : mais tout autant de fois il fut repoussé par vne main inuisible , & contraint de descendre à terre. Cependant l'autre sœur qui auoit eu aussi l'illusion du mort , estant entrée dans la cuisine pour aduertir sa Compagne , qu'il estoit desia tard , vid cét horrible Serpent , & croyant que la sœur ne s'en fut pas encore apperceuë ; parce qu'elle ne paroissoit nullement auoir peur ; & poussant vn grand cry : *Ah ma sœur* , dit elle , *Ostes-vous de là , venez & courez promptement , ne voyez vous pas cét horrible Serpent , qui s'appoche de vous* , pardonnez-moy , *ma sœur* , repondit-elle d'un ton ferme & assuré , *ie l'ay desia veu , mais ie l'ay veu sans frayeur , & en effet que me peut-il faire , puisque DIEU est avecque moy ?* *Le m'apperois bien qu'il voudroit me détourner ;*
mais

mais ie ne laisseray pas d'acheuer ma besoigne. Approchez-vous vous mesme pour m'ayder. Il ne faut pas seulement que nous prenions garde à cette vilaine beste.

La seconde fille qui auoit apperceu le Serpent , ne fut pas assez fortifiée par la réponse de sa sœur : au contraire son apprehension croissant à mesure qu'elle regardoit cét hideux animal , & ne pouuant pas en éloigner sa Compagne ; elle remonte promptement les degrez , & en aduertit la Supérieure , & les autres sœurs. Dieu voulut sans doute que toutes ces filles fussent témoins des embusches du Demon en cette rencontre , pour les discerner ; & qu'elles connussent sa foiblesse pour ne pas l'apprehender à l'aduenir. La Supérieure ne fut pas plustost descenduë , que sans témoigner aucune crainte , elle s'approcha du Serpent pour le tuer. Son exemple encourageant ses filles , chacune s'arma , qui de pierres , qui d'une paële , qui de bastons : toutes se ruerent sur le Serpent , & le frapperent , en sorte qu'elles luy donnerent plus de mille coups sans toutesfois le pouuoir tuer.

Enfin elles eurent recours à la priere , & aussi-tost elles virent sortir du corps de ce Serpent , comme vn papillon noir , ou vne chauuesouris qui s'éuanouït. Le corps du Serpent demeura mort sur le pavé , rendant vne puanteur horrible ; on le ietta dans la rue : mais la place où il estoit mort , demeura tachée de certaines marques noires , & vilaines , qui donnoient de l'horreur , & que l'on ne pût effacer de plusieurs mois , quelque soin que l'on prist chaque iour de lauer & frotter cette place. Il me semble que ces marques prouuoient que cette apparition n'estoit pas vne pure illusion : mais que le Demon auoit apporté ce Serpent , & s'estoit mis en son corps , pour infecter la maison de nos vertueuses filles , ou du moins pour les troubler , & leur faire peur , s'il en eust eu le pouuoir. Mais leur foy , & leurs autres vertus , rendirent vains & inutiles tous ses efforts.

Il parut vne troisième fois en la forme d'une Guenon , dans la chambre d'une fille qui estoit malade. Il fit en entrant mille singeries pour l'amuser , & la distraire de la presence de **DIAB** : mais voyant qu'elle le méprisoit , il feignit vouloir

tout renuerſer , & meſme de mal-traitter la malade , l'eſprit du SEIGNEVR , qui ne manque iamais au beſoin , fortifia ſa ſervante contre ce perfide ennemy. Et ainſi non ſeulement , elle n'eut aucune peur ; mais le prenant par vne de ſes pates , lors qu'il les portoit ſur le liſt , & ſe ſentant ſur l'heure meſme reueſtuë d'une puiſſance extraordinaire pour le chaſtier , elle le battit de tout ſon pouuoir.

Il eſt certain que cette fille foible & malade , ne pouuoit pas d'elle meſme faire grand mal à ce malin , neantmoins coſuperbe crioit , & hurloit horriblement , ſe pleignant comme ſ'il euſt viuent ſenti les coups que cette fille luy donnoit , ou qu'il y euſt eu quelque puiſſante main , qui appesantiſt celle de la creature infirme. Elle le tint fort long-temps de la ſorte , ne ceſſant de le battre , & de le maudire , iuſques à ce qu'elle ſe ſentit inspirée de le laſcher , & à meſme temps cét animal diſparut.

Le bon Pere Yvan apprenant ces choſes par le rapport des filles à qui elles arriuoient , & de celles qui en eſtoient témoins , ne pouuoit contenir ſa ioye , ny ſa reconnoiſſance enuers D I E U , & la Sainte Vierge , du courage & de la force de ces genereuſes filles naturellement foibles & timides. Auſſi que ne leur diſoit il pas pour les encourager de plus en plus , & les porter à ſe tenir touſiours préparées par l'humilité , la pénitence , & les autres vertus , qui ſont les ſeules armes que le Demon apprehende. Et quant à la dernière qui luy racontoit les coups qu'elle auoit donnés à cét ennemy reueſtu de la forme d'une guenon : *Que ne l'attachiez-vous , luy dit-il , pour luy faire plus grande honte & conſuſion ?* Mon Pere , répondit la fille , avec grande ſimplicité , *je vous aſſeure que ſ'il retourne , ie l'attacheray comme un voleur.* Il ſemble que cét orgueilleux eut peur de cette menace , comme luy eſtant fort iniurieufe : car il ne parut plus ſi ordinairement ſous des formes hideuſes. Mais il eut recours à d'autres ruſes , qui firent bien de la peine à noſtre Fondateur , & aux filles de ſa Congregation.

CHAPITRE XXVIII.

Autres illusions du Demon

QUOY que le Demon voulust se déguiser pour dece-
 uoir nos innocentes filles, lors qu'il se monstroît à elles
 sous les formes dont nous auons parlé, de mort, de Serpent,
 & de guenon; ne pouuons-nous pas dire que DIEU, permet-
 toit qu'il parust sous ces figures pour les faire connoître, puis-
 que ce sont de naïfues marques de sa malignité, & des cara-
 cteres de sa pernicieuse conduite. Il parut en mort: N'est-il
 pas le premier mort du monde, & mort d'une mort eternelle,
 par la perte de la grace, & de la gloire; & celuy qui a introduit
 la mort sur la terre en insinuant le peché? Il parut aussi sous la
 forme de Serpent: ç'a esté la premiere figure que DIEU luy
 permit de prendre; pour nous signifier par icelle les replis de
 ses ruses, & le venin de sa cruauté. Il parut la troisième fois
 sous la forme d'une guenon: c'est ainsi que les Saints Peres
 appellent cet ennemy; parce que dès le commencement du
 monde, il s'est continuellement efforcé d'imiter les œuvres
 de DIEU, ainsi que la guenon tasche de contrefaire les actions
 des hommes. Ie ne m'estonne donc pas s'il fut si tost reconnu
 par nos filles, puis qu'il portoit les liurées de sa malice.

Aussi cet infame changea-t'il de batterie, recourant à la
 violence, & à des astuces plus subtiles. Il s'estudioit à les mo-
 lester, leur causant mille sujets d'inquietude. Il fraploit tres-
 souuent aux portes pour les distraire du trauail, sous pretexte
 d'aller voir ce que c'estoit, leur donnant matiere d'impatien-
 ce, en ce qu'elles ne trouuoient personne qui eust heurté. Il
 les éveilloit la nuict auant l'heure de l'Oraison; les aduertis-
 sant comme si elle estoit desia passée, si bien que souuent ces
 innocentes filles se leuoient, connoissant apres qu'elles auoient
 esté trompées. Il souffloit les chandelles & les lampes quand
 elles alloient en quelque lieu obscur. Quelquesfois mesme il

les leurostoit des mains, & les iettoit en des lieux, où l'on auoit de la peine à les trouuer. Parfois encore les surprenant, lors qu'elles montoient ou descendoient les degres, ou qu'elles entroient dans quelques chambres, il se presentoit tout à coup à elles sous diuerſes formes pour les épouuanter, ou les distraire de leur recueillement. Il arriuoit meſme qu'il les frappoit rudement, le Seigneur le permettant ainſi pour la perfection de ſes ſeruantſes. Vne des premieres filles de Noſtre Congregation appellée Anne de Berenguier, de laquelle nous auons parlé dans les Chapitres precedens, eſtant en Oraïſon vit entrer vn Demon dans la chambre, qui allant & venant par diuerſes fois s'eſſorçoit de distraire les filles de leur priere par les troubles qu'il tâcha d'exciter dans leurs eſprits, elle luy dit hardiment, *méchante beſte que fais-tu icy ? penſes-tu*, répondit ce malin eſprit, *que ce ſoit pour toy, n'y en a-t'il pas d'autres ?* Elle ne repartit point, mais formant le ſigne de la Sainte Croix ſur ſoy, & inuoquant le nom du Seigneur, elle le contraignit de ſe retirer. Deux ou trois iours apres cét ennemy vint ſe mettre ſur la teſte de la meſme fille en forme de crapau, de maniere qu'elle en ſentoit vne tres grande douleur : ſa patience fut neantmoins ſi forte que ſans s'eſſrayer, ny ſe plaindre, elle la ſupporta avec vne ſinguliere vertu. Le Demon pour rendre la douleur plus ſenſible, ſe mit dans ſon oreille en forme d'vn Scorpion ; la fille ne ſ'en émeut point : mais aucontraire comme inſultant à cét aduerſaire, & tirant de la gloire de la perſecution qu'elle en receuoit, ie marqueray maintenant, dit-elle, vne ſeconde mortification. A ces paroles le Demon ſ'enfuit, & la fille ſe trouua non ſeulement deliurée du mal qu'elle ſouffroit ; mais remplie des conſolations diuines, dont Dieu recompense les travaux de ſes fideles épouſes. Cela arriua l'année 1643. dans le mois de Noüembre, ainſi que le Pere Yvan l'a remarqué luy-meſme dans les memoires qu'il a faites, & écrites de ſa propre main, des choſes extraordinaires arriuées dans la Fondation de ſon Inſtitut. C'eſt de ces memoires particulierement que i'ay tiré la pluſpart de ce que i'ay deſſus raconté, & de ce que ie rapporteray dans la ſuite.

Le second Dimanche de l'Aduent de la mesme année à trois heures du matin, vn Demon en forme d'vn homme, grand, gros & terrible vint attaquer vne de nos genereuses filles; vñant de menaces épouuantables, comme s'il eust voulu tout exterminer: mais la fille s'armant du signe de la Sainte Croix, & de la confiance en D I E U, le méprisa & le contraignit à disparoistre. Le mesme iour entre huit & neuf heures du soir la mesme fille fut attaquée par vne armée de malins esprits, qui prenant la forme de soldats cruels & desesperes, la faisoient comme si elle eust esté criminelle & coupable de tous les suplices de l'Enfer; & la tourmenterent avec tant de rage, qu'elle croyoit que ces ennemis alloient la traîner dans les abysses. Dans cét estat, l'innocente fille priuée de tout appuy des creatures, & abandonnée mesme du secours du Ciel, ce luy sembloit, crioit *misericorde*, de toutes les forces, *helas* disoit-elle en se pleignant, *mon doux Sauueur, le sçay que & se crois que vous estes, n'ya-t'il point de misericorde pour moy*, elle fit plusieurs semblables exclamations, qui marquoient les peines qu'elle sentoit. Cela se passa en la presence des autres filles qui estoient en Oraison avec elle; qui neant moins n'entendirent que de profonds soupirs qu'elle pouffoit continuellement: d'où le Pere Yvan adioust dans ses memoires, que la fille estant deliurée de ce combat ne sçauoit si elle l'auoit souffert, *sine in corpore, sine extra corpus*.

Le Lundy (poursuit le mesme Pere) à trois heures du matin, cette troupe infernale vint assaillir nostre patiente fille avec tant de violence, que la saisissant par le col, on luy faisoit ietter la langue hors de la bouche. La fille creut de mourir dans le martyre qu'elle souffroit; si bien qu'interieurement elle faisoit des actes de Foy & de Contrition; elle disoit, *In manus tuas*, & semblables prieres; tandis que les Demons la battoient, & la chargeoient de coups, hurlans & crians, *maintenant nous auons licence, nous ne te laisserons pas en repos*. Ce n'estoit pas pourtant le plus rude tourment de cette genereuse fille, qui se confiant en D I E U, se mocquoit des attaques du Demon, & profitoit de leur cruauté pour exercer la patience, & la resignation; mais il sembloit que le bon D I E U pour la faire me-

riter davantage augmentoit sa peine , luy ostant toute sorte de grace sensible , & la priuant de toute perceptible assistance ; en telle sorte qu'elle ne sentoit plus en soy que la seule foy , accompagnée de troubles de tenebres , de crainte , & d'effrays espouvantables dans son interieur. Neantmoins **D**IEU la rendit victorieuse par sa grace ; & cette troupe ennemie fut contrainte de se retirer avec confusion , ne pouuant rien gagner sur cette constante & fidelle fille.

Vne autre fille ne découurant pas son interieur avec sincerité à sa Supérieure , Dieu permit que le Demon la troubla si fort qu'elle sembloit en estre possédée ; il y eut mesme plus que du trouble : car cét ennemy la saisissant par le col la serra en telle sorte qu'elle se prit à crier , *on m'estrange on m'estrange* , Vne de ses Compagnes auoit veu auparauant le Demon s'approcher d'elle , comme la voulant estrangler ; mais craignant d'estre trompée , elle ne s'en estoit point émeuë , iusques à ce qu'oyant crier , elle accourut , & iettant de l'eau benite sur la patiente , elle contraignit le Demon à se retirer : mais avec des menaces , & des iniures , disant , *méchante , tu m'empeschas , mais tu la payeras*. Cét ennemy changea de batterie , & ne pouuant estrangler cette fille , il la tenta de s'estrangler elle-mesme , d'une maniere si violente que la fille succombant à la tentation , fut sur le point de l'exécuter ; sans que le Seigneur l'en destourna par vne voye merueilleuse. En mesmo temps qu'elle estoit sollicitée à s'estrangler , vne de ses sœurs en eut la connoissance dans l'Oraison , & vit mesme que le Demon luy donna vne corde pour effectuer ce pernicieux dessein ; si bien que se leuant promptement , & accourant à elle toute effrayée ! *Ah ma sœur* , s'écria-t'elle , *à quoy pensez-vous ? il est vray* répondit la fille , *que ie suis horriblement tentée de m'estrangler & i'estois resoluë de le faire si vous ne fussiez accouruë pour m'en détourner*. En mesme temps vint vne autre fille , qui auoit eu la mesme connoissance de cette tentation , & qui luy fit aussi vne tres-serieuse correction de sa lascheté & foiblesse à ne pas resister à cét ennemy : puis la tentation continuant , on luy pendit au col vne Croix d'argent , garnie de saintes Reliques , & entre autres du bois de

la sainte Croix, le Demon sollicita fortement à la fille de ietter cette Croix, luy disant que c'estoient des fausses Reliques, neantmoins comme elle persista à la tenir, l'aduersaire chassé par la vertu de ces pieuses Reliques se retira, & la fille fut deliurée de la tentation.

Nostre bon Prestre souffroit sans mesure la violence de cette persecution, comme ressentant dans son cœur toutes les peines que ses filles enduroient en leurs corps, & en leur esprit. Il ne cessoit de les fortifier par ses paroles, & par ses prieres, se servant mesme des moyens que l'Eglise a ordonnés contre ce Serpent infernal. Car outre qu'il les munissoit de saintes Reliques, d'Agnus, d'eau benite, d'images de la Sainte Vierge, & particulièrement de petits lambeaux de quelque linge qui auoit seruy au Saint Sacrement de l'Autel, il auoit encore attaché à toutes les portes, & aux volets des fenestres, vn petit sachet plein de ces choses benites. Le succez en monstroït la vertu; parce que le Demon en estoit affoibly, & on éprouuoit sans cesse l'efficace de ces mesmes choses, contre ses ruses, & ses efforts, s'en servant pour faire cesser ses bruits, pour luy résister, & pour le chasser honteusement.

CHAPITRE XXIX.

Suite du mesme suiet.

SAINT Iean Chrysostome comparant le Demon à vn chien, qui ne bouge d'auprès d'vne table, quād on luy iette quelque morceau, & qui s'éloigne quād on ne luy donne rien; nous exhorte de tout refuser à la tentation. C'est le conseil que le Pere Yvan faisoit pratiquer à ses filles, qui, bien loin d'accorder quelque chose au Demon, en se relaschant, ou deuenant timides, se rendoient tousiours plus fidelles, & plus courageuses; iusques là qu'elles en faisoient parfois la matiere de leur recreation.

Il est vray que cet ennemy en augmentoit sa cholere, & donnoit pour lors de plus grandes marques de sa furie, selon que

DIEU le luy permettoit. En effet vn iournos filles estant assemblées pour la recreation, l'vne d'icelles presenta vn Catechisme où estoit l'image d'un Demon dépeint d'une façon tres hideuse. Cette peinture leur seruit de sujet de diuertissement: car comme si elles eussent voulu se vanger des persecutions de cét ennemy sur son Portraict, chacune luy dit mille iniures, & mille paroles de mépris. L'vne luy faisoit des reproches de la gloire qu'il auoit perduë par sa superbe; l'autre le blasmoit de presumption d'auoir osé se rebeller contre son Souuerain. Cette cy l'appelloit le pere de mensonge, & le plus grand de tous les menteurs, qui ne promettoit que pour tromper. Celle là blâmoit sa lâcheté, & sa foiblesse, d'attaquer des filles infirmes, & ne pouuoir pas resister à l'eau benite, aux Images, & aux autres choses, dont elles se seruoient. Il n'y en eut pas vne qui ne luy donna des marques de sa haine, & de son mépris. Enfin pour luy faire plus grand dépit, dès paroles elles vinrent aux coups: car prenant des épingles en leurs mains, chacune à son tour picqua cette image du Demon par plusieurs fois, le chargeant à chaque coup d'une iniure, ou d'une imprecation particuliere.

Que les Superbes ont de la peine de souffrir le mépris? le Demon ne peut supporter celuy qu'on faisoit à son image: car comme les filles continuoient à se mocquer de luy, tout à coup la maison sembla tremousser, & à mesme temps elles entendirent vn bruit, & vn fracas extraordinaire dans l'estage, qui estoit au dessous d'elles. La Superieure enuoya aussi tost pour voir s'il y auoit quelque chose de rompu, & on trouua que le Demon par la permission diuine auoit brisé en mille pieces plusieurs beaux vases qu'on leur auoit donnés pour l'embellissement de leur Autel.

Le Demon esperoit que cette perte feroit repentir les filles des iniures qu'elles luy auoient dites, & des mépris qu'elles luy auoient faits: mais il arriua tout le contraire; car elles augmentèrent leur haine, & redoublerent leur mespris contre cét orgueilleux, l'accusans de lâcheté de s'estre vangé sur des choses si fragiles, & d'impieté d'auoir osé rompre des vases destinés au seruice Diuin. Le Pere Yvan ne sceut pas plustost co
qui

qui estoit arriué, qu'il en témoigna de la ioye; loüant ses filles de ce qu'elles auoient fait contre le Demon, & les encourageant de continuer contre luy leur haine, & leur mépris. Il dit encore que cette perte leur seroit auantageuse, & qu'il prioit le Seign. de chastier l'arrogance de cét insolent, adjoustant qu'il luy en feroit des reproches au iour du iugement vniuersel.

Vne autre fois la sœur Marie des Sçrains, de qui nous auons parlé, s'entretenant avec la Superieure de ces diuers tumultes du Demon, assura qu'elle n'en auoit aucune peur, & qu'elle se mocquoit de son impuissance. A mesme temps le Demon parut sous la forme d'une teste d'Asne tres-hideuse, la bouche beante, comme s'il eust voulu l'engloutir, poussant de plus vn souffle tres-fort, & tres puant. La fille fremit d'abord, mais aussi tost elle se remit. Cependant le Demon prenant de là occasion de se vanger d'elle : *Tu as donc peur*, luy dit-il, *& tu es vne menteuse d'asseurer le contraire.* La fille sans s'émouuoir. *Je ne serois pas sage*, répondit elle hardiment, *si ie n'auois peur d'un fol & d'un furieux* Et en suite se seruant avec la Superieure qui estoit presente, de l'eau benite, & faisant le signe de la Croix, elle fit disparoistre ce monstre.

I'adiousteray encore deux apparitions de cét obstiné, l'une sous les habits d'une des filles de la maison, & l'autre sous la figure du Pere Yvan. La premiere arriüée à sœur Marie Peculier, & la seconde à sœur N. deux filles de la Congregation, dont nous auons desia parlé.

Marie Peculier estoit malade dans vn liét depuis plusieurs mois; elle souffroit son mal qui estoit extrême, avec vne parfaite resignation, sans témoigner autre desir que de faire penitence de ses pechez, & de se rendre conforme aux souffrances de Iesus Christ: il n'y auoit qu'une seule pensée qui pouuoit luy donner quelque sujet d'inquietude, & d'impatience; c'est à sçauoir la crainte d'estre à charge à la maison, & le regret de causer de l'incommodité à ses sœurs. Le Demon s'estoit souuent efforcé de luy imprimer ces apprehensions pour la troubler: mais n'en ayant pas peu venir à bout, il eut enfin recours à vne illusion extraordinaire.

Comme vn iour Marguerite la garde, & sœur de nostre malade, estoit fort occupée ailleurs, en sorte qu'elle ne la pouuoit venir voir de quelques heures; le Demon prenant sa forme & sa figure, entre dans la chambre de l'infirmes, se presente à elle; & au lieu des paroles de douceur & de consolation que Marie auoit accoustumé d'ouyr de sa sœur; ce méchant commence à la gronder brusquement, à murmurer contre elle, & luy dire mille paroles fâcheuses, luy reprochant [qu'elle estoit trop long temps malade, qu'elle ruinoit la Communauté, que les sœurs ne la pouuoient plus souffrir, que la Supérieure se plaint de la trop grande dépence qu'elle cause, & qu'elle mesme comme sa sœur souffre beaucoup de mépris, & de reproche à son occasion.]

Nostre patiente fille fut fort estonnée de ce discours si peu attendu; neantmoins comme elle auoit contracté de fortes habitudes à s'humilier en tout, & à recevoir toutes choses de la main du Seigneur, elle ne se troubla point, & repondit de cette sorte avec grande tranquillité d'esprit [Ma sœur, il faut que vous ayez patience & moy aussi. Il est vray que ie suis grandement à charge à la maison, & nos sœurs auroient grand fuit de me congedier, comme estant tres imparfaite, & de mauuais exemple: mais ie sçay qu'elles sont tres-bonnes, & tres charitables: mais ie suis bien fâchée que vous souffriez à mon occasion: mais j'espere que DIEU, & la Sainte Vierge vous en recompenseront, ainsi que ie les prie de tout mon cœur.]

Le Demon ne pouuant souffrir l'humilité ny les autres vertus que nostre malade faisoit paroistre, la laissa brusquement, & sortit de la chambre sans se découurir; ce qui estonna encore dauantage nostre pauvre infirme, qui n'auoit iamais rien veu, ny ouy de semblable de sa bonne sœur. Neantmoins quoy que le Demon voulust se cacher, DIEU permit toutesfois pour le repos de la malade, que la Supérieure le découurit, car l'ayant rencontré comme il sortoit de la chambre de Marie, & l'ayant reconnu, *d'où viens-tu méchante* luy dit-elle; sans se troubler, *Je viens*, repartit ce mal-heureux, *de tenter cete mandite*, mais *te n'ay rien peu gagner sur elle*; apres quoy il disparut.

La Supérieure ayant accoustumé de ne faire nul conte du Demon, ny de ses ruses, méprisa pour lors ce qu'elle auoit veu & ouy, & n'entra point dans la chambre de nostre infirme pour s'informer de sa tentation. Mais elle le sentit bien-tost apres, quand la sœur de Marie vint la visiter. Car l'ayant saluée avec des paroles de tendresse & de consolation; la malade remarquant ce pretendu changement: *ma sœur*, luy dit elle, *vous voila bien changée depuis tantost, maintenant vous estes gayer, & vous me consolez, & tantost vous esties triste, & chagrine, de telle sorte que vous auez failly à me desoler par vos reproches. Je pense, repartit Marguerite, que vous auez eu quelque réuerie, ou que vous vous mocquez de moy: car ie n'ay rien fait de tout ce que vous dites. Et n'estes vous pas venue icy, continua la malade, il y a enuiron deux heures, & ne m'auiez-vous pas fait mille reproches, & apres auoir ouy ce que ie vous ay répondu, ne m'auiez-vous pas quittée avecque precipitation? Ah ma sœur,* repliqua Marguerite, en s'estonnant: *le vous assure que ie ne suis point entrée dans vostre chambre à l'heure que vous dites, & que pour lors i'estois tres-occupée ailleurs par l'Ordre de Nostre Reuerende Mere; dequoy toutes nos sœurs, si vous voulez rendront un fidelle témoignage.* Comme elles s'entretenoient sur cette matiere, la Supérieure entra; qui apres auoir ouy le sujet de leur discours, racontant ce qu'elle auoit veu, & ouy du Demon, & remarquant l'heure, découurit euidentement l'illusion. L'on ne scauroit exprimer quelle fut la ioye de nostre genereuse malade, & les remerciements, qu'elle fit à D I E U, de ce que par sa grace, elle auoit resisté à cette ruse de l'ennemy. Toutes les sœurs de la Congregation en donnerent aussi loüange au Seigneur, & à la Sainte Mere; & cette occasion les anima puissamment à veiller sans cesse sur toutes leurs actions, & à se tenir tousiours dans la crainte, de peur d'estre surprises.

L'illusion qui arriua a vne autre fille de nostre Congregation fut presque semblable à la precedente. Cette fille estoit aussi griefuement malade, & on auoit de la peine à la remettre; parce qu'elle estoit tres-difficile à prendre les remedes, & mesme les boüillons. Le seul Pere Yvan pouuoit tout sur elle, par

son autorité, & par sa presence : ce fut aussi en quoy le Demon l'attaqua pour la troubler, & pour luy oster l'estime, & l'amour qu'elle auoit pour son Confesseur.


Vn iour doncques que nostre bon Pere estoit fort occupé hors de la Congregation de ses filles; le Demon prenant sa figure entra dans la chambre de cette malade, qui ne connoissant pas la tromperie de cet ennemy, le receut avec ioye, & le salua à son ordinaire, avecque grand respect; mais sa ioye fut bien tost changée en tristesse; parce que ce trompeur luy répondit d'un ton aigre, & d'une mine seuer, & dédaigneuse, de maniere qu'il témoigna qu'il estoit fâché, & en cholere contre elle. La fille qui croyoit que ce fust veritablement son Confesseur, fort estonnée de ce procédé, voulut s'informer de son chagrin & de sa fâcherie; si bien qu'elle l'appella fort respectueusement par diuerses fois, le priant de s'approcher, & de luy dire quelque parole: Mais le perfide continuant sa ruse, se promena encores quelque temps dans la chambre sans répondre; comme vne personne fâchée, feignant de ne tenir nul compte de la malade, & mesme de l'auoir en tres-grand mépris.

On ne scauroit exprimer quelle fut la confusion, la tristesse, & l'inquietude de nostre pauvre infirme; quelle fut sa crainte d'auoir fait ou dit quelque chose, qui eut irrité son Confesseur, & quel fut son regret d'auoir donné quelque mauuais exemple à ses sœurs, dont le rapport l'eut rendu si chagrin, & de si mauuaise humeur: enfin elle eut vn tres-grand travail d'esprit; craignant que ce ne fust vne marque de la cholere de Dieu contre elle, en punition de quelque peché, qu'elle eut fait, & qu'elle ne connut pas. Nous pouuons dire que cette innocente fille souffrit vn espee de martyre, iusques à l'arrivée du veritable Pere Yvan.

Ce bon Pere entrant dans sa chambre, s'approcha de son lit, pour la consoler, à son accoustumée; mais il fut vn peu surpris, de ce qu'aussi-tost que la malade l'apperceut, comme elle estoit fort ieune, & fort simple, pour donner des marques de son déplaisir, elle se tourna de l'autre costé. Le Pere Yvan qui connoissoit la simplicité de cette ieune personne; *Ma fille,*

luy dit il, *Je pense que tu es faschée contre moy : ouy mon Pere,* répondit la fille fort ingenuëment, *ie suis grandement faschée contre vous. Et que i'ay-ie fait?* poursuivit-il : *vous le sçavez bien, adiousta-t'elle, avec quel mépris vous m'avez traitée ce matin. Vous estes cause que i'ay eu mille tentations, & que peut-estre i'ay bien offensé DIEU : Tu réues fille, ou tu as réué,* repartit le Pere : *car d'aujourd'huy ie ne suis entré dans ta chambre, & i'ay esté si occupé, que mesme ie n'en ay pas eu le loisir.* Elle croyoit au commencement que le Pere disoit ces paroles pour adoucir son esprit ; mais oyant qu'il les repetoit serieusement, & que la Superieure, & les sœurs témoignoient le mesme ; s'estant remise du costé du Pere, apres luy auoir demandé pardon ; elle luy raconta ce qui luy estoit arriué. On reconnut d'abord l'illusion du Demon ; si bien que la fille en fut consolée, & le bon Pere la fortifia pour le temps aduenir contre de semblables tentations. Le Lecteur pourra voir ce que le bon Pere Yvan raconte de cette guerre des Demons dans le Liure de ses Lettres, que nous auons fait imprimer : où il en parle en diuers endroits, & particulierement en la 82. en laquelle il décrit plusieurs attaques de ces ennemis, contre les filles de sa Congregation.

Cette guerre ouuerte du Demon contre le Pere Yvan, & contre ses filles, dura enuiron cinq années, c'est à sçauoir depuis 1633. iusques à 1638. ; pendant lesquelles ce cruel ennemy leur fit souffrir des peines, & des maux innombrables ; mais enfin le tout se termina à la confusion de l'Enfer, au contentement du bon Pere, à l'aduancement des filles de la Misericorde, & à l'heureux progrès de leur Congregation.



CHAPITRE XXX.

D'une fille possédée par le Demon, & delivrée par le Pere Yvan.

VN puissant ennemy est tousiours à craindre quand il assiege vne ville, encore qu'il n'en ayt que le dehors : mais il est particulièrement redoutable ; lors que s'estant rendu le Maistre des portes, il entre dans la place pour en prendre la possession. Les filles de la Misericorde estoient comme assiégées dans leur petite Congregation par les Demons : cela les tenoit dans vne crainte salutaire ; quoy que les aduersaires ne peussent les attaquer que par le dehors, par des bruits, de illusions, & par d'autres ruses exterieures : mais leur crainte augmenta de beaucoup, lors que pour leur instruction, & pour monstrier le pouuoir de nostre Fondateur ; le tout puissant permit qu'une fille de leur maison fut possédée par vn esprit malin.

Ce n'estoit pas vne des filles que la Sainte Vierge auoit appellées, & que le Pere Yvan auoit receuës pour les premieres de son Ordre ; car elles estoient des Amazones spirituelles que la grace & la fidelité rendoient victorieuses de tous les assauts de l'ennemy : mais ce malheur arriua à vne pauvre fille, que l'on auoit prise en qualité de seruante, pour les choses qu'il falloit achepter, ou faire hors de la maison, qui ayant eu vne education vicieuse ; & n'ayant aussi iamais fait que l'office de seruante, auoit contracté dans le siecle de tres-mauuaises habitudes.

DIEU luy auoit fait vne grande grace, de l'employer au seruice d'une si sainte maison, que celle des filles de nostre Dame de Misericorde, où elle pouuoit s'amender de ses fautes, & acquerir la vertu par les instructions, qu'on luy donnoit sans cesse, & par les bons exemples qu'elle y voyoit continuellement. Mais comme il y a des estomachs cacochimes, qui changent les meilleures viandes en corruption ; cette seruante

au lieu de profiter des moyens, qu'elle auoit pour sa sanctification, en abusa, & se rendit plus méchante pour n'auoir jamais voulu aduoüer ses fautes avecque sincérité, ny en receuoir humblement la correction.

Celuy qui hayt la correction, hayt son salut, dit le Sage, & Saint Augustin adioust, que DIEU ne peut détruire le peché dans nos ames, lors que nous nous en rendons nous mesmes les Protecteurs, par l'obstination, en le continuant, ou par mensonge, ne voulant pas l'aduouër. C'estoit le malheur de nostre infortunée creature: car elle se laissoit aller à beaucoup d'imperfections; mais la plus grande, & celle qui luy causoit de plus grands dommages, consistoit en ce qu'elle ne s'en accusoit jamais dans les humiliations, ny dans les redditions de compte de son ame qu'elle faisoit à sa Supérieure: elle ne vouloit pas mesme qu'on y prist garde; & ce qui estoit en elle de plus criminel, & de plus pernicieux; c'est qu'elle nioit absolument toutes les fautes qu'elle auoit faites, pour ne souffrir la honte, & la confusion d'en estre reprise.

Sa Supérieure l'auoit souuent aduertie avecque douceur, & charité, qu'elle se corrigeast de ses fautes; & particulièrement de la méchante coustume qu'elle auoit de mentir, & de nier impudemment ses fautes, quand on la reprenoit: la menaçant que DIEU la puniroit mesme dans cette vie de quelque chastiment exemplaire, si elle différoit plus long temps à se corriger. Le bon Pere Yvan y auoit aussi employé son zele; usant encore de grandes menaces de la cholere de DIEU, & de la terreur de ses iugemens, si elle ne s'amendoit de ses mauuaises habitudes.

Mais toutes ces choses n'estant pas assez puissantes pour la conuertir, comme elle continuoit de mentir, & de nier ses défauts, quand on la vouloit corriger: DIEU la chastia exemplairement de cette façon. Elle coucha vn soir à terre, par dépit de quelque mortification qu'elle auoit receüe; la Supérieure l'ayant sceu par reuelation, la fit appeller, & luy demanda simplement, *pourquoy est-ce qu'ayant vn liét, elle auoit couché à terre, se mettant en danger de deuenir malade, adioustant qu'elle la conturoit de dire le vray, & de ne point men-*

21. Cette mal-heureuse nia impudemment sa faute, assurant qu'elle n'auoit point couché à terre. *Prenez garde*, luy dit la Supérieure *vous n'estes pas veritable, DIEU vous punira.* Cette menace eut d'abord son effect: car comme la fille s'opiniastroit à soustenir le mensonge qu'elle auoit dit; l'esprit de mensonge entra dans son corps, & la posseda.

Aussi tost le Demon se prenant à crier par la bouche de cette miserable creature, *Les menteurs*, dit-il, *sont à moy: l'ay empire sur ceux qui sont ennemis de la verité.* En mesme temps cette fille fut horrible à voir, & à entendre, par les gestes, & les grimasses épouuantables qu'elle fit, & par les horribles blasphemes qu'elle proféra. Le Pere Yvan qui veilloit iour & nuict sur son petit troupeau, comme vn fidelle Pasteur, fut inspiré d'y venir à cette heure là: Il vid d'abord, & ouït les extrauagances de cette personne, de maniere qu'il connut qu'elle estoit possédée. Il ne fit pas semblant neantmoins de s'en estonner, ny de s'en mettre beaucoup en peine: mais ayant commandé à ses filles de prier *DIU*, & la Sainte Vietge pour la deliurance de la possédée: Il se mit aussi en prieres: apres quoy il employa les moyens, dont l'Eglise a accoustumé de se seruir en semblables rencôntres.

DIEU permit que le Demon se rendist opiniastre, & ne quitast la possédée qu'apres deux iours. Cepédant l'on ne sçauoit dire les maux, dont elle fut tourmentée, & en son corps & en son esprit: comme nous ne sçaurions raconter les soins, & les peines extraordinaires de nostre charitable Prestre, pour le soulagement de cette mal-heureuse. Ce fut vn trait de la Prouidence Diuine, d'auoir voulu que cette fille ne fust pas d'abord deliurée; mais qu'elle fust possédée durant ces deux iours: afin qu'on eust loisir de iustifier la possession, par les signes que l'on remarqua durant ce temps-là, & afin que les filles de la Misericorde qui en estoient témoins, pussent mieux considerer l'estat deplorable d'vne ame dans le peché mortel; par celuy d'vne creature possédée par le Demon; & preuoir avec quelle rigueur, la Iustice Diuine punit les grands crimes dans l'Enfer, puis qu'elle chastie avec tant de seuerité les moindres fautes, mesme dans cette vie.

On

On remarque cette sage conduite du Seigneur dans l'establisement de ses Loix ; que sa Iustice en a puny les moindres transgressions , avecque grande rigueur dans le commencement ; chastiant les Auteurs par des vengeances exemplaires , & imprimant aussi la crainte de son nom dans les autres , pour leur monstrier l'importance de ses Commandemens , & les leur faire fidellement obseruer , par le chastiment rigoureux des personnes , qui les premieres auoient osé les violer. Ainsi nous lisons dans le Pentatuque de Moyse , que pour intimider les Israélites , & les rendre fidelles à l'obseruation de la Loy , Dieu fit lapider vn homme , pour auoir ramassé du bois le iour du Sabbath ; quoy que sa faute parust en quelque façon legere & pardonnable. Ainsi dans les Actes des Apostres , Saint Pierre fit mourir Ananias , & Saphira , mary , & femme pour les punir du mensonge , qu'ils auoient soustenu , touchant le prix de leur champ. Ce qui donna vne sainte terreur à tous les Chrestiens de la primitiue Eglise , & les confirma dans leur deuoir.

Il semble aussi que la punition de cette fille , supposé son peché , estoit necessaire pour la plus grande perfection , de la Congregation naissante des filles de nostre Dame de Misericorde : car il falloit leur faire garder avec fidelité les constitutions , que le Pere Yvan leur auoit données ; il estoit encore important qu'elles eussent grande foy , respect , & soumission enuers celle que la Sainte Vierge auoit establie pour tenir sa place , & pour estre à son nom , leur premiere Mere , & Supérieure : & enfin il estoit absolument necessaire qu'elles marchassent en verité , & eussent horreur du mensonge. Elles pratiquoient desia toutes ces vertus : mais il n'est pas croyable combien la punition de leur seruante , les encouragea & les fortifia à perseuerer constamment , & à ne iamais relascher

Cependant le Demon , preuoyant qu'il seroit bien tost contraint de sortir avecque confusion par les exorcismes de la Sainte Eglise , & par la vertu du Pere Yvan , auquel il ne pouoit plus resister ; voulut s'en aller par vne autre voye , qui auroit esté scandaleuse & preiudiciable à nos vertueuses filles. Si bien qu'il persuada à la possedée de se tuer elle-mesme , en

se precipitant dutoict de la maison dans la ruë. Cette miserable succombant à la tentation, estoit desia montée au plus haut des degrez; & desia pour executer son mauuais dessein, elle commençoit à descendre par vne fenestre qui donnoit sur le toict, lors qu'elle en fut destournée par vne voye merueilleuse.

L'esprit de DIEU fit voir à la Superieure pour lors malade, l'intention de la possédée, le lieu où elle estoit, & le prochain danger auquel elle s'alloit exposer: de sorte qu'estant épouuantee par cette reuelation, elle appella d'abort ses sœurs; & leur ayant raconté ce qui se passoit, leur commanda de courir promptement, pour retirer la possédée de l'extrême danger où elle estoit. Elles trouuerent que cette miserable s'estant desia aduancée sur le toict, estoit sur le point de se precipiter; mais elles remarquerent aussi qu'il y auoit quelque chose qui sembloit la retenir, & la détourner de ce peril, à mesure que le Demon la sollicitoit plus puissamment: parce qu'elles virent que tantost elle s'auançoit, & tantost elle reculoit. On attribua cette protection à son bon Ange, ou à l'Ange tutelaire de la Congregation; en effet dès que les sœurs l'eurent apperceuë, elles l'appellerent fort doucement, si bien que par leurs persuasions elles la firent retourner sur les degrez; où en mesme temps elles s'en saisirent, & la ramenerent dans sa chambre. Cét accident les obligea de l'enfermer, & ne luy plus donner la liberté de sortir; iusques à ce que nostre Fondateur par ses prieres, & exorcismes ayant contraint le Demon de la quitter, elle fut congediée de la maison, & remise entre les mains de ses parens.

Le Demon, dit l'Euangile, estant chassé de sa maison s'en va dans les lieux deserts & arides pour y chercher le repos qu'il ne peut trouuer: c'est à dire selon quelques Interpretes qu'estant chassé des cœurs des mauuais Chrestiens, il se retire parmy les Iuifs & Infideles, qui sont comme des terres incultes n'estant pas cultiuées par la parole de DIEU, ny arrosées des eaux de nos Sacremens. Il semble que cet ennemy fit tout le contraire dans nostre naissante Congregation: car ayant abandonné cette fille imparfaite, dont

nous venons de parler , il attaqua vne autre fille de nostre societé : mais vne fille d'une tres solide vertu , & d'une singuliere perfection appellée Marie Peculier qui deceda quelques années apres en odeur de sainteté.

Cette fille fut tentée par le Demon d'une maniere semblable à la precedente ; c'est à sçavoir de se tuer , & Dieu permit que la tentation fut si violente que cette pauvre innocente en fut dans vn trouble extraordinaire ; de telle sorte que son imagination estant comme blessée , & sa raison mesme presque interdite , elle ne sçauoit bonnement s'il falloit consentir à la tentation ou la reietter , & particulierement vn matin qu'elle deuoit pétrir dans la cuisine. L'assistante de la maison connoissant par inspiration le trouble de cette fille luy donna vne compagne , qui eut ordre de se tenir aupres d'elle , & de ne la point laisser seule , iusques à ce qu'ayant pétry , elle reuint dans la chambre avec ses sœurs. Le Demon eut peur ce semble , de la presence de cette autre fille ; car la tentation relascha , tandis qu'elle se tint aupres : mais ayant esté contrainte de s'éloigner pour fort peu de temps par quelque vrgente necessité , tandis que Marie pétrissoit , l'ennemy , redoubla son attaque , non seulement par ses suggestions interieures , mais encore par l'occasion qu'il en fournit à l'exterieur ; car presentant vn couteau à la fille , *tiens* , luy dit-il , *voila vn couteau , tu es toy maintenant que tu es seule & qu'il n'y a personne pour te détourner.*

La fille troublée par l'illusion du dehors & par les angoisses de son interieur , se trouua dans vn peril euident ; lors que nostre Seigneur qui ne manque iamais aux siens dans le besoin , la deliura par vne voye tout à fait admirable . Au mesme instant que le Demon sous la forme d'un homme venerable presentoit vn couteau à la fille qui pétrissoit , l'assistante qui auoit connu son trouble par inspiration , estant pour lors couchée dans son lit en vne chambre au dessus de la cuisine , & encore profondement endormie , se mit à crier , *Marie, Marie , venez vite, vite, quittez tout , & courez promptement.* Ce fut vne merueille qu'elle profera ces paroles en criant sans s'écueillir ; si bien que par vne autre merueille ,

Marie qui pétrissoit dans vn lieu assez esloigné , les ayant ouyes distinctement quitta sa paste à l'heure mesme, & monta dans la chambre de l'assistante pour sçauoir ce qu'elle demandoit . Elle fut estonnée de la trouuer encore dans vn profond sommeil ; mais son estonnement s'accrut bien dauantage, lors qu'apres l'auoir éueillée , luy ayant demandé , *ma soeur , qu'est-ce qu'il vous plait , m'ayant appelée avec tant d'empressement ?* l'autre luy répondant comme si elle eust esté presente à ce qui s'estoit passé dans la cuisine , *belas ! pauvre fille*, luy dit elle, *& que vouliez vous faire ? quoy vous tuer comme vne desesperée ? pourquoy écoutez vous cette horrible tentation ? que n'avez-vous fait le signe de la Croix , & inuqué l'assistance Diuine , quand ce maudit vous a présenté vn couteau.* Elle adiousta quelques autres paroles fort pressantes , qui firent connoistre à la fille le venin de la tentation , dont elle estoit trauaillée, la fortifierent pour résister avec plus de force , & enfin la deliurerent entierement : si bien que s'estant mise à genoux pour mieux receuoir la correction , ayant auoué humblement les fautes qu'elle leur auoit fait , & en ayant demandé penitence , le Demon se retira , & elle iouyt depuis d'vne grande tranquillité.

CHAPITRE XXXI.

De quelques graces extraordinaires que DIEU départit aux filles de Nostre-Dame de Misericorde sous la direction du Pere Yvan.

SEIGNEUR , dit le Prophète Dauid parlant à DIEU ; vos consolations ont resiouy mon ame , à proportion des douceurs que j'ay senties. C'est le procédé ordinaire de la Justice Diuine : car comme elle fait souffrir aux impies , autant d'angoisses dans leur punition , qu'ils ont recherché de delices dans leur peché , elle départ autant de consolations ,

& autant de biens aux ames fidelles ; qu'elles reçoivent d'amertume, & souffrent de maux pour son amour. Nous en auons vn illustre exemple en la Congregation des filles de nostre excellent Directeur : car si ce bon Prestre souffrit de cruelles persecutions, & des maux sans nombre en soy, & en la personne de ses bonnes filles ; tant par les calomnies, & les autres oppositions que les hommes susciterent contre luy ; que par la malice & la cruauté du Demon durant environ cinq années : durant ce mesme temps il fut aussi secouru & protégé en la personne de ses mesmes filles, par des soins admirables de la prouidence Diuine ; par diuerses apparitions des Saints, par plusieurs merueilles que DIEU opera par ses prieres, & par les leurs, & par vne abondance des graces, & des benedictions que la Sainte Vierge leur départit.

Si nous auons remarqué, que nos premieres filles commencerent leur Congregation, par vne extrême disete de toutes choses ; voulant imiter la pauvreté du Fils de DIEU en sa naissance, qui a esté le commencement de nostre redemption : considerons maintenant que DIEU commença à leur faire sentir les effets de sa misericorde par les soins extraordinaires que sa prouidence eut de les pourvoir des choses dont elles auoient besoin. Elles n'estoient encore qu'au nombre de six ; lors qu'un iour à l'heure du disner, comme elles se dispoisoient à benir la table sans auoir de quoy manger ; vn ieune garçon d'une tres-rare beauté, & d'une modestie Angelique frappe à leur porte, apportant six pains, & quelques fruiets dans vn panier. La portiere n'eut pas plustost respondu que ce beau garçon, luy donnant le present ; *l'ay charge* luy dit il, *de mon Maistre de laisser ce que ie vous apporte de sa part*, apres quoy il s'en alla ; quoy que la portiere le voulust arrester, en luy disant mesme, qu'il ne luy estoit pas permis d'accepter aucun present, sans l'adueu de la Superieure. Les filles disnerent de ce present, qu'elles receurent comme leur estant enuoyé du Ciel. En effet elles eurent suiet de croire que ce ieune homme estoit vn Ange que le Seigneur leur auoit enuoyé dans le besoin ; parce qu'apres auoir fait

qua pas aussi-tost qu'elle fut aduertie de venir à la rencontre de cette Dame , pour luy faire civilité : mais la Dame la preuenant , dès qu'elle l'apperceut : *Ah ma bonne mere, s'écria-t'elle, vostre personne ne m'est pas inconnue, ny vostre maison: quoy que ie ne vous aye iamais veüe des yeux du corps, & que ie ne sçache pas, d'auoir iamais ouy parler de vous; parce que ie suis estrangere: mais ie vous ay veüe en DIEU, qui cette nuict m'a fait connoistre vostre personne, & vostre dessein, & m'a fait voir l'amour, & la tendresse qu'il a pour vostre Communauté, & la fidelité avec laquelle il y est aimé & seruy. Il m'a de plus commandé de vous venir voir, de vous ouurir mon cœur, & de vous départir de mes biens.*

La Superieure, sans s'estonner d'une rencontre si extraordinaire, luy répondit selon que le Saint Esprit luy inspira, apres quoy elle la conduisit dans la petite Chappelle pour prier avec elle, & remercier ensemble le Seigneur, & la Sainte Vierge de leurs infinies bontez. En suite ayant chacune pris vn siege dans vne chambre; la Dame découurit à la Superieure avec vne entiere confiance l'estat de son interieur, & de ses affaires: la Superieure, luy découurit aussi les desseins de sa Congregation, & les merueilles que Dieu & sa Mere y auoient desia operées: enfin apres auoir parlé assez long-temps de plusieurs choses necessaires touchant la conduite de son ame, & ses exercices de deuotion; la Dame sortit, ayant laissé par aumosne, vne somme considerable.

Il n'y auoit pas long-temps que cette vertueuse personne estoit arriüée dans Aix, pour y solliciter vn procez de grande importance; lors que luy Dieu donna la connoissance de nos filles, & l'inspira de les aller voir. Depuis cette entreueüe elle se mit sous la direction du P. Yvan: de maniere qu'elle continua de donner des marques de son estime, de son zele, & de sa Foy enuers nostre Congregation; y allant tres-souuent, y faisant des charités, & recourant dans tous les besoins aux prieres de nos pieuses filles. Mais si DIEU se seruit d'elle pour assister de son temporel les filles de la Misericorde. Sa Diuine Prouidence employa celles-cy, pour la remplir de richesses spirituelles; la gratifiant par leurs prieres, de plusieurs faueurs

singulieres qu'elle auoit demandées.

Enuiron le mesme temps, nos filles n'ayant encore quē de pauures ornemens pour embellir la Chapelle qu'elles auoient dressée dans leur maison, comme vn iour elles s'entretenoient avec leur Directeur, Mon Pere, luy dit vne d'entre elles, nous aurions besoin d'vn Crucifix d'argent, & il faut mesme que nous trauaillions pource suiet. Ce zelé Confesseur qui ialoux de la perfection de ses filles les punissoit seuerement de tout ce qui luy sembloit estre imparfait, croyant ou feignant de croire que cette-cy luy auoit fait la proposition du Crucifix d'argent, par vn esprit de vanité, ou par quelque autre motif contraire à l'amour de la pauvreté, prit occasion de l'humilier, & d'imprimer la crainte aux autres par son exemple; de maniere qu'il la mortifia avec rigueur, luy disant plusieurs paroles de mépris, la priuant de la Communion pour quelques iours, & luy ordonnant quelques autres peines humiliantes & sensibles.

Quoy que la fille fust innocente, & qu'elle eust fait la proposition du Crucifix avec grande ingenuité sans aucune reflexion à ce dequoy on la condamnoit, & que peut-estre mesme elle eust parlé par le mouuement de l'esprit de DIEU, ainsi qu'on le peut iuger par la suite; neantmoins se mettant à genoux, dès qu'elle connut que le Pere Yvan vouloit luy faire la correction, elle écouta avec humilité tous les reproches qu'il luy fit, & toutes les paroles mortifiantes, sans répondre vn seul mot pour s'excuser; elle accepta encore avec grande soumission les penitences qui luy furent eniointes, & les executa tres-fidèlement. Il semble que Dieu voulut recompenser le zele du Confesseur, & la vertu de la penitente, par cela mesme qui leur auoit donné occasion de les exercer: car quelque temps apres, le sieur de Maurel le Jeune ayant receu quelque singuliere faueur dans vn voyage qu'il fit à Paris, & en Flandre, & l'attribuant cette grace aux prieres du Pere Yvan, & de ses filles ausquelles il s'estoit recommandé, auant que partir d'Aix, il leur acheta vn fort beau Crucifix d'argent, & le leur donna en reconnoissance, dès qu'il fut arriué.

Il arriua quelque temps apres vne autre rencontre pres- que semblable à la precedente: Le Pere Yvan ayant acheté vne petite lampe de leton pour la Chapelle de ses filles, la leur apporta avec ioye, esperant qu'elles luy en feroient de grands remerciemens ; mais par vne conduite du Seigneur autant admirable qu'elle estoit pour lors inconnüe, il arriua que comme il la leur monstra, disant qu'elle luy auoit beaucoup couté, & qu'il auoit bien eu de la peine à l'auoir, vne de ces filles, *vrayment*, luy dit-elle avec autant de simplicité que de confiance ; *cette lampe n'est pas assez belle pour mettre deuant l'Image de nostre Sainte Mere de Misericorde, cette grande Reine en veut vne plus riche, & en effet nous en aurons bien tost vne d'argent.* Ce sage Confesseur qui apprehendoit sans cesse que ses filles ne fussent pas assez humbles, & qui craignoit qu'elles ne tirassent quelque vanité des graces continuelles que DIEU répandoit sur elles, tremoussa à ces paroles, comme si elles eussent esté proferées par vn esprit de suffisance, & d'orgueil, ou par vne trop grande legereté & precipitation. En effet pour en punir le defaut s'il y en auoit, & l'empescher à l'aduenir ; il se mit dans vne sainte colere contre elle, il luy dit tout ce que son zele luy inspira pour l'humilité, l'accusant de temerité, de presumption & de plusieurs autres defauts, & luy imposant de tres rigoureuses penitences. La fille se soumit à tout avec grande edification, & répandant vn torrent de larmes, luy demanda mille fois pardon, & à toutes ses soeurs du mauuais exemple qu'elle croyoit leur auoir donné.

Cependant l'issuë fit voir qu'elle estoit innocente, & mesme loüable dans sa réponse, & qu'elle auoit parlé par esprit prophetique : car quelques iours apres, le sieur de Maurelle frere aîné de celle dont nous auons parlé cy dessus, estant tombé griefuement malade, en telle sorte que les Medecins l'auoient abandonné, eut recours aux prieres des filles de nostre Congregation ; qui luy promirent qu'il releueroit de sa maladie, nonobstant les apparences contraires. L'effet répondit à leur promesse, il se remit, & n'eut pas plustost recouuert sa santé qu'il leur donna vne belle & riche lampe d'argent.

La Sainte Vierge Mere de Misericorde, fit particulièrement voir sa protection enuers ses seruantes, quand elle y appela la mere de la premiere; ce qui arriua d'une façon merueilleuse. Cette vertueuse femme, qui depuis a esté nommée dans l'Ordre sœur Marie de la Charité (parce qu'elle s'estoit exercée toute sa vie dans les œuvres charitables; nourrissant les pauvres comme ses enfans, & leur distribuant publiquement, & en cachete la plus grande partie de ses biens.) Cette charitable personne dis-je, souffroit depuis quelque temps de tres grands travaux d'esprit sur les differents rapports, que plusieurs personnes luy faisoient, de la congregation, que sa fille auoit entreprise: car les vns la blasmoient, beaucoup d'autres en faisoient des railleries, & plusieurs encore en murmuroient.

Ce qui l'affligeoit dauantage, estoit que l'on s'en prenoit à elle, disant qu'elle deuoit retirer sa fille dans sa maison, & qu'elle auoit tort de luy permettre de viure sous la conduite du Pere Yvan; parce que cela estoit la cause de tant de plaintes, que l'on faisoit contre elle, & mesme des discours qu'on tenoit au preiudice de sa reputation. Ainsi on la pressoit de détourner sa fille du dessein qu'elle témoignoit auoir, & que tout le monde condamnoit de folie, & d'extrauagance. On luy conseilloit mesme d'vser de l'autorité de mere, pour la contraindre de quitter la congregation imaginaire qu'elle auoit commencé, qui seruoit de pierre d'achopement, & presque de scandale à toute la ville: de maniere qu'on ne sçauoit exprimer le trouble, & mesme encore l'angoisse que cette pieuse femme sentoit; oyant d'une part tant de rapports injurieux que l'on faisoit contre sa fille, & de l'autre n'osant la condamner, sçachant tres-bien, qu'elle n'auoit reconnu en elle dès son enfance que des marques d'une singuliere vertu. Outre qu'elle auoit une si haute estime du Pere Yvan, qu'elle ne pouoit se resoudre à blâmer sa conduite, non obstant toutes les plaintes qu'on luy en faisoit.

Dans cette agitation elle se resolut d'aller voir sa fille, & de s'informer de ses actions, & de son entreprise, dont on parloit si diuersement. Un iour doncques y estant venu, dès

qu'elle fut entrée dans la maison, s'adressant à sa fille qui estoit allée au deuant d'elle, *mon DIEU*, luy dit-elle, avec vne grande simplicité, *que faites-vous icy ? la fille*, luy respondant avec son ordinaire ingenuité, *ma mere*, répartit-elle: *Nous faisons ce que Dieu veut, si vous me voulez croire, vous en ferez autant.* *DIEU* parla par la bouche de la fille au cœur de la mere: car estant touchée par les paroles qu'elle receut comme de la part de Dieu, & de la Sainte Vierge, elle se rendit à l'heure mesme, & sans nul delay, renonçant au monde, elle se donna à Dieu, & à nostre Dame Mere de Misericorde dans sa congregation, pour le seruice de ses filles.

Elle apporta tous ses biens dans cette Communauté, & les donna pour pure charité aux seruantes de la Mere de Dieu; en vn temps, où elles en auoient vn extrême besoin. Mais avec ses biens, elle donna encore sa personne; parce qu'elle se rendit la seruante de la maison; s'employant dès lors aux plus vils, & aux plus penibles offices avecque ioye, avec humilité, & avec vne ferueur admirable. Le Pere Yvan en receut vne tres-grande consolation; si bien qu'il en remercia le Seigneur & sa Mere, preuoyant qu'outre les auantages, & les commoditez que cette vertueuse femme apportoit dans la Congregation; sa presence seruoit de beaucoup pour la iustification des filles: estant âgée, sage & estimée de tout le monde, pour personne de vertu, & d'integrité. Aussi deuons nous regarder la visite de cette pieuse personne, & la resolution prompte & inopinée qu'elle prit de s'arrester dans nostre Congregation; nous deuons dis-ie la considerer comme vn ouurage de la protection singuliere du Seigneur, comme vn coup de sa main toute puissante, & vn effect des intercessions de la Reine des Cieux: car si on l'auoit induite à faire cette visite pour s'opposer à l'œuvre de Dieu, & pour la détruire, Dieu se seruit de la mesme visite pour confirmer son ouurage, & pour le mieux establir. On l'auoit poussée de venir dans cette Congregation naissante, pour en retirer sa fille, qui en estoit le premier suiet, & le principal appuy; & Dieu donna des forces à la fille pour y appeller la mere, & l'y retenir. Enfin les

aduersaires de nostre Fondateur pretendoient employer cette femme pour luy faire de la peine, & luy susciter de nouveaux troubles; & DIEU l'employa pour le consoler, & par ses biens qu'elle luy apporta, l'assister dans l'exécution de son dessein.

DIEU fit encore plusieurs autres merueilles pour la subsistance de nos filles ayant souvent multiplié le pain, & les autres prouisions necessaires à leur entretien. Vn jour estant venuës à leur reſectoir pour disner sans auoir que quelques morceaux de pain, qui n'auroient pas peu suffire à la reſection d'une seule personne; elles firent leurs prieres à l'heure accoustumée: apres quoy, DIEU multiplia si abondamment ces morceaux de pain, qu'elles en eurent pour disner, & il leur en resta encore pour en donner aux pauvres.

Vne autre fois, l'eau ayant manqué dans le besoin, comme vne sœur se mettoit en estat d'en aller querir, ce qu'elle ne pouuoit faire pour lors sans incommodité, parce qu'il n'y auoit ny puits, ny fontaine dans la maison, *regardez ma sœur*, luy dit la Superieure, *vous en trouuerez dans la cruche autant qu'il en faut*. La fille obeyt, si bien que regardant dans la mesme cruche, qu'elle auoit vidée vn peu auparauant; elle y en trouua suffisamment, ainsi que la Superieure le luy auoit fait esperer. Il arriua vne chose semblable touchant l'huile: car le vase où on le tenoit estant tout à fait vuide, comme la Superieure eut commandé d'y voir derechef, assurant qu'il y en auroit encore, l'on y en trouua en effet vne quantité considerable, sans qu'on y en eust mis de nouveau. Si ces choses merueilleuses donnoient occasion à nostre bon Prestre de s'humilier; elles l'encourageoient aussi à continuer son entreprise, voyant euidentement par ses protections singulieres, que Dieu se plaisoit dans son dessein; puis qu'il le maintenoit, & le faisoit auancer par des voyes tout à fait extraordinaires.

CHAPITRE XXXII.

De quelques saintes Apparitions arriuées dans la congregation des filles de nostre-Dame de Misericorde.

SI l'vne des plus rudes persecutions, que le Pere Yvan, & ses filles ont souffertes dans leur premiere maison, consiste dans les diuerſes & frequentes apparitions des Demons, accompagnées des menaces de terreur, & de dangereuses illusions: Dieu voulut recompenser cette peine, par vne faueur oppoſée: car il détrempe l'amertume des apparitions du Demon dans la douceur des apparitions de la Sainte Vierge, & des plus grands Saints.

La Reine des Cieux parut par diuerſes fois, dans la maison de ses seruantes pour les consoler par sa presence; pour les fortifier par les marques de sa protection, & encore pour les instruire, par les exemples qu'elle leur donna de sa pureté, & de sa modestie incomparable. Les filles de la Misericorde estoient vn iour assemblées, pour assister à la lecture spirituelle qu'elles ont accoustumé de faire à quatre heures du soir; lors que la Sainte Vierge parut parmy elles, reuestue en Religieuse de la façon qu'elles le sont maintenant, la plupart d'entr'elles l'ayant apperceuë, demandoient les vnes aux autres, qui estoit cette Religieuse, dont la pudeur & la modestie estoient si admirables, & faisoient de si fortes impressions dans leur cœur. Elles estoient fort en peine de ſçauoir qui elle estoit; quand cette serenissime Princesse!, & Mere de Misericorde, se fit reconnoistre à ses filles, les remplissant de ioye, & d'amour: de maniere que comme elle voulut disparoistre; elle leur inspira, que pour estre ses filles, elles deuoient se rendre ses imitatrices, non seulement en la perfection interieure de leur ame, mais encore dans la modestie, & la bien-seance exterieure du corps.

Vne autre fois le malin esprit, estant apparu à nos inno-

centes filles, sous vne forme terrible & épouuantable, comme il menaçoit de desoler leur Congregation, & de ruiner tout ce qu'elles entreprendroient; la Sainte Vierge vint au secours de ses seruantes, qui imploroient son aide; elle les consola de sa presence, & les encourageant contre les menaces de l'ennemy; elle fit entendre qu'elle briseroit la teste de ce serpent, ainsi qu'elle auoit desia fait.

Outre cette apparition faite en commun, cette auguste Reine départit la mesme grace à quelques vnes en particulier; & particulièrement à N. Berenguiier, appelée depuis dans la Religion sœur de saint Michel, de laquelle nous auons desia parlé. Cette fille estoit vne Heroine, & vne Amazone contre le Demon: car elle estoit des moins timides, & des plus courageuses; aussi estoit elle des plus furieusement attaquées par l'ennemy. Vn soir entre autres, le Demon ayant entrepris de la faire sortir par ses ruses, & ses violences, s'apparut à elle prenant toute sorte de formes épouuantables, de serpent, de lion & de tygre, & de semblables animaux. Il jadioüsta encore les menaces aux figures, & aux menaces les coups, si bien qu'il la frappa avecque cruauté.

Cette fille ne se sentant pas assez forte contre les diuerses attaques d'un si puissant, & si redoutable ennemy, & craignant de succomber, eut recours à la Sainte Vierge sa bonne Mere, & sa fidelle protectrice: implorant son secours de toutes ses forces de son ame dans vne si vrgente necessité. A l'heure mesme, la Sainte Vierge parut à la deffense de sa seruante; & l'ayant consolée, & fortifiée par sa presence; elle chassa le malin esprit, ainsi que l'aurore dissipe les tenebres à son leuer, & fait fuyr dans les bois les voleurs qui se tenoient dans les grands chemins à la faueur de la nuit.

Je trouue encore dans les memoires écrites par le P. Yvan, que les Anges ont souuent paru à ses filles dans le commencement de leur congregation, pour les encourager par leur presence contre les apparitions des Demons. L'on vit diuerses fois le glorieux Saint Michel chasser les Demons, & les contraindre de laisser nos bonnes filles en paix: d'où vint que le Pere Yvan le choisit pour le patron de son or-

dre apres la Sainte Vierge, & que les filles auoient particulièrement recours à luy dans leurs troubles & tentations. Vn iour vne de ses filles, faisant l'oraison par le commandement de sa Superieure, comme elle la continuoit en se faisant vne tres-grande violence pour surmonter les tentations que le Demon luy suggeroit, pour la luy faire quitter; vne de ses compagnes vid qu'un Ange luy mettoit vne riche corone sur la teste, pour faire connoistre le fruit de son obeysance, & le prix de la victoire qu'elle remportoit sur soy mesme.

Vne autre fois, ayant obtenu la permission de faire celebrer la sainte Messe dans la Chappelle de leur maison, comme elles faisoient la sainte Communion, vn Ange parut sur l'Autel beau & rayonnant, tenant vn flambeau allumé en sa main, comme s'il eust voulu instruire ces bonnes filles, & les encourager à communier avec vne grande foy, pureté, & vn ardent amour, signifiez par la cire blanche, la lumiere & l'ardeur de son flambeau. Le bon Pere Yvan a remarqué dans ses memoires que saint Pierre & S. Paul, témoignèrent qu'ils s'interessent dans la congregation des filles de nostre Dame de Misericorde s'en declarans, les Deffenseurs contre les attaques des ennemis: car comme vn iour vne des premieres filles, estant en oraison dans vne petite cellule, imploroit le secours Diuin pour soy, & pour ses sœurs, contre les persecutions dont elles estoient affligées, tant du costé du Demon, que du costé des hommes, qui vouloient détruire leur entreprise; Saint Pierre & Saint Paul s'apparurent à elle, & luy presenterent toute sorte d'armes.

La fille sans s'estonner demanda à ces Saints, à quoy seruoient ces diuerses armes qu'ils luy offroient; ils luy répondirent qu'elles seroient vtils pour soustenir les assauts qu'on luy liureroit encore, & pour supporter les maux, qui restoient encore à souffrir pour l'acheuement de la Congregation. A l'heure mesme DIEU reuela à cette fille, que ces armes signifioient la Foy, l'Espérance, la Charité & les autres vertus qui sont les seules armes, avec lesquelles nous pouons surmonter les ennemis de nostre salut. Apres quoy les Saints disparurent, & la fille grandement consolée, & encouragée

par l'apparition de ces deux grands Princes de l'Eglise triomphante, & de l'Eglise militante, demeurâ rauie au Seigneur, benissant son saint Nom, & adorant ses infinies bontez.

Quoy que ces apparitions moderaissent la crainte, que le Pere Yuan auoit d'estre trompé dans son entreprise; neanmoins ce fidele Prestre, ne laissoit pas d'exorter sans cesse ses vertueuses Filles, à ne pas interrompre leurs prieres. Mais à demander sans relasche la grace de bien connoistre la volonté diuine, & de l'accomplir de point en point; si bien qu'elles obeyssent ponctuellement au conseil de leur Confesseur, s'adressant à tous les Saints du Paradis, & particulièrement aux Saints Fondateurs des Ordres, pour les prier de leur obtenir la grace d'estre éclairées de leurs lumieres, & de participer à leur esprit. L'intention du Pere, & les prieres des filles furent efficaces; car les saints Fondateurs des Ordres Religieux de la sainte Eglise, s'apparurent à vne des premieres filles de nostre nouvelle Congregation, & la rendirent capable des choses qu'elle demandoit à Dieu par leur entremise, touchât son nouuel Institut.

Vn iour qu'elle estoit en oraison, tous les Saints Fondateurs se firent voir à elle avec les habits de leur Religion; chacun selon le rang du temps que Dieu l'auoit employé à son seruice. Dieu découurit à mesme-temps à cette fille, l'estat present des ordres que ces grands Saints auoient établis, touchant l'auancement, ou le relâchement spirituel de leurs Religieux. Et ce qui luy parut plus extraordinaire, est que ces saints Fondateurs sembloient auoir le visage triste & joyeux, selon l'estat present de leur religion. Or parmi ces illustres Patriarches, comme elle auoit vne deuotion particuliere enuers saint François; ayant mesme eu vne inclination particuliere pour estre de son ordre: Dieu permit que ce Saint luy témoignât plus de tendresse que les autres, & se communiquât à elle avec plus de familiarité; de façon que cela encouragea cette fille à s'adresser particulièrement à luy, & luy proposer ses doutes avec plus de confiance.

Et

Et ainsi elle luy demanda, pourquoy quelques-uns d'entre eux auoient le visage triste, puis qu'ils iouysoient tous de la gloire de Dieu. Elle luy demanda encore, si le dessein du Pere Yvan touchant l'Institution de l'Ordre des Religieuses de Nostre Dame de Misericorde, estoit de l'esprit de DIEU, & si sa D. M. en differeroit encore bien long-temps l'exécution. Ce grand Saint luy répondit dans le mesme ordre qu'elle l'auoit interrogé : premierement, que iouyssant de la beatitude. Ils ne pouuoient auoir nulle tristesse ; mais que neantmoins quelques-unes d'entre eux, sembloient en porter les marques sur leur visage, pour faire connoistre l'estat déplorable de plusieurs de leurs enfans, dont le dereglement leur causeroit des déplaisirs extrêmes, s'ils estoient capables d'en recevoir. En second lieu il répondit que le dessein de l'institution de l'ordre des Religieuses de Nostre-Dame de Misericorde estoit un ouurage du tout puissant ; qu'il n'y auoit que l'esprit de DIEU, qui en eust donné les premieres pensées, qu'elle encourageast le Pere Yvan d'y travailler, qu'elle y traouillast aussi de son costé, que le Seigneur ne tarderoit pas de le faire reussir pour sa gloire, & pour le salut de plusieurs.

Cette fille continuant son entretien avec le mesme, grand Saint, luy dit elle, s'il y doit auoir du relasche dans l'ordre de Nostre Dame de Misericorde, quand il sera estably ; ie prie Dieu qu'il en détruise les commencemens, & qu'il ne permette pas qu'on le continué : Ah ma fille ! répondit ce grand Saint, il ne faut pas auoir ce souhait ; DIEU ne demande de nous que le present, obeysez humblement, & fidèlement à ses volontez ; l'aduenir est en la seule disposition de sa toute puissance.

Il en tirera tousiours la gloire de son nom, & l'auantage des ames predestinées. Cependant priez pour les autres ordres établis dans l'Eglise ; afin que DIEU leur donne le premier esprit de leur Fondateur, & en particulier priez pour celuy, dans lequel la Diuine bonté a voulu se seruir de moy. Comment grand Saint, poursuiuit encore la fille, n'estes vous pas plus puissant auprès de Dieu ; vous qui iouyssiez de la gloire sans aucun défaut, que nous qui uiuons dans les miseres, & sommes remplis de pechez ? Ma fille, acheua ce saint Dieu est si bon qu'il sem-

ble exaucer plustost les prieres de ses seruiteurs qui combattent encore sur la terre , que de ceux qui regnent avec luy dans le Ciel.

La vision disparut , & ces dernieres paroles laisserent dans l'esprit de la fille vne certaine crainte d'auoir esté trompre ; & que ce qu'elle auoit veu & ouy , ne fust vne illusion de l'esprit de mensonge : quoy que d'ailleurs elle eust plusieurs marques que l'apparition estoit veritable, par les grands effets qu'elle auoit operé dans son ame. Cette crainte, & ce doute l'obligerent de faire appeller aussitost le P. Yvan pour en conferer avec luy ; qui en fut grandement consolé & tascha de persuader à cette fille, qu'il n'y auoit rien à craindre dans sa vision, pourueu qu'elle fust bien humble , & ne s'en seruist que pour estre plus fidelle à sa vocation. Toutes-fois pour plus grande seurété ; il luy permit d'en prendre conseil, d'autres personnes sçauantes, & experimentées en semblables matieres.

Ainsi, elle en conféra avec le R. P. Maunier Iesuite tres-docte, & d'une eminente vertu, que l'Archeuesque leur auoit donné pour Confesseur. Ce Pere ayant examiné toutes les circonstances de l'apparition, & les effets qu'elle auoit produits ; connoissant d'ailleurs le fonds de la fille , qui en auoit esté fauorisée, iugea que l'apparition estoit veritable, & exempte de tromperie. Il assura de plus , que l'on pouuoit dire, conformément aux dernieres paroles de saint François ; que les prieres de ceux qui vivent encore sur la terre , semblent estre plustost exaucées que de ceux qui sont bien heureux dans la gloire ; dans le sens que les Interpretes donnent à celles-cy du Fils de DIEU ; que la penitence d'un pecheur cause plus de ioye dans le Paradis , que la perseuerance de 99. iustes : & comme le pere du Prodigue témoigna plus de ioye du retour de son cadet qu'il n'auoit fait de la sagesse, & de l'obeyssance de son aîné.

Le bon Pere Yvan écoutant avecque crainte, & humilité toutes ces choses extraordinaires qui arriuoient à ses filles, leur faisoit pour l'ordinaire cette réponse : *Helas filles ! il faut que nous nous humilions profondement en tout , &*

que nous vivions toujours dans la crainte. Et pour les choses extraordinaires qui arriuent ; il faut les remettre au sentiment de la Sainte Eglise Catholique , Apostolique & Romaine & ne croire , ny ne faireprecisement , que ce qu'elle en approuvera , & en ordonnera par nos Superieurs.

CHAPITRE XXXIII.

DIEU fait plusieurs merueilles par les prieres du Pere Yvan, & des filles de sa Congregation.

IL semble, dit S. Augustin, qu'il y ait eu vn combat d'amour , & de reconnoissance entre le Pere Eternel & IESVS CHRIST son Fils, en ce que IESVS CHRIST s'estant toujours humilié pour l'amour de son Pere ; le Pere Eternel l'a toujours exalté pour recompenser ses humiliations: ainsi que l'on voit en sa naissance durant sa vie & en sa mort. Si les Iustes doiuent se conformer à ce Diuin original , puis que leur iustice & leur salut depend de cette conformatité : nous en pouuons remarquer vne riche copie dans la conduite de nostre Imitateur. Il s'humilioit entreprenant , & poursuivant le dessein de sa Congregation ; parce qu'il s'exposoit à mille iniures , mépris & autres persecutions ; & DIEU en recompense l'exaltoit , operant diuerses merueilles en faueur des personnes qui se recommandoient à ses prieres , ou à celles de ses filles, dont ie rapporteray icy quelques vnes.

Le fils du sieur Guerin President à la Chambre des Comtes en Prouence, estoit grandement trauaillé de la pierre ; en en telle sorte que la douleur extrême qu'il en sentoît, luy faisoit pousser des cris presque continuels , & le mettoit en tres-grand danger de mourir : apres y auoir employé diuers remedes la consultation des Medecins , & des Chirurgiens, porta qu'il le falloit tailler ; & qu'il n'y auoit point d'autre voye pour le guerir. L'appareil estoit desia fait pour cette operation ; lors que le President pere du malade , qui auoit

vne singuliere estime pour nostre bon Pere, & pour ses filles; les fit aduertir de l'estat dangereux de son fils, les suppliant de le recommander à DIEU, & à nostre Dame de Misericorde. Nos pieuses filles n'eurent pas plustost sceu les intentions de ce pere affligé, qu'elles luy enuoyerent de differer quelque temps cette violente operation, qu'on vouloit faire sur son fils; afin qu'elles eussent l'oisir d'offrir leurs prieres pour luy; adioustant qu'elles esperoient, que la sainte Vierge le soulageroit, sans qu'on se seruist de ce remede dangereux. Le President creut avecque confiance ce qu'on luy mandoit de maniere que sa confiance ne fut pas confondue: la merueille ayant esté plus grande qu'on ne luy auoit fait esperer. La douleur du malade continua iusques au lendemain, sans qu'on vit aucune apparence de guerison; si bien que les Chirurgiens persistoient, qu'il ne falloit plus differer de le tailler. Le President y ayant encore consenty, fit derechef aduertir les filles de nostre Congregation, qui continuoient leurs prieres, & qui luy répondirent qu'il se gardast bien de permettre qu'on vst de ce violent remede enuers son fils: mais qu'il verroit bien-tost des marques des intercessions de nostre Dame de Misericorde. A peine ce deuot Magistrat eut ouy cette réponse, qu'il en apperceut l'effet: car son fils iettant dehors la pierre qui le trauailloit en la presence des Medecins, & des Chirurgiens qui estoient assemblez pour le tailler, il fut à l'heure mesme, non seulement soulagé, mais encore tout à fait guery de son mal. Tous les assistans qui furent témoins de cette merueille, donnerent mille benedictions au Seigneur, & à la sainte Vierge Mere de Misericorde, & sçachant qu'elle estoit arriuée par les prieres de nostre Fondateur, & de ses filles; ils se confirmerent dans le respect, & la haute estime qu'ils en auoient. Je ne sçauois exprimer la reconnoissance du President: car outre qu'il donna pour lors vn riche tableau à nostre Congregation, en memoire de la merueille qui s'estoit faite en la personne de son fils, il a depuis continué avec zele de proteger nostre bon Ecclesiastique, & les interets de son Institut; en toute sorte de rencontres; s'estant mesme employé avec grande affection

à faire connoistre le merite de nostre Fondateur apres son deceds; si bien que c'est luy particulierement qui a trauaillé à recueillir, & nous enuoyer les memoires de cette vie.

Vne Dame de grande condition, & d'une singuliere pieté, veſue d'un Seigneur, qui auoit eſté premier Preſident au Parlement de Prouence, receut vne ſemblable grace en la perſon- d'une de ſes filles, par les prieres de nostre bon pere, & de ſa deuote Congregation. Cette Damoiſelle ayant eſté atteinte d'une eſpece de catharre, ou apoplexie, auoit reſté ſi incom- modée; que ſon corps eſtoit dans un eſtat pitoyable. L'on eut en vain recours aux Medecins, qui apres diuers reme- des ne peurent luy donner aucun ſoulagement. Enfin ſa pieuſe Mere, que nous pouuons appeller vne femme de Dieu, la Mere des pauures, & un exemplaire de pieté à toutes celles de ſon ſexe, & de ſa condition: cette Dame, diſ-je, fut inſpi- rée de recourir aux prieres du Pere Yvan, & de ſa Congre- gation, elle les viſita pour ce ſuiet, & les pria de commencer vne neufuaine à Noſtre Dame de Misericorde pour la gue- riſon de ſa fille. Noſtre bon Pere qui ſe trouua pour lors dans la maiſon, la receut avec grand reſpect, & comman- da à ſes filles de faire ſelon les intentions de cette Dame. Alors meſme il y en eut vne, qui ſ'adreſſant à cette perſon- ne: [Madame, luy dit-elle, avec vne ſinguliere confiance, ne ſoyez pas ſi affligée de la maladie de Madamoiselle voſtre fille, la ſainte Vierge Mere de Misericorde la guerira, & ſans doute que ſa bonté operera cette merueille, auant que la neufuaine ſoit acheuée.] L'euenement montra bien- toſt la verité de ces paroles: car dans le temps, dont cette pieuſe fille auoit parlé: la Damoiſelle fut parfaitement remi- ſe en ſa premiere ſanté, ce qui donna vne ample matiere de glorifier Dieu & la Sainte Vierge de iuſtifier le Pere Yvan, & ſes filles, des bruits qu'on auoit ſemés contre leur con- duitte, & de faire approuuer leur Congregation.

La meſme Dame receut vne ſeconde faueur par les prie- res du Pere Yvan, & des filles de ſa Congregation, en la perſonne du Marquis N. l'un de ſes beaux-fils. Ce Gentil- homme atteint d'une maladie dangereuſe apres auoir em-

ployé inutilement diuers remedes , auoit esté condamné des Medecins , sans espoir de guerison. Sa belle mere se souuenant de la faueur qu'elle auoit desia receue par les prieres du Pere Yvan , & de ses filles , eut recours vne seconde fois à leurs intercessions , les coniurant de demander à Dieu la santé pour son beau-fils. La mesme qui luy auoit fait la premiere prediſtion pour la santé de la Damoiselle sa fille, luy predit encore la guerison de son beau-fils , luy disant confidamment ces paroles. *Madame, ne craignez rien, vostre malade ne mourra pas, pourueu qu'il ayt soin de faire vne bonne confession, & de mettre son ame en estat de grace.*

Ces paroles consolerent grandement cette pieuse Dame, qui ne manqua pas de le faire sçauoir aussi tost à son beau-fils & de le presser à faire vne bonne confession. Mais celuy cy ne croyant pas sa maladie si dangereuse, qu'on vouloit luy persuader negligea cét aduis salutaire, & ne prit le soin qu'il deuoit pour mettre ordre à sa conscience, ainsi que l'ay appris de sa propre bouche. Qu'arriua-t'il ? sa maladie luy empira de telle sorte, qu'estant reduit dans peu de iours en vn estat pitoyable pour sa santé ; il apprehenda viuement de mourir. Cette apprehension l'ayant obligé de songer serieusement à son salut, il fit appeller vn Confesseur, & apporta tous les soins pour faire vne bonne confession. Merueille ! Dieu vouloit guerir en luy les infirmités de son ame, à l'occasion de la maladie de son corps : car il n'eut pas plustost receu l'absolution du Prestre, qu'il commença à se bien porter & ne tarda apres cela de reconuer entièrement la santé. La Dame sa belle mere en reconnoissance de ce bien fait, donna vne riche chasne d'or au Pere Yvan, pour l'embellissement de la Chappelle de sa Congregation, qui fut depuis changée, du consentement de la mesme Dame en vn soleil, où l'on expose le saint Sacrement de l'Eucharistie.

Dans le quartier où logeoient les filles de la Misericorde, il y auoit vne maison grandement desolée, à cause de la maladie du chef de la famille qui estoit à l'extrémité. La femme du malade preuoyant les maux qu'elle souffriroit, si son mary decedoit, estant chargée d'enfans, & priuée des commo-

ditez necessaires , s'adressa à nostre Fondateur , pour implorer le secours de ses prieres , & le supplier de venir voir son mary , ou d'y enuoyer quelqu'une des filles de la Congregation. Le bon Pere accorda la premiere demande , & promit de faire prier Dieu pour le malade : mais s'estant rendu difficile pour la seconde , cette femme affligée se ierta à ses pieds , & fit tant par ses larmes & par ses sanglots , qu'elle le porta à commander à vne de ses filles de visiter le moribond , & de demander sa santé à Nostre Dame de Misericorde.

Il semble que nostre excellent Ecclesiastique faisant ce commandement à sa fille , luy communiqua sa vertu ; ainsi qu'il est arriué à plusieurs grands seruiteurs de Dieu qui ont fait des prodiges par l'obeyssance de leurs Disciples. La fille obeyt à l'heure mesme , & visita ce malade qu'elle trouua moribond : le cierge benit estoit desia allumé , & il y auoit plusieurs personnes autour de son liét , qui n'attendoient que les derniers signes de sa mort : Elle en approcha neantmoins , & apres vne briefue , mais seruente priere à la Mere de Dieu , elle dit ces paroles à l'oreille du malade , *recommandez-vous avecque confiance aux intercessions de nostre Sainte Mere de Misericorde , elle aura pitié de vous , & de vostre famille , & conseruera vostre vie , si elle est encore necessaire.*

Elle luy dit encore quelques paroles d'exhortation , selon que nostre Seigneur luy inspira ; & l'on peut dire que ce furent en quelque façon des paroles de vie : puis que Dieu s'en seruit pour remettre le malade. Car à peine cette pieuse personne eut prononcé les paroles , 'que ie viens de dire , que le moribond qui' estoit desia presqua destitué de l'usage de tous les sens , reuint à soy à l'heure mesme , il donna des marques certaines de sa conualescence , & dans quelques iours , il fut entierement remis. Il seroit difficile de raconter le transport de ioye de la femme , & de toute la famille , voyant ce malade que l'on tenoit desia pour mors , donner des marques certaines de sa conualescence , lors que l'on attendoit les signes de son trépas. Chacun donna mille benedictions au Seigneur , & à la Sainte Vierge , & des eloges au

Pere Yvan qu'on regardoit comme l'Autheur de cette guérison.

Je laisse les autres effets merueilleux , que la Reine des Cieux opera dans la premiere maison de nos filles : car on les verra vn iour dans les Croniques de l'Ordre : mais ie suis obligé de dire qu'il ne se passoit aucune semaine , ny presque aucun iour , que cette auguste Princesse n'accordast quelque grace extraordinaire en faueur de ceux qui auoient recours à la Congregation : de pecheurs conuertis , de procès gaignez , de prisonniers deliurés & des malades gueris , estoient les fruiçts ordinaires des prieres de nostre Fondateur , & de celles de ses filles , & c'estoient aussi des marques certaines , que le Seigneur approuuoit leur Congregation , & que Nostre Dame Mere de Misericorde en auoit vn soin tout particulier.

L'adiousteray encore que le sieur de Foresta tres-sçauant Medecin , & l'vn des Professeurs de l'Vniuersité d'Aix , ayant esté appelé dans cette Congregation pour quelques filles malades : apres y auoir remarqué la suite des merueilles que le Ciel y operoit continuellement , changea de façon de viure , & vescu en effet depuis ce temps-là d'vne maniere beaucoup plus pieuse , & plus exemplaire. Aussi conceut il vne si haute estime du Pere Yvan , & de ses filles , que quand les remedes humains ne pouuoient plus profiter à ses malades ; il les exhortoit d'implorer les prieres des personnes de nostre pieuse Societé : Et il arriuoit ordinairement que ceux qui suiuoient l'avis de ce deuot Medecin , receuoient des graces extraordinaires , non seulement pour la santé de leurs corps , mais encore pour la conuersion de leur ame.

Depuis cette connoissance que le sieur de Foresta eut de la vertu & du merite des filles de Nostre Dame de Misericorde , il se donna à elles avec tant de zele ; qu'il quittroit tous ses autres emplois pour leur rendre seruice quand il en auoit l'occasion : & dès qu'il estoit appelé pour leur faire quelque bon office , il le faisoit avec vne charité singuliere , les aydant de sa profession de Medecin , de son conseil , & mesme de ses biens comme vn vray amy , & bien-faicteur. Nous
pouuons

pouuons dire qu'il éprouua ce que le grand Apôstre nous promet, que si nous trauaillons à semer de bonnes œuures, nous aurons vn iour la ioue, & le gain d'une riche moisson. Car ayant assisté nostre naissante Congregation en tout ce qu'il peut pour le pur amour de DIEU, & de la Sainte Vierge Mere de Misericorde, il en receut vne merueilleuse recompense; non seulement pendant sa vie par sa grande pieté, dont il fit profession le reste de ses iours, qui furent suivis d'une tres-belle, & tres bonne mort; mais encore apres son deceds: son ame ayant esté promptement deliurée des peines du Purgatoire, de la maniere suiuaute, que j'ay extraite des memoires du bon Pere Yvan.

Le sieur de Foresta nostre bon amy, & bien-faicteur, estant mort 1635. & le 21. Aoust, Nos filles ont creu par diuers signes, & sentimens que son ame s'estoit arrestée dans leur maison, & que la Mere de Dieu luy auoit obtenu la grace de faire là son Purgatoire, en recompense de ce qu'il les auoit souuent assistées. En effet le lendemain de son trépas, pendant qu' Anne Berenguier faisoit son Oraison du matin, elle fut fortement inspirée de dire à sa Superieure, qu'elle commandast à ses filles de faire la sainte Communion, le Samedi prochain pour son repos, & qu'aussitost son ame iroit en Paradis. Cette fille n'adionstant foy à l'inspiration qu'elle auoit eue, negligea d'en parler à la Superieure; de maniere que le Samedi à trois heures du matin, elle ouyt qu'on frappa vn grand coup à la porte de sa chambre proche de son lit, & elle ouyt encore comme si l'on répandoit de l'eau. Ce coup ne l'ayant nullement effrayée, apres auoir eleué son esprit, & son cœur à Dieu, elle dit à haute voix; si tu es quelque bonne chose, & de Dieu, fais moy vn signe plus clair & plus intelligible. Alors l'ame du deffunêt répondant avec humilité, & du mesme ton de voix qu'il auoit pendant sa vie, fit connoistre qui elle estoit, & dit qu'elle n'osoit faire d'autres signes pour ne luy causer de la peur; en suite la fille entendit pour la seconde fois vn bruit tel que l'on fait quand on répand de l'eau, & de plus elle vit par deux fois vne flamme de feu, qui ne fit que passer; puis le deffunêt reprenant la parole, c'est assez, dit-il, pour vous faire connoistre ce que c'est moy. Ho-

las, adiousta-t'il, tous ceux que vous croyez en Paradis n'y sont pas; le nombre des sauuez, n'est pas si grand que l'on pense; le danger est bien grand de se damner pendant la vie, & à l'article de la mort. Il fit encore connoistre à la fille, qu'après sa mort il auoit souffert de terribles frayeurs, & de desolations épouuantables: mais qu'il auoit esté remis en un Purgatoire plus doux; qu'il auoit mérité de demeurer trois ans dans le Purgatoire, & que la Mere de Dieu, Mere de Misericorde auoit donné le moyen de racourcir cet espace en cinq tours, & que par sa bonté elle luy auoit esté grandement favorable.

La fille bien instruite de quelle maniere elle se deuoit comporter en semblable rencontre, répondit, ie n'ay pas permission de rien croire de ce que vous me dites, & l'ame repartit; ny moy, de vous donner d'autre signe; car ie vous ferois peur. Quelques heures après le P. Yvan estant venu à son ordinaire pour célébrer la sainte Messe, la fille luy ayant raconté ce qui s'estoit passé, ordonna que toutes feroient la sainte Communion pour le repos du sieur de Foresta, & il offrit le Sacrifice de la sainte Messe à son intention. Ce fut une chose merueilleuse, que toutes les filles, qui depuis le deccès en ce pieux medecin auoient souffert durant cinq iours de troubles, d'angoisses & d'autres tres sensibles peines dans leur interieur, & mesme de grandes douleurs en leur corps (si bien que le bon Pere Yvan adiouste, qu'il croit que ce fut par les souffrances des filles que les peines du deffunt furent racourcies) aussi tost après la Communion, se trouuerent remplies de ioye, & d'une consolation extraordinaire; comme si Dieu eust voulu qu'elles eussent eu part à la ioye de cette ame, s'en allant en Paradis; ainsi qu'elles sembloient auoir participé à ses souffrances. C'est ce que j'ay creu à propos deuoir extraire des memoires du Pere Yvan, pour la confirmation de nostre Histoire, & pour l'edification du Lecteur.

CHAPITRE XXXIII.

Le grand Vicaire permet au Pere Yvan de célébrer la Messe dans sa Congregation, en suite d'une merueille operée en sa faveur.

L'VNE des plus grandes peines que nostre Fondateur souffrit au commencement de sa Congregation, fut de n'auoir la permission de celebrer la Sainte Messe dans la petite Chappelle que ses filles auoient preparée dans leur maison; de sorte que l'on ne scauroit croire les incommoditez que cela leur causa. Car en premier lieu, ce defaut de permission empeschoit nos bonnes filles de viure tout à fait séparées du commerce des seculiers, & de garder vne espee de closture; estans contraintes de sortir tous les iours pour ouyr la sainte Messe; & ainsi de se mêler parmy les mondains: ce qui leur donnoit mille troubles, & mille distractions, à cause des mauuais traitemens qu'elles receuoient par les ruës, comme nous auons remarqué.

Elles souffroient encore mille peines, & mille mortifications, pour raison de la tres-sainte Communion: car comme leur Directeur sçachant les dispositions de leur ame, & le desir ardent qu'elles auoient de seruir à Iesus Christ leur espoux, leur permettoit de communier tres-souuent, & quelquesfois plusieurs iours de suite; elles estans contraintes de le faire publiquement dans les Eglises; ce qui excitoit mille murmures contre elles, & contre leur Fondateur, la plupart condamnoient leur deuotion, & prenoient quoy qu'injustement suiet d'estre mal edifiées, que des filles seculieres approchassent si souuent du Saint Sacrement de l'Autel. Quelques-vnes en murmuroient mesme publiquement dans les Eglises, disans qu'on les deuoit renvoyer de la sainte Table, & que leur Confesseur estoit grandement blasmable, de

leur permettre de communier si souuent. Pour faire cesser ces murmures, elles alloient par le conseil du Pere Yvan en diuerses Eglises; mais le Demon ne laissoit pas de les y persecuter: car comme l'on en auoit dit plusieurs choses iniurieuses; dès qu'on les voyoit venir, *voicy*, disoit on, *les bigotes du Pere Yvan: voicy les hyppocrates. Pourquoi leur permet-t-on de viure de la sorte, que ne se font elles tout à fait Religieuses, ou que ne vivent elles comme les autres?* Il estoit mesme arriué au mépris, & à la confusion de ces filles, qu'en quelques Eglises on leur auoit refusé la Communion: en d'autres Eglises, on différoit long temps de la leur administrer, apres qu'elles l'auoient demandée, pour leur donner suiet de sortir sans la receuoir.

En passant ie diray vne chose merueilleuse, qui arriua sur ce suiet. Deux de ces filles estans entrées dans vne Eglise pour ouyr la Messe; dès que le Sacristain les vid, il cacha la clef du Tabernacle pour auoir pretexte de leur refuser la Communion, si elles la demandoient. La chose arriua comme il l'auoit preueüe; mais elle ne reussit pas selon son dessein: car l'une de ces deux filles demandant la Communion apres la Messe, comme le Sacristain répondit que la clef du Tabernacle estoit perduë, & comme apres auoir fait semblant de la chercher en diuers endroits, il asseuroit qu'il ne pouuoit la trouuer; la clef se trouua mesme dans la serrure du Tabernacle, portée sans doute par vne main inuisible. Celle qui vouloit communier, fut la premiere à la découurir: de façon qu'en ayant aduertty sa compagne, & celle-cy le Sacristain, & le Prestre, qui auoit célébré la Messe, elle receut la grace qu'elle auoit demandée, au grand estonnement de ceux, qui auoient voulu la luy refuser. DIEV auoit operé plusieurs autres merueilles en faueur de ces filles, sur ce mesme suiet de la Communion: mais ces merueilles estoit secretes, pendant que les iniures qu'elles souffroient, pour ne pouuoir ouyr la Messe dans leur maison, estoient publiques, & presque continues.

DIEV sçait les prieres, & les penitences qu'elles firent pour obtenir cette grace, & les soins que le Pere Yvan prit pour y

disposer les Superieurs, sans pouuoir de long temps en venir à bout. Le Seigneur de Richelieu, qui estoit le Protecteur de nostre Ecclesiastique, ainsi que nous auons dit, s'estoit demis de l'Archeuesché d'Aix en faueur du Seigneur de Bretel. Ce changement donna de la peine à nostre bon Pere; parce qu'il n'en estoit pas si bien conneu, ny si bien aimé que de son predecesseur: & quoy que ce dernier Prelat fust fort doux, tres-affable, & tresporté à ce qui regardoit la gloire de Dieu, & le bien des Ames; il se rendit neantmoins tres difficile à approuuer le dessein de nostre Fondateur, & à luy accorder les permissions necessaires, soit qu'il y fust poussé par les personnes mal affectionnées au Pere Yvan; soit que son conseil le iugeast ainsi à propos, ou qu'il fust luy-mesme inspiré d'agir de la sorte pour éprouuer la vertu de nostre pieux Ecclesiastique, & la fermeté de nos filles, par la perseuerance; afin de connoistre plus clairement par le temps, & par la suite la volonté du Seigneur.

Ainsi vn an & demy se passa, sans que nostre bon Pere pust obtenir de dire la Messe dans sa Congregation; nonobstant ses soins, & les instances presque continuelles, durant tout ce temps-là. Il est vray que comme il ne regardoit dans cét oeuvre que la volonté de Dieu, aussi ne voulut il pas employer aucunes sollicitations enuers les Superieurs que les siennes, accompagnées de ses prieres, de ses penitences, & de celles de ses filles enuers Dieu, & enuers la Sainte Vierge Mere de Misericorde. Dieu voulut qu'il achetast cherement ce bien; parce qu'il estoit tres important à son entreprise; de telle sorte qu'on pouuoit l'appeller le premier establisement de sa nouvelle Congregation: mais enfin ses prieres furent exaucées, & ce patient Ecclesiastique, apres auoir semé avec larmes, moissonna le fruit de ses peines avec ioye.

L'Archeuesque ayant esté obligé pour les affaires de son Diocese, de s'absenter pour quelque temps de la ville Metropolitaine, laissa le soin & la disposition de la Requête de nostre bon Pere au sieur de Gautier son Vicaire, homme de pieté, d'experience & d'un profond sçauoir. Nostre ecclesiastique auoit suiet d'esperer beaucoup de la bonné de ce grand

Vicaire ; parce qu'il en estoit conneu, & estimé depuis long-temps, en ayant receu en diuerfes rencontres plusieurs témoignages d'amitié : neantmoins Dieu permit pour la plus grande gloire de son nom, & la perfection de son œuvre, que le sieur de Gautier se rendre aussi rude en cette occasion, & aussi seuer que l'Archeuesque ; comme si la Mere de Dieu ne voulant pas que l'on eust l'obligation de cette faueur à aucune creature mortelle, eust seule voulu la procurer de cette façon.

Le grand Vicaire estant tombé dangereusement malade, eut plustost recours aux moyens surnaturels, qu'aux remedes humains. Il auoit ouy parler par des personnes dignes de foy, des merueilles que la Reine des Cieux faisoit dans la Congregation des filles du Pere Yvan ; il les enuoya prier de demander la guerison à DIEU, & à Nostre-Dame de Misericorde : adioustant qu'il auoit vne grande foy en leurs prieres. Nostre bon Pere, & ses vertueuses filles ne manquerent pas d'obeyr ; si bien que d'abord le malade commença à se porter bien, & quelques iours apres ayant entierement recouré sa santé contre l'esperance des Medecins, il l'attribua aux prieres du Pere Yvan, & de ses filles, & resolut d'en estre recoinnoissant.

En effet, nostre Fondateur l'ayant visité enuiron ce temps-là ; dès qu'il l'apperceut : *Mon Pere*, luy dit-il, *le vous suis grandement obligé, & à vos filles aussi ; car apres m'estre re-commandé à vos prieres enuers Nostre Dame de Misericorde, j'ay esté guery de ma maladie, contre le sentiment du Medecin ; & mesme plustost que ie n'auois esperé. Je ne veux pas estre ingrat du bien que vous m'avez obtenu ; c'est pourquoy, ie desire pour vostre consolation, & celle de vos filles vous accorder la permission que vous m'avez demandée, de leur celebrer la sainte Messe dans la Chappelle de leur maison. Et pour vous donner encere de plus grandes marques de mon affection, & de ma recoinnoissance, j'iray moy-mesme benir la Chappelle, & y celebrer la premiere Messe, en action de graces de la santé que j'ay recourée par les intercessions de la Mere de DIEU.*

Nostre Fondateur sentit vne si grande consolation de ces

paroles, qu'il sembla recevoir vne nouvelle vie; aussi estoit-il sensiblement affligé de tant de refus qu'on luy auoit faits, & de tant de peines, & de mépris que ses filles auoient endurés depuis dix huit mois. Il remercia donc le grand Vicaire, & luy ayant souhaitté mille benedictions; il le pria instamment d'exécuter bien tost sa promesse. Apres quoy, portant cette bonne nouvelle à ses filles, il les fit participantes de sa ioye: & les ayant exhortées à remercier la Diuine Bonté, & la Sainte Vierge Mere de Misericorde de cette grace; il leur commanda de préparer la Chappelle, l'Autel, & les ornemens pour la sainte Messe, & de se disposer elles-mesmes, pour y recevoir la Communion.

Le grand Vicaire ne différa pas long temps d'y venir, selon sa promesse; si bien que le iour, & feste de saint Thomas Apôstre, apres auoir beny la Chappelle, l'Autel, & les ornemens; il y celebra la premiere Messe, donna la Communion aux filles, & laissa à nostre Fondateur vne permission ample & authentique de faire le mesme à l'aduenir. Si nostre bon Pere, & ses filles auoient enduré beaucoup pour obtenir cette permission, ayant passé les iours, & les nuits en prieres, & en penitences pour ce suiet, leur consolation ne fut pas mediocre, quand le grand Vicaire leur eut accordé ce bien. Aussi peut-on dire que ç'a esté vne des grandes benedictions de l'Ordre de Misericorde, & vn des plus efficaces moyens de l'acheminer à sa perfection: parce que dès lors les filles n'estans plus contraintes de sortir de leur maison, commencerent de garder vne espee de closture, menans vne vie retirée, & séparée du mélange du monde, qui leur estoit vn martyre presque insupportable. Dès lors aussi elles s'addonnerent avec plus de liberté, & d'application aux exercices de la vie religieuse, qu'elles desiroient embrasser.

CHAPITRE XXXIV.

DIEU change le cœur de l'Archeuesque, & le rend favorable à la Congregation du Pere Ivan.

NOSTRE bon Prestre commençoit à iouyr du calme que la permission du grand Vicaire luy auoit procuré, lors qu'il fut menacé d'un furieux orage; mais que le Seigneur fit resoudre en vne pluye de benediction. Il commençoit, disie, à gouter la consolation qu'il receuoit en soy, & qu'il donnoit à ses filles; leur celebrant la Messe tous les iours, & leur administrant les Sacremens dans la Chappelle de leur maison, lors qu'il fut affligé d'une rude persecution; mais que la Diuine Misericorde changea en vne protection fauorable. Ceux qui s'estoient le plus ouuertement declarés contre le dessein de la Congregation, n'ayant peu s'opposer à la permission du grand Vicaire, dont nous venons de parler, & voyant que par icelle nostre Fondateur, auoit desia vne partie de ses pretensions, & qu'assurément il pousseroit son ouurage iusques au bout, s'il ne rencontroit de puissants obstacles, eurent recours à de nouuelles inuentions, non seulement pour empêcher qu'il ne poursuiuist dauantage son establissement, mais encore pour détruire ce qu'il auoit desia fait.

Ainsi dès que l'Archeuesque fut de retour dans la ville, ces personnes le preuenans, s'efforcèrent de luy donner des impressions contraires à l'estime, & à l'affection qu'il pouuoit conceuoir pour nostre bon Prestre, & pour ses filles, afin qu'il reuoquast la permission que son Vicaire leur auoit oütoyée, & qu'il deffendist encore de continuer leur Communauté. Pour cette cause, ils accuserent nostre pieux Ecclesiastique, deuant ce bon Prelat, d'ignorance, de presumption, & mesme d'extrauagance, d'auoir entrepris, & de poursuiure vne nouvelle Congregation de filles, de luy mesme, sans l'aduis de

de ceux qui estoient capables de le conseiller en cette affaire, & sans auoir le moyen de le pouuoir faire subsister.

Ce n'est pas, poursuiuoient-ils, à un petit Prestre ignorant, pauvre, & méprisable, d'instituer une nouvelle Congregation; & qui est un des plus grands ouurages de l'Eglise de Dieu. Les plus grands hommes, & les plus illustres Prelats ont bien eu de la peine d'en venir à bout; quoy qu'ils eussent les moyens & l'autorité. DIEU n'a employé à ces desseins si importans, que de grands Saints, apres auoir fait connoistre leur vertu, par les miracles de sa puissance. Nous ne voyons rien de semblable en la personne du Pere Yvan, ny selon la nature, ny selon la grace, n'ayant rien qui ne paroisse vil, & digne de mépris. Ce n'est donc, adioustoient ils, qu'une illusion du Demon, & un proiet de vanité, pour se rendre considerable par une entreprise extraordinaire. Enfin apres plusieurs autres discours de mesme nature, ils concludoient que l'Archeuesque deuoit s'opposer au dessein de nostre bon Pere, & détruire la Congregation naissante; de peur qu'elle ne tournast au mépris de la religion, & au scandale des bons, & au preiudice de l'autorité des Supérieurs; s'ils permettoient le progrès d'une œuvre, qui selon toutes les apparences humaines, ne pouuoit se terminer qu'à la confusion de son Auteur, & à la honte de ceux, qui s'y feroient employé.

Il ne fut pas difficile à ces personnes, qui estoient considerables par leur sçauoir, & par l'estime de leur pieté, & qui mesme croyoient bien faire, en agissant de la sorte; il ne leur fut pas difficile, dis-je, de faire receuoir à l'Archeuesque une partie de leurs sentimens contre nostre Fondateur, & contre la Congregation: d'autant mieux, que n'y ayant pas longtemps que ce bon Prelat estoit dans le pays; il n'estoit pas encore bien informé des choses: & quoy qu'il ne creut pas tout ce qu'on luy auoit dit, il en creut neantmoins assez, pour faire de la peine à nostre Ecclesiastique sur le sujet de la Congregation. En effet quelques iours apres l'ayant rencontré par les ruës, Pere Yvan, luy dit-il, j'ay sçeu que vous avez commencé une Congregation de filles; & que mon Vicaire vous auoit accordé la permission de celebrer la Messe dans leur mai-

son : ie veux les visiter , & examiner avec soin vostre dessein , & le leur ; & si ce que vous auez fait , ne m'agrée , ie le détruiray , & vous deffendray d'y plus travailler. Nostre bon Pere fut surpris de ces paroles , qui montroient que le Prelat n'estoit pas bien intentionné pour son entreprise : neantmoins répondant avec vne profonde humilité , qui estoit accompagnée d'une haute confiance ; Monseigneur , dit-il , tout est en vostre disposition , que vostre grandeur en fasse ce que Dieu luy inspirera.

Il sembloit par cette réponse que nostre Fondateur n'auoit pas esté émeu des menaces de l'Archeuesque , & qu'il n'en apprehendoit pas beaucoup le succès ; & neantmoins comme si DIEU l'eust voulu éprouuer dans cette rencontre , & le faire meriter par les peines interieures ; il permit que son cœur fust attaqué d'une terrible crainte , qu'il eust esté trompé dans son dessein , & que sa congrégation ne fust pas selon l'esprit de DIEU ; puis que le Prelat qu'il regardoit comme son Lieutenant , & l'Interprete de ses Diuines volonte , au lieu de la confirmer , la desapprouuoit , menaçant mesme de la détruire. Cette apprehension augmentée par les sentimens que son humilité , & la deffiance de soy-mesme , luy suggeroient continuellement , qu'il n'estoit capable d'aucune bonne chose , & qu'il n'estoit propre qu'à offencer Dieu , luy causa de tres grands trauaux dans son ame. Ce n'est pas qu'il manquast de confiance en Dieu , ny aussi qu'il apprehendast la confusion de voir son dessein renuersé : mais cela procedoit d'un certain mépris , & de ie ne sçay quelle peur qu'il auoit de soy-mesme , & de ses œuures , qui le faisoit tousiours craindre de se tromper , & de tromper les autres , & d'estre vn empeschement aux intentions du Seigneur.

Visitant donc ses filles dans ces pensées d'humilité & de crainte , il leur fit sçauoir la rencontre qu'il auoit eue de l'Archeuesque , & les menaces que ce Prelat luy auoit faites. Il leur raconta ces choses avec tant de sentiment d'apprehension , & de découragement , qu'il leur parla des affaires de sa Congrégation , comme s'il eust creu que tout deuoit estre perdu , & qu'il n'en fallust plus esperer que la destruction.

Son dessein estoit de faire part à ses filles, de ses craintes & de ses angoisses ; afin qu'elles en fussent aussi humiliées, & qu'elles eussent recours à la priere avec plus de ferueur, & d'assiduité : mais l'esprit de Dieu en disposa autrement par vne admirable conduite ; car il dépoüilla ce semble en cette occasion le Pere Yvan de la force actuelle, pour l'humilier, & luy faire sentir les foiblesses de la nature, quand elle est delaissee du secours Diuin ; & en mesme temps il fortifia ses filles, pour les encourager, & mettre en elles la generosité, & la fermeté d'une ame, qui est appuyée de la grace du Ciel.

Ainsi dès qu'il eut cessé de parler de son affliction, & de ses craintes ; vne de ses filles le regardant d'un visage serain, & d'une façon courageuse : *Mon bon Pere*, luy dit elle, *ne vous estonnez pas du procédé de nostre Archeuesque ; Dieu veut esprouver par là nostre foy, & nostre confiance. Ayons bon courage, & esperons en luy : sa Diuine Bonté aura soin de donner au Prelat autant d'affection, & de zele pour nostre Congregation ; qu'il témoigne en auoir de mépris, & d'éloignement.* Qui ne penseroit que les paroles de cette fille, prononcées, d'une manière feruente, & qui témoignioient quelque chose de l'esprit de Dieu, auroient consolé le Pere Yvan ? au contraire elles accrourent ses peines, & redoublerent ses apprehensions.

Ce fidele Directeur qui trembloit à la seule apparence du mal, & à la veüe des moindres imperfections ; douta que la confiance de sa penitente ne procédast d'un principe de superbe, & qu'elle ne parlât plustost par la suggestion de l'esprit de mensonge, ou par vne temeraire presumption de ieunesse ; que par les mouuemens de l'esprit de Dieu, & par vne meure & sage deliberation. Ainsi pour détruire en elle le mal s'il y en auoit, & pour luy faire pratiquer en cette occasion le mépris de son iugement, l'abnegation de sa volonté, & semblables vertus ; il la reprit aigrement de legereté, & de presumption. Il luy fit l'humiliation de ses fautes en presence de ses sœurs ; & enfin il luy dit avec zele, tout ce qu'un Pere spirituel peut dire de mortifiant à sa penitente, dans la chaleur d'une forte, & serieuse correction.

La fille se prosternant à terre, receut avec vn grand respect, & vne sincere humilité, la correction de son Directeur: elle creut que tout ce qu'il auoit dit de ses imperfections estoit vray, qu'elle estoit vaine, superbe, légère, & coupables de plusieurs autres deffauts. Dans cette croyance ayant abandonné son cœur aux regrets, & ses yeux aux larmes; elle se ietta aux pieds d'un Crucifix, comme si elle eust esté la plus grande pecheresse du monde [le coniuant d'auoir pitié d'elle, de luy faire la grace de bien connoistre ses pechez. & de s'en amender, & que sa bonté ne permist pas qu'elle fust trompée, ny qu'elle trompast les autres, protestant qu'elle estoit disposée de receuoir toute sorte de mépris & de confusion, pourueu que son nom fust glorifié: mais qu'ayant tousiours mis toute sa confiance en luy, & en la protection de sa sainte Mere, elle esperoit de n'estre pas confonduë; neantmoins que sa Diuine Bonté fust accomplie, & qu'elle supplioit sa misericorde, de consoler du moins son Confesseur, qui paroissoit si triste, & si desolé.]

Elle continuoit sa priere, & ses larmes; & les sœurs s'estans aussi prosternées, s'estoient iointes à elle; & nostre bon Pere encore qui sentoit vn redoublement de ses peines, craignant d'auoir excédé en sa correction; lors que l'esprit de Dieu luy fit connoistre *qu'elle nedeuoit pas se fâcher; que tout iroit bien, & qu'elle en verroit bien tost des effets.* Cette connoissance portant, quant à elle son effet, changea d'abord le cœur de cette fille; de façon qu'au lieu de la crainte, & de la tristesse dont elle estoit trauaillée; elle se trouua remplie de ioye & de confiance. Aussi continuant ses prieres: *pourquoy donc Seigneur, adiousta-t'elle confidamment, laissez-vous ainsi nostre bon Pere dans l'incertitude, & dans les angoisses qu'il souffre: le Seigneur luy fit entendre pour la seconde fois, que c'est de la sorte qu'il épreune, & purifie ses seruiteurs, & qu'il fait les choses qui luy sont agreables; qu'il en tireroit sa gloire, & qu'elle en receuroit le profit, & la consolation avec son Confesseur.*

A peine nostre pieuse fille s'estoit leuée de l'Oraison, & auoit essuyé les larmes, que la tristesse, & la ioye auoient tirés de ses yeux; que comme elle s'approchoit du Pere Yvan pour

luy rendre compte de sa priere, Dieu confirma sa parole par l'execution de sa promesse. L'Archeuesque arriua à l'heure mesme; & ainsi que le Seigneur auoit promis, il se comporta d'une façon bien differente de celle qu'il auoit fait apprehender: car ce bon Prelat ne fut pas plustost entré dans cette petite, mais deuote Communauté, que sentant, ie ne sçay quoy de Diuin, que le Saint Esprit y auoit répandu, il se trouua entierement changé; de maniere que les filles s'estans prosternées pour luy demander la benediction; il la leur donna fort amiablement, & leur commanda de se releuer. Apres quoy il parla à nostre Fondateur, & à nos filles avec grande affabilité; & s'estant doucement informé de leur dessein, & de leurs exercices, non seulement il témoigna estre content de la conduite de nostre bon Prestre, & de sa Congregation: mais encore il fit connoistre qu'il en estoit resiouy, & grandement edifié.

En suite il approuua cette mesme Congregation des filles de Nostre Dame de Misericorde: il ratifia les permissions, que son Vicaire auoit desia données; il en accorda de nouvelles, & offrant avec tendresse sa protection à nostre bon Pere, & à ses filles, il leur promit de les aymer, & de les aider de tout son pouuoir; & qu'il aüroit tousiours en leur endroit, le cœur d'un Pere, & d'un vigilant Pasteur. Le succès montra que ce changement estoit vn effet du don de Dieu: parce que, depuis cette premiere visite, ce Prelat conceut, & conserua vne haute estime, & vne tendre bien veillance pour nos pieuses personnes: De telle sorte qu'il parloit depuis de cette Congregation à tout le monde, avec des sentimens de respect, & d'amour, comme d'un ouurage de Dieu. Il se declara mesme ouuertement en nostre faueur; & s'opposa à ceux qui vouloient nous susciter de nouueaux troubles. Enfin iusques à la mort, il a continué dans ces sentimens; ayant souuent aduoué à diuerses personnes, que la premiere fois, qu'il auoit visité nostre Congregation; son ame auoit esté touchée des sentimens Diuins; & qu'il auoit conneu par les mouuemens extraordinaires, que la grace excita pour lors dans son cœur,

312 FONDATION DE L'ORDRE
que Dieu habitoit dans cette Communauté naissante, & y es-
toit fidelement seruy.

CHAPITRE XXXV.

*Le Pere Yvan souffre vne rude persecution, refusant d'accepter
un employ pour ses filles incompatible à son dessein.*

COMME c'est le propre de Dieu, tirant le bien du mal, de consoler ses amis, par les choses qui les affligent, de les appuyer par ceux qui le persecutent, & de se servir de la haine mesme de leurs ennemis, pour leur procurer le salut; ainsi que Saint Zacharie a dit dans son Cantique. Nous pouvons dire que la malice du Demon produit des effets tous contraires; puis que tirant le mal du bien, il afflige les bons, par les choses qui les deuroient consoler, il les persecute par ceux qui seroient obligez de les appuyer, & il se sert mesme de leurs amis pour les faire souffrir, & contrecarrer leur dessein. Nous auons veu la preuue de la premiere partie de cette proposition dans le Chapitre precedent: nous verrons la preuue de la seconde dans celui-cy.

Ceux qui s'opposoient à la Congregation du Pere Yvan, furent fort surpris du succès de la visite de l'Archeuesque; voyans tout à fait le contraire de ce qu'ils auoient esperé: parce que tout où l'Archeuesque trouuoit l'occasion de parler de nos pieuses filles, il les proposoit cōme des personnes d'une grande pieté & d'une vertu extraordinaire, & il témoignoit en estre si satisfait, que c'eust esté choquer ses sentimens, & se rendre suspect de haine, ou de quelque passion, que d'auoir osé entreprendre de les blâmer en sa presence. Ils prirent donc une autre route, & n'ayant peu attirer le mépris, ny l'indignation de l'Archeuesque contre l'entreprise de nostre zélé Ecclesiastique; ils voulurent se servir de l'estime mesme, & de l'affection que le Prelat luy portoit, pour empêcher l'establissement de la Congregation,

Comme on cherchoit dans la ville d'Aix des personnes d'une solide vertu, & d'une piété approuvée, pour leur commettre le soin, & la conduite des filles penitentes, que l'on avoit nouvellement enfermées dans une maison particulière, les adversaires de nostre Fôdateur ietterent les yeux sur la Cōgregation pour luy faire donner cét employ par les Superieurs: de maniere qu'ils creurent que l'Archevesque l'agreeroit d'autant plus volontiers, qu'il sembloit estre plus convenable à la misericorde, dont nos filles faisoient profession; & plus conforme à la haute estime, que ce mesme Prelat témoignoit avoir de leur vertu.

La chose reussit d'abord, de la façon qu'elle avoit esté premeditée, car non seulement le Prelat receut agreablement cette proposition; mais encore presque toutes les personnes les plus considerables de la ville témoignèrent estre de ce sentiment; qu'il falloit donner la conduite des penitentes aux filles de la Misericorde. Chacun disoit, [que c'estoit une occupation qui avoit du rapport au titre qu'elles avoient choisi, & qu'elles ne scauroient jamais exercer une plus grande misericorde, que d'assister par leurs soins, & par leurs exemples des personnes qui avoient quitté le peché, & ne desiroient plus que d'en obtenir le pardon par la penitence, & la pratique des autres vertus.]

Les amis mesmes de nostre bon Pere, & ceux qui connoissoient la vertu de ses filles, ne repugnoient pas à cét employ: au contraire ils estoient d'avis qu'elles le devoient accepter, apportant diverses raisons, pour le leur persuader, & particulièrement celle cy. [Que cét employ effaceroit toutes les mauvaises impressions, que l'on avoit voulu donner contre leur Congregation: puis que l'Archevesque, & son conseil rendoient par là un témoignage authentique de leur sagesse, & de leur integrité; les iugeant non seulement exemptes de vice, mais encore capables de corriger les plus vicieuses; & que non seulement elles estoient vertueuses, mais encore dans un estat de pouvoir communiquer la vertu aux autres, par la force de leurs exemples, & la pureté de leurs instructions.] Enfin tout le monde témoignoit approuver le choix que l'on

faisoit de nos filles, pour la direction des penitentes.

Il n'y auoit qu'elles, & leur Fondateur qui receuoient vne extrême affliction de ce traité, si bien qu'elles ne pouuoient pas mesme en ouyr la proposition, sans en sentir de la crainte, & du trouble. Nostre bon Pere auoit conneut par plusieurs voyes extraordinaires, la fin que Dieu demandoit de sa Congregation, & l'employ que la sainte Vierge assignoit à ses filles, fin & employ entierement opposés au gouuernement des penitentes, quel Archeuesque leur presentoit. Il voyoit par là son dessein perir, & qu'il n'y auroit pas d'esperance de le restablir, s'il estoit vne fois destruit. Cependant il n'osoit en parler, ne iugeant pas que le temps fust encore conuenable, ny que les esprits fussent disposés à le recevoir. D'autre part il ne scauoit par quel moyen, il pourroit refuser la demande du Prelat, & resister à la force de ceux qui le faisoient agir. Ses aduersaires estoient puissants sur l'esprit de l'Archeuesque, & ses amis l'abandonnoient: parce qu'ils s'accordoient avec eux en cette rencontre; taschant de luy persuader, & à ses filles de condescendre à la volonté des Superieurs.

Il ne luy restoit plus que son refuge ordinaire, & son azile accoustumé: c'est à sçauoir, les pleurs, & les soupirs deuant Dieu, & deuant la Sainte Vierge Mere de Misericorde: prier, trauailler, faire penitence, & attendre avec l'humilité l'euenement des choses, selon que la Prouidence en auroit ordonné, c'estoient les vertus qu'il pratiquoit en ces occasions, & les armes, dont il se premunit contre cét orage, qu'il preuit deuoit estre fort long, & tres fascheux. Cependant l'Archeuesque le fit appeller, pour luy declarer ses intentions, & les luy faire executer. Il y alla, mais remply de crainte, se voyant entre deux grandes extremitez, ou de n'estre pas fidelle à Dieu, s'il adheroit aux sentimens du Prelat, ou d'irriter, le mesme Prelat, s'il se roidissoit à les refuser selon les connoissances qu'il auoit de sa Congregation.

Mais il éuita l'un & l'autre de ses escueils; le Saint Esprit luy ayant suggeré des paroles, qui satisfirent à sa conscience, & ne déplurent pas à l'Archeuesque, ny aux personnes de son conseil. Car apres que le Prelat luy eut déclaré son intention

tention de commettre la conduite des penitentes à ses filles, & qu'il luy eust témoigné qu'il desiroit que cela fust, & qu'il s'y preparast; il fit cette sage & humble réponse : *Monseigneur, vous estes le Maistre : vous pouvez disposer de tout à vostre volonté. Je ne suis qu'un pauvre Prestre, qui n'ay jamais eu autre pretention, que de faire la volonté de Dieu. Je ne pense pas que Dieu exige des filles de la Misericorde, ce que vostre grandeur leur propose. Toutesfois qu'elle s'informe de leur volonté, & qu'elle les fasse examiner pour connoistre à quoy elles sont propres : apres quoy elle pourra ordonner ce que le Seigneur luy inspirera.*

L' Archevesque estant satisfait de cette réponse de nostre humble Ecclesiastique, le renuoya avec honneur, & avec demonstration d'amitié : mais les personnes de son conseil, & ceux qui ne cessoient de le pousser contre nostre bon Prestre, n'en furent pas trop contents. Car remontrant au Prelat, qu'il ne se devoit pas fier aux paroles du Pere Yvan, qu'ils disoient estre rusé & dissimulé ; ils tascherent de luy persuader, de s'adresser à ses filles, & sans exiger avec civilité leur consentement ; les obliger de faire ce qui leur seroit commandé, autrement les menacer de détruire leur Congregation, & ne plus permettre qu'elles vécussent sous la direction de leur Confesseur.

Comme ce bon Prelat avoit beaucoup d'estime pour nostre pieux Ecclesiastique, & de tendresses paternelles pour les filles de la Congregation ; il ne voulut pas user de son autorité en cette affaire avec la rigueur qu'on luy conseilloit. Ainsi répondant à ceux qui le sollicitoient, *il faut, dit-il, donner du temps au Pere Yvan, & à ses filles pour prier Dieu, sur ce que nous leur avons proposé : apres quoy elles diront leur sentiment, que nous ferons examiner par des personnes capables d'en iuger sainement, & par nostre conseil.* L'on ne pouvoit desirer des paroles plus judicieuses, ny plus fauorables, que celles-là, si elles eussent eu leur effet ; mais ceux qui pour détruire l'ouutage de nostre Fondateur avoient entrepris l'affaire, agirent avec tant de pouvoir sur l'esprit du Prelat, qu'ils le gagnerent à eux, de façon qu'ils luy persuaderent, que sans

auoir égard aux sentimens du Pere Yvan, & de ses filles, qui en cette rencontre estoient suspects; parce qu'il s'agissoit de leur propre cause; il deuoit vser de pleine autorité, & les contraindre de faire ce que son conseil trouueroit à propos.

L'on peut bien dire que la guerre fut alors entierement declarée à nostre genereux Prestre, & que la persecution deuint violente: car l'Archeuesque agissant selon les impressions qu'on luy auoit données, sous les apparences d'un plus grand bien, enuoya dire aux filles de la Misericorde, que son conseil (dont les principaux estoient ceux-là mesme qui estoient contraires à nostre Fondateur) auoit trouué necessaire, de leur donner la conduite des filles penitentes, qu'elles se resolussent d'obeyr, autrement qu'il dissiperoit leur Congregation, & les retireroit de la conduite du Pere Yvan.

Je ne sçauois exprimer la douleur extrême de nostre patient Ecclesiastique en cette occasion: car les craintes dans lesquelles DIEU le conduisoit, s'augmentant, & se fortifiant dans son ame, luy firent endurer d'extraordinaires angoisses. Aussi voyant que la Congregation estoit sur le point d'estre dissipée, il craignoit que ce mal n'arriuast par sa faute, & qu'il ne l'eust attiré luy-mesme par ses pechez; de telle sorte qu'il sembloit que DIEU l'eust abandonné à son naturel, craintif, meffiant, & plustost susceptible de douleur, & de tristesse, qu'à la ioye: car il sentit dās son ame tout ce que la crainte, la desffiance, & la tristesse peut faire souffrir. Dieu permit mesme au Demō, de le ietter dans des obscuritez effroyables; ce qui arriue souvent aux plus grands seruiteurs de Dieu, & dans cēt estat, il fut travaillé de mille doutes, que les connoissances, & les inspirations qu'il auoit eues touchant son dessein ne fussent vaines, & sans effet; craignant d'auoir esté trompé, & de n'auoir pas suiuy les ordres de Dieu; puis que les Superieurs à qui Dieu manifeste sa volonté, & qui sont les Interpretes de sa parole, ne voulant pas qu'il continuast son entreprise, le pressoient d'accepter vn employ, opposé à son dessein.

L'on ne sçauoit dire combien ce trouble & cette crainte luy donnerent de la peine, & luy firent sentir d'amertume. Il court à son azile ordinaire, il continuē de prier, pleurer, &

de gemir deuant le Seign. le suppliât neantmoins de faire sa Diuine volôté, & de n'auoir point d'égard à la sienne particuliere : en suite il fit plusieurs actes d'abandon, de resignation, & de conformité aux ordres de Dieu, de desappropriation, & dépouillement de ses propres desirs : mais le tout estoit mêlé de fiel, de lances & de croix. C'est à dire, de craintes, de doutes, & de tristesse, sans trouuer aucune consolation; de sorte que mesme, lors qu'il parloit à ses filles, au lieu de les consoler, & de les fortifier par ses discours, & par son exemple, Dieu permettoit pour l'humilier dauantage, qu'il semblast les intimider, les affoiblir, & leur oster le courage. C'estoit la conduite ordinaire de l'esprit de Dieu sur cette ame choisie, & sur cette ame forte, de la tenir dans vn estat d'humilité, de souffrance, conforme à celuy de Iesus Christ crucifié.

Cependant l'orage s'augmente, l'Archeuesque veut estre obey; & les filles de la Misericorde se rendent de plus en plus difficiles à executer ses ordres. Tous en blâment nostre patient Ecclesiastique, chacun l'accuse d'estre desobeyssant au Prelat, & d'empescher ses filles de luy obeyr. Enfin la persecution, qui dura près d'vne année deuiant si furieuse; que la Congregation de nos filles, ressemble à la nacelle de saint Pierre, où le fils de Dieu s'estoit endormy au plus fort de la tempeste: aussi crioient elles avec les Apostres, Seigneur, sauuez nous, & commandez que l'orage cesse; & comme le Fils de Dieu exauça pour lors ses Disciples, il exauce aussi ses Seruantes; leur faisant esperer qu'elles ne tarderont pas à iouyr du calme qu'elles desirerent, & que la tempeste dont elles sont agitées se tournera mesme à leur aduantage.

Cela arriua bien tost apres, par l'entremise de ceux là mesmes, que les aduersaires du Pere Yvan employèrent contre luy : car ces personnes qui sollicitoient le Prelat, se plaignant de ce que sa trop grande facilité & douceur estoient cause que les filles de la Misericorde n'obeyssent pas à sa volonté, le porterent d'employer quelques Illustres Prelats des plus considérables de la Prouince, qui estoient pour lors dans la ville d'Aix, & à les prier d'vser de leur connoissance, & de leur credit, pour vaincre les repugnances de nos filles, & les faire

condescendre à son intention. Cette attaque estoit vne des plus dangereuses que ces filles eussent encore eues ; puis qu'il falloit resister à des personnes si puissantes : neantmoins Dieu les fortifia de telle sorte qu'elles en furent victorieuses.

Ces Prelats donc qui sont entr'autres Messire de Barraud Archeuesque d'Arles , & Messire Camelin Euesque de Frezux, visitent nos filles separement, & chacun d'eux apres s'estre informé de leurs exercices , & de leur dessein , leur declare la cause, pour laquelle l'Archeuesque d'Aix les a prié de les voir. Ils s'emploient l'un & l'autre , pour leur faire accepter la conduite des filles penitentes selon l'intention de leur Superieur ; apportant toutes les raisons que leur doctrine , leur eloquence & leur pieté leur peut suggerer en cette matiere , se servant mesme des promesses , & des menaces pour mieux fléchir leur esprit , & gagner leur volonté. Cependant nostre Fondateur estoit en prieres, pour impetrer à ses filles les graces dont elles auoient besoin en cette rencontre ; & ses prieres furent efficaces. Car ses filles resisterent avec courage , répondant neantmoins avec tant de respect , d'humilité , & de sagesse ; que bien loin de rebuter les Prelats par leur resistance ; elles les edifierent merueilleusement bien ; de sorte que les mesmes Prelats estans de plus en plus sollicités par le conseil de l'Archeuesque, resolurent enfin de faire faire vne espee de retraite aux filles de la Misericorde ; & pendant icelle les visiter tous les iours separement esperant par ce moyen de mieux connoistre les dispositions de leur interieur , & les porter plus facilement , à ce que l'Archeuesque en exigeoit , s'ils les en trouuoient propres & capables. Voicy vn nouveau suiet de peine à nostre bon Pere, apprehendant la foiblesse de ses filles, & l'autorité iointe à l'adresse de ceux qui les obseruoient. Car n'auoit-il pas suiet de traindre que ces Prelats apres plusieurs entretiens , & communications, n'imprimassent à ses filles vn autre esprit , & des sentimens contraires à ceux qu'il auoit taché de leur donner : nonobstant cette crainte , il leur destend de ne rien declarer des reuelations , & des autres faueurs extraordinaires que le Ciel leur a départies : quoy qu'apparemment ces choses deussent seruir pour les fortifier, & pour faire

approuver leur résistance ; mais il croit que ce n'est pas encore le temps d'en parler. Cependant pour ne pas manquer de son costé, outre les exercices de deuotion & de penitence qu'il fait pour les filles, les visitant tous les iours selon sa coustume, il les encourage, & leur enseigne avec simplicité, mais avec succès ; ce qu'elles doiuent répondre aux Prelats, qui les examinent, & comment elles se doiuent comporter dans la retraite qu'on leur fait faire. Cette retraite estant donc commencée, les Prelats ne perdent aucun moment pour reussir à ce qu'ils ont entrepris. Leurs visites sont continuelles, leurs examens exacts, & leurs persuasions pressantes, quelque résistance qu'ils trouvent du costé de nos filles ; si bien que la retraite se continuë de la sorte avec trouble & avec peine, mais elle se termine avec paix, avec benedictiō & avec ioye de toutes parts. Car les Prelats reconnoissant enfin la pureté, & la solidité du Pere Yvan dans la conduite de ses filles, & l'innocence avec les autres vertus des mesmes filles, dans l'obeyssance qu'elles leur rendirent ; ils furent persuadés que le Directeur, & les penitentes n'agissoient que par les lumieres, & par les mouuemens de l'Esprit de DIEU ; que DIEU seul estoit l'Autheur de leur Congregation, & que sans doute la Diuine prouidence auoit des desseins plus releués sur nostre Communauté naissante, que l'employ qu'on leur vouloit donner, & qui leur auoit fait tant de peine ; & ainsi apres les auoir exhortées à perséuerer de mieux en mieux, ils leur offrirent leur assistance, & leur protection. En effet ayant rapporté à l'Archeuesque d'Aix, ce qu'ils auoient reconnu par les examens qu'ils auoient faits à nos filles durant leur retraite, ils arresterent la persecution que l'on auoit suscitée contre elles, & contre leur Directeur, touchant la conduite des filles penitentes ; & remettant le mesme Prelat dans les sentimens d'estime, & d'affection, qu'il auoit eus pour nostre bon Prestre, & pour sa Congregation ; ils le disposerent à luy continuer sa bienveillance, & à luy accorder amiablement tout ce qu'il luy demanderoit pour le progrès de sa deuote Communauté.

Voila comme le Ciel protegea la cause du Iuste, & prit la deffence des foibles : ceux qui auoient esté employés pour dé-

truire la Congregation de la Misericorde, s'employèrent pour la bien establir; le Superieur qui auoit esté refroidy, deuint plus feruent, & plus zelé; les amis du Pere Yvan se reunirent & accreurent leur foy, & leur estime enuers luy. Enfin comme le Demon auoit voulu tirer le mal du bien, Dieu tira le bien du mal à la plus grande gloire de son nom, & à la consolation de son seruiteur, & de ses seruantes, qui rendirent mille actions de graces à son infinie Bonté.

CHAPITRE XXXVI.

Autre persecution contre le Pere Yvan, touchant sa Congregation.

APRÈS que l'orage, dont nous venons de parler fut entièrement appaisé, nostre bon Prestre commença à goûter vn peu le repos; ayant vne liberté entiere de conduire sa Congregation de la façon qu'il vouloit sans nul empeschement. Tout le monde sembloit approuuer son ouurage: les Superieurs se rendoient fauorables à son dessein, & il sembloit mesme qu'aucun n'osast s'opposer à son entreprise. Mais il ne tarda pas de sentir de nouvelles persecutions plus violentes que les premieres; si bien que nous pouuons dire que Dieu ne luy auoit donné ce peu de relasche, que pour luy faire reprendre ses forces, & ranimer son courage contre les nouvelles attaques qu'il deuoit soustenir. Aussi n'est-ce pas la conduite ordinaire du Seigneur, que de ne laisser long-temps en repos durant cette vie; ceux qui trauaillent vtilement pour sa gloire, & pour leur salut.

Il semble pourtant que nostre genereux Ecclesiastique preuit la nouvelle tempeste qui deuoit s'éleuer contre luy: puis que parlant à ses filles, auant que l'orage parust, & voulant les fortifier; ainsi que le Fils de Dieu encourageoit ses Disciples par la prediction des maux qui leur deuoient arriuer. Filles, leur dit-il, il semble que nous deuous iouyr long-temps de

la paix que nous goustons maintenant ; parce que toutes choses nous sont fauorables : mais ne quittons pas les armes de l'humilité, de la penitence, ny des prieres. Ne relaschons point, mais prenons de nouuelles forces ; demeurons dans la crainte du Seigneur : car nous serons bien tost attaquez avec plus de violence qu'auparauant, & partant il faut que nous ayons bon courage, & une forte confiance, en la protection de la Sainte Vierge mere de Misericorde.

Ces paroleseurent bien tost leur effet, & l'éuenement fit bien connoistre quenostre Fondateur les auoit proferées plus par esprit de Prophetie, que par instinct de foiblesse, ou par mouuement d'apprehension : car les mesmes personnes qui l'auoient tourmenté à l'occasion des filles penitentes, voyant par le succès que leur dessein n'auoit pas reussi, se seruirent encore de la facilité du Prelat, pour susciter de nouveaux troubles contre la Congregation de nos filles. Si bien qu'ils persuaderent à l'Archeuesque [qu'apres le refus que ces filles là auoient fait, de prendre le soin des penitentes ; il deuoit diligemment s'informer, quelles estoient les intentions du Pere Yvan sur leur conduite, & ce qu'il pretendoit faire de la Congregation qu'il en auoit commencée] parce qu'il est, adioustoit il, un homme rusé, qui parle fort peu, & qui déguise ses sentimens ; de telle sorte qu'il feint d'estre simple & niais cependant on voit bien qu'il a quelque grand dessein ; & il est important que les Superieurs le sçachent, pour ne pas se laisser tromper.

Ainsi, poursuiuoient ils, il faut sçauoir s'il pretend que les filles qu'il a assemblées, continuent de vivre en habit seculier dans une simple association, ou s'il desire de les faire Religieuses. S'il veut les tenir dans l'estat d'une Congregation seculiere, il ne leur faut pas permettre de garder une regularité si estroite, que celle qu'elles obseruent, parce qu'elles ne sçauroient la continuer ; si bien que leur relaschement seroit un iour occasion de scandale : s'il veut leur faire faire des vœux, & embrasser la vie religieuse ; il faut obliger ses filles de choisir quelque ordre de Religieuses desia estably, & approuué, ou de recevoir des Religieuses chez elles, pour en estre conduites ; & gouuernées,

selon l'esprit de la Religion. Enfin, continuoient ils sicet hy-pocrite, appellant de ce nom vn Prestre d'une si solide vertu, à la presumption de vouloir entreprendre un nouvel ordre Religieux : il est tres important pour la gloire de Dieu, & pour le bien de l'Eglise, qu'on s'oppose fortement à son dessein, comme à une chose temeraire, impossible & ridicule ; si l'on a égard à sa personne, & à ses qualités, & si l'on considere que c'est un pauvre Prestre, grossier, ignorant, sans autorité, & sans aucun auantage considerable.

C'est ainsi que ces personnes parloient au mépris du seruiteur de Dieu, & de ses œuvres, & qu'ils taschoient d'obscurcir ses vertus, & les talens dont le Ciel l'auoit entichy : mais ils insistent particulièrement sur ce chef, qu'il ne faut nullement luy permettre d'instituer vn nouvel Ordre Religieux ; car c'est le suiet de leur apprehension, le motif de leur plainte, & la cause de toutes les peines qu'ils luy suscitent. L'Archeuesque émeu par leurs persuasions, se porte luy mesme dans la maison des filles de la Misericorde, & aussi tost apres leur auoir donné sa benediction, & fait la priere deuant l'Autel de la Sainte Vierge ; il leur dit en presence du Pere Yvan [qu'il vient s'informer de leur dessein, & qu'il desire sçauoir précisément à quelle fin particuliere, leur Confesseur les a assemblées, si elles desirent viure en habit seculier, comme elles ont commencé, ou si elles pretendent embrasser l'estat Religieux.] Et continuant son discours auant que l'on eust répondu à ses demandes.

Cette Congregation, dit-il, commence à me faire de la peine. Ce n'est pas que Dieu ne m'en ayt donné une grande estime, & des tendresses paternelles : mais ces sentimens n'empeschent pas que ie n'en ressentie beaucoup d'inquietude, & de chagrin. Aussi m'en fait on mille plaintes ; plusieurs continuent d'en murmurer, & mesme les plus deuots témoignent n'en estre pas bien contents ; si bien qu'il ne se passe presque point de iour que ie n'en souffre plusieurs importunités. L'on me demande quelle est vostre façon de viure, quelles sont vos pretentions, & de quel ordre vous desirez estre. Les vns me pressent de vous separer ; les autres me prient de vous maintenir. Il y en a plu-sieurs

seurs qui me font apprehender que cette entreprise ne pourra pas reussir, & qu'elle se détruira d'elle-mesme à vostre confusion, & à ma honte; si ie n'y prens garde de bonne heure. Enfin tous me conseillent de vous faire embrasser un estat de vie qui soit solide & ferme; & que vous ne puissiez pas changer. Apres quoy s'adressant à nostre Fondateur, il luy parla de cette sorte.

Mon Pere, l'on a voulu me persuader, que vous auez dessein de faire une nouvelle Religion de filles, & que pour ce suiet, vous auez assemblé celles cy. Je vous declare, depeur que vous n'y soyez trompé, que ie ne le souffriray iamais, & que mesme ie m'y opposeray pour de tres bonnes considerations. Portés les à faire profession d'un estat regulier: ie le veux bien, mais que ce soit dans un ordre desia estably, & approuvé. Je leur donne le choix des Religieuses qui sont dans mon Diocese, qu'elles regardent l'Institut qui leur sera plus agreable; ie consens volontiers qu'elles le choisissent; mesme ie vous promets, que ie m'employeray avec zele pour leur satisfaction; mais que l'on ne me parle du tout point de faire un nouvel Institut: car ie n'en scaurois souffrir la proposition. Aussi croit-il que mon autorité n'est pas assez ample pour une si haute entreprise; & quand mesme i'en aurois le pouuoir, i'ay mille raisons qui m'empeschent d'y consentir. Pensez donc serieusement à ce que ie vous propose, & apres que vous en aurez prié Dieu, & Nostre Dame de Misericorde; & qu'en suite vous en aurez pris une derniere resolution; rendez-moy precisement réponse: afin que ie delibere ainsi que ie dois sur le suiet de vostre Congregation.

Le P. Yvan ne fut pas surpris de cette nouvelle proposition, quoy qu'entierement opposée à son dessein, parce que l'ayant preueü, il s'y estoit préparé avec ses filles. Il ne laissa pourtant d'en estre sensiblement affligé, comme si c'eust esté vne punition de ses fautes; estant la coustume ordinaire d'attribuer à ses offenses tout ce qui luy arriuoit de fascheux. Il répondit toutesfois comme s'il n'eust point eu de trouble, ny d'apprehension: en sorte qu'il fortifia ses filles, & encouragea mesme le Prelat contre ceux qui le faisoient agir.

Ainsi, apres auoir humblement demandé la grace du saint

R r

Esprit, répondant à l'Archeuesque d'une façon respectueuse, & qui avoit neantmoins quelque chose de libre : *Monseigneur*, luy dit-il, *il ne faut pas perdre courage à cause des troubles, & des persecutions que le Demon suscite contre les pauvres filles de la Misericorde, & contre leur pauvre Confesseur. Nous prions bien fort vostre grandeur de n'apprehender aucune chose, & qu'elle ne se lasse point de proteger l'œuvre du Seigneur, nonobstant les plaintes, & les murmures des personnes qui ne sont pas bien informées de nos intentions. Nous penserons serieusement à ce que vostre grandeur nous a recommandé; nous en prions le Seigneur, & la sainte Vierge nostre bonne mere de Misericorde. Cependant Monseigneur, soyez s'il vous plaît certain, que nous ne désirons que l'accomplissement de la volonté de Dieu, & de la vostre; que nous renerons comme celle de son Lieutenant.*

Quoy que l'Archeuesque témoignast quelque agréement pour cette réponse, il faut pourtant advoüer qu'elle ne le satisfit pas entierement; aussi n'estoit elle pas precisement conforme à ses demandes, outre qu'il remarqua tres-bien, qu'encore que les filles montrassent de tres-grandes inclinations, pour estre Religieuses; elles ne faisoient toutesfois paroistre nulle disposition pour aucun Ordre religieux desia estably, ny aussi de vouloir admettre en leur compagnie aucunes Religieuses, pour se faire instruire dans les pratiques de leur profession. Cela n'empescha pas que sortant de chez elles, il ne leur donnast de nouvelles marques de son affection, leur reiterant les promesses qu'il leur avoit faites, de les proteger en tout ce qui dependroit de luy: mais il leur repeta que c'estoit à condition qu'elles ne songeroient point à faire vn nouvel ordre religieux, adioustant qu'en ce caslà, il se declareroit ennemy de leur entreprise, comme d'une chose temeraire & pernicieuse.

C'estoit pourtant le dessein que *DIAV* avoit reuelé à nostre bon Pere, & ce qui l'avoit obligé d'entreprendre sa Congregation de ses filles: mais il n'osoit le manifester, iusques à ce que le S. Esprit luy eust fait connoistre qu'il estoit temps de le decouvrir; preuoyant bien qu'il y auroit mille obstacles à

vaincre, & des persecutions sans nombre à surmonter. En effet il auoit commandé à ses filles de n'en parler du tout point, leur ayant mesme deffendu d'en faire paroistre aucun indice. Mais quoy qu'il s'estudiaist à cacher son dessein ; ses aduersaires ne laissoient pas d'en auoir de grandes coniectures ; si bien qu'ils y furent confirmés, quand ils connurent que nostre Fondateur ne vouloit pas consentir qu'on mist ses filles sous la direction d'aucunes Religieuses. Car c'estoit vne marque qu'il aspiroit à vn nouuel Institut ; puis qu'il refusoit les anciens, faisant neantmoins mener à ses filles vne vie tres reguliere ; de sorte que ce fut ce qui augmenta la persecution, & la fit durer fort long temps.

Le Prelat sollicité par ces personnes, qui ne cessoient de luy dire que le Pere Yvan estant vn homme fin & dissimulé, il estoit à craindre qu'il ne trompast tout le monde, si l'on ne venoit à connoistre ses ruses, ce Prelat dis-je, faisoit viuement presser nos genereuses filles de declarer leur intention, & celle de leur Confesseur, & de se resoudre, ou à se separer, ou à choisir quelque Ordre Religieux desia approuué. Le plus fort de l'attaque tomboit sur nostre bon Prestre, comme sur le Chef, & le Directeur de la Congregation ; aussi n'oubloit on rien pour l'intimider, pour l'affliger, & pour le contraindre d'abandonner tout à fait son entreprise.

Nostre patient Ecclesiastique répondant avec humilité, & avec vn si grand mépris de soy mesme qu'il sēbloit vouloir s'aneantir, ne disoit pour sa iustification : si non[qu'il estoit vn pauvre Prestre, qu'il auoit ce qu'on disoit de luy, qu'il estoit grossier, & ignorant : mais qu'on ne deuoit pas s'adresser à luy touchant la Congregation des filles de Nostre Dame de Misericorde ; & qu'on ne deuoit pas aussi la luy attribuer ; que c'estoit vn ouurage du Seigneur, & vn effet des prieres de la Reine des Cieux. Quant aux filles qu'il dirigeoit, il asseuroit qu'elles ne pretendoient faire autre chose que de suiure la volonté Diuine, adioustant qu'il ne croyoit pas qu'aucune creature y peust resister, qu'il esperoit que le Seigneur feroit voir dans le temps la pureté de leurs intentions ; & que cependant on auoit grand tort de les molester, puis qu'elles n

portoient nul dommage à personne , & qu'elles ne s'employent qu'à servir Dieu , & la sainte Vierge , menans vne vie tres innocente , dans l'exercice du trauail , & dans la pratique des plus regulieres vertus.]

Si l'Archeuesque eust agi par luy-mesme , il auroit esté satisfait des paroles de nostre bon Prestre ; parce qu'elles estoient raisonnables , Chrestiennes , & accompagnées d'une douceur angelique , & d'une tres-profonde humilité ; mais estant poussé par ses aduersaires , bien loin de témoigner qu'il en fust content , il se comportoit comme estant irrité contre luy. En effet il s'en plaignoit comme d'un homme fin & adroit ; qui sous apparence de simplicité estoit opiniastre dans ses sentimens , resistoit aux Ordres des Superieurs , & portoit les filles de la Congregation à faire la mesme resistance. Cette contention du Prelat avec les filles de la Misericorde dura fort long temps ; pendant lequel le Prelat continuoit ses demandes avec plaintes , & avec menaces , & les filles par le conseil de leur Directeur , persistoient dans leur premiere réponse ; *qu'elles ne desiroient que faire la volonté de Dieu , & celle des Superieurs ; mais qu'elles demandoient du temps pour prier & pour se determiner à l'estat de vie qu'elles deuoient embrasser.*

Ce fut environ ce mesme temps que le Pere Yvan escriuit la 34. & la 35. de ses Lettres à vne personne de grande pieté , dans lesquelles il implore le secours de ses prieres , & luy declare ses peines , ses troubles , & ses apprehensions au suiet de la Congregation de ses filles , & des contradictions qu'on luy suscitoit. Le Lecteur pourra les voir dans le Liure , qui en est imprimé , sans que ie les rapporte en ce lieu , de peur d'estre trop prolix.

Enfin comme le pere Yuan , & ses filles ne pouuoient plus resister aux instances de l'Archeuesque , qui ne vouloit plus leur octroyer aucun delay ; apres plusieurs prieres , penitences & autres exercices de deuotion ; le Ciel leur enuoya vn secours dont elles auoient desia éprouué le pouuoir. L'Archeuesque d'Arles , & l'Euesque de Freux , dont nous auons parlé , s'estans derechef trouués dans la ville d'Aix ; nostre pre-

lat les pria de visiter vne seconde fois les filles de Nostre Dame de Misericorde, pour les resoudre suiuant ses intentions à faire choix d'un Ordre religieux desia approuué, ou à recevoir des Religieuses chez elles pour en estre conduites. Ces illustres Prelats apporterent mille raisons à nos filles, & se seruirent de toute leur autorité, pour leur persuader de suivre laueuglement les intentions de leur Superieur : mais elles sans declarer leur veritable dessein. répondirent avec tant de respect, tant de sagesse, & tant de force, que ces Prelats ne iugeans pas à propos de les presser dauantage, se retirerent, témoignans qu'ils en estoient satisfaits. Et en suite faisans recit à l'Archeuesque d'Aix du succès de leur visite; ils le porterent à donner du relasche au Pere Yvan, & aux filles de la Congregation, & de ne permettre qu'on les inquietast sur ce point de choisir vu Ordre religieux; iusques à ce qu'elles mesmes s'y fussent determinées.

CHAPITRE XXXVII.

L'Archeuesque oste la conduite des filles de la Misericorde au Pere Yvan, & en commet le soin aux R. R. P. P. Iesuites.

IL sembloit que la Congregation des filles de la Misericorde, & le Fondateur d'icelle deuoient iouyr de quelque repos, apres tant de troubles, & que l'on deuoit approuuer la conduite, apres en auoir connu la solidité par tant d'examens & tant d'épreuues, apres dis ie tant de marques que Dieu auoit données de sa protection en leur faueur : neantmoins la persecution continua, & deuint mesme si forte & si violente, que l'on persuade à l'Archeuesque d'oster au pere Yvan la direction des filles de la Congregation, & de la commettre à d'autres Confesseurs. C'estoit bien vouloir faire courir risc de naufrage à cette petite nacelle, que de changer le Pilote qui l'auoit si heureusement gouuernée; c'estoit bien vouloir es-

branler cét edifice ; que d'en oster la principale Colonne : enfin c'estoit bien vouloir desoler ce troupeau , que de le soustraire à son legitime pasteur , pour en donner la charge à des estrangers ; si la Sainte Vierge mere de Misericorde n'eust puissamment protégé son ouurage , le conseruant , & l'affermissant par les mesmes voyes , dont on voulut se seruir pour le destruire.

Nos aduersaires voyans eschoüer toutes leurs entreprises contre nostre Congregation , eurent encore recours à celle-cy , qu'ils iugerent la plus solide , & la plus efficace à leur intenion. Aussi desesperoient-ils de venir à bout de leur dessein , tandis que nostre bon Pere continueroit à conduire les filles de Nostre Dame de Misericorde ; comme au contraire , ils croyoient que nostre Confesseur se dépiteroit de ce changement , qu'ils estimoient luy estre iniurieux , & qu'abandonnant son dessein , il ne leur donneroit plus la peine de le combattre. En effet l'Archeuesque approuua la proposition qu'ils luy en firent ; les autres Prelats qui auoient examiné nos filles , y consentirent aussi , apres quelque resistance ; si bien qu'on leur fit trouuer ce procedé raisonnable , quand on leur proposa que d'autres Confesseurs , n'estans preoccupés d'aucun dessein particulier , comme le Pere Yvan le pouuoit estre , auroient plus de liberté d'examiner , & de connoistre la capacité de ces filles , & d'empescher qu'elles ne fussent trompées , & ne trompassent les autres.

Ce pretexte estoit specieux , il me semble pourtant , qu'il estoit iniuste , & contraire aux desseins de Dieu , qui s'estant seruy du Pere Yvan pour commencer cette Congregation sembloit vouloir aussi se seruir de luy pour la continuer. En effet c'estoit à luy particulierement que la Diuine sagesse auoit fait connoistre ses intentions , touchant la conduite de ses filles là , & assurement c'estoit luy faire vne grande iniure , que de luy oster vn employ ; où apres tant de soins , tant de travaux , & tant de souffrances , il auoit si heureusement reussi ; le luy oster dis-je , comme s'il y eust commis quelque manquement considerable ; & cependant l'on ne peut iamais decouurir aucun ne faute dans sa conduite. Mais il semble que le tort qu'on

faisoit aux filles de la Misericorde estoit encore plus grand, de les priver d'un Confesseur pour qui elles auoient toute l'estime, la foy & le respect necessaire pour profiter de ses instructions, & d'un Directeur, qui seul ayant vne parfaite connoissance de leur interieur, & de leurs affaires, scauoit luy seul par quelle voye ellesdeuoient estre dirigées; d'un Confesseur qui auoit fait, & souffert pour elles tout ce qu'un vray Pere peut faire & souffrir pour ses propres enfans, si bien qu'il estoit à craindre que de nouveaux Confesseurs leur voulussent donner des desseins, & des sentimens opposés à ceux qu'elles auoient desia, & les mener par des voyes contraires à celles que l'Esprit de Dieu leur auoit inspirées; ce qui ne pouuoit que leur faire endurer des gehennes extrêmes, & détruire les fondemens de leur Congregation.

Quoy qu'il en soit, l'Archeuesque ordonna au Pere Yvan de ne plus confesser les filles de la Misericorde, & commanda à celles cy, de faire election d'autres Confesseurs parmy les Prestres seculiers, & les Religieux qui estoient dans la ville d'Aix. Nos pauvres filles verserent des torrens de larmes dès qu'on leur signifia la volonté du Prelat; témoignant d'auoir la plus sensible affliction, qu'elles eussent encore ressentie. Mais la desolation de nostre bon Pere ne fut pas moindre; car il croyoit que Dieu ne luy faisoit oster la direction de ses filles, que pour le punir de ce qu'il s'en estoit rendu indigne par ses pechés; neantmoins parce qu'il s'agissoit de son interest, il témoigna vn parfait dépouillement en ce qui la regardoit; de maniere qu'il montra vne entiere resignation aux ordres du Ciel. Ainsi non seulement il receut l'ordonnance de l'Archeuesque, sans aucune plainte ny resistance: mais encore ils'y soubmit avec vn profond respect, & vne humilité parfaite.

Il porta mesme ses filles à obeyr au Prelat avec vne entiere soumission, les encourageant & les consolant par ces paroles: *que Dieu protegeroit leur Congregation contre les efforts de toutes les creatures; qu'elles ne deuoient apprehender que le peché, & que si elles estoient bien fideles à leur vocation, Dieu feroit auancer leur dessein par les moyens que les creatures vou-*

droient employer à la détruire. (Cependant pour executer le mandement de l'Archeuesque , apres beaucoup de prieres , & de penitences , il conseilla à ses filles de demander au Prelat, qu'il les mist sous la conduite des Peres Iesuites , dont il estimoit grandement la direction. Elles suivirent le conseil de leur Fondateur , de sorte que nous pouuons dire que Dieu recompensa leur obeyssance : car l'Archeuesque leur ayant accordé tres amiablement leurs demandes , leur dit encore pour les consoler ; qu'il ne pretendoit pas les priver tout à fait du P. Yuan , si non pour la confession , & la conduite interieure , que pour le reste il estoit bien aise , qu'il leur continuast ses soins & ses assistances avec le mesme zele qu' auparauant.

Ce furent deux grands lenitifs , qui adoucirent vne partie de l'amertume de nos pauvres filles , dans ce changement de Confesseur ; le P. Yuan en fut aussi consolé ; parce que connoissant la pureté & la solidité des Iesuites , il espera qu'ils contribueroient beaucoup au progrès de sa Congregation , pour laquelle il n'auoit iamais eu d'autre pretention , que celle de la gloire de Dieu , & de l'honneur de la sainte Vierge mere de Misericorde ; aussi ne fut il pas frustré de son attente ; car les Peres Iesuites que l'Archeuesque commit , entre lesquels estoient le R. P. Guillaume pour lors Recteur du Colledge d'Aix , & le R. P. Maunier qui en estoit Procureur , Religieux tres pieux , tres sçauans , & tres intelligens en la conduite des Ames. Ces Peres là dis ie , prirent des soins extraordinaires , & vserent d'une merueilleuse vigilance pour s'acquiter de leur commission.

Comme il s'agissoit de bien connoistre les vertus , & les défauts des filles de la Misericorde , & le dessein de leur Congregation qu'elles n'auoient pas encore bien expliqué , pour sçauoir si l'on deuoit leur permettre , ou leur deffendre de la continuer , & comme il s'agissoit encore d'examiner à quels emplois elles estoient propres : il ne se passoit presque aucun iour que ces Peres ne les visitassent alternatiuement , & bien souuent plusieurs fois dans vn mesme iour ; si bien qu'ils s'arrestoient quelquesfois avec elles , les deux & les trois heures entieres , pour obseruer avec plus de loisir leurs paroles , & leurs

actions. Ils les interrogerent tantost en general, tantost en particulier, dans le Tribunal de la penitence, & dans des conuersations familières; mêlant avec adresse les paroles de consolation, & les applaudissemens, avec la rigueur, & les mortifications, dont ils se seruoient pour éprouuer leur vertu. Quelques fois ils les aduertissoient de l'heure qu'ils viendroient les voir: mais le plus souuent pour pouuoir les surprendre, ils y alloient lors qu'elles les attendoient le moins.

Enfin ces sages Directeurs pour estre mieux informés de tout ce qui concernoit nos filles, & la conduite que leur Fondateur leur auoit donnée, ne se contentant pas de la connoissance qu'ils en pouuoient auoir par leurs paroles, & par les témoignages tres sinceres, qu'elles rendoient de l'estat de leur ame, de leurs exercices, & de leurs affaires; ils vouloient eux-mêmes estre les témoins de leurs actions. Ainsi ils taschoient autant qu'ils en auoient le loisir d'assister à leurs exercices, quand elles entendoient la sainte Messe, quand elles traualloient manuellement, & quand elles prenoient leur refection. Cet examen le plus exact, & le plus rigoureux qui se peust faire, dura plusieurs mois; pendant lesquels ces Peres, pour ne se pas tromper dans la connoissance de la conduite du Pere Yvan, & de la Congregation, employerent tous les soins, toutes les inuentions, & toutes les adresses innocentes, que la Charité & la prudence Chrestienne permettent en semblables rencontres.

Pendant aussie ce temps-là, nostre genereux Ecclesiastique, bien loin de se rebuter enuers ses filles, parce qu'il n'en auoit plus la direction; leur témoigne plus de bien veillance qu' auparauant: car leur continuant ses soins & ses trauaux; comme il n'estoit plus leur Confesseur, il taschoit de les seruir en toute autre chose: de maniere qu'il estoit leur Aumosnier, leur celebrant chaque iour la Messe dans leur Chapelle, il estoit leur Econome, trauallant pour pouruoir à leurs necessitez; il estoit leur Agent; parce qu'il auoit grand soin de leurs affaires; il estoit leur Protecteur, parce qu'il prenoit leur defence contre tous qui les attaquoient: en vn mot, il se comportoit comme leur vray amy, s'interessant dans tout ce qui les

regardoit avec le zele d'une parfaite charité, & les tendresses d'un tres bon Pere.

Mais s'il faisoit paroistre sa charité envers les filles de la Misericorde; il ne donnoit pas de moindres marques de son humilité, & de sa defférence envers les Peres Iesuites qui en estoient les Directeurs : car il exhortoit sans cesse ses filles à les honorer comme des Anges enuoyés de Dieu, à auoir grande foy, & grande confiance en eux, & à leur obeyr en tout avec soumission & fidelité. Il confirmoit encore par ses exemples ce qu'il enseignoit par ses discours : car il rendoit luy-mesme toute sorte de respect à ces Peres; les receuant avec demonstrations de ioye & de tendresse; traittant avec eux à cœur ouuert; n'entreprenant aucune chose pour les filles de la Misericorde, qu'après leur en auoir demandé aduis, & après en auoir receu leur consentement. Si bien qu'encore qu'il fust plus auancé en âge; neantmoins il suiuiot leur sentiment comme un agneau la voix du Pasteur; & il leur obeyssoit, comme un Nouice au commandement de son Maistre.

Ce témoignage de vertu que nostre bon Prestre donnoit aux Peres Iesuites, & ceux qu'eux mesmes remarquoient dans la conduite tant interieure, qu'exterieure de nos filles, leur firent enfin trouuer ce qu'ils cherchoient. Car après diuers examens, & après plusieurs differentes épreuues & consultations; Ils connurent, & ils furent persuadés que cette Congregation estoit un ouurage du Ciel, que Dieu, & sa sainte Mere y presidoient, & qu'ils y estoient purement & fidelement seruis. Ils connurent, dis-ie, que le Pere Yvan estoit un vray seruiteur de Dieu, un homme de verité, un Prestre fidele, & sans reproche, & un Ouurier Apostolique, qui n'agissoit que dans les principes de l'Euangile, & selon les mouuemens de l'Esprit de Dieu. Ils connurent aussi que les filles qui composoient cette Congregation menoiens une vie exempte de blasme, une vie pure, Angelique, & d'une tres-grande edification.

En suite ayant déclaré à l'Archeuesque, les sentimens qu'ils auoient conneus touchant nostre Fondateur, & la Congregation de ses filles; ils tascherent de persuader à ce Prelat, de laisser au Pere Yvan seule la libre conduite du dessein qu'il auoit

entrepris ; puis qu'il s'en acquittoit si dignement : adioustant que l'on deuoit espeter que DIEU continueroit ses benedictions sur son entreprise , & la feroit reussir à sa plus grande gloire , & à l'auancement du salut des Ames. Ce bon Prelat sembla ne leur vouloir pas donner vne croyance entiere, la premiere fois qu'ils se presenterent à luy ; car il les renuoya, les chargeant derechef de continuer leurs soins , & leurs vigilances , & de prendre bien garde de ne pas se laisser tromper.

Mais enfin , comme ils perseuererent durant plusieurs mois, à luy confirmer les mesmes choses, il les creut , & il reprit les premieres tendresses qu'il auoit eues pour nostre Fondateur, & pour sa Congregation. Il est vray qu'il n'auoit iamais entierement perdu l'estime & l'affection qu'il leur portoit , mais il faut auouer qu'on luy auoit dit tant de choses contre ce bon Pere, & contre ces vertueuses filles , que sa charité s'estoit beaucoup refroidie en leur endroit : de sorte qu'il auoit beaucoup diminué de son estime. Il fut donc remis par les rapports veritables que les Iesuites luy firent : mais il ne voulut pas permettre qu'ils desistassent de gouverner cette mesme Congregation, si bien qu'il les pria d'y continuer leurs soins & leurs seruices coniointement avec le Pere Yvan, & les chargeant de luy en faire de temps en temps de fideles relations.

Qui n'admirera en cette rencontre la protection du Seigneur enuers nostre fidele Ecclesiastique , & enuers ses filles voyant que leurs aduersaires leur auoient fait donner des Confesseurs estrangers pour la ruine de leur Congregation, & que la prouidence Diuine se seruit de ces mesmes Confesseurs pour la fortifier , & pour la conduire iusques à la derniere perfection.

CHAPITRE XXXVIII.

Le Pere Yuan cherche vne maison pour les filles de la Misericorde, & Dieu benit ses soins.

PENDANT que les PP. Iesuites trauaillent à diriger les filles de nostre Congregation, la Prouidence diuine fait naistre l'occasion au Pere Yuan, de s'occuper à l'auancement de leurs affaires externes : en sorte qu'il semble que DIEU ne l'a déchargé du premier soin, que l'on a commis aux Iesuites; que pour le faire vacquer avec plus de loisir & de liberté au second. Il semble, dis-je, au iugement des hommes qu'il ait receu vne grande iniure, & vne sensible affliction de ce que l'Archeuesque luy a osté le pouuoir de confesser les filles de la Misericorde : mais au iugement de Dieu, c'est vne douce & amoureuse conduite pour le bien de ses filles; afin, que ce bon Prestre estant plus libre, puisse s'employer avec plus de soin à leurs affaires, & particulièrement à leur chercher vne maison conuenable, ou vne place pour y bastir vn Monastere, conformément à leur intention.

Car il faut auoïr que ces pieuses filles auoient vne grande necessité de changer leur habitation; estans si mal logées, & souffrant de si grandes incommodités dans leur premiere maison, que ç'a esté vne merueille, de ce qu'elles ont peu y demeurer plusieurs années, sans y mourir, ou du moins sans y contracter des maladies mortelles. Il n'y auoit dans leur logis, ny iardin, ny cour, ny autre lieu qui leur donnast moyen de prendre l'air; si bien qu'elles souffroient beaucoup, parce que gardant vne étroite closture, elles n'osoient sortir hors des portes, ny se mettre aux fenestres, non pas mesme les ouvrir tout à fait, de peur d'estre veuës des maisons voisines: en sorte qu'elles estoient comme des prisonnieres enfermées dans vn cachot. D'ailleurs leur logis estant fort estroit, & n'ayant que quelques chambres, lors que le nombre des filles s'ac-

trut, elles furent contraintes de se presser, & de se servir d'un mesme lieu pour diuers offices, ce qui les incommodoit extraordinairement.

Il est vray que ces vertueuses filles souffroient avec amour toutes ces incommodités sans se plaindre, & que mesme par le conseil, & l'exemple de leur Fondateur, elles estoient disposées à les souffrir toute leur vie; mais il estoit necessaire qu'elles eussent vne habitation plus ample, & plus commode pour y faire les fonctions de la vie religieuse. Ainsi DIEU suscita des personnes qui les y porterent, & le Pere Yvan s'y employa avec diligence, non toutesfois sans souffrir en certe rencontre de grandes peines, de fâcheuses longueurs, & des difficultez ennuyeuses. Il semble d'abord que la chose est facile: car dès qu'on sçait le dessein de nostre bon Pere, on luy offre vne maison qui est propre à son dessein, & qui ayant esté veüe par ses principales filles, & par ses amis, est iugée tres-commode. Il en traite donc avec le Maistre, il tombe d'accord avec luy touchant le prix, & il assigna mesme vn iour precis pour en passer le Contract. Mais comme chacun croit que l'affaire est assurée; DIEU ne permet pas qu'elle reussisse, & sa sagesse en donne mesme vne tres-claire connoissance en la maniere qui suit.

Pendant que l'on attend de part & d'autre ce iour assigné pour le Contract; vne des filles de la Misericorde faisant sa priere à Dieu: *Monseigneur*, luy dit-elle tout simplement, *estes-vous bien content de cette maison pour vos filles? car nous ne desirons que suivre vostre bon plaisir.* Elle fait la mesme demande, & avec la mesme simplicité à la Mere de Dieu, qui répondant avec son Fils, fait connoistre que ce n'est pas le lieu qu'elle a choisi pour y accomplir ses desseins. *He pourquoy repartit nostre innocente fille, avec vne ingenuité toute singuliere, pourquoy n'avez-vous pas empesché le traité de cette maison là, puis que ce n'estoit pas vostre volonté que nous l'achetassions. Je le feray sçauoir en son temps,* luy répond le Seigneur: & en suite, il luy monstra [que l'achapt de la maison ne reussiroit pas, & qu'il falloit la laisser & songer à acheter vne

place pour y bastir vn Monastere, adioustant qu'il desiroit vn sepulchre neuf.]

Quoy que cette fille crut que la chose arriueroit de la façon qu'elle luy auoit esté declarée, toutesfois pour agir prudemment & avec plus d'assurance, elle en rendit compte aussi tost au Pere Yvan, adioustant qu'elle ne croyoit pas que le traité de la maison qu'on vouloit acheter, s'acheuast, & qu'elle estimoit que Dieu auoit d'autres intentions, luy faisant le recit de ce qu'elle croyoit auoir connu dans son oraison. Nostre Fondateur, n'eut pas plustost ouy le rapport que cette fille luy fit de ce qui luy estoit arriué pendant ses prieres, qu'il luy répondit, mais à son ordinaire avec des paroles si mortifiantes, & d'une façon si terrible qu'il sembloit la vouloir aneantir. Aussi estoit-ce vn effet de la discretion de nostre Ecclesiastique de traiter ainsi cette fille; pour la dépouiller du goust, & de l'attache; si elle en eust eu des choses extraordinaires qui luy arriuoient.

Il vsoit encore de cette seuerité enuers elle, pour la preseruer des illusions du Demon, en luy faisant pratiquer l'humilité, la crainte, la soumission, la deffiance d'elle mesme, & les autres vertus contraires aux impressions de l'ennemy. Mais disons que c'estoit encore vn effet merueilleux de la prouidence surnaturelle, qui pour faire mieux exercer à nostre bon Pere ces mesmes vertus dont ie viens de parler, elle luy cachoit bien souuent les grandes choses qu'elle vouloit faire pour luy, & par luy, & permettoit qu'il en eust mesme des sentimens contraires; le tenant par cette voye entre la crainte & la confiance qui est vn milieu assésuré & exempt d'illusion. Ainsi ce bon Prestre ayant receu vn extrême déplaisir des paroles de sa fille, & craignant qu'elle ne fust trompée, la fit encore mortifier par les Peres Iesuites qui en estoient pour lors les Directeurs, iusques à la faire priuer de la sainte Communion pour quelques iours. Mais la chose ne laissa pas d'arriuer de la façon que la fille l'auoit prédite; car le iour assigné pour passer ce Contract de l'achapt de cette maison là, ayant esté remis, l'affaire fut absolument abandonnée, & sans nul effet.

Quelques personnes considerables qui s'interesseient dans les affaires de nostre Congregation, presserent fort le Pere Yvan de louer vne grande maison pour ses filles, à cause des incommodités qu'elles receuoient dans la leur. Ce bon Prestre ayant des sentimens contraires leur resista durant quelque temps, mais persecuté par leurs sollicitations iusques à en estre troublé; il consentit enfin par cette occasion qui paroissoit fauorable. Il se trouua vn homme qui offrit sa maison pour la luy louer, & au mesme temps vn autre s'offrit qui promit d'en payer charitablement le loyer; de maniere que nos filles auroient esté logées sans qu'il leur en cousta rien. Cette rencontre auantageuse anima si fort les amis de nos filles à l'acheter que leur Fondateur ne peut plus refuser son consentement; quoy qu'il le donnast avec regret. L'euénement montra bien-tost que ses repugnances estoient raisonnables, & que sans doute elles luy estoient suggerées par l'E'sprit Diuin; car peu de iours apres, celuy qui auoit promis de louer sa maison estant mort, & l'autre qui s'estoit offert d'en payer la rente, ayant témoigné du refroidissement, ainsi que nostre éclairé Prestre auoit apprehendé, l'affaire resta comme auparauant; & les amis du Pere Yvan eurent suiet d'admirer ses lumieres, & de se repentir de l'auoir troublé par leurs trop pressantes sollicitations.

Le dessein de ce sage Ecclesiastique estoit d'acheter vne maison toute faite & acheuée pour ses filles; & il auoit mesme de tres-grandes repugnances à acheter vne place, & y faire bastir pour les raisons qu'il apporte luy mesme dans sa Lettre 85. Mais il s'y resolut par l'aduis de ses amis, aymant mieux suiure le sentiment des autres que le sien qu'il tenoit suspect; ainsi qu'il dit dans la Lettre que ie viens de citer. Il est vray que Dieu ce semble, le dispoia par vne voye extraordinaire à donner son consentement, en ce qu'une de ses filles luy rendant compte de ses Oraisons, luy decouurit que toutes les fois qu'elle prioit pour leur nouveau logement l'E'sprit de Dieu luy faisoit voir vn iardin, luy declarant que c'estoit la place qu'il falloit acheter, & y bastir le premier Monastere de son Institut. Cette veuë porta nostre Fondateur à accepter la pro-

position qu'on luy fit, de traiter d'un iardin propre à y faire un beau bastiment, de telle sorte qu'il chargea un de ses amis d'en faire l'achapt avec les Propriétaires.

Cet amy receut la commission; mais ayant differé plus de trois mois de rendre réponse, comme on l'interrogea de sa commission, il répondit qu'on luy auoit demandé un prix si excessif de cette place, qu'il auoit creu n'en deuoir pas parler dauantage; adioustant qu'il ne luy conseilloit pas, ny à ses filles d'en traiter, parce qu'il n'esperoit pas qu'on la leur vendist à un prix raisonnable.

Quoy que cette réponse affligeast nostre Fondateur tres-timide de son naturel; neantmoins le desir & l'esperance d'auoir cette mesme place, s'augmenta en son ame, & dans l'esprit de ses filles faisant voir que si la difficulté estonne les méchants qui ne se confient qu'en eux, & aux creatures qui sont de tres-foibles appuys elle encourage les gens de bien, qui ne mettent leur esperance qu'en Dieu, dont la vertu estant infinie se manifeste d'autant plus qu'elle fait des choses plus difficiles, & moins faisables aux yeux des hommes. Mais ce qui encourageoit encor nostre bon Prestre, & nos vertueuses filles, & ce qui fortifioit leur esperance, estoit vne reuelation Diuine faite à vne d'icelles, que dans la cinquième année, elles seroient logées commodément dans un Monastere, ainsi qu'elles le desiroient.

Cependant la quatrième année estoit commencée, & il n'y auoit encore rien de disposé pour cela, ny aucune apparence que la prediétion deust auoir son effet. C'est ainsi que Dieu éprouue ses seruiteurs, leur faisant esperer d'euenemens certains, lors que toutes choses paroissent y estre contraires. En en effet on offre diuerses maisons, & places au Pere Yvan, pour le logement de ses filles, il en traite, il fait tout ce qu'il peut de luy-mesme, il employe ses amis, & tout cela se trouue inutile, & sans effet.

Enuiron ce temps comme nos filles estoient tristes, & en quelque façon découragées, de ce que ce leur sembloit, le Seigneur differoit long-temps à leur donner le secours qu'il leur auoit promis, la diuine Bonté les consola, & renouella
leur

confiance par vne espee de reuelation qui fut faite à Anne Berenguer. Elle estoit en Oraison recommandant à Iesus-Christ & à sa sainte Mere de Misericorde les affaires de sa Congregation, & se plaignant amoureuxment d'un trop grand delay, lors que l'Esprit de Dieu luy dit que Sara la mere d'Isaac, la femme de Manue mere de Sanson, Anne la mere de Samuel, & Elisabeth la mere de saint Iean Baptiste, auoient esté reputées steriles, & neantmoins auoient enfanté des fils merueilleux, & d'un mérite extraordinaire apres beaucoup de pleurs, de desirs de prieres, & d'autres bonnes œuvres; qu'elle deuoit auoir vne esperance semblable, touchant la Congregation du Pere Yvan. Le mesme esprit luy fit voir qu'un nauire ne laisse pas d'aller bien vite, quoy que ceux qui sont dedans semblent ne bouger d'une place; le mesme luy presenta vne tres belle piece de Brocart toute roulée & pliée en telle sorte que l'on ne voyoit que le dehors, qui n'auoit aucun éclar; tout à coup l'on déploya cette piece qui parut d'une si grande estendue qu'elle sembloit couvrir toute la terre, & s'étendre d'un bout du monde à l'autre: l'on la replia aussi tost, & l'on dit qu'en son temps elle seroit déployée pour tousiours, & qu'elle aplicast ces verités à la Congregation ou Institut, qui deuoit estre des filles de Nostre Dame de Misericorde, pour qui elle faisoit son Oraison.

Quoy que ces verités mystericuses deussent encourager nostre sage Prestre à esperer quelque secours extraordinaire pour l'auancement de son dessein, il ne laissoit pas de craindre, & de recourir à son appuy ordinaire, les prieres, & les penitences, pour bien connoître, & executer fidelement la volonté de Dieu. En effet nous pouuons dire que le Seigneur l'exauça car comme vne de ses filles à qui l'Esprit de Dieu se communiquoit d'une façon tres singuliere, luy demanda avec grande ferueur, & dans sa simplicité ordinaire; *pourquoy il permettoit tous ces troubles, & toutes ces difficultez contre le dessein qu'elles auoient de se loger, & nonobstant que sa bonté sembla auoir promis le contraire?* le suppliant encore de luy declarer, *s'il estoit son*

*plaisir, qu'on retint la place que l'on auoit tasché d'acquies-
rir. L'esprit de Dieuluy fit connoistre [qu'il permettoit ces
troubles, & ce retardement pour faire meriter son seruiteur,
& ses seruantes : & qu'il vouloit absolument, que l'on ne trai-
tast que de la place, dont nous auons parlé.]*

Quelques iours apres nostre F^odateur poussé par cette mesme
fille, à qui Dieu auoit fait connoistre ses intentions, s'adressa
derechef au Maistre de la place que l'on veut achepter : & il le
trouua si bien disposé, que celuy-cy le preuenant la luy offre
à vn tres-iuste prix, & le presse d'en passer le Contract. No-
stre bon Prestre receut vne grande ioye de rencontrer en cét
homme de si bonnes dispositions, bien contraires à celles qu'il
auoit témoignées depuis plusieurs mois ; aussi connut-il que
Dieu y auoit operé, & que c'estoit vn effet de ses promesses.
Et ainsi pour ne pas perdre vn moment de temps, il accepte
son offre à l'heure mesme, & deux ou trois iours apres il passe le
Contract, & en paye le prix conuenu.

CHAPITRE XXXIX.

*Le Pere Yvan fait bastir le premier Monastere de son Ordre
parmy les benedictions du Ciel, & les contra-
dictions de la Terre.*

AVSS I-TOST que nostre Fondateur eut achepté la place
dont nous auons parlé, il traita avec vn Architecte
pour y faire construire son Monastere, & l'Architecte ayant
touché vne somme d'argent par auance, en entreprit & en
continua la construction avec tant d'assiduité & de diligence ;
que le bastiment fut acheué, & en estat d'estre habité dans la
mesme année, qui estoit la cinquième depuis le commence-
ment de la Congregation des filles de Nostre Dame de Mi-
sericorde : la cinquième, dis-ie, en laquelle, selon les pro-
messes du Ciel, ces filles-là deuoient estre commodement lo-

gées dans vne maison propre, & conuenable aux exercices de la vie religieuse.

Il sembloit que Dieu estoit ialoux de sa parole; car il fauorisa l'entreprise du nouveau Monastere, en telle sorte que tout le monde en parloit comme d'une grande merueille; & il n'y auoit aucun de ceux qui le consideroient sans passion, qui n'auoïast qu'on le deuoit plustost regarder comme vn ouurage des mains du tout puissant, que comme vn effet du travail, & de l'industrie des hommes. Aussi toutes choses se trouuerent elles tres fauorables: les materiaux sembloient naistre sur le lieu, tant il y auoit de facilité à les trouuer, sans qu'on en eust fait aucune preparation. Iamais les Maçons & les Manœuvres, n'ont paru plus disposés à trauailler, ny poussés plus fortement à faire toutes les diligences possibles, si bien qu'ils en estoient eux mesmes dans l'estonnement, & en parloient comme d'une chose extraordinaire; disant qu'ils sentoient en eux de plus grandes forces quel'ordinaire, & qu'en effet ils faisoient plus de besogne qu'ils n'auoient accoustumé: sans toutesfois y employer plus de temps, & sans s'y épuiser davantage. Ils passoient encore plus auant; car voyant que l'ouurage s'auançoit beaucoup plus qu'ils n'auoient esperé, *Il semble, disoient-ils, que les Anges trauaillent la nuit, pendant que nous nous reposons, parce que le matin la besogne paroist plus auancée qu'il ne nous sembloit le soir precedent.*

La merueille parut enoore, en ce que le nombre des Ouuriers étant tres grand, quoy que le lieu ne fust pas d'une vaste étendue, il n'y eut pourtant iamais aucun desordre, ny aucune confusion, non pas mesme aucun fascheux accident. Il est vray que quatre ou cinq des Ouuriers tomberent des plus hauts ponts du bastiment, chargés de lourds fardeaux: mais leur chute fut fauorable; car les vns n'en receurent que quelques legeres meurtrisseures, les autres qui furent griefuement bleffez receurent vne prompte guerison, le Pere Yvan ayant prié pour eux, & formé le signe de la sainte Croix sur leurs parties bleffées.

L'on pourroit dire qu'il arriua vn accident funeste, en ce qu'un enfant âgé de cinq à six années, étant tombé dans vne

profonde fosse, où l'on auoit détrempé de la chaux viue y fut estouffé. Mais nostre bon Prestre estima cét euenement tres-fauorable à l'enfant, qui par ce moyen obtint sans peine la possession de la gloire celeste, dont peut estre il se seroit rendu indigne par ses pechés; s'il eust atteint l'usage de la raison. Aussi estant sollicité de prier pour luy, & de demander sa vie à la Mere de Dieu, *A Dieu ne plaise*, répondit-il, *que ie fasse vn si grand tort à ce fortuné enfant. Il est bien heureux, & Dieu luy a monstré vne grande misericorde de l'auoir fait mourir dans l'innocence de son Baptisme; si bien que ie le rendrois misérable, si i'obtenois qu'il reuint en vie: puis qu'outre les miseres qu'il souffriroit dans le temps, il seroit en peril de se rendre malheureux pour l'Eternité.* Ainsi il témoigna de la ioye de cét euenement, qui donnoit de la tristesse aux autres; parce qu'il regardoit le salut de l'ame. Aussi là où les autres, qui ne regardoient que la perte du corps, en parloient comme d'un grand malheur; nostre éclairé Prestre en parloit comme d'une grace, & d'une benediction, non seulement à l'égard de l'enfant; mais encore à l'égard de son Monastere, qui auoit esté l'occasion de cette mort, de cette mort, dis-je, qui fut suivie d'une felicité eternelle.

Mais la plus grande benediction que l'on puisse admirer dans la construction de ce Monastere consiste, à mon aduis, en ce que la prouidence Diuine fournit au P. Yvan, & à ses filles de quoy suruenir aux frais qui estoient necessaires. Ce fut de vray vne singuliere merueille, parce que nostre bon Pere estoit tres pauvre, & ses filles aussi, outre qu'il n'y eut aucun bien-faicteur, ny bien-faitrice. Certes les amis de nostre Fondateur sçachant sa pauvreté, & celle de ses filles, s'étonnoient de ce qu'il auoit osé entreprendre vn ouurage de si grande dépence; de maniere qu'ils luy demandoient de temps en temps avec admiration, où est-ce qu'il trouuoit de quoy fournir à tant de frais, sçachant bien qu'il ne demandoit rien & qu'il n'auroit pas voulu estre à charge à personne.

Ceux d'entre ses amis qui auoient voulu se charger de prendre garde aux Ouuriers, & de conduire la besogne; voyant les frais immenses où il s'estoit engagé, craignoient de tom-

ber en confusion, & que l'argent venant à deffailir, ils ne peussent acheuer ce qu'ils auoient entrepris. Le Pere Yvan mesme en estoit fort inquieté; Dieu le permettant ainsi pour le tenir dans la voye ordinaire qui estoit celle de la Croix, & des souffrances interieures, Mais qui croira que les peines que cette apprehension luy donnoit alloient si auant, qu'il en faisoit mesme des plaintes à ses filles, comme s'il eust voulu en receuoir quelque consolation! *Helas filles*, disoit-il, tout triste, & tout abattu: *ne tomberons nous point en confusion touchant le Monastere que nous auons entrepris? aurons-nous bien dequoy fournir iusques à ce que tout soit acheué? Mon bon Pere*, répondoient les filles, *il ne faut rien craindre: le Seigneur & sa sainte Mere de Misericorde ont promis que tout iroit bien. Soyez assuré qu'encore que nous soyons pauvres, nous aurons plus d'argent qu'il ne sera necessaire, pour paracheuer nostre bastiment.*

L'euénement fit connoistre que ces vertueuses filles parloient avec fondement, & que les promesses qu'elles disoient que Dieu leur auoit faites, estoient legitimes; parce que le Monastere estant paracheué, & pontueu des choses necessaires pour l'habitation; elles eurent dequoy satisfaire à tout; si bien qu'il leur en resta encore pour employer à des aumônes, & à d'autres œuures de pieté.

La merueille en cecy est d'autant plus grande que ces bonnes filles, pendant que l'on bastissoit le Monastere, refuserent par le conseil de leur Fondateur vne somme tres-considerables qu'une Dame leur offrit, n'ayant voulu accepter qu'une tres-petite aumosne d'une autre Dame. La premiere estoit vne femme de tres haute vertu, vefue d'un President au Parlement; & qui auoit tousiours eu de grandes inclinations pour nostre Congregation; elle offrit à nos filles par pure Charité vn present de dix mille escus, pour les aider dans leur pieux dessein, & en estre participante: mais elles l'en remercierent, & l'aduertirent de conseruer son argent, pour vne mauuaise affaire où elle en auroit grand besoin. Cette affaire arriua bien tost; de façon que la Dame conceut vne si haute estime de nos filles, & du Pere Yvan qui les auoit éle-

uées, qu'ellen'en parloit iamais, que dans des termes admiration, comme des personnes d'une extraordinaire vertu.

L'autre Dame qui donna vne tres petite aumosne fut vne femme inconnue, que l'on n'auoit iamais veue, & que l'on ne vit iamais depuis. Cette personne estant venue à la porte de la maison des filles de la Misericorde, fit dire à la Superieure qu'elle auoit vne charité à luy donner de la part de Dieu. Ces derniers mots de la part de Dieu, firent haster la Superieure, & venir promptement au deuant d'elle, pour la recevoir. Quin'auoit creu que cette Dame, qui paroissoit fort venerable & maiestueuse, auoit quelque grande somme à donner? elle fit plus de ceremonie que si elle eust eu des thresors à distribuer: car faisant approcher la Superieure, & ayant tiré de sa pochette son present serré dans vn linge, elle luy prit la main, & la tenant par vne des siennes, de l'autre elle luy compta son aumosne. Apres cela luy fermant la main, tenez, luy dit-elle, ma fille voila ce que ie vous donne, ayez soin de le bien conseruer. Ce riche present pour lequel elle auoit tant fait de ceremonies, ne consistoit qu'en neuf doubles tournois.

Cecy paroist ridicule; il y a pourtant quelque chose de bien merueilleux. Car outre que la Superieure receut ces neuf doubles avec autant de demonstration de ioye & d'actions de graces enuers la Dame inconnue, que si elle luy eust donné vn thresor; cette petite aumosne apporta plus de consolation au Pere Yvan, & aux autres filles de la Congregation, que si on leur eust departy de tres grandes sommes. D'ailleurs on remarqua que ces neuf doubles estans mis dans le coffre de l'argent de nos filles, furent comme vne semence de benediction: car depuis ce temps-là, Dieu multiplia miraculeusement le peu qu'elles auoient; si bien qu'encore comme nous auons desia dit, qu'elles fussent pauvres, & qu'elles n'eussent aucun appuy humain; elles en eurent de reste, apres en auoir payé tous les frais de leur bastiment.


Mais ce qui donna encore plus de suiet de douter, qu'il n'y eust quelque chose d'extraordinaire en cette Dame inconnue, & en son present; c'est que l'on apperceut quelque

chose de saint dans son visage & dans ses paroles , & vne grande Maieſté en son port ; outre qu'elle disparut apres auoir donné son aumosne , sans que depuis on en ait peu apprendre aucune nouuelle. Cela auoit donné lieu à nos pieuses filles de croire que cette Dame estoit sainte Anne Mere de la sainte Vierge , ou quelque autre sainte du Paradis ; quoy qu'il en soit elles ont tousiours mis cette rencontre entre les benedictions que Dieu leur auoit départies , pendant qu'elles faisoient construire leur premier Monastere.

Or parmy ces benedictions , & ces suiets de ioye , il ne manqua pas d'y auoir des contradictions , & des occasions de tristesse : car le Demon suscita presque autant de bruit , & de murmure contre ce premier Monastere des filles de la Misericorde , qu'il en auoit autresfois suscitè contre celuy que sainte Therese fit bastir dans Auila en Espagne. Il y eut d'abord vn terrible murmure contre le Pere Yvan , de ce qu'estant vn pauvre Prestre , & n'ayant aucun secours , il auoit entrepris vn si grand bastiment. Les vns disoient , que c'estoit vne entreprise temeraire , dont il ne receuroit que de la confusion : les autres qu'il se repentiroit de la croyance qu'il donnoit aux réueries de ses filles , comme si c'estoient des reuelations. On adioustoit encore que ce Monastere seroit pour quelques riches Religieuses , à qui le Pere Yvan seroit contraint de le vendre pour payer les Ouuriers qui y traualloient. Nostre bon Pere prenant ses humiliations de la main du Seigneur , les supportoit avec grande resignation : mais ce ne fut pas la plus rude mortification qu'il souffrit en cette rencontre. Aussi n'y auoit il à craindre que de la part de l'Archeuesque , qui estant le Superieur pouuoit seul empescher la continuation de nostre nouveau bastiment , & ce fut de ce costé là , que le Seigneur permit qu'il fut le plus sensiblement affligé : de maniere que ce Prelat poussé par des personnes mal affectionnées , ayant fait appeller nostre bon Pere apres plusieurs paroles seches & mortifiantes sur le suiet de nostre nouveau Conuent Pere Yvan ; luy dit-il, *vous faites bastir vn beau Monastere ; ne croyez pas qu'il soit pour les filles de vostre Congregation , car ie le destine pour vn autre bonne œuvre que*

j'ay en main. Nostre docile Ecclesiastique qui marchoit dans vne grande simplicité, croyant aux paroles de l'Archeuesque, en ressentit d'abord vne horrible crainte, & vne extrême tristesse; neanmoins y répondant comme s'il n'en eust pas esté émeu *Monseigneur*, repartit-il, *j'espere que vostre grandeur ne veut faire que ce que Dieu luy inspirera, & ie seray content, pouruen que la volonté de Dieu soit faite, parce que ie ne desire rien autre.*

Il proféra ces paroles avec tant d'humilité, & de marques d'une parfaite desappropriation, que le Prelat en fut touché, & changea à l'heure mesme de sentiment; si bien que luy parlant d'une maniere plus douce, *Mon Pere*, luy dit-il, *ne craignez rien: ie suis si edifié de vostre conduite que ie me confirme de plus en plus dans l'estime de la bonne œuvre que vous avez entreprise. j'ay voulu vous éprouver: mais ie connois bien que vous estes indifferent en ce qui vous regarde, & que vous ne recherchez que la gloire de Dieu, & l'accomplissement de sa volonté. Allez mon Pere, soyez assuré de ma bien-veillance, & de ma protection.* A quelque temps de là ce Prelat, visitant les filles de Nostre Dame de Misericorde, leur confirma les offres qu'il auoit faites à leur Fondateur, & leur donnant de nouvelles demonstrations de son affection, il les encouragea aussi à faire continuer leur Monastere, & le mettre en estat qu'elles le desiroient: & ainsi l'œuvre de Dieu s'auançant, le Monastere fut heureusement acheué, comme nous auons desia dit.



CHAPITRE XL.

Oppositions touchant le vœu particulier de la Congregation des filles de Nostre Dame de Misericorde.

PE NDANT que les Maçons travailloient avec toute la diligence possible, pour acheuer l'edifice materiel de nos filles, & que les P. Iesuites s'employoient avec zele, à l'auancement de leur edifice spirituel, c'est à dire à procurer leur perfection interieure, & le progrez de leur Congregation; le Pere Yvan s'occupoit en l'un, & en l'autre : car tous les iours apres leur auoir celebré la sainte Messe, il alloit voir le bastiment, pour donner les ordres necessaires : l'apresdiné il reuenoit chez ses filles leur faire des conferances spirituelles; apres quoy il retournoit encore au nouveau bastiment, pour contribuer de sa presence, & de ses soins en ce qu'il iugeoit à propos.

Les P P. Iesuites visitoient aussi de temps en temps le nouuel edifice, afin d'y faire obseruer les choses conuenables à vne Communauté religieuse : mais leur plus grand soin estant la direction spirituelle de ces bonnes filles, ils s'en acquitoient avec tant de fidelité, & d'application, & mesme avec tant de peine, & de succès, quel on ne scauroit iamais raconter les signalés seruices qu'ils rendirent à cette naissante Communauté. Ce fut aussi ce qui donna vne entiere confiance à nos filles enuers ces R. Peres ; & ce qui les encouragea avec l'aduis de nostre bon Pere à leur declarer naïfvement le dessein principal de leur Congregation, qu'elles n'auoient encore osé decouurir aux Superieurs. C'est à sçauoir, ainsi que nous auons dit dans les Chapitres 23. que si Dieu leur faisoit la grace d'estre Religieuses, elles s'obligeroient par vœu de receuoir dans leur Ordre les pauures Damoiselles, & autres filles d'honneste condition, avec la dot qu'elles auroient ou grande ou petite, pourueu qu'elles les connussent bien

Y u

appelées. Elles adioustèrent qu'elles ctoyoient que c'estoit l'intention de la sainte Vierge leur vnique Mere & Fondatrice, laquelle pour ce suiet leur auoit inspiré leur Congregation, & leur auoit donné son nom de Misericorde : elles raconterent encore à ces Peres les diuerfes predctions, apparitions, & autres graces extraordinaires qu'elles auoient eues à l'occasion de ce grand dessein.

Ces Peres témoignèrent vne grande ioye d'vne entreprise si charitable, si pure, & si vtile à l'Eglise de Dieu, & quoy qu'ils preussent bien les obstacles, & les difficultez qu'il faudroit vaincre pour l'establir; neantmoins connoissant la vertu des filles, & remarquant les merueilles que Dieu operoit tous tous les iours dans leur Congregation, ils approuuerent leur vœu, & les encouragerent à s'y maintenir, & à le deffendre avec vigueur. Cependant parce qu'il le falloit faire approuuer par les Superieurs, ils resolurent apres le consentement du Pere Yvan, & de ses filles d'en faire eux-mesmes la proposition à l'Archeuesque. C'est icy où les troubles qui sembloient estre esteints, se renouellent avec plus de violence, qu'auparauant; car le Prelat n'a pas plustost appris le dessein de nostre Fondateur, que le faisant sçauoir à son conseil, & aux autres personnes dont il se seruoit ordinairement dans l'administration de sa charge; il fait naistre mille troubles contre nostre Congregation. Les aduersaires du Pere Yvan prennent de là suiet de renoueler leurs oppositions, & de faire tous leurs efforts pour détruire ce qu'il auoit entrepris; aussi parlent-ils de son dessein, avec tant de mépris, de dédain, & d'aduersion; qu'ils changent l'affection & les sentimens de bonté que le Prelat en auoit.

Les Iesuites n'oublient rien pour remettre l'esprit de l'Archeuesque, & le faire condescendre aux pieuses intentions de nostre Fondateur; mais les aduersaires l'aigrissans tousiours dauantage l'empeschent de receuoir les impressions fauorables, que ces P. & les autres amis de N. Congregation s'efforcent de luy donner. Nos aduersaires triomphent de cette occasion, qui leur fournit vne si ample matiere de détruire nostre bon Prestre, & ses vertueuses filles dans l'esprit du Prelat,

de façon qu'ils esperent enfin abolir entierement nostre Congregation, apres l'auoir si souuent attaquée sans nul effet. En suite dequoy renouuelant toutes les plaintes qu'ils auoient faites contre nostre patient Ecclesiastique, ils semblent mesme se plaindre du Prelat, de ce que n'ayant pas receu leurs oppositions, il a permis la continuation d'un ouurage, que l'on voit bien maintenant n'estre qu'une pure illusion, & vne grande tremperie; puis qu'il aboutit à un dessein imaginaire, & extrauagant (ainsi le nomment ils) de vouloir s'obliger par vœu à receuoir les pauvres filles sans dot, & sans estre à charge à personne. *C'est un projet, adioustent ils, nouveau, singulier, & extraordinaire, & qui pourtant doit estre suspect dans l'Eglise. Quoy, poursuient-ils, parmi tant de grands Saints, ou de Saintes qui ont fondé diuers Instituts de filles, nous n'en sçauons aucun qui ayt eu un semblable dessein; & quelle apparence y a-t'il que l'Esprit de Dieu en eust reserué la gloire à un pauvre Prestre ignorant, & méprisable, & à des filles de mesme étoffe?* Ainsi appelloient ils nos vertueuses personnes.

Ils adioustent plusieurs autres raisons tirées de la prudence du siecle; mais contraires à la sagesse de l'Euangile; qui ont neantmoins tant de pouuoir sur l'esprit du Prelat, que non seulement il refuse d'approuuer le dessein de nostre bon Pere: mais encore il témoigne en estre en colere, & tout à fait rebuté. Aussi se plaint il contre luy, & contre les filles de Nostre Dame de Misericorde, disant qu'il en a esté deceu, de n'auoir esté informé de leur intention, dès les commencement, & auant que les choses fussent si auancées. Si bien que menaçant de reuoker toutes les permissions qu'il a données, il commence d'agir contre nostre Congregation, comme ayant résolu de la détruire entierement.

Les Peres Iesuites sont fort affligés de voir les obstacles que le Demon suscite contre vne œuvre, qu'apres plusieurs examens, & apres diuerses épreuues, ils connoissent estre si sainte, & si conforme aux intentions du Seigneur, & de la Reine des Cieux. Tous nos amis se trouuent gaandement en peine, & dans de terribles craintes, que nostre entreprise ne se dissipe à la confusion de tant de gens de bien, qui en souhaitent.

tent l'accôplissement. Mais nostre bon Prestre souffre le plus dans cette persecution ; car outre ses peines interieures qui sont extrêmes , & presque continuelles , il est chargé de mépris, de honte & de confusion , & de mille reproches qu'on luy fait ; si bien qu'on le traite comme vn ignorant , & vn homme sans esprit , qui se laisse tromper par les réueries de filles ; & comme vn presomptueux , & temeraire , qui entreprenant des choses impossibles , se sert de la simplicité de ses penitentes , pour leur donner des desseins ridicules. C'est ainsi que l'on parloit de nostre excellent Ecclesiastique , l'un des plus sages , & des plus humbles seruiteurs de Dieu de son temps.

Il n'y a que la Superieure des filles de la Misericorde qui semble ne s'émouvoir nullement de tout cét orage ; car bien loin de paroistre abbatuë , affligée , ou du moins timide ; elle encourage ceux qui sont dans l'apprehension , touchant le succès de son Institut. Elle fortifie ceux qui chancelent dans l'estime de cette bonne œuvre , & console ceux qui sont affligés des troubles de la Congregation. Sa foy & son courage sont tout à fait merueilleux ; si bien qu'elle ne se monstre jamais plus forte , que quand tout le monde semble se soulever contre son dessein ; & lors mesme qu'il y a de plus grandes apparences que la Congregation sera détruite , pour lors , dis-je , elle publie avec plus d'assurance , que cette mesme Congregation sera approuvée , & que l'on en verra bien tost l'établissement , & le progrès.

Nous devons sans doute attribuer le courage , & la constance de cette fille , aux merites , & aux prieres du Pere Yvan qui par vne tres solide humilité , ne voulant paroistre dans l'entreprise de la Congregation , (comme il auoit accoustumé en toute autre bonne œuvre) que le moins qu'il pouuoit , rapportoit toutes choses à cette mesme fille , priant sans cesse , ieunant , & faisant d'autres penitences pour elle : afin de luy impetrer la grace d'estre fidelle & forte dans l'exécution de son dessein ; de maniere que Dieu exauçoit les prieres du Pere en faueur de la fille , car il la reuestoit d'une generosité invincible , la fortifiant mesme par des voyes extraordinaires & merueilleuses ; ainsi que sa prouidence fit voir en cette ren-

contre. Car deux ames de Purgatoire se manifesterent à elle, pour implorer le secours de ses prieres, & pour l'encourager de la part de DIEU, à continuer son dessein, l'assurant qu'elle auroit la consolation de le voir bien tost reussir.

L'une de ses ames estoit celle du sieur de Foresta, Professeur du Roy en Medecine, qui pendant sa vie auoit esté tres-affectionné à nostre Congregation. Aussi en fut il recompensé apres sa mort, comme nous auons parlé cy-deuant dans le Chapitre 32.

La seconde personne qui parut estoit l'ame de Damoiselle N. de Blanc, femme d'une grande vertu, & d'une pieté exemplaire, qui aussi auoit esté grandement zelée pour le bien de nostre Congregation, ayant contribué à la subsistance de nos filles, & donné plusieurs beaux ornemens pour leur Eglise; si bien qu'elle en receut vne ample recompense apres sa mort: car elle fut bien tost deliurée des peines du Purgatoire, par les intercessions de Nostre Dame de Misericorde, qui en estoit sollicitée par le Pere Yvan, & par ses bonnes filles. En suite dequoy certe ame enrichie des Laureoles de la gloire, parut à nostre Superieure, la remerciant du secours charitable qu'elle luy auoit donné par ses prieres, & l'encourageant de la part du Seigneur à poursuiure genereusement la pieuse entreprise qu'elle auoit commencée.

Mais la protection du Tout puissant parut encore avec plus d'éclat, en ce que DIEU mesme sollicité par les prieres de nostre Fondateur, consola & fortifia la fille dont nous parlons; car comme elle prioit par le commandement de nostre bon Pere, demandant à Dieu de faire connoistre ses Diuines intentions à l'Archeuesque: *Ne te trouble point*, luy répondit l'Esprit de Dieu, *Je tireray ma gloire des persecutions que l'on fait souffrir au Pere Yvan, & à sa Congregation. Je trouue mon contentement aux vertus qu'il pratique dans ses peines: plus il y a des combats, plus il y aura de victoires, & mon ouurage reussira avec d'autant plus de gloire & de succès, qu'il y aura eu plus de mépris, & plus d'empeschement. Je pourrois le faire sans trouble, & sans opposition. Mais il est à propos qu'il soit conduit de la sorte, afin qu'on connoisse que c'est moy qui le fais*

contre l'astente des creatures , & nonobstant leurs contradictions.

Cependant la persecution augmentant de plus en plus, l'Archeuesque qui commençoit à n'adiouster point tant de foy au rapport des Peres Iesuites , parce que leur zele les luy auoit tendus suspects ; enuoya deux Euesques au Pere Yvan, & à nos filles pour les dissuader de leur vœu , & les porter à d'autres desseins. Ces Prelats s'adressans à nostre bon Pere le traiterent avec beaucoup de rigueur, le blasmant ainsi que les autres auoient desia fait, de vanité, de presumption & de folie, d'auoir porté les filles de sa Congregation à faire vn vœu, que les Superieurs n'approuueroient iamais, & qu'elles aussi ne pourroient iamais executer qu'avec desordre, & confusion. Ils le presserent encore d'oster cette folle imagination de l'esprit de ces mesmes filles, & ne les plus amuser à semblables impertinences; c'est ainsi qu'ils en parloient d'une façon tres seuerre, & tout à fait humiliante.

Nostre patient Ecclesiastique apres les auoir écoutés avec respect, ne s'arrestant qu'à ce qui regardoit la Congregation, & les vœux des filles de Nostre Dame de Misericorde : *Mes Seigneurs*, leur dit-il, *le ne suis qu'un pauvre Prestre ignorant, rempli de deffauts, ainsi que l'on vous a tres bien informés. Helas ! se m'estonne que vous vous adressez à moy, comme si i'auois quelque pouuoir. La Congregation, & le vœu qu'on improuue avec tant de rigueur, n'est pas un ouurage de mes inuentions, si i'en'estois l'autheur, le tout seroit bien tost destruit, & aneantiz. Dieu seul, & la sainte Vierge ont donné ce dessein, & l'ont protégé iusques à maintenant; de telle sorte que se ne crois pas que les creatures pussent s'y opposer. Comme i'ay connu que c'estoit la volonté de Dieu; se n'ay pas peu, ny deu y resister. Prenez s'il vous plait la peine de voir les filles, & de leur parler, vous oyrez ce qu'elles vous diront, apres quoy vous ferez ce que le Seigneur vous inspirera.*

Les Prelats edifiés de cette réponse, visiterent nos filles, & s'adressans à la Superieure, qui parloit pour toutes ses sœurs, ils luy apporterent mille raisons pour la dissuader de son vœu, qu'ils appelloient vne imagination ridicule, vne extrauagance ou

foiblesse d'esprit, & vne illusion du Demon. La fille les ayant écoutés comme vne douce brebis, ou comme vne petite No- uice, leur répondit en Lion, & en femme forte; si bien que ces Prelats connoissans par la force & le zele de ses paroles, qu'elle estoit poussée du Saint Esprit, en furent si touchés, qu'ils changerent de sentiment. Ainsi au lieu de la dissuader de son intention; ils furent eux-mesmes dissuadés de la leur, & au lieu de presser davantage le Pere Yvan, & sa Congregation, ils s'en declarerent les protecteurs: en effet ils agirent depuis si puissamment sur l'esprit de l'Archeuesque, qu'encore qu'ils ne pussent pas luy faire approuver le vœu, dont il estoit question: ils le persuaderent de laisser en repos nostre Fondateur, & les filles de Nostre Dame de Misericorde, & de leur permettre la continuation de leur entreprise, iusques à ce que le temps eut mieux fait connoistre la volonté du Seigneur.

CHAPITRE XL I.

De la reception des filles de Nostre Dame de Misericorde dans leur nouveau Monastere, & des progrès de leur Congregation.

LE Pere Yvan receut vne grande ioye de voir l'Archeuesque appaisé par le moyen des Prelats qu'il auoit commis, & il en eut d'autant plus de suiet, que l'Archeuesque sembla luy donner quelque esperance qu'il approuueroit le quatrième vœu de sa Congregation. Cette ioye fut encore suivie immédiatement d'une autre grande consolation, qu'il auoit désiré depuis long temps, en ce que le Monastere de ses filles estant acheué de bastir, & mis en estat de pouuoir estre habitée; elles se trouuerent à la veille d'estre deliurées des incommodités de leur petite maison, & de demeurer dans vn lieu conuenable aux exercices de la vie religieuse. C'estoit précisément sur la fin de la cinquième année, depuis le commence-

ment de leur Congregation, & le temps auquel le Seigneur leur auoit promis, qu'elles seroient logées dans vne maison reguliere.

Auant qu'elles se retirassent dans le nouveau Couuent; le grand Vicair en l'absence de l'Archeuesque, apres y auoir celebré la sainte Messe dans vne petite Chapelle, le benit solennellement, assisté d'un grand nombre d'Ecclesiastiques, & de plusieurs autres personnes de condition. Le Pere Yvan parla de cette benediction dans sa Lettre 88. comme d'un effet singulier de la protection de la Mere de DIEU. Voicy ces termes. *Estant necessaire que nos filles se retirent dans leur nouvelle maison, & leur Eglise; n'estant pas encore acheuée; le Prelat leur a permis de faire dire la Messe dans la Tribune & ce qui est un grand miracle de la Mere de Misericorde, cette bonne personne qui a tant fait la guerre à cette Congregation a beny luy mesme cette Tribune, & y a celebré la premiere Messe avec toute la deuotion & contentement de filles, & d'une assez grande compagnie. Il s'est declaré très bon amy de la compagnie de ces pauvres filles: ce qui a grandement edifié tout le monde, & sur tous ceux qui auoient esté troublés de ces persecutions: ce qui est vne grande protection, & puissance de la Mere de Dieu, de changer les cœurs, & nous rendre amis nos ennemis.*

Quelque temps apres, à sçauoir le iour de la Natiuité de la Sainte Vierge, la Dame de Berner, femme du sieur de Berner, pour lors premier President du Parlement de Prouence, & plusieurs autres Dames des plus qualifiées de la ville, accompagnerent les bonnes filles de Nostre Dame de Misericorde dans leur Monastere. Le Pere Yvan assisté de plusieurs Ecclesiastiques les receut à la porte, les faisant entrer en procession; apres auoir entonné le *Te Deum*, qu'elles continuèrent; & acheuerent avec tant de deuotion, & de tendresse, que la plus part ne purent contenir les larmes, que la ioye tira de leurs yeux. En suite il celebra la sainte Messe, & leur donna la communion, en action de graces, de la faueur qu'elles auoient receuë, & pour offrir au Pere Eternel, par Iesus-Christ, & à Iesus-Christ par la sainte Vierge mere de Misericorde toutes

tes les bonnesœuvres qu'on feroit, & que l'on desiroit faire pour son amour, dans cette maison religieuse.

Toute la ville accourut à cette entrée, & la foule fut si grande, que le Monastere qui n'auoit point encore de closture, ne put contenir la moindre partie des personnes qui voulurent le visiter. On vit pour lors vn merueilleux changement que le Seigneur fit à la consideration de son seruiteur, & de ses seruantes : car les murmures, les plaintes, les oppositions, & les calomnies que le Demon auoit suscitées contre nos pieuses personnes, se changerent en vne approbation vniuerselle, & vn applaudissement public. Chacun admire ce qu'il a condamné, l'on approuue ce que l'on auoit reietté ; & tous témoignent du respect, & de la veneration, pour la bonne œuvre qu'ils auoient decriée comme vne illusion du Demon, ou comme vn effet de superbe & de presumption.

Ce changement general touche mesme quelques particuliers, qui s'estoient le plus opposés à nostre Congregation ; si bien que voyant par le succès, que ce ne peut estre qu'un ouurage de l'esprit de Dieu ; puis qu'il s'auance si merueilleusement, nonobstant les oppositions contraires, se rendent affectionnées à nostre Fondateur, & à son Institut, le protegent depuis ce temps là, & luy rendent mille services. Ainsi le nombre des amis de nostre bon Prestre s'accroist, le nombre des filles de Nostre Dame de Misericorde se multiplie aussi, par celles qui se presentent, pour estre associées à nostre Congregation ; desquelles on admet particulièrement celles qui se trouuent propres, c'est à dire qui sont filles de condition ; mais pauvres, qui auroient bien eu de la peine pour la modicité de leur dot, d'estre receuës parmy les Religieuses des autres Ordres desia establis : si bien qu'on les reçoit par charité, commençant à mettre en pratique le quatrième vœu, qui est particulier à cet Institut.

Mais Dieu répandit encore d'autres benedictions sur le Monastere de nos filles : car tous ceux qui s'interessent à leur conseruation, auoient tasché de leur persuader de ne pas habiter dans leur nouveau bastiment, disant qu'elles y contracteroient de tres dangereuses maladies : parce que il n'estoit

passec. Les Medecins alloient mesmes plus auant; car ils asseuroient que l'humidité leur causeroit infailliblement la mort en peu de iours, si Dieu ne les conseruoit par vn miracle. Orce miracle leur fut accordé; puis que bien loin de mourir, ou de contracter de grandes maladies par l'humidité de leurs chambres, elles passerent cinq ou six années, sans qu'aucune d'elles tombast dangereusement malade, & sans mesme qu'elles eussent aucune incommodité considerable: au contraire, celles qui estoient infirmes dans la premiere maison, se porterent mieux dans la seconde, qui selon toutes les apparences deuoit leur causer de nouvelles infirmités.

Cependant l'on trauailloit à acheuer, & à embellir l'Eglise de nostre nouveau Monastere; & ce fut en quoy la sainte Vierge mere de Misericorde fit particulièrement connoistre sa protection: car on ne scauroit exprimer le zele que chacun témoignoit pour l'embellissement de cette Eglise. Tout le monde y accouroit, & chacun y contribuoit quelque chose: de telle sorte qu'elle fut acheuée de bastir, embellie de peintures, & enrichie des vases d'argent qui seruent à l'Autel, & pourueüe d'autres beaux, & précieux ornemens, en si peu de temps, que c'estoit à tous vn sujet d'étonnement & d'admiration: de façon que ceux qui l'ont veu, & qui vivent encore, en parlent comme d'une merueille de nostre siecle.

Certes ie dois dire que la Sainte Vierge estoit la cause des presens charitables que l'on faisoit à ces vertueuses filles, soit pour l'Eglise, soit pour leur entretien: parce qu'elle faisoit des miracles continuels en faueur de ceux qui venoient implorer son assistance dans la nouvelle maison, & en faueur des personnes, qui se recommandoient aux prieres du Pere Yvan, & de ses filles. Cette auguste Princeesse, dis-je, sembloit ne vouloir rien refuser aux souhaits de son seruiteur, & de ses seruantes; de maniere qu'elle operoit sans cesse des merueilles à leur consideration, & le nombre en est si grand qu'il faudroit en composer des volumes entiers pour écrire celles que l'on a particulièrement remarquées.

Leur Eglise en fait foy, par autant de témoignages illustres, qu'il y a de Tableaux votifs, de lampes, de Chan-

deliers d'argent, de riches parements d'Autel, de Chasubles, de vases & semblables choses, qui ont esté données en reconnaissance des graces singulieres, que la Mere de Dieu auoit octroyées par les prieres de nostre Fondateur. Ainsi l'Eglise ayant esté acheuée, & embellie en fort peu de temps, le grand Vicaire la benit avec grande solemnité, & y celebra la premiere Messe, en laquelle le Pere Yvan répondit avec l'humilité, & la modestie d'un Ange. Apres la Messe on fit vne procession à l'entour du Conuent, où assisterent la plus part du Clergé, grand nombre de personnes de condition, & vne tres grande foule de peuple. Cela arriua la veille de Noël, auquel iour on commença d'y mettre, & d'y exposer le tres-adorable Sacrement de l'Autel. Nostre feruent Ecclesiastique ayant prêché durant les festes avec sa simplicité, & sa faueur ordinaire, fit continuer le concours du monde, & admirer de plus en plus les meruelles du Seigneur, & les bontés de la sainte Vierge mere de Misericorde, dans le progrès de sa Congregation.

CHAPITRE XLII.

La Providence Diuine fait donner des Bulles de Regularité aux filles de Nostre Dame de Misericorde.

IL ne restoit plus à nostre bon Prestre pour l'accomplissement de son dessein, que d'obtenir des Superieurs, le pouuoir de lier ses filles par les vœux solempnels de la Religion, & changer leur Congregation seculiere en vn Institut regulier. C'estoit le dernier obstacle à vaincre, pour acheuer l'œuvre de Dieu : mais aussi c'estoit celuy qui paroissoit le plus difficile, & qui demandoit de plus grands soins, & de plus grands travaux; car l'Archeuesque qui pouoit le plus en cét affaire, en estoit tout à fait éloigné, par les impressions qu'on luy auoit données, de ne souffrir aucun nouuel Ordre religieux dans son Diocese.

Ainsi nostre Fondateur , & les filles n'osoient luy parler de leur desir touchant l'estat religieux. Ce Prelat les visitoit assez souuent dans leur nouveau Monastere , leur donnant chaque fois diuers témoignages de bonté & d'affection ; il s'entretenoit bien souuent avec le pere , & quelque fois avec les filles : mais ny les vns ny les autres n'osoient commencer le discours de la vie religieuse ; si bien que l'Archeuesque sembloit apprehender de leur en parler, pour ne leur donner occasion de luy en faire la demande , & n'estre contraint de les affliger en les refusant. Le Pere Yvan aussi , & les filles n'osoient pas luy en faire la proposition , craignant de le fâcher , & de donner lieu à de nouveaux troubles contre le repos de leur Congregation.

Cependant le desir que ces pieuses filles auoient pour l'estat religieux , estoit extrême: C'estoit là l'obiet de toutes leurs pretentions ; le suiet de leurs vœux , de leurs larmes , de leurs penitences , & de leurs entretiens , & la fin de tout ce qu'elles auoient fait iusques alors par le conseil de leur fidelle Directeur. Aussi le sollicitoient elles continuellement à chercher les moyens de leur procurer ce bonheur : mais cét excellent Ecclesiastique les portant tousiours à s'humilier à prier , pleurer , à souffrir , & à attendre avec longanimité le moment du Seigneur : *Filles*, leur disoit-il, *nous deuons auoir patience. Le Fils de Dieu a demeuré quatre mille ans de s'incarner , apres la cheute d'Adam , quoy qu'il eust promis son Incarnation dès le commencement du monde. Pourquoy est-ce qu'il a différé si longtemps ? ce sont des mysteres , adioustoit il , que nous deuons aimer , & adorer en silence. Dieu nous a promis que vous seriez religieuses : cela arriuera au moment que sa diuine sagesse a ordonné , quand sa providence aura fait venir ce moment elle nous donnera tout à la fois ce qu'il nous faut. N'allons pas plus viste que Dieu ; laissons luy faire : cependant prions , pleurons détruisons nos pechez , de peur qu'ils n'empeschent en nous l'œuvre de Dieu , & de sa sainte Mere de Misericorde. Croyons que nous ne meritons aucune faueur , ny grace , ny que Dieu fasse pour nous aucune chose : ayons peur de gaster tout , & estimons nous*

moins que rien. O que ce sera vne grande merueille, si Dieu daigne nous faire misericorde.

C'estoient les discours ordinaires de nostre Prestre parlant à ses filles : discours qui rendoient tousiours à les établir dans la crainte des Jugemens de Dieu, & dans la deffiance d'elles-mesmes. Aussi estoient elles si humbles, qu'elles ne travailloient qu'à se cacher, & à s'aneantir; si bien qu'encore que le desir d'estre Religieuses s'augmentast de plus en plus dans leurs ames; elles n'osoient toutesfois le declarer, non pas mesme s'y arrester de pensée; se dépoüillant de tout desir propre, pour ne souhaitter que l'accomplissement de la volonté Divine: adioustant qu'elles n'estoient pas dignes d'estre Religieuses, & que c'estoit vne bien grande grace, que Dieu daignast les regarder comme les pauvres seruantes. Elles passerent de la sorte environ vne année dans leur nouveau Monastere; viuans en habit seculier, mais menant vne vie retirée, & autant reguliere, que les plus reformées Religieuses de l'Eglise de Dieu.

Ce fut sans doute ce qui leur procura l'aduancement du bien qu'elles desiroient avec tant de ferueur: car lors qu'elles ne s'y attendoient pas, & qu'il n'y auoit encore nulle apparence; la prouidence diuine leur suscita vn bon amy dans la ville d'Avignon, qui sçachant qu'elles vouloient estre Religieuses dans leur nouvelle Congregation, leur enuoya offrir ses seruices pour l'accomplissement de leur dessein. C'estoit le sieur de Cornes Secretaire de la Legation d'Avignon; ce bon amy des filles de la Misericorde estoit vn des plus capables qui pult leur rendre seruice en cette rencontre, à cause de sa charge, & du credit qu'il auoit auprès du Seigneur SForza pour lors Vice-Legat, & qui depuis a esté fait Cardinal.

Ce Vice-Legat outre le pouuoir ordinaire de sa charge, auoit par vn Bref particulier de sa saincteté la puissance d'établir de nouvelles Congregations dans l'Eglise, & de les rendre regulieres sous des regles desia approuuées. Ainsi il ne falloit à nos filles de la Misericorde qu'en obtenir des Bulles, par lesquelles il leur donnast pouuoir de choisir vne regle approuuée, faire les vœux de religion, & dresser des constitu-

tions particulieres : car autrement elles auroient esté contraintes de recourir à sa Saincteté , attendu le refus de leur Archeuesque , & cela leur estoit tres difficile , tant parce qu'estant pauvres , elles n'auroient eu de quoy fournir aux frais qu'il auroit fallu , comme aussi parce qu'elles n'auroient personne qui pust les servir en cét affaire. Et voila que la prouidence Divine leur suscite vn amy puissant , qui preuenant leur demande , & leur priere , de son propre mouuement s'offre de leur obtenir dans Auignon sans nulle peine , ce qu'elles n'auroient pu obtenir dans Rome , que par des travaux immenses.

Il ne faut pas demander avec quelle reconnoissance nos filles receurent l'offre du sieur des Cornes , qui leur fut faite par vn grand seruiteur de Dieu , Carme Déchaussé ; de maniere qu'apres auoir pris conseil des plus habiles personnes d'Aix , & particulièrement des R. Peres Iesuites , qui continuoient leur charité enuers nostre Congregation ; elles prièrent instamment ce bon amy d'exécuter ce qu'il faisoit esperer. Mais si cét amy auoit esté obligé dans ses offres , il se rendit encore plus officieux dans l'exécution ; car quelques iours apres , il enuoya vne minute de la Bulle , qu'elles demandoient , afin que nostre Fondateur l'examinast , & la fist examiner , pour y adiouster , & retrancher ce qu'il iugeroit à propos selon ses intentions. L'on fit pour ce suiet vne nouuelle consultation des plus sçauans , des plus pieux , & des plus experimentez aux affaires des Congregations Religieuses : de façon que toutes choses ayans esté concludës , & la minute de la Bulle dressée , à la maniere qu'il falloit , on la renuoya au sieur de Cornes , avec des remerciemens de sa charité , & de nouvelles prieres d'acheuer ce qu'il auoit entrepris.

Il parut bien que c'estoit Dieu qui agissoit dans cette affaire , ainsi que sa diuine Maiesté auoit fait esperer à ses seruantes : d'autant que le sieur de Cornes , sans autre motif que celuy de la gloire de Dieu , & de la sainte Vierge mere de Misericorde , s'employa avec tant de soin , & de diligence pour faire expedier la Bulle dont est question , qu'il ne cessa de solliciter Monsieur le Vice-Legat , iusques à ce qu'il l'eust obtenuë. La

merueille en cecy est d'autant plus grande , & la Diuine providence y paroist d'autant mieux, que cette Bulle de Regularité fut expédiée & enuoyée aux filles de Nostre Dame de Misericorde, gratuitement , & sans qu'elles ayent du tout rien donné pour l'auoir. Si bien que l'interest n'y ayant point de lieu, ny le respect humain, à quoy peut-on attribuer cette grace, qu'à la bonté du Seigneur , & à la Misericorde de la sainte Vierge, sollicitées par le Pere Yvan, & les filles de la Congregation.

CHAPITRE XLIII.

Dieu suscite de puissans amis aux filles de Nostre Dame de Misericorde , pour faire receuoir leurs Bulles par l'Archeuesque.

LES affaires de nostre bon Prestre touchant la Congregation de ses filles, se trouuoient fort auancées par les Bulles, qui luy donnoient pouuoir de les faire Religieuses, sous la regle de saint Augustin, & de leur dresser des Constitutions particulieres, mais ce n'estoit pas encore assez pour l'accomplissement de cét ouurage : car il falloit faire receuoir les Bulles par l'Archeuesque d'Aix, à qui elles estoient adressées, sans quoy elles estoient inutiles , & de nul effet : ce qui estoit le dernier obstacle qu'il falloit vaincre, le plus grand & le plus difficile de tous, & celuy qui causa plus de peine & plus d'ennuy que les autres , qu'on auoit eus dès le commencement. Aussi apres auoir employé tous les moyens que la prudence humaine peut suggerer, il fallut que le Tout puissant y mit la main, & en vint à bout d'une maniere admirable & surprenante.

Quoy que l'Archeuesque fust affectionné à nostre bon Pere & aux filles de sa Congregation, & qu'il accordast avec grande facilité tout ce qu'on luy demandoit de leur part ; neantmoins en ce qui regardoit l'estat religieux qu'elles vouloient

embrasser, l'on en auoit tellement éloigné son esprit, qu'il témoignoît n'y vouloir du tout point entendre ; il trouuoit mesme auoir de la peine d'en souffrir la proposition. Cela estoit cause que personne n'osoit plus luy en parler, & quoy que nos filles eussent receu des Bulles pour estre Religieuses ; elles les tenoient secretes, & n'en parloient qu'aux personnes de leur conseil, Cependant elles ieusnoient, prioient, soupiroient deuant le Seigneur, pour luy demander l'accomplissement de sa diuine volonté, attendant avec resignation, & amour, que sa prouidence leur enuoyast quelque personne de grande autorité, qui eust pouuoir sur l'esprit de l'Archeuesque, pour luy presenter leurs Bulles, & les luy faire admettre.

Certes il faut aduouër que leurs prieres en cette rencontre furent bien tost exaucées : car peu de iours apres l'expedition de leus Bulles, Dieu leur enuoya Monsieur le Duc d'Angoulême, qui pour lors estoit Gouverneur de Prouence, comme estant le seul qui auoit le plus de pouuoir, & le plus d'autorité dans tout le pays, & principalement sur l'esprit de l'Archeuesque d'Aix, si bien que ce Prince visitant vn iour au matin nostre bon Prestre : *Mon pere*, luy dit il *Dieu m'a commandé de vous venir voir, & vos filles, & de vous offrir mon appuy & mon assistance dans les affaires de vostre Congregation. l'en ay esté fortement inspiré la nuit passée, & non seulement inspiré, mais i'ay esté eueillé plusieurs fois par de nouueaux mouuemens, qui comme ie croy ne m'ont esté données que par mon Ange Gardien, qui m'a commandé de venir à vous, me promettant que Dieu me feroit beaucoup de graces, si ie me rendois affectionné aux desseins des filles de Nostre Dame de Misericorde; voyons les, mon pere, & sçachons ce que ie puis faire pour elles.*

Nostre bon Prestre estant agreablement surpris de cette rencontre, la receut comme vne singuliere faueur du Tout puissant, & vn secours euidet que sa prouidence luy enuoyoit dans l'extrême besoin : aussi receuant ce Prince avec respect, apres l'auoir humblement remercié de ses offres, le prit par la main, & le conduisit au parloir de ses filles, où la Superieure s'estant

s'estant renduë en mesme temps, dès que le Pere la vid, luy monstrant le Gouverneur, *Filles*, luy dit-il avec grande simplicité, *voicy nostre frere que Dieu nous a enuoyé pour nous secourir*. La Superieure ayant répondu avec grand respect, le Prince luy raconta ce qu'il auoit desia dit au Pere Yvan, touchant les choses qui luy estoient arriuées la nuit precedente, & confirma les grandes tendresses que Dieu luy auoit données, pour cette naissante Congregation.

Il voulut en suite estre informé du dessein de nostre Fondateur, & de l'estat de ses affaires: à quoy le Pere Yvan ayant satisfait, ce pieux & genereux Prince s'offrit, de presenter à l'Archeuesque les Bulles qu'il auoit obtenuës, pour rendre sa Congregation religieuse: de maniere qu'il executa le mesme iour sa promesse; car il visita le Prelat, il luy presenta les Bulles, & il agit si puissamment sur son esprit, que nonobstant les extrêmes repugnances qu'il en auoit, il le disposa à les recevoir, pour les examiner, & pour ordonner en suite ce qui feroit de raison. Ce commencement reussit avec tant de bonheur, que l'Archeuesque, & le Duc d'Angoulesme vinrent separément raconter à nostre bon Prestre, & à ses filles ce qui s'estoit passé entre eux, la satisfaction qu'ils auoient eüe, l'un de l'autre, & leur mutuel desir pour le progrès de la Congregation de Nostre Dame de Misericorde.

Cela donna la liberté au Pere Yvan, à ses filles & à ses amis, d'agir ouuertement enuers ce Prelat, & de poursuiure avec instance l'approbation des Bulles que le Gouverneur luy auoit presentées. Ce bon Prince s'y employoit luy-mesme avec zele; ne laissant passer aucune occasion d'en solliciter l'Archeuesque. Les Peres Iesuites dont nous auons parlé si souvent, s'y employoient aussi de toutes leurs forces, n'obmettans aucun soin, ny aucune peine pour persuader au Prelat qu'il n'y auoit rien dans les Bulles de nos filles, qui ne deust estre approuué.

Cependant DIEU permit que les affaires se broüillèrent de nouveau, & qu'il y eust de nouvelles oppositions: car l'Archeuesque ayant donné les Bulles à examiner, aux personnes qui auoient tousiours esté contraires au Pere Yvan, & à sa

Congregation ; ces personnes firent naistre d'abord mille obstacles , & mille difficultés : & quoy qu'ils n'osassent plus s'opposer ouvertement aux intentions de nostre bon Prestre , craignant l'autorité du Gouverneur , qui s'estoit entierement déclaré pour luy ; neantmoins en secret ils employoient tous leurs efforts , pour en éloigner l'esprit , & l'affection du Prelat.

Les amis des filles de Nostre Dame de Misericorde , particulierement le Gouverneur de la Prouince , sçachant les secretes menées de nos aduersaires , en estoient grandement irrités , & vouloient mesme témoigner contre eux leur ressentiment , mais nostre patient Ecclesiastique les apaisant , les exhortoit à supporter leurs contradictions avec grande douceur , leur disant , *qu'il n'y auoit rien de plus glorieux , ny de plus auantageux pour son ordre , que les persecutions qu'il souffroit ; & que Dieu estant tout puissant , & tout misericordieux , ne laisseroit pas de faire son œuvre , lors que sa sagesse le trouueroit à propos.*

Les affaires furent donc suspenduës pour quelque temps : pendant lequel nostre bon Prestre , & les filles demeuroient en paix , comme des Anges , sans témoigner aucune inquietude ou impatience des delais. & des remises de l'Archeuesque ; & mesme sans monstrier aucun sentiment d'aigreur , ou de refroidissement contre ceux qui leur suscitoient ces nouuelles contradictions. L'employ de nos filles estoit de continuer leurs exercices de pieté , & de penitence , s'humiliant & s'aneantissant deuant Dieu , & Nostre Dame de Misericorde , comme s'estimans indignes de toute faueur , & incapables de tout bien. C'estoit le sentiment que nostre patient Ecclesiastique leur donnoit par son exemple , & par ses continuelles exhortations.

Aussi puis ie dire , que Dieu permettoit ces nouuelles oppositions au dessein de nostre Fondateur , pour faire paroistre ses vertus avec plus d'éclat , & particulierement sa crainte salutaire , & son humilité tres-profonde : car encore que l'esprit Diuin par les fortes impressions de ses lumieres , luy fist esperer que le dessein de sa Congregation reussiroit , & que ses fil-

les seroient Religieuses; quoy que les mesmes filles l'enasseuraissent aussi, luy racontant les connoissances certaines qu'elles en receuoient dans l'Oraison; neantmoins il demouroit tousiours en crainte, comme vne personne qui apprehende tout, & ne se promet aucune chose, que la punition de ses pechez. Ainsi lors que ses filles luy disoient que nonobstant les oppositions que l'on faisoit, elles esperoient de la Bonté du Seigneur d'estre Religieuses: *Ah filles! répondoit-il, tremblés, & il faut que ie tremble aussi; nous ne meritons pas que nostre Seigneur, & sa tres-sainte Mere nous favorise d'une telle grace. Il faut nous dépouiller de toutes nos pretentions, & n'oser pas penser que Dieu fasse aucune chose pour nous. Helas que sommes nous, pauvres & miserables creatures? O que Dieu est sage, & qu'il fait bien de nous mesnager de la sorte! Laissons le faire, & ayons seulement soin de le bien aimer, & de nous humilier profondement deuant luy, adorant ses Ordres, & ses secrets iugemens. Nous verrons ce qu'il sçait faire, puis qu'il est nostre Dieu, qui peut tout ce qu'il veut.*

Cependant la Sainte Vierge Mere de Misericorde, faisoit continuer les merueilles dans le nouveau Monastere de nos filles, acoordant des faueurs extraordinaires aux personnes qui auoient recours à leurs prieres, & aux sacrifices du Pere Yvan. Plusieurs malades recouuroient la santé, contre l'esperance des Medecins; plusieurs pauvres plaidans qui estoient opprimés par des procès iniustes, & qui n'attendoient que leur condamnation par le credit, & la violence de leurs parties, se trouuoient heureusement deliurés, apres s'estre recommandés aux prieres de nostre bon Prestre, & de ses filles.

Il y eut particulièrement vn Gentilhomme, qui ayant esté mis en prison par des fausses accusations, estoit sur le point d'estre condamné à mort, à la honte & ignominie de ses parens, qui estoient fort considerables, & en tres grand nombre; lors que son innocence fut merueilleusement reconnuë, & luy mis en liberté, apres qu'une Dame de ses plus proches parentes, eut fait mettre en prieres à son occasion le Pere Yvan: & les filles de Nostre Dame de Misericorde, & qu'elle eust fait elle mesme ses deuotions dans leur Eglise. Ainsi si les creatu-

res taschoient d'affoiblir nostre Congregation , & d'en retarder les progrès par leurs oppositions, DIEU operoit des merueilles pour l'établir & la faire auancer ; si bien qu'outre l'estime & l'affection de tout le peuple , ces faueurs extraordinaires attiroient encore à nos filles plusieurs charités, qui aidoint à leur subsistence, ou à l'embellissement de leur Eglise.

Le Gouverneur de la Prouince, dont nous auons fait mention, ne manquoit point chaque semaine de venir faire ses deuotions dans la nouvelle Eglise de Nostre Dame de Misericorde, le Vendredy iour qui est deuoié à Nostre Dame de Pitié, des sept douleurs ou de Misericorde. Il y entendoit la Messe avec vne modestie exemplaire, il y receuoit souuent la Communion, & tousiours il vouloit que le Pere Yvan demeurast à ces costez, iusques à ce que la Messe fust acheuée. Apres cela il montoit avec luy à vn parloir des filles, où appellant la Superieure, il faisoit vne espee de conference spirituelle, ne s'entretenant que des choses qui regardoient la gloire de Dieu, l'aduancement du salut des ames, & leur perfection particuliere.

Ce bon Prince leur donnoit vne grande edification, parce qu'il parloit des choses interieures avec vne profonde doctrine, & avec des respects d'un veritable homme de Dieu. Aussi estoit-il l'un des plus sçauans, & des plus pieux Princes de l'Europe : mais il estoit encore plus edifié luy-mesme des paroles du Pere Yvan, qui sans nul respect humain, ny aucune complaisance, ne l'entretenoit que des plus fortes, & des plus redoutables verités de nostre Religion, de la pureté que Dieu exige des ames, de la seuerité de sa Iustice, des approches de la mort, de la terreur des iugemens de Dieu, & de semblables matieres. Le Gouverneur écoutoit ces choses avec vne docilité admirable, receuant les aduis de nostre zélé Ecclesiastique, comme des oracles du Ciel. Aussi outre cette conference des Vendredis, assistoit il à tous ses Sermons, autant que les affaires du Roy, & de la Prouince le luy permettoient, témoignant vn respect singulier, pour la doctrine de nostre Predicateur, & autorisant par sa presence, & par son

DE N. DAME DE MISERICORDE. 367
approbation son zele Apostolique contre les railleries , & les
médifances des libertins.

CHAPITRE XLIV.

*Suite des oppositions à la reception des Bulles des filles de Nostre
Dame de Misericorde.*

PENDANT que l'Archeuesque d'Aix differe d'approuver les Bulles des filles de Nostre Dame de Misericorde , & que le Pere Yvan , & ses filles attendent avec vn mélange de crainte & de confiance l'accomplissement des promesses du Ciel ; Dieu leur enuoye vn second appuy en la personne du seigneur de Barreau Archeuesque d'Arles , qui estoit arriué dans Aix. Nous auons desia dit que ce grand Prelat ayant examiné le dessein de nostre Fondateur , & les dispositions de nos filles au commencement de nostre Congregation , en auoit esté approbateur , & leur auoit promis son assistance & sa protection : il s'acquitte de sa promesse en cette rencontre ; car dès qu'il est arriué dans Aix , le Gouverneur l'ayant entretenu de l'estime & du zele que Dieu luy auoit donné pour nostre bon Prestre , & pour les affaires de sa Congregation , luy ayant ainsi parlé des Bulles qu'on auoit obtenues , & des difficultés que l'on faisoit à les admettre ; ce digne Prelat le confirme dans l'estime , & dans l'affection qu'il a desia pour nostre pieux Ecclesiastique , & pour ses vertueuses filles , & s'offre de joindre ses sollicitations aux siennes , pour leur procurer vn parfait établissement.

En effet cét Archeuesque ayant incontinent apres visité les filles de nostre Congregation , les console , & les encourage à continuer leur dessein ; & voulant y contribuer par ses soins , apres s'estre informé de l'estat de leurs affaires , il confere avec l'Archeuesque d'Aix , & fait tout ce qu'il peut pour le porter à donner son approbation : de là il reuient à nostre Monastere,

pour faire sçauoir le succès de sa negociation : apres quoy , il donne des marques de son zele par vne tres-deuote , & frequente exhortation qu'il fait à nos filles. Il veut voir en suite la disposition du Monastere , qui n'auoit point encore de closture ; si bien qui y estant entré avec le Gouverneur , il trouue de nouueaux suiets de benir Dieu , & sa tres-sainte mere , voyant ce Monastere si bien pourueu de toutes les commodités necessaires pour la vie reguliere. Il donne plusieurs autres marques de sa bien veillance à nostre bon Pere, pendant son seiour dans Aix ; & il luy fait esperer que l'Archeuesque accordera enfin sa demande ; adioustant que Dieu vouloit éprouuer sa vertu , par de longues & de fascheuses oppositions : il s'y employe mesme avec zele ; mais se trouuant obligé de retourner à son Diocese , il part sans auoir rien conclu avec l'ordinaire , touchant l'approbation de nos Bulles.

En mesme temps le Vice Legat d'Auignon ; sçachant les difficultez que l'Archeuesque d'Aix faisoit d'admettre ces mesmes Bulles , luy escriuit vne tres-forte , & tres-puissante Lettre pour l'inciter à les approuuer , & pour répondre aux principales obiections qu'il pouuoit faire contre elles. Cette Lettre fit vne tres-puissante impression sur l'esprit de nostre Prelat ; car elle le porta à visiter les filles de Nostre Dame de Misericorde dans leur maison ; où apres leur auoir parlé de la Lettre que le Vice legat luy auoit écrite en leur faueur , il leur promit d'accorder leur demande , & de leur donner toute la satisfaction qu'elles souhaittoient. Qui n'auroit creu apres cette promesse de l'Archeuesque , qu'il n'y auroit plus de difficulté à vaincre , ny de delay à souffrir ; puis qu'il se monstroit porté à faire ce qui dépendoit de luy ? toutesfois la chose ne reussit pas de la sorte , si bien qu'il y eut encore à surmonter le plus grand de tous les obstacles , & la plus dangereuse de toutes les persecutions.

L'Archeuesque ne pouuant plus differer l'approbation des Bulles , prit encore conseil des personnes qui auoient tousiours formé des oppositions contre le Pere Yuan , & contre son Institut ; ce fut qui faillit à ruiner entierement l'œuure de Dieu ; car ces personnes persuaderent au Prelat [qu'auant qu'il per-

mist aux filles de la Misericorde de recevoir la regularité dans leur Congregation; il falloit éprouver les premières d'entre elles celles qui gouvernoient, & qui avoient attiré les autres, & qui paroissent les plus fortes & les plus courageuses, que pour ce suiet il falloit les cōtraindre de demeurer durant quelque mois dans vn Conuent de Religieuses qui les examineroient, & les éprouveroient; afin de connoistre non seulement si elles estoient propres à gouverner vne Communauté; mais encore si elles estoient mesme capables d'estre Religieuses]

Si ce pretexte estoit specieux, la fin estoit tres-pernicieuse à nostre Institut; de quelque costé que nous la considerions; car si nos genereuses filles eussent refusé d'entrer dans vne maison de Religieuses, ou que le Pere Yvan n'y eust pas voulu consentir, on pretendoit que l'Archevesque auroit par ce refus vn iuste suiet de dissiper nostre Congregation, ou de refuser pour tousiours l'approbation de nos Bulles. Et si ces mesmes filles se laissoient enfermer, on esperoit de les retenir & d'empescher, ou par adresse, ou par autorité qu'elles continuassent leur entreprise.

Or l'esperance que les aduersaires avoient de retenir nos premières filles, estoit d'autant mieux fondée qu'ils pretendoient les faire mettre dans vn Conuent, dont ils estoient les Superieurs, & en avoir par là vne pleine & entiere disposition. En effet ils obtindrent de la facilité du Prelat vne partie de ce qu'ils avoient souhaité; mais le Tout puissant protegea le dessein de nostre Fondateur; de telle sorte qu'il le fit reussir à sa gloire, & à la conseruation des personnes qui esperoient en luy. Ainsi l'Archevesque poussé par ceux que les Religieuses faisoient agir, s'estant porté au Conuent de la Misericorde, declare sa volonté au Pere Yvan, & à nos premières filles, leur disant qu'il estoit enfin resolu d'admettre leurs Bulles de Regularité; mais qu'auparavant il vouloit éprouver ces mesmes filles durant quelques mois dans vne des maisons religieuses de son Diocese.

Nostre bon Prestre fut fort surpris de ces dernières paroles du Prelat; de maniere que répondant selon qu'il crut estre à propos, il tascha de luy persuader [que cette épreuve n'estoit

pas nécessaire, ny mesme vtile; mais qu'aucontraire elle estoit dommageable à la naissante Congregation, & que sans doute on ne s'en seruiroit que pour exciter de nouveaux troubles.] Il adioute encor que l'esprit de Dieu ayât inspiré le dessein de la Cōgregation à ses premieres filles, & leur ayant donné la force & le courage de l'entreprendre, leur auoit aussi départy les autres qualités nécessaires pour la gouverner, qu'il y auoit plus de six années que la Congregation estant commencée, les filles y viuoient à la façon des plus reformées Religieuses, & qu'elles s'estoient tousiours gouvernées avec grande benediction, que pendant ce temps là, elles auoient esté plusieurs fois examinées par de grands Prelats, par de sçauans Prestres & Religieux, & principalement par les Peres Iesuites, qui en auoient encore la conduite, qui les auoient tous iugées capables de la société qu'elles auoient commencée; & que par là l'on pouuoit suffisamment connoistre leur capacité, sans auoir recours à d'autres preuues.

Nostre bon Prestre apporta encore d'autres raisons, pour dissuader l'Archeuesque de son intention; mais comme il vid qu'il y persistoit, apres auoir examiné la chose, apres auoir prié Dieu, & en auoir conféré avec ses filles il y consentit avec respect. Il n'estoit donc plus question, que de sçauoir dans quel Monastere elles seroiēt éprouuées: quoy que l'Archeuesque semblast leur en laisser le choix libre, ayant neantmoins témoigné de desirer qu'on acceptast le Conuent des Religieuses qui leur estoient les plus aduersaires, nos genereuses filles s'y determinerent aussi tost avec courage; de façon que s'adressant au Prelat avec vne modestie Angelique: *Monseigneur*, luy dirent elles d'un ton de voix fort humble, & d'une façon tout à fait respectueuse; *puis que vostre grandeur nous donne le choix des Monasteres des Religieuses de cette ville pour y estre éprouuées, nous choisissons celuy que nous aurions lieu d'apprehender, & on selon que l'on peut preuoir, nous aurons beaucoup à souffrir. Nous serions caressées dans tous les autres, qui nous ont donné mille témoignages d'estime & d'affection; mais nous ne pouuons esperer dans le premier, que beaucoup de confusion, de mépris, & de terribles peines; veu que ces bonnes Religieuses*

(es

ses se sont tousiours opposees à nostre dessein.

Nous aurions, Monseigneur, adiousterent-elles, beaucoup à craindre pour cette pauvre Congregation, que l'on veust aneantir: mais nous esperons que la sainte Vierge nostre bonne Mere de Misericorde la protegera, & fera voir qu'elle est sienne, & qu'elle est l'ouurage de ses mains. Nous ne desirons que d'obeyr, & puis qu'il faut boire ce Calice, nous sommes bien aise de n'y rencontrer que de l'mertume. Le bon Pere Yvan fut de ce mesme avis: quoy qu'en tremblant, & avec de terribles apprehensions. C'est pourquoy comme l'Archeuesque en se retirant, repeta qu'il leur laissoit le choix du Couuent qu'ils trouueroient le plus conforme à leurs intentions: Monseigneur, repartit nostre pieux Ecclesiastique, Il n'est pas iuste que nous choisissions ce qui nous sera le plus agreable: au contraire nous voulons embrasser le plus rude, & le plus mortifiant, comme le Fils de Dieu a élu durant sa vie ce qui le faisoit dauantage souffrir.

L'Archeuesque fort satisfait & edifié de cette réponse de nos pieuses personnes, se retira apres leur auoir donné sa benediction. Cependant les amis de nostre Congregation, ne sceurent pas plustost le dessein du Prelat, qu'ils firent de grandes plaintes, & voulurent mesme s'opposer pour en empescher l'exécution. Le Gouverneur de la Prouince comme le plus zelé, rémoigna aussi vne grande repugnance; si bien qu'il voulut se seruir de son autorité & de son credit, pour détourner l'Archeuesque de sa resolution; mais nostre bon Prestre appaisa tous les mécontents leur persuadant, qu'il falloit que la chose se passast de la sorte, pour mieux connoistre les desseins du Seigneur, & que ce seroit la dernière épreuue, apres laquelle on ne pourroit plus douter, que la Congregation de Nostre Dame de Misericorde ne fust vn ouurage du Tout puissant; pus iqu'elle auroit esté conseruée parmy les troubles, & les orages, comme Daniel dans la fosse des Lions &, les trois enfans de la fournaise de Babylone. Quelques iours apres l'Archeuesque ayant enuoyé ses ordres, deux des filles de Nostre Dame furent conduites dans vn carrosse, par des Dames de leurs amies, au Monastere qu'elles auoient bien voulu choisir.

Je ne reciteray pas icy les diuers traitemens que ces filles receurent dans ce Monastere ; ie me contenteray de dire que durant tout le temps qu'elles y demurerent, les Religieuses d'iceluy, & ceux qui en auoient la direction, & les autres personnes qui n'estoient pas affectionnées au Pere Yvan, employèrent tous leurs efforts, & toute leur industrie ; afin de les dépouiller de l'estime, & de la foy qu'elles auoient pour le P. Yvan, & leur faire abandonner le dessein de la Congregation qu'elles auoient entreprises par son assistance & par les conseils. En effet que ne leur disoit on pas dans les diuers entretiens que l'on auoit avec elles chaque iour, pour leur persuader que nostre bon Prestre estoit vn ignorant, & incapable de direction ? qu'elles auoient esté trompées par luy dans le dessein de leur Institut, & qu'ainsi elles n'y deuoient plus penser, que pour auoir du regret, & de la confusion de l'auoir entrepris, comme vne chose tres - pernicieuse, & d'un scandale public.

Pour les ébranler encore plus fortement, en les priuant de toutes les consolations, & de tout le secours qu'elles auroient peu recevoir, on leur osta la liberté de pouoir apprendre des nouuelles du Pere Yvan, & des autres filles de sa Congregation, & des Peres Iesuites qui les conduisoient, & enfin de tous ceux qui auroient peu les encourager & les fortifier. Si bien qu'elles n'auoient permission de voir, ny d'entretenir que les personnes qui auoient entrepris de les exercer avec rigueur, pour leur faire changer de resolution. Encore leur déguisoit on les choses ; leur disant que l'Archeuesque auoit enfin resolu de détruire leur compagnie, comme vn ouurage de l'esprit de mensonge, & qu'il n'y auoit plus rien à espérer que la honte & la confusion de l'auoir commencée. On leur défendoit mesme à peine de desobeyssance de penser au Pere Yvan ; si ce n'estoit pour se repentir de l'auoir creu ; & de penser au dessein de leur Institut imaginaire, que pour rougir de confusion de leur temerité ; & de penser mesme aux autres filles de leur Congregation, que pour demander pardon à Dieu de les auoir abusées. De maniere que c'estoient les discours qu'el-

les entendoient à toute heure, des personnes à qui seulement elles auoient permission de parler.

Mais ce qui augmentoit leur affliction, c'estoit que comme elles ne pouuoient sçauoir aucunes nouvelles, ny du Pere Yvan, ny de leurs compagnes, ny de leurs amis; elles ne pouuoient non plus leur en donner des leurs, ny leur faire sçauoir l'estat de leur detention, & les forces que Dieu leur donnoit pour resister aux attaques des aduersaires; si bien que ce fut vne des plus rudes épreuues que ces bonnes filles endurent. Car outre les peines extraordinaires qu'elles sentoient, par les reproches, & par les menaces qu'on leur faisoit à toute heure; & par les violens scrupules qu'on taschoit de leur donner, de ce qu'elles n'adheroient pas aux persuasions de ceux qui les gouuernoient pour lors; quand ils vouloient qu'elles renoncassent au Pere Yvan, & à leur nouvelle Congregation. Elles estoient encore viuement touchées, de la desolation qu'elles sçauoient bien que leur bon Fondateur, & leurs cheres sœurs souffroient de leur absence, & de ne pouuoir apprendre aucune de leurs nouvelles. Et certes la douleur qu'elles auoient des peines de leur Directeur, estoit bien iuste & raisonnable; car si la vie de cét excellent Prestre, a esté détrempee d'une suite continuelle de miseres, d'amertumes, de trauail, d'afflictions, & de persecutions: il faut pourtant aduoüer, qu'il n'auoit iamais senti vne plus terrible desolation, ny vne violence plus sensible.

Car il ne voyoit de toutes parts que des suiets de crainte, & d'affliction; il estoit obligé d'auoir des tendresses paternelles pour ses filles, qui luy auoient esté comme enuoyées par merueille, & que la sainte Vierge luy auoit recommandées, pour les employer dans la fondation de nostre Institut. Elles auoient cōmencé leur Congregation, l'auoient faite auancer, & en estoient les pierres fondamentales, & le principal appuy. Cependant les ayant enleuées dans vn Cloistre, on les detenoit, sans qu'il en peüst receuoir aucune nouvelle, ny mesme esperer avec certitude qu'elles deussent reuenir à luy. L'on ne sçauoit dire combien cette priuation luy donna de peine, & luy apporta d'ennuys & de déplaisir, durant tout le temps

qu'elles furent detenuës : quel regret, qu'on ne les fist souffrir à son occasion ; afin de les faire renoncer à sa conduite ? & quelles apprehensions, qu'estant attaquées par de puissans aduersaires, sans estre secouruës d'aucun ; elles ne se laissassent gagner, & ne quittassent leurs premiers desseins, pour adherer aux nouvelles propositions qu'on leur feroit, & qu'on tascheroit de leur persuader par toute sorte de voyes ; se rendans infidelles à leur vocation, & indignes des graces que le Ciel leur auoit départies.

La douleur de ce bon Pere est inexprimable, & nous pourrions la comparer à celle de la femme de Thobie quand son Fils tarδοit trop long-temps à reuenir : car comme cette pieuse Mere fendoit en larmes en l'absence de son Fils, & s'en alloit par les champs, pour voir s'il reuenoit, & pour apprendre des nouvelles de son retour : nostre bon Pere versoit des ruisseaux de pleurs dans son Oratoire ; pendant la detention de ses filles. La liberté de les voir, & de leur parler luy estant refusée, il taschoit d'en apprendre quelque nouvelle par le moyen de ceux qui frequentoient dans le Monastere où elles estoient ; mais toutes les portes estans fermées pour luy, & pour ses amis il n'en receuoit qu'un surcroist d'affliction : son extrême déplaisir redoubloit encore toutes les fois qu'il visitoit les autres filles de sa Congregation, qui estoient desia en tres grand nombre ; car dès que ces mesmes filles le voyoient, elles demandoient des nouvelles de leurs bonnes sœurs, & comme il ne pouuoit pas leur en donner ; elles renoueloient leurs larmes, leurs soupirs, & leurs plaintes, d'une maniere si pitoyable qu'elles auroient esté capables d'exciter des mouuemens de compassion dans les ames les plus insensibles.

C'estoient tout autant de glauiues de douleur qui perçoent le cœur de nostre patient Ecclesiastique, qui par fois au lieu de consoler ses filles, augmentoit leur affliction par la sienne, & bien souuent auoit il de la peine à leur parler, tant il estoit presse de douleur. Dieu l'abandonnant à son naturel, qui estoit porté plustost à la tristesse qu'à la ioye, & plus susceptible de crainte, que d'esperance. Aussi estoit-il extraordinairement travaillé d'aprehension, que l'on ne détint ces pieuses

filles pour tousiours, & qu'ainsi la Congregation ne fust détruite en punition de ces pechez. Il estoit dis-je, horriblement tourmenté de cette crainte : nonobstant les reuelations qu'il auoit eues qu'elles viendroient à bout de leur dessein, & nonobstant la confiance qu'il auoit en la protection de la Mere de Dieu. Car le Seigneur pour le faire meriter dauantage, luy cachoit pour lors toutes ces connoissances, qui auoient peu le consoler ; ne luy laissant que la veüe de ses iugemens, & le souuenir de ses fautes. Il passe dans cet estat pitoyable durant quelque mois, continuant ses prieres, & ses autres exercices, & mesme les redoublant, pour demander à DIEU l'accomplissement de sa sainte volonté, & pour impetrer des graces à ceux qui auoient suscité contre luy cette rude persecution.

Cependant les personnes mal intentionnées pour nostre Congregation faisoient diuers rapports à l'Archeuesque pour diminuer la haute estime qu'il auoit de la vertu de nos innocentes prisonnières. Ce Prelat les visitoit dans les parloirs du Monastere où elles estoient enfermées ; mais la presence de ce Superieur, qui deuoit estre leur consolation, seruoit pour accroistre leurs peines. Aussi les emmenoit on deuant luy, comme des criminelles, que l'on accusoit de diuers deffauts, les faisant rougir de confusion par mille reproches, & mille blâmes, dont on les chargeoit. Car comme on auoit cette pretention, de dissuader le Prelat de receuoir les Bulles de regularité que nos filles auoient obtenuës, & mesme de le porter à ne souffrir plus le progrès de leur entreprise, on ne laissoit rien à luy dire, pour luy persuader qu'elles estoient incapables de gouverner vne Communauté religieuse ; si bien que nos aduersaires sembloient triompher, esperant bien tost la distraction entiere de nostre Congregation, pendant que tous les amis de nostre bon P. étoient dans la crainte, & dans l'affliction ; que ces vertueuses filles continuoient dans leurs larmes & gémissements ; & qu'il se trouuoit luy mesme dans vne extreme consternation. Mais enfin le Seigneur eut pitié de son fidelle seruiteur ; & fit connoistre que sa prouidence n'auoit permis cette violente épreuve que pour mieux manifester la solidité de sa conduite, & la sain-

été de sa Congregation : Car tout cét orage ne seruit qu'à montrer la vertu du Pere en la personne de ses filles , & à mieux affermir , & faire auancer son entreprise.

En effet nos genereuses prisonnières augmentèrent leur foy & leur estime enuers leur Fondateur , à mesure qu'on employa toutes sortes de moyens pour les leur oster ; & DIEU les rendit si courageuses , qu'on ne peut iamais les ébranler de leurs premieres resolutions. L'Archeuesque se confirma dans le sentiment d'estime & d'affection qu'il en auoit par les accusations mesmes qu'on faisoit contre elles ; parce qu'il scauoit le contraire de ce dont on les blasmoit , & il remarquoit luy-mesme en elles la pratique des vertus opposées aux deffauts , dont on vouloit les noircir.

Cependant tous les amis nostre bon Prestre , & de sa Congregation commencent à faire de grandes plaintes , de ce qu'on les retient si long temps hors de leur Monastere ; le Gouverneur presse fortement l'Archeuesque de les y faire remmener ; menaçant de se seruir de l'autorité du Roy pour empêcher la violence qu'il croit qu'on exerce contre elles. Mais la protection du Seigneur paroist encore avec plus d'éclat ; permettant qu'il s'éleue en mesme temps vn grand murmure , & des plaintes presque vniuerselles parmy les personnes de pieté , contre ceux qui ont conseillé , & qui fomentent cette detention ; si bien que ce murmure , & ces plaintes augmentent si fort , que ces mesmes personnes pour éviter les reproches qu'on leur fait , n'osent quasi plus se trouuer en aucunes assemblées. Mais voicy vn nouveau secours que la prouidence Diuine nous enuoye : La nouvelle que l'Archeuesque d'Arles deuoit bientôt arriuer dans Aix , estant diuulgüée en ce mesme temps , contribüé beaucoup aussi à faire renuoyer nos filles dans leur Conuent ; parce que l'on apprehende les plaintes qu'il fera comme estant amy de nostre bon Pere , & protecteur de sa Congregation. Enfin les personnes qui ont porté l'Archeuesque d'Aix , à mettre les premieres filles de nostre Congregation dans vn Monastere estranger , se trouuent contraintes à le solliciter de les en retirer , apres auoir inutilement trauaillé à leur persuader de se rendre Religieuses dans le Monastere où elles

estoyent enfermées. Ainsi elles sont ramenées dans leur Convent de Nostre Dame de Misericorde par les mesmes Dames qui les auoient conduites à celuy dont elles sortent, apres y auoir été exercées durant quelques mois. Elles sont dis-ie, remises dans leur premiere liberté, sans qu'elles ny leur Fôdateur y ayent contribué que leur simple consentement. Ce qui fait clairement voir que leur retour est vn pur effet d'vne singuliere prouidence du Tout puissant; Dieu seul l'ayant procuré par les ressorts adorables de sa sagesse infinie.

C H A P I T R E X L V .

L' Archeuesque reçoit les Bulles des filles de Nostre Dame de Misericorde.

LE bon Pere Yvan pleura de ioye à leur arriuée, & s'adressant à elles dès qu'il les vid: *Ah filles, leur dit-il, que vostre retraite nous a fait souffrir, & que nostre pauvre Congregation a couru de risque d'estre dissipée. Dieu & la sainte Vierge ont bien fait voir, qu'elle estoit l'ouuurage de leurs mains, de l'auoir protégée & conseruée dans vn si euident peril. Remercions les, & humilions nous, car nous deuons tousiours craindre & ne nous promettre aucune bonne chose de nous mesmes.* Les filles de la Congregation n'eurent pas moins de ioye du retour de leurs sœurs, dont l'absence leur auoit causé tant de larmes, tant de sanglots, & de si terribles angoisses. Tous les amis vinrent aussi tost se conioiir avec nostre bon Prestre, & avec ses filles: mais particulièrement le Gouverneur, qui s'estant fait reciter par cesmesmes filles vne partie des choses qui s'estoient passées pendant leur retraite, eut de nouueaux suiets de glorifier le Seigneur, & de s'affectionner encore dauantage à fauoriser ce nouuel Institut.

Vn succès si heureux ayant donné du courage à nostre Fondateur, augmenta aussi l'esperance que ses filles auoient que

le Seigneur beniroit leur dessein d'embrasser l'estat religieux, & leur donneroit la grace de l'accomplir : si bien qu'elles continuerent avec de nouvelles ferueurs leurs prieres, leurs vœux, & leurs penitences. Environ ce temps là, le R. P. Daniol de la compagnie de Iesus, personnage d'une profonde doctrine, & d'une tres grande pieté, estant arrivé à Aix, s'employa de tout son pouuoir à leur faire auoir de l'Archeuesque la satisfaction qu'elles en desiroient. Il les encouragea à demander avec instance la reception de leurs Bulles, & à se rendre importunes enuers le Prelat, iusques à ce qu'elles l'eussent obtenuë.

Il encouragea aussi le Pere Yvan à continuer son dessein, l'assurant, que c'estoit vn ouurage du Ciel, & que Dieu le protegeroit; & non content de ce remoinage de son zele pour nostre Institut, ayant esté inuité par l'Archeuesque de dîner chez luy, il ne l'entretint presque d'autre chose que des affaires de la Congregation de nos filles, de la iustice de leurs Bulles, & des raisons qui l'obligeoient à n'en plus differer la reception. Enfin il agit avec tant de zele & de force, que l'Archeuesque en estant touché, visita nos filles, & leur donna des plus grandes esperances, touchant leur établissement, qu'il n'auoit encore fait. Neantmoins l'affection, & le zele de ce bon Pere de la Compagnie de Iesus, n'eurent pas le succès qu'il attendoit; parce qu'apres son retour dans Auignon, le Prelat se remit à ses delais ordinaires.

Sans doute Dieu vouloit luy seul ostroyer cette grace, de faire receuoir les Bulles de nos filles par l'Archeuesque, comme luy seul les leur auoit fait obtenir du Vice-legat. Ainsi apres leur auoir donné plusieurs puissans amis, il leur monstra qu'elles ne s'y deuoient appuyer, leur faisant voir leur impuissance; puis que toutes leurs sollicitations ne peurent rien obtenir de l'Archeuesque touchant leurs Bulles; Apres quoy la diuine Maiesté paracheua l'ouurage avec satisfaction de part & d'autre sans nulle contestation, ny remise, ainsi qu'elle l'auoit promis au Pere Yvan, & à vne de ses filles dans les plaintes amoureuses que l'un & l'autre faisoient à sa bonté: à sçauoir que tout iroit bien, & que les filles de Notre

stre Dame de Misericorde seroient bien tost Religieuses.

En effet la chose arriva, lors que les creatures sembloient ne vouloir plus s'en mêler; car comme nul n'osoit plus parler de ces Bulles à l'Archevesque, chacun estant rebuté par ses longs delays; l'Aumônier du mesme Archevesque vint celebrer la sainte Messe dans l'Eglise des filles de la Misericorde, si bien que pendant qu'il la disoit, la Superieure fut fortement inspirée de luy parler, & éclairée de ce qu'elle luy devoit dire. L'ayant donc fait appeller à la grille du parloir apres son action de graces: *Monsieur*, luy dit-elle, *je vous remercie tres-humblement de la bonté que vous avez eue, de venir aujour d'huy celebrer la sainte Messe dans nostre Eglise, & je remercie encore plus le saint Esprit, de vous en avoir donné la volonté; car c'est luy sans doute qui vous a aujour d'huy porté à nous venir voir, puis que pendant vostre Messe j'ay esté puissamment excitée à vous faire cette priere. C'est Monsieur*, continua-t'elle, *qu'apres avoir donné le bon iour de ma part à Monseigneur l'Archevesque, vous luy disiez de ma part aussi, que Dieu veut qu'il achève l'affaire de ses pauvres servantes de Nostre Dame de Misericorde; que le temps est venu, que sa divine Bonté veut que nous soyons ses Eponses. Dites luy bien*, repeta-t'elle, *que je vous ay assuré que c'est la volonté du Seigneur, & de la sainte Vierge Nostre bonne Mere. Je vous supplie encore, adiousta-t'elle, de revenir aussi tost me rendre la réponse que vous aurez eue. Ma mere*, répondit l'Aumônier, *j'accepte de tres bon cœur la commission que vous me donnés, je vous promets encore, de revenir d'abord si les nouvelles sont bonnes, si non je differeray à vous les faire sçavoir. Vous reviendrez donc bien tost*, repartit la Mere, *parce que j'espere que vous serez bien recue.*

A peine le Prelat avoit acheué son action de graces, apres avoir chanté la sainte Messe, pendant laquelle Dieu luy avoit donné de grands sentimens en faueur de nostre Congregation, lors que l'Aumônier se presenta à luy, pour le saluër de la part de celle qui l'enuoyoit: mais l'Archevesque le prevenant. *Vous venez*, luy dit il, *du Convent des filles de N. D. de Misericorde? répondez moy ce que la bonne mere vous a proposé pour me dire.* Monseigneur, répondit l'Aumônier, apres m'avoir prié

d'offrir à vostre grandeur la continuation de ses tres-humbles respects, elle m'a chargé de vous dire de sa part que Dieu veut, que vous receviez presentement ses Bulles de regularité, sans plus differer; que le temps est venu pour cela, & que telle est la volonté de nostre Seigneur, & de Nostre Dame de Misericorde. Au reste Monseigneur, continua-t'il, elle témoigne d'estre tellement persuadée de ces choses; qu'elle croit fermement que votre grandeur luy donnera cette consolation, & n'usera plus de remises. Elle a bien raison, repartit l'Archeuesque, car le Seigneur m'y a si bien disposé; pendant le saint Sacrifice que ie viens de celebrer, que ie ne sçauois plus luy refuser cette grace. C'est pourquoy, retournez à l'heure mesme au Conuent de la Misericorde, pour dire au Pere Yvan, & à ses filles qu'ils m'enuoyent leurs Bulles, avec la requeste, qu'elles m'ont desia présentée, & assurez-les de ma part, que ie les signeray de tres-bon cœur.

Ie ne sçauois exprimer la ioye de l'Aumosnier, dès qu'il eut vne si agreable nouuelle à porter. Il part d'abord, & s'en vient au Conuent de la Misericorde avec tant de ferueur, qu'il auroit souhaité auoir des aïles, pour y arriuer plustost. Il raconte à nostre Fondateur, & à la Superieure de la maison, le succès de son voyage; si bien que nos pieuses personnes n'en parurent nullement surprises, parce que l'esprit diuin les y auoit préparées, leur ayant reuelé que l'Archeuesque receuoit leurs Bulles avec ioye, que cela se feroit tout simplement, & que Dieu seul en vouloit estre l'auteur, inclinant le cœur du Prelat selon ses diuines intentions.

En effet la chose arriua de la sorte: l'Aumosnier ayant porté les Bulles à l'Archeuesque, ce Prelat qui auoit refusé de les recevoir, quand il en auoit esté sollicité par le Vice-legat d'Auignon, par l'Archeuesque d'Arles, par le Comte d'Alaiz, Gouverneur de la Prouince, & par toutes les personnes les plus considerables du pays, ce Prelat, dis-ie, les recut de luy mesme, lors qu'il ne fut plus sollicité que par les mouuemens de l'Esprit de Dieu; de maniere qu'au lieu des repugnances extremes, qu'il auoit auparauant témoignées à donner son consentement, il montra vne ioye, & vne satisfaction tout à fait singuliere. Ainsi nous pouuons dire que le Pere Yvan, &

ses vertueuses filles obtindrent par la patience, l'humilité, l'abandon, les larmes, & les prieres, ce qu'on leur auoit refusé, nonobstant l'appuy, & la protection des personnes les plus puissantes. Cependant Dieu voulut qu'elles employassent les voyes ordinaires qui sont les prieres & les sollicitations des amis, & qu'elles ne negligassent aucune sorte de soin, ny de trauail pour leur faire connoistre l'importance de la grace, qu'elles demandoient, par les difficultez qu'elles trouueroient dans la poursuite d'icelle; mais les moyens ordinaires n'ayans pas reussi, sa diuine Bonté y mit la main; si bien qu'elle satisfit aux desirs de son fidelle seruiteur, & de ses pieuses seruantes, faisant voir à tout le monde ce que nous auons souuent repeté, que ceux qui se confient en sa protection, & en celle de sa tres-sainte Mere, ne demeurent iamais confus.

CHAPITRE XLVI.

Les filles de Nostre Dame de Misericorde sont receues Religieuses, & font leur profession.

LE Comte d'Alaiz n'eut pas plustost sceu, que les Bulles de nos filles auoient enfin esté receuës par l'Archeuesque, de la façon que ie viens de rapporter, qu'apres s'en estre con-iouy avec nostre Fondateur, il alla remercier le Prelat, & l'exciter à parfaire l'œuvre de Dieu, en donnant l'habit, & le voile de Religion à nos filles selon la teneur de leurs Bulles. Quelques iours apres, l'Archeuesque accompagné de son Clergé, & de ses Officiers, vint faire la visite du Conuent de la Misericorde; s'il estoit dans les formes regulieres, & propre à la closture. Apres toutes choses examinées, & l'inuentaie dressé de tout ce qui estoit dans la maison, tant pour les seruices de l'Autel & de la Sacristie, que pour l'usage de la Communauté, il establit la closture, & donna les clefs du Conuent à la premiere fille de la Congregation, la confir-

mant dans la charge de Supérieure, au grand contentement de nostre bon Pere, qui l'auoit ainsi desiré, & de toutes nos filles qui en auoient fait d'instantes prieres.

Pour lors aussil Archeuesque accepta vn iour, pour donner l'habit de Nouice aux six premieres filles de nostre Congregation, c'est à sçauoir la seconde feste de Pentecoste; ce qui fut sans doute vne heureuse rencontre, & le iour le plus conuenable que l'on eust peu choisir pour cette ceremonie: car ne sembloit il pas, que le saint Esprit l'auoit disposé de la sorte; afin qu'on commençast l'establissement de l'Ordre des Religieuses de Nostre Dame de Misericorde, par la vesture de six premieres filles; à pareil iour que l'Eglise vniuerselle a esté establie en la personne des Apostres & des Disciples? Et ne puis ie pas dire, que ç'a esté par vne conduite singuliere du Seigneur, que la Congregation de nostre Fondateur ait esté changée en vn Ordre regulier, lors que l'Eglise celebre les iours, ausquels la Loy écrite fut changée en la Loy de grace, par la descente du saint Esprit sur les premiers Chrestiens.

Le iour arresté estant écheu, l'Archeuesque fit luy-mesme la Ceremonie, reuestu de ses habits pontificaux, assisté du Clergé & accompagné de la plus illustre assemblée qui se pût faire dans Aix; c'est à sçauoir du Gouverneur, des Messieurs du Parlement, des Consuls, & des plus considerables personnes de la ville. Je ne dois pas obmettre la merueille qui arriua dans l'imposition des noms, car comme les filles de Nostre D. de Misericorde sont obligées de changer leurs noms, quand elles changent d'habit; si bien qu'au lieu des noms qu'elles auoient dans le siecle, elles prennent le nom de Marie &, tirent leurs surnoms de nos mysteres, ou des Saints, pour qui elles ont plus de deuotion; Les six premieres voulans observer cette constitution, il y eut vne rencontre tout à fait singuliere. L'on auoit écrit les noms de Religion de celles qui deuoient receuoir l'habit de Nouice: c'est à sçauoir Magdelene Martin, Anne Bontemps, Marguerite Taulany, Magdelene Ferreol, Anne Berenguer, & Marguerite Peculier (quatre desquelles sont decedées dans l'Ordre, en odeur de sainteté,

& les autres vivent encore avec grande edification.) Apres donc que ces six filles eurent receu l'habit religieux , qu'elles auoient preparé , comme l'Archeuesque vouloit leur bailler à chacune vn des billets où estoient écrits leurs noms de Religion, *Monseigneur* , luy dit le Pere Yvan qui estoit auprès de luy, *ie prie vostre grandeur de permettre, que les filles tirent elles mesmes les billets par sort sans les voir & par là nous verrons mieux, le nom que chacune d'elles doit auoir* Le Prelat y ayant consenty , & chacune ayant tiré son billet, sans le voir , & sans ordre , il se trouua vn Ordre merueilleux dans leurs noms ; de telle sorte que la premiere eut le nom de sœur Marie de la Sainte Trinité , la seconde de sœur Marie de Iesus Christ , la troisiéme de sœur Marie du Saint Esprit , la quatriéme des Seraphins , la cinquiéme de Saint Michel , & la derniere de la Mere de Dieu. Le Prelat & tous les assistans , ayans admiré l'ordre de ces noms , loüerent nostre Fondateur d'auoir voulu qu'on les tirast au sort, puis qu'il auoit reussi avec tant de bonheur.

Quelques mois apres , le mesme Archeuesque donna encore l'habit religieux à six autres filles de nostre Congregation à Claire Tessier, Elisabet Martely, Louyse de la Brillane, Anne Roque , & à Magdelene de Tromper : entre lesquelles il y eut vne rencontre presque semblable à la precedente, touchant les noms : car comme elles les tirerent par sort , chacune le sien sans les voir ; la premiere eut le nom de saint Gabriel , la seconde de saint Raphaël , la troisiéme de la Conception , la quatriéme de l'Incarnation , la cinquiéme de la Passion , & la sixiéme de la Misericorde.

Ie ne diray rien de la ferueur , ny de l'exaëtitude de nos Nouices , ny des soins que leur Fondateur prenoit à leur faire fidellement pratiquer les vertus de la vie religieuse , qu'elles auoient embrassée avec tant d'amour , & vn si grand zele. Le Monastere de la Misericorde estoit vne Image du Paradis , car les filles menoient vne vie semblable à celle des Anges , si ce n'est que les Anges ne souffrent aucune peine , & nos Nouices se maceroient par de continuelles mortifications : aussi auoient elles en la personne du Pere Yvan vn des plus seueres

Directeurs , & des plus exacts Maistres des Nouices , qui puisse estre dans les Ordres les plus reformés.

Ainsi l'odeur de la vertu de nos nouvelles Religieuses , jointe à la haute estime , que l'on auoit de la perfection de leur Fondateur , se répandant par toute la ville , leur attira bientôt de grandes benedictions mesme temporelles : de façon que chacun s'empressoit à leur faire des presents , tant pour leur subsistance , que pour la decoration de leur Eglise. C'estoit vn effet des promesses que la sainte Vierge Mere de Misericorde auoit faites , & de la protection qu'elle monstroït à son Ordre naissant ; car comme elle vouloit , que ce sien Institut seruist d'azile aux pauvres Damoiselles , elle procuroit à ses filles plus de bien qui ne leur estoit necessaire , pour les encourager à suiure ses diuines intentions , & leur persuader , qu'elle feroit subsister leur Ordre ; nonobstant la misericorde , qu'elle exerceroient enuers les suiets , qui y seroient receus.

Pendant que nos Nouices se disposent à leur profession , leur Fondateur vsant de diligence , pour ne rien negliger dans l'ouurage du Seigneur , presenta les Constitutions particulieres de son Institut à l'Archeuesque , pour les luy faire approuuer : de maniere que le Prelat les ayant fait examiner , les auroit approuuées alors mesme ; n'eust esté qu'il falloit aussi approuuer le vœu particulier de l'Ordre que l'on auoit inseré dans ces Constitutions ; car comme ce vœu auoit esté trouué tres-difficile dans son execution , ainsi que nous auons remarqué , le conseil du Prelat trouua bon d'en différer l'approbation , iusques à ce que l'on eust mieux examiné les choses , & que l'on eust veu par la pratique qu'on commençoit d'en faire , quel en seroit le succès. Cependant l'Archeuesque ayant esté obligé de faire vn voyage à Thoulouse , à l'occasion d'un procès qu'il y auoit , partit sans rien conclure ; portant avec soy vne Copie des Constitutions , & de la formule du vœu particulier de nos filles de Nostre Dame de Misericorde , pour les faire examiner par les Prelats , & les autres personnes capables , qu'il deuoit consulter.

Pendant l'absence de l'Archeuesque , l'année du Nouiciat des six premieres filles de nostre Institut estant acheuée , le bon

Pere Yvan apprehendoit fort que leur profession ne fust retardée, iusques au retour du Prelat, ce qui auroit esté grandement fascheux; parce qu'il n'y pouuoit rien auoir de bien établi auant cette profession: & l'on auoit suiet de craindre de nouueaux troubles dans les foibles commencemens de l'Institut. Mais le Seigneur y pourueut par son infinie Bonté; car nostre Fondateur, les filles & le Gouverneur de la Prouince, ayant écrit à l'Archeuesque, pour le supplier de permettre à nos Nouices, de faire leur profession, & de commettre quelqu'un pour receuoir leurs vœux solennels; le Prelat le leur accorda amiablement; enuoyant vn ordre apres à son Vicaire, de donner à nos filles toutes les permissions, dont elles l'auoient prié.

Le Vicaire ayant executé les ordres de l'Archeuesque, & le iour auquel nos Nouices deuoient faire leur profefsion, estant arriué, elles firent leurs vœux avec vne solemnité extraordinaire; le Saint Sacrement fut exposé avec magnificence dans leur Eglise, toute la ville y accourut; le Seigneur Euesque de Senés fit la ceremonie, reuestu de ses habits Pontificaux; la Musique de la Metrapole y asista, & chanta le *Veni Creator* au commencement, & le *Te Deum* à la fin. Il y eut vne tres-belle, & treseloquente predication sur le quatriéme vœu de nostre Ordre, faite par le Pere Lambert de la Compagnie de Iesus, qui la prononça avec tant de zele & de pieté, que tout son auditoire en fut émeu. Je ne scaurois exprimer la satisfaction de nos vertueuses filles dans la possession de l'estat religieux, dont la poursuite leur auoit cousté tant de prieres, tant de larmes, tant de penitences, & tant de trauaux. Il semble que nostre Fondateur deuoit estre transporté de ioye, de voir enfin l'acheuement de l'œuure de Dieu, & l'accomplissement des promesses de la sainte Vierge Mere de Misericorde, dans la profession des premieres filles de son Ordre; car nous pouuons dire, qu'il commença pour lors à moissonner ce qu'il auoit semé, & à gouter des fruiçts de ses peines, voyant l'établissement de l'Ordre, pour lequel depuis plusieurs ans, il auoit pris tant de soin, & souffert de si rudes persecutions. Neantmoins il ne témoigna aucune satisfaction extraordinaire: mais

au contraire, comme il estoit tousiours dans vne crainte respectueuse des Iugemens de DIEU, & dans vn profond aneantissement de luy mesme, il parut plus estonné qu'auparavant: c'est ainsi qu'il en parle luy mesme dans quelques Lettres qu'il écriuit pour lors à des personnes de pieté qui estoient sous sa direction. *Voyez les Lettres trente-neuf & quarante.*

CHAPITRE XLVII.

L Pere Yvan travaille pour faire approuver les Constitutions de son Ordre.

COMME l'Archeuesque d'Aix allant à Tholose, & portant avec soy les Constitutions, & la formule du quatrième vœu des filles de la Misericorde, auoit promis de les faire examiner par des personnes les plus capables qu'il trouueroit, il s'acquita de sa promesse; de façon que dès qu'il fut arriué, montrant auoir autant de soin des interets de nos filles, que de son procès, il proposa leur Constitution, & leur quatrième vœu dans vne grande assemblée qu'il fit faire pour ce sujet, où estoient l'Archeuesque de Tholose, quelques Prelats, & plusieurs autres personnes pieuses & sçauantes. A peine eut on ouy la lecture des Constitutions, que tous iugerent qu'il n'y auoit rien qui ne deust estre approuué: mais pour le quatrième vœu, quoy que chacun monstroit en auoir vne haute estime, comme d'une chose grandement vtile, & mesme necessaire dans l'Eglise: neantmoins tous conclurent que l'exécution en estoit tres-difficile, à moins que les Conuents du nouuel Institut eussent de grands reuenus, pour supleer à l'insuffisance de la dot des pauvres Damoiselles.

Cette difficulté ayant esté iugée tres-considerable, on ne conclu rien dans cette premiete assemblée, ny dans quelques autres qui furent faites pour le mesme sujet; si bien que l'Archeuesque d'Aix écriuant à nostre Fondateur, & à ses Religieuses, leur fit sçauoir le sentiment des personnes qu'il auoit consultées, touchant leurs Constitutions, & leur quatrième

vœu

vœu, les exhortant à continuer leurs prieres, & leurs exercices de deuotion, adioustant encore, *qu'il leur permettois de recevoir de pauvres Damoiselles dans leur Monastere, conformément à leur premier dessein, & que à son retour il arresteroit toutes choses.*

Si nostre Fondateur fut affligé d'une part, voyant que le quatrième vœu de son Institut, paroissoit si difficile à tous ceux qui l'examinoyent; il receut d'autre costé vne grande consolation, de ce que l'ordinaire luy permettoit de l'exécuter. Ainsi il receut plusieurs filles de grande vertu, dont la plus part n'auroient pas eu vne dot suffisante, pour estre admises dans les autres Conuents. Et ce qui estoit tout à fait singulier, consiste en ce que le Pere Yvan parmy le grand nombre des filles qui se presentoyent, pour estre Religieuses dans son Monastere, preferant les pauvres aux riches, admettoit plustost celles qu'il connoissoit bien appellées, quoy qu'elles fussent dépourueës des biens temporels, que celles qui estoient riches: mais qui paroissoient n'auoir pas les qualitez necessaires à l'estat religieux. Mais la merueille estoit encore plus grande, en ce que le Conuent n'estant point fondé, & les filles qui auoient esté receuës, n'ayans apporté que fort peu de bien, le Monastere ne laissoit pas de subsister honorablement, sans que nos Religieuses fussent à charge à personne, ny en general, ny en particulier; de maniere que la Mere de Dieu protegeant son nouuel Ordre, excitoit des personnes charitables à fournir à ses filles, tout ce dont elles pouuoient auoir besoin; tellement qu'elles auoient mesme en abondance toutes les commodités necessaires

Pendant ce temps là, comme l'Archeuesque estant reue-nu de Tholose, témoigna vouloir approuuer les Constitutions de nos Religieuses; pourueu que l'on peust establir parmy elles quelque moyen, de faire subsister leurs Conuents dans la pratique du quatrième vœu: nostre bon Pere luy proposa le traual manuel, auquel elles s'employoient tout le temps qu'il leur restoit, apres leurs exercices de Religion. Ce moyen fut trouué excellent, & tres-conformé à l'esprit du Christianisme, & de la vie religieuse; & ainsi nostre

Prelat en estant satisfait, donna nos Constitutions à vn sçavant Ecclesiastique pour les examiner la derniere fois. Nostre Fondateur fut sensiblement mortifié en cette occasion; car comme il desiroit estre present à l'examen, que l'on feroit de ses Constitutions, ainsi qu'il estoit raisonnable, il en fut refusé avec mépris: neantmoins cét Ecclesiastique s'acquitta si fidelement de sa commission que le Prelat, nostre Fondateur & les Religieuses en furent satisfaits. Mais qui croira, qu'apres cela l'Archeuesque diffiera encore à donner son approbation? il faut auoïr que c'estoit vne espee de martyre à nostre bon Pere, que les delais de ce Prelat, mais piûtost c'estoit vne occasion, dont Dieu se seruoit pour manifester plus clairement sa bonté, & sa protection enuers nostre nouuel Institut.

En effet comme l'Archeuesque continnoit ses remises, en telle sorte que personne n'osoit plus le solliciter; Dieu le sollicita luy-mesme, & le fit consentir en cette façon. Vne de nos Religieuses ayant esté fortement inspirée de faire presser le Prelat encore vne fois, & qu'asseurément il seroit disposé à consentir à ce qu'on desiroit, comme le Pere Yvan & le Pere Maunier Iesuite, & son compagnon s'entretenoient des faueurs que le Ciel auoit departies à nostre Ordre en presence de la mesme Religieuse; *Mes Peres, leur dit-elle, ce n'est rien, vous verrez bien d'autres merueilles, que le Seigneur fera à l'occasion de ses pauvres seruantes. Je ne sçay fille, repartit le Pere Yvan, pourquoy vous dites cela; puis que vous voyez que l'ordinaire ne veut pas approuuer nos Constitutions, apres tant de prieres que nous luy en auons faites. Mon bon Pere, repliqua la Religieuse: prenez la peine d'aller presentement chez luy avec ses bons Peres Iesuites, & vous verrez la merueille du Seigneur: car assurement l'Archeuesque vous accordera tout ce que vous luy demanderez.*

Ces paroles furent receuës par le Pere Yvan, & par les Iesuites, non seulement avec refus, mais encore avec vn grand mépris; si bien que s'adressans à elle avec quelque sorte d'indignation; *quoy, dirent ils, voulez vous que nous allions recevoir de nouveaux affronts? & ne sçauéz pas que l'Archeuesque ne veut*

plus estre importuné de nos affaires, & qu'il en est tellement rebaté, qu'il se fâche contre tous ceux, qui prennent la liberté de l'en entretenir ? ie vous demande pardon, répondit la fille. si ie contredis : mais ie vous promets, que vous serez tres bien receus si vous y allez, de maniere, que vous devez partir à l'heure mesme sans aucun delay. Ils se fâcherent encore contre elle, l'accusant de presumption & de legereté ; mais comme elle continua à les presser viuement, disant qu'elle se soumettoit à toute sorte de mortification, si la chose ne reussissoit ainsi qu'elle l'auoit proposé ; Ils y allerent enfin avec bien de la peine, & de la crainte, & presque en murmurant contre celle qui les y portoit.

Mais leur peine & leur apprehension cessèrent, dès qu'ils se presenterent à l'Archeuesque ; parce que ce Prelat, dès qu'il les apperceut, s'approchant d'eux avec des demonstrations de bonté, & d'une façon tout à fait obligeante, leur fit esperer vne heureuse issuë de leur voyage : & ainsi estans encouragés par ce bon accueil ; *Monseigneur, luy dirent-ils, la bonne sœur N nous a pressés de venir à vostre Grandeur ; nous assurant de la part de Dieu, que nous en serions tres bien receus, & que nous la trouuerions disposée à signer les Constitutions, pour lesquelles nous l'auons importunée tant de fois. Cette bonne fille a eu raison, répondit le Prelat, de vous dire ces choses, & ie connois bien par là, qu'elle a esté poussée par les mouuemens du saint Esprit ; puis qu'elle a connu les dispositions de mon cœur, qui me portent à luy accorder ce qu'elle desire. Donnez moy vos Constitutions, & ie les signeray tout presentement.* La chose fut faite à l'heure mesme, avec tant de bonheur, que l'Archeuesque témoigna en auoir vne entiere satisfaction, au lieu des extrêmes repugnances qu'il auoit montrées auparauant.

Quelque temps apres nostre Fondateur ayant ennoyé à Rome pour faire confirmer par sa Sainteté, ce que l'ordinaire auoit estably dans son Institut, il y eust de nouuelles difficultés touchant le 4. vœu : mais enfin la Sainteté en laissa la pratique libre, & par vu Bref du 3. Iuillet 1642. confirma l'approbation que l'ordinaire auoit donnée aux Constitutions de nos

Religieuses, lequel Bref fut confirmé par vn semblable du Pape Innocent X. du 2. Avril 1648. & le tout receu, & appuyé par les Lettres patentes de sa Maiesté tres-Chrestienne, enregistrees par le Parlement d'Aix, & apres par le Parlement de Paris. Voila enfin le commencement, le progrès, l'établissement de l'Ordre des Religieuses de Nostre Dame de Misericorde, & de leur premier Monastere, erigé dans la ville d'Aix la capitale de Prouence.

CHAPITRE XLVIII.

Dieu donne vn logement au Pere Iuan aupres de ses Religieuses par vne voye merueilleuse.

COMME tous les troubles que l'on auoit suscités contre la Congregation des Religieuses de Nostre Dame de Misericorde, furent entierement apaisées, par l'approbation du Saint Siege, de l'ordinaire & de sa Maiesté tres Chrestienne, dont nous venons de par ler, nostre Fondateur se trouua dans vn grand repos; si bien qu'il ne luy restoit plus qu'à travailler à l'auancement de ses filles, & à les conduire à la perfection de l'estat religieux. C'est à quoy il s'employa sans relasche, & avec vn zele tout à fait singulier; c'est pourquoy afin d'y vacquer encore avec plus d'affiduité, il se resolut de prendre vn logement aupres de leur Monastere. Aussi souffroit il mille incommoditez, de venir plusieurs fois chaque iour de la maison des Peres de l'Oratoire, où il auoit logé iusques alors, & qui est beaucoup éloignée du Conuent de ses filles: outre que par le mesme éloignement, elles estoient bien souuent priuées du secours, que sa presence pouuoit leur donner.

Si ce dessein estoit raisonnable, l'execution en estoit difficile parce qu'il n'y auoit dans le voisinage, que de maisons occupées par des Laiques, parmy lesquels nostre bon Pere ne vouloit pas se loger: craignant d'estre interrompu dans ses exercices de pieté. Enfin apres en auoir prié le Seigneur, & sa

sainte Mere de Misericorde , la prouidence luy fournit le moyen d'accomplir son desir d'une maniere admirable. Ceux qui ont veu la situation du Monastere de nos Religieuses dans Aix , sçauent qu'auant l'agrandissement de cette ville, il estoit basti contre les murailles & le fossé, n'y ayant qu'une ruë entre les deux. Il y auoit vne tour de ces murailles de la ville , qui dominoit dans le iardin de nos Religieuses ; de telle sorte qu'à l'occasion d'une fenestre de la mesme tour, on pouuoit voir tout ce qu'elles faisoient dans leur iardin , on pouuoit mesme leur parler ce, qui les incommodoit grandement.

Nostre Fondateur qui cherchoit vn lieu pour s'y loger, trouuant cette tour propre à son dessein , pria vne Dame a qui elle appartenoit de la luy vendre, luy enoffrant mesme vn prix qui en excedoit la valeur , pour la faire condescendre avec plus de facilité. Toutesfois cette Dame le refusa absolument, & persista dans son tefus, quelques instantes prieres qu'il luy en fit. Cela porta nostre bon Pere , qui sçauoit d'ailleurs quelle estoit la volonté du Seigneur sur certe affaire , à luy dire ces paroles ; *Madame prenez garde à ce que vous faites ; vous refusez de me vendre cette tour, quoy que ie vous en offre de l'argent constant, plus qu'elle ne vaut , & i'espere que la sainte Vierge mere de Misericorde, vous contraindra de me la donner gratuitement.*

Cette predication ne tarda pas d'auoir son effer ; car quelque temps apres, cette mesme Dame estant affligée à l'occasion d'un procès de tres grande importance, qu'on luy suscita, ne trouuant pas les papiers necessaires pour se deffendre, elle creut que dieu luy enuoyoit ce fleau, en punition du refus quelle auoit fait de vendre sa tour au Pere Yvan ; si bien que s'adressant à luy toute espleurée, apres luy auoir raconté le suiet de son affliction, elle le cooiura de recommander son affaire à la mere de dieu , promettant de luy donner sa tour, par pure reconnoissance, si elle'gagnoit son procès. Le Pere la regardant avec vn souftris serain qui dissipa vne partie de son apprehension.

Ne vous l'auois-je pas dit , luy répondit il , que la sainte

Vierge vous contraindroit de donner cette tour pour le logement du Prestre des pauvres filles de N. Dame de Misericorde? Allez en paix, & consolez vous, je commanderay à nos filles de prier pour vostre affaire, & j'espere que tout ira bien pour vostre satisfaction. La chose arriva de la sorte; cette Dame trouva les papiers dont elle avoit besoin, gagna son procès & accomplit sa promesse, liurant la tour en pur don. Le Pere Yvan fit d'abord fermer la fenestre qui avoit veuë dans le jardin de ses Religieuses, & en ouvrant d'autres, fit accommoder cét edifice; en sorte qu'il y eut du logement pour luy & pour vn autre Ecclesiastique.

Quelque temps apres Monsieur de Richelieu Cardinal de Lyon, allant à son Abbaye de saint Victor de Marseille, & passant par Aix, visita à son ordinaire nostre bon Prestre, & voyant la nouvelle maison, le menaça en raillerie de faire des plaintes à la Cour contre luy de ce qu'il s'estoit emparé d'une tour des murailles de la ville pour brasser quelque trahison. *Monseigneur*, répondit le Pere Yvan, *il faut que vostre Eminence forme ces plaintes contre Monsieur N. que voilà, Intendant pour le Roy en ce pays; parce qu'ayant jugé un procès de tres grande importance en faveur de Mad. d'André, il a esté cause qu'elle m'a fait present de cette tour, en reconnoissance des prieres que nos filles ont faites pour elle envers Nostre Dame de Misericorde. Et vostre Eminence sçaura, adiousta-t'il, que cette Dame avoit refusé de me vendre sa tour, lors que je la luy ay demandée à acheter, luy en offrant contant le iuste prix.*

Le Cardinal surpris par cette réponse, voulut estre pleinement informé du procès, & du don de cette Dame, & à l'heure mesme, comme il s'en fut enquis, le sieur intendant & quelques autres personnes des plus considerables de la ville, qui estoient presentes, raconterent naïvement à son Eminence, de laquelle façon cette affaire s'estoit passée, & confirmerent ce que le Pere Yvan en avoit recité.

CHAPITRE XLIX.

*De l'employ du Pere Yvan, & des conferences qu' il faisoit
aux Ecclesiastiques*

LES bons & les fideses ouuriers trouuent tousiours de la besoigne pour trauailler, & la prouidence diuine, qui départ à ses seruiteurs de riches talës, leur fournit aussi les moyens & les occasions de les employer. Le S. Siege, l'Archeuesque, & la Maiesté tres Chrestienne ayant approuué l'Institut des Religieuses de Nostre dame de Misericorde tous les troubles exterieurs ayant cessé, il ne restoit plus à nostre Fondateur, qu'à procurer l'auancement de ses Religieuses dans la vertu, & les conduire par ses instructions & les exemples à la plus haute perfection de leur estat. C'est à quoy il s'employoit avec assiduité, & avec vn zeile singulier, & Dieu benissant ses trauaux dans la fidele cooperation de ses filles, le succès en estoit merueilleux.

Ces Religieuses de Nostre Dame de Misericorde, menotent vne vie exemplaire, & d'vne edification vniuerselle. Tout le monde les auoit en grande veneration; Dieu faisoit plusieurs merueilles en faueur de ceux qui auoient recours à leurs prieres & à celles de leur Fondateur, en sorte qu'il n'y auoit presque point de malade, ny de personne affligée dans Aix qu'il ne fist faire des prieres dans leur Eglise, & n'implorast l'assistance de leurs intercessions. On y accouroit mesme des Bourgs & des villes voisines pour le mesme suiet, & Dieu continuant d'operer des merueilles par les prieres de nostre bon Prestre, & de ses filles, le concours estoit si grand dans leur Eglise, qu'elle estoit plus frequentée qu'vne celebre Paroisse.

Cette affluence de peuple donnoit de l'employ au Pere Yvan, parce que la plupart alloit a confesse vers luy, en sorte qu'il passoit presque toutes les matinées dans le Confession-

nal pour ouyr ceux qui se presentoient, non seulement les festes & les Dimanches, mais encore les iours ouurables. Son zele, la haute estime qu'on auoit de sa vertu, luy procurerent vn autre employ plus auantageux pour la gloire de Dieu, & le bien du prochain c'est à sçauoir l'instruction de plusieurs ieunes Ecclesiastiques, qui estoient attirés par la pureté & la solidité de sa doctrine, & par la simplicité & l'innocence de ses actions. Nous auons remarqué ailleurs qu'il auoit tousiours témoigné vn grand zele pour la reformation du Clergé, & qu'il s'y estoit employé avec ardeur, toutes les fois qu'il auoit eu le moyen d'y traualler. La Prouidence diuine luy en fournit l'occasion, dès que les affaires de son ordre luy donnerent quelque relasche, & qu'il se fut logé dans la maison dont nous auons parlé cy-dessus.

Il n'y fut pas plustost retiré qu'il y fut visité, & consulté par plusieurs ieunes Ecclesiastiques qui le choissoient pour leur directeur; l'on ne sçauroit exprimer avec quelle bonté & amour il les receuoit, & avec quelle benediction il les esleuoit à l'oraison, & à la mortification, à donner bon exemple, au zelé, & aux autres vertus Euangeliques. Ces Ecclesiastiques estans attirez de plus en plus par le profit qu'ils receuoient des discours, & des actions de nostre bon Pere, s'assembloient diuerses fois la sepmaine, & souuent le mesme iour dans sa maison pour y faire des conferences, comme si la maison de nostre Prestre eust esté vne Eschole publique de science & de vertu, aussi l'estoit elle, puis que celuy qui l'occupoit, estoit vn des plus éclairez dans la vie spirituelle, & des plus vertueux personnages de ce siecle.

Il assistoit luy mesme à ces conferences pour encourager les Ecclesiastiques par sa presencc, & auoir occasion de les instruire comme ils se deuoient comporter. Il est vray qu'il témoignoit auoir de la repugnance, quand il traittoit des matieres de la Theologie scholastique, ou de la controuersé, s'excusant par fois sur sa vieillesse, ou sur l'aduersion qu'il auoit des disputes contentieuses. Il ne pouuoit du tout souffrir que l'on proposast, ou que l'on soustint avec chaleur les objections contraires à la Foy, ny aussi que l'on auançast des propositions

propositions tant soit peu contraires au sentiment del'Eglise, ou à l'autorité du saint Siege ; car pour lors ou il rompoit l'assemblée, ou il se retiroit sans mot dire ; mais il assistoit, & presidoit aux conferences touchant les matieres de la deuotion.

Ces diuerses conferences donnerent commencement à vne Academie ou assemblée, que l'on a depuis continuée durant plusieurs années dans la ville d'Aix, touchant la façon de prescher chrestienement & solidement la parole de Dieu. Cette Academie estoit composée de plusieurs Ecclesiastiques, qui choissoient entre eux chaque année, ou de six en six mois, vn Prefet pour donner, & faire obseruer les ordres à ce necessaires. L'on n'y admettoit que des personnes choisies, & qui auoient les qualitez conuenables : sçauoir est l'estat & l'habit Ecclesiastique, la science, la pieté, & le bon exemple ; l'experience ayant fait voir que ce choix estoit absolument necessaire pour la continuation de l'Academie.

La predication estoit le principal'exercice que l'on y faisoit ; chacun estoit obligé à son tour de prescher deuant l'Assemblée. Le choix de la matiere estoit libre, & l'on auoit tout le temps que l'on demandoit pour se preparer. Apres l'action, le Prefet prioit les assistans, de dire chacun par ordre les defauts qu'ils auoient remarquez sur le suiet, la forme & la disposition du discours ; sur le geste, la locution, la voix, &c. ce qui se faisoit simplement, charitablement, & avec vne grande discretion, pour ne décourager les timides, & ne pas donner de la vanité aux plus hardis. En disant les defauts qui auoient esté remarquez, l'on proposoit les remedes, & les vertus contraires : & ainsi l'on expliquoit insensiblement, & d'vne façon tres familiere, ce qui estoit de plus beau & de plus solide dans la Rethorique Chrestienne.

Il est vray que l'on ne s'arrestoit pas tant à la pureté du langage, ny à l'arrangement des paroles (quoy qu'on ne le negligeast poin) qu'à la solidité du discours, & à la ferueur des mouuemens. Et le principal point sur lequel on insistoit d'auantage, étoit de rendre vn Predicateur deuot dans le choix des suiets d'edification & de profit ; fort & conuainquant dans

les preuues tirées de l'Ecriture , des Peres & de la Theologie ; familier & populaire dans son expression ; si bien qu'il tâchoit de se rendre intelligible aux plus grossiers ; zélé & ardent dans ses mouuemens , afin de toucher plus efficacement ; enfin tres-moral , & tres-practique , en sorte qu'autant qu'il le peust , il descendit iusques aux moindres actions pour mieux inculquer sa doctrine , & en faciliter la pratique . Voila les qualités que l'on requeroit à vn predicateur , & que l'on s'efforçoit de donner à ceux qui frequentoient l'Academie .

Le secret y estoit tres-religieusement obserué . L'on y entretenoit vne tres-intime & tres-cordiale vnion , chacun témoignant de l'affection , & du zele pour l'auancement de ses confreres . Aussi auoit t'on grand soin d'éviter que l'enuie , l'ambition , la ialousie & autres sources de diuision nes'y glissassent . On finissoit l'Assemblée par vne priere à la sainte Vierge comme on l'auoit commencée par l'inuocation du saint Esprit : parfois quand il restoit du temps apres l'action , & la correction , on s'excitoit mutuellement par vne sincere communication à la pratique de l'Oraison , du zele , du bon exemple , & des autres vertus conuenables aux personnes Ecclesiastiques .

Au reste le profit en estoit tres-grand , tant pour les Ecclesiastiques , qui par cette douce & facile voye apprenoient à prescher vtilement la parole de Dieu , que pour les fideles qui assisoient à leur Predication . Pour preuue dequoy c'est assez de dire que la seule Academie d'Aix , quoy que commençante , & par ainsi encore foible & defectueuse , forma dans quelques années vn tres-grand nombre de Predicateurs qui annoncent maintenant la parole de Dieu avec benediction . La pluspart desquels ont aduoüé qu'ils n'auroient iamais eu le courage de parler en public , s'ils n'auoient esté instruits & animez dans cette assemblée . Il seroit à souhaitter que Nosseigneurs les Prelats instituassent de semblables Academies dans leurs Dioceses , & particulièrement dans les villes , où il y a des Colleges & vniuersitez , au moyen dequoy il y a grand nombre d'Ecclesiastiques ; car par cette voye ils auroient à leur disposition de fideles ouuriers , dont la capacité & la ver-

ruleur seroit connuë, pour les employer dans la vigne du Seigneur. Cependant nous deuons rapporter la gloire de cette assemblée au bon Pere Yvan, puis qu'elle a esté commencée, & continuée par ses conseils, & par les ecclesiastiques qu'il dirigeoit.

CHAPITRE L.

Des soins du Pere Antoine Yvan en la Fondation d'un Monastere de son Ordre en Auignon.

IL y auoit enuiron dix années, que l'Ordre des Religieuses de Nostre Dame de Misericorde estoit estably dans Aix, lors que le bruit des merueilles que Dieu y auoit operées, & y operoit continuellement, & la haute estime de la vertu du Pere Antoine Yvan, & de ses Religieuses, excitèrent plusieurs personnes à demander, & à procurer l'établissement du mesme Ordre en d'autres villes. La premiere à qui Dieu donna ce pieux mouuement, fut l'Abbesse du Monastere de saint Georges d'Auignon, laquelle desirant reformer son Conuent, fut portée à demander les Religieuses de Nostre Dame de Misericorde par les choses merueilleuses que le bruit commun en publioit. Elle en écriuit au Pere Yvan, & à la Superieure du Monastere d'Aix avec tant d'humilité, & de ferueur qu'il paroissoit bien qu'elle estoit poussée par l'Esprit du Seigneur.

Nostre bon Prestre qui ne resoluoit iamais aucune chose importante, qu'apres l'auoir soigneusement examinée, & en auoir long temps prié Dieu, luy répondit qu'il falloit recommander ses intentions au Seigneur, & à la sainte Vierge, & qu'on verroit par sa perseuerance, si le dessein qu'elle proposoit venoit de l'Esprit diuin. L'Abbesse fut confirmée dans l'estime qu'elle auoit desia du Pere Yvan, par cette réponse qu'elle trouua pieuse & desinteressée; ainsi elle perseuera dans

sa demande durant quelques années; & pendant ce temps là vne partie de ses Religieuses se ioignirent à elle pour embrasser le mesme dessein. Mais comme tous les ouurages de Dieu sont contrariez, le pieux dessein de cette Abbessse fut bien tost combattu par l'opposition que forma l'autre partie de ses filles, qui refusant de recevoir l'Ordre de Nostre Dame de Misericorde, demanderent des Religieuses d'un autre Institut.

Cette contestation des deux parties, causerent mille peines, & mille troubles à l'Abbessse, tant dans l'enclos qu'au dehors de son Monastere. Elle persista neantmoins avec courage dans sa premiere resolution; & la sainte Vierge Mere de Misericorde luy obtint plusieurs graces pour la fortifier. Nous pouuons mettre entre ces graces, comme vne protection singuliere, la permission que luy donna Monseigneur Philonardy Archeuesque d'Avignon, pour lors Nonce de la Sainteté auprès du Roy de Pologne. Car ayant esté prié par l'Abbessse d'approuuer son dessein, & l'appuyer de son autorité, il luy accorda sans delay ce qu'elle luy demandoit, & luy témoigna mesme de la ioye de ce qu'elle auoit choisi les Religieuses de Nostre Dame de Misericorde, bien que d'ailleurs il fust tres exact, & tres difficile en ce qui regardoit le changement, & l'établissement des Religieuses; & particulièrement quand il s'agissoit d'un Ordre nouveau, & qu'il n'estoit encore bien estably.

Cette permission qui fut receüe comme vne grace du Ciel, encouragea l'Abbessse, & tous ceux qui s'interessent dans sa cause, à poursuiure l'accomplissement de son dessein. Le Vicelegat, & les Consuls de la ville d'Avignon donnerent leur consentement, & firent presser nostre bon Prestre de leur enuoyer de ses Religieuses. L'Archeuesque d'Aix y consentit aussi avec le Gouverneur de la Prouince, & tous les autres amis de l'Institut de la Misericorde. Il n'y auoit que le Pere Yvan, & ses premieres filles qui n'estoient pas satisfaits de ce dessein, & qui apprehendoient ie ne sçay quelle croix qui leur faisoit de la peine: la suite a fait voir que leur apprehension estoit iuste; Neantmoins, ils s'y accorderent aussi, renonçant à leurs propres lumieres, pour se sou-

mettre à la volonté des Superieurs.

Toutes choses estans donc arrestées, le Pere Yuan partit d'Aix avec quatre de ses Religieuses, & quelques pieuses Dames de condition, qui voulurent les accompagner. Cette troupe ne fut pas plustost parmy les champs, qu'il s'éleva vn terrible orage accompagné d'éclairs, de tonnerres, & de pluye. Les Dames, & les autres qui accompagnoient nos Religieuses, vouloient rebrousser chemin, ou se retirer dans quelque maison champestre: mais le Pere Yvan les retint, & les encouragea à poursuivre leur route, les assurant qu'il n'y auoit rien à craindre, & qu'aucun de la compagnie n'en seroit incommodé. En effet encore que l'orage fust tres-grand, & que la pluye tombast à verse tout à l'entour; aucun neantmoins de la compagnie ne fut mouillé, comme s'il y eust eu vn Ange, qui eust détourné l'orage, & empesché la pluye de leur tomber dessus. Aussi les habitans des bourgs par où ils passerent, estoient étonnez de les voir sans estre mouillez, & leur demandoient comment est-ce qu'ils auoient esté garantis de la pluye; les blasmant mesme d'auoir continué leur chemin par vn si horrible temps. Mais ce temps leur fut favorable, en ce que les chaleurs estant pour lors excessiues, car c'estoit au mois d'Aoust, les nuës qui les couuroient, & la pluye qui leur tomba à l'entour, leur seruit de rafraischissement.

Il y eut d'autres accidens pendant ce voyage, qui sont merueilleux, & que nous deuons attribuer à vne singuliere protection du Seigneur. Car en premier lieu, comme nos Religieuses furent arrivées au port de la Durance, & qu'elles vouloient sortir de leur lictiere pour entrer dans le bateau, le Muletier haussant la portiere, vn Cocher qui venoit d'vn autre costé, poussa ses cheuaux à toute bride dans le mesme chemin, où estoit la lictiere; de façon que le Muletier n'ayant pas le temps de se détourner, se trouua en estat d'estre foulé par les cheuaux, & brisé par les roues du carrosse. Il se prit à crier de frayeur, les Religieuses qui virent le danger s'écrierent avec luy; & en mesme temps cet homme se trouua élevé sur le brancas de la lictiere, & hors de l'atteinte du carrosse, sans

auoir receu d'autre incommodité, que celle de la peur.

Cette grace fut snuied'vne autres d'autant que les Religieuses n'eurent pas plustost passé la Durance, que cete riuere, l'vne des plus rapides de France, se grossit & déborda de telle sorte, que les cheualets qui soutiennent la corde, dont on se sert pour faire le trait, estant emportez par la violence des eaux, le passage de la riuere ne put estre libre de quelques iours.

Il arriua vne troisieme rencontre merueilleuse qui parut encore plus fauorable que les precedentes. Les personnes qui auoient persecuté nostre bon Prestre, & ses Religieuses de la Misericorde dans Aix, s'efforçant de les troubler encore dans leur établissement à Auignon, auoient pour cét effet écrit diuerfes Lettres à plusieurs personnes de la mesme ville d'Auignon pour les exciter à mettre des obstacles au dessein du Pere Yvan, & de ses filles. Ces Lettres auroient infailliblement causé du bruit, & fait de la peine; mais le Seigneur y pourueut. Car ayant esté perduës dans le chemin par le porteur, elles tomberent entre les mains des amis de nos Religieuses, qui sans en faire aucune plainte euerent le mal. Elles auroient pû faire, & s'en seruirent avec charité & prudence, pour le bien de nostre Institut.

A iuger de la suite par le commencement, il sembloit que l'établissement de nos Religieuses dans Auignon, deuoit estre tres-heureux, puis qu'il commençoit avec tant de benediction: L'issuë neantmoins monstra que les craintes du Pere Yvan, quand il refusoit de l'entreprendre estoient bien iustes. Car ses filles ayans esté receuës dans Auignon avec tout le bon accueil qu'elles pouuoient desirer, apres auoir esté établies dans le Monastere de saint George; l'Abbesse, & les Religieuses de son party, s'estans soumises à leur conduite, elles en sortirent, & s'en retournerent à Aix, y estans contraintes par l'opposition des Religieuses de l'autre party, qui auoient demandé les filles de la Visitation.

Le Pere Yvan recut avec vne grande conformité aux ordres de la volonté diuine, la confusion qu'il eut en la personne de ses filles: mais le Seigneur en tira sa gloire, & celle de son seruiteur, & de ses seruantes. Car le Con ent de saint

Georges fut reformé à l'occasion des Religieuses de Nostre Dame de Misericorde , & ces mesmes Religieuses durant le temps qu'elles demeurerent dans Auignon , y laisserent tant de rares exemples de leur vertu , & de leur pieté , & vne si grande edification de leur conduite , & de celle de leur Fondateur , qu'elles ne tarderent pas d'y estre rappellées. Ainsi deux années apres leur sortie , les Magistrats , & tous les principaux de la mesme ville les presserent avec de grandes instances d'y reuenir , & les receurent pour la seconde fois avec de singuliers témoignages de ioye & de bien-veillance. Ce second voyage fut plus heureux que le premier ; d'autant que du depuis elles s'y sont tres bien establies , & y viuent avec grande benediction dans l'obseruance de leurs Regles & Constitutions.

CHAPITRE LI.

Le Pere Tvan traueille à la Fondation d'un Monastere de son Ordre dans Marseille.

NOS Religieuses estans sorties du Monastere de saint Georges , & reuenues dans leur premier Conuent de la ville d'Aix , ainsi que nous auons dit , il sembloit à plusieurs qu'elles auoient receu vne iniure notable , qui feroit tort à leur Ordre naissant : mais la Prouidence adorable qui fait reussir toutes choses au bien de ceux qui se confient en elle , disposa les affaires de telle façon que ce congé leur fust fauorable , & mesme auantageux à l'amplification de leur Institut. En effet outre qu'elles laisserent de si heureuses dispositions dans la ville d'Auignon , qu'elles y furent bien tost rappellées avec honneur ; leur retour leur procura vn troisieme établissement dans Marseille , qu'elles n'auroient pu accepter en ce mesme temps , si elles eussent resté dans le Monastere de saint Georges.

[A peine furent elles arriuées dans Aix, que le sieur Bontemps

Docteur en Medecine, l'un des plus célèbres de la Prouince, frere de la mere de Bontemps, appelée Marie de Iesus-Christ, la seconde Religieuse de l'Ordre, & la premiere compagne de la Fondatrice, proposa au Pere Yvan, & à ses Religieuses de faire dans Marseille vne Fondation de leur nouuel Institut, offrant pour ce suiet son appuy, son credit & celuy de tous ses amis. Le voisinage de cette grande ville, qui n'est qu'à cinq lieues de celle d'Aix, & les auantages que l'on espera pouuoit en tirer pour la gloire de Dieu, & l'auancement de l'Institut, firent que la proposition apres auoir esté consultée & recommandée à Dieu & à sa sainte Mere, ne tarda pas d'estre acceptée avec agrément; de telle sorte que l'on chercha aussitost les moyens de l'exccuter.

Il y auoit dans Marseille, proche la Parroisse de saint Martin vn ancien College, où les Peres de l'Oratoire auoient demeuré, & apres eux les filles Orphelines, & qui en dernier lieu estoit resté au corps des Medecins pour y faire leurs Assemblées. Ce lieu parut tres-propre pour y bastir vn Monastere de nos Religieuses, d'autant mieux que sans y faire de grandes dépenses, elles y trouuoient vne Chappelle, vn iardin, des chambres pour y loger, & les autres apartemens necessaires à leur profession; outre que ce lieu appartenant à la ville, l'on fit esperer à nos Religieuses qu'elles l'obtiendroient en pur don, ce qui les ayderoit à pouuoir admettre parmy elles, de pauures Damoiselles sans vne dot suffisante suiuant la fin Principale de leur Institut.

La chose parut tres-facile; mais ainsi qu'il arriue ordinairement en la plus part des entreprises, particulièrement en celles de pieté, il y eut tât d'obstacles, & tant de difficultés dans l'exccution; què le Pere Yvan, qui alla à Marseille pour y trauailler, eut vn champ tres-ample pour exercer son humilité, sa patience & les autres vertus, dont il estoit enrichy. Assisté du credit, & des soins du sieur Bontemps & de ses amis, il n'eut pas beaucoup de peine d'obtenir des Magistrats de la ville la permission pour y fonder vn Couuent de son Ordre; mais quand il demanda le lieu dont nous venons de parler, il y eut mille oppositions, à cause que c'estoit le College des Medecins

decins, & vn lieu appartenant au public, & encore dépendant del'Hospital du saint Esprit de la mesme ville pour vne rente annuelle payable audit Hospital. Dieu disposa neantmoins les choses en telle sorte, qu'elles contribuerent à faire reussir le dessein de nostre Fondateur. Le sieur Bontemps ayant esté élu Reſteur du College des Medecins, employa si utilement le credit que sa charge & son rare merite luy donnerent, que ces Messieurs donnerent agreablement les mains à ceder leur College en faueur de nos Religieuses. La mesme année, le sieur de la Salle fut élu premier Consul de la ville, qui estant allié, & amy dud. sieur Bontemps, & frere de Madame de Guillard, femme du sieur Guillard Thresorier du pays dans la ville d'Aix, la meilleure amie, & la plus charitable bien-faitrice de nos Religieuses, se trouua disposé à contribuer tout ce qui dépendoit de luy, pour l'execution de nostre bonne œu-ure.

Mais parce que son consentement ne suffisoit pas, & qu'il falloit encore auoir celuy des autres Consuls ses Collegues, & de tout le conseil de la ville, composé des principaux habitants, cela causa de grandes pe-nes, & fit traîner quelque temps nostre Fondation. Il falloit vnir tous ces Messieurs du conseil, & leur insinuer les mesmes sentimens; cependant on n'y man quoit pas d'aduersaires, qui y formoient des oppositions. Nostre zelé Prestre trauailloit sans cesse, allant, tournant tantost chez les vns, tantost chez les autres pour les disposer à son dessein, il ne negligeoit aucun moyen, il n'épargnoit aucune fatigue: il n'y eut sorte d'humiliation, ny de mortification qu'il n'acceptast avec amour, pour venir à bout de son entreprise dans la venë de Dieu, & de Nostre Dame de Misericorde.

Vn iour ayant quelque permission à demander à vn des Messieurs les Consuls, il fut chez luy, dès le matin apres sa Messe iusques à midy sans pouuoir luy parler: il y retourna apres le dîner, & y demeura iusques au soir avec vne patience Angelique, sans pouuoir obtenir vn moment d'Audience. Il ne se rebuta pas neantmoins; car le lendemain il y fut encore avec vn visage gay & serain; mais sa gayeté se changea bien-

toſt en vnetres rude mortification, en ce que le Conſul luy refuſa ſa demande, il le gronda avec des paroles imperieuſes, témoignant qu'il eſtoit grandement coléré contre luy. Noſtre bon Preſtre écouta ſans mot dire les reproches qui luy furent faites, puis ſe mettant à genoux deuant luy, pour l'appaſer; *Mon bon Monsieur*, luy dit-il tres-ingenuëment, *ne vous ſaſchez pas touchant l'affaire que iſ vous ay propoſée; car il n'en ſera que ce que vous trouuerez à propos.* Ces paroles dites avec candeur, & d'une maniere touchante, émeurent tellement le Conſul, que relevant auſſi toſt noſtre bon Preſtre l'embrassa, luy fit diuerſes careſſes, & luy accorda tout ce qu'il luy auoit demandé.

Il fit vne ſeconde action encore plus humble, que celle que ie viens de raconter; ayant à parler pour la neceſſité de ſes affaires à vne perſonne de condition, comme toutes les portes luy furent fermées, & qu'il vid qu'il ne pouuoit auoir audience que par le moyen d'un laquay qui le rebutoit, il ſe mit à genoux deuant ce laquays, le ſuppliant de luy faire parler à ſon Maſtre. Ce ſeruiteur confus de voir à ſes pieds un Preſtre ſi venerable, en fut ſi touché qu'à l'heure meſme l'ayant introduit dans la chambre de ſon Maſtre, il luy procura vne audience fauorable, en laquelle il obtint ce qu'il demandoit. Il pratiqua pluſieurs autres ſemblables actions d'humilité & de patience dans la poursuite de ſa Fondation; de maniere qu'il donnoit un rare exemple, & vne edification tout à fait ſinguliere à tous ceux avec leſquels il auoit à traiter.

Mais il ne trauailla pas ſeulement à ſa Fondation, pendant le temps qu'il fut à Marſeille; la haute eſtime de ſa pieté & de ſon zele, le faiſant appeller en diuerſes Eglises pour y annoncer la parole de Dieu, il faiſoit des exhortations preſque chaque iour, & quelques fois deux ou trois le meſme iour avec vne affluence extraordinaire, & un profit merueilleux. L'Esprit de Dieu manifestant par ce moyen les talens; dont il auoit enrichy ſon ſeruiteur, il obtint enfin ce qu'il pouſſuuoit: La ville luy ayant accordé le lieu dont nous auons parlé pour y établir ſes Religieuſes, & trouué des moyens aſſeu-

rez, pour décharger ce mesme lieu de la rente annuelle qu'il deuoit à l'Hospital du saint Esprit.

Dés qu'il eut le consentement, & le don de la ville en la forme qui le souhaitoit, il s'adressa à Monseigneur de Gaulle pour lors Euesque de la mesme ville, pour luy demander la permission de faire accommoder le lieu qu'il auoit obtenu en la façon d'un Conuent regulier, & y emmener de ses Religieuses pour les y établir. Ce Prelat dont la memoire est en grande benediction, ayant reconnu le merite de nostre excellent Prestre dans les premiers entretiens qu'il eut avec luy, & s'estant informé de l'utilité de son Institut, & des benedictions que Dieu y auoit répandues, luy accorda avec ioye les Lettres, dont il auoit besoin; luy offrant encore son appuy & sa protection.

Il employa aussi tost diuers ouuriers pour accommoder ce qu'il falloit dans ce College, pour qu'il seruist à vne Cōmunauté de Religieuses, & particulièrement les portes, les grilles des parloirs, les murs, & tout ce qui regardoit la closture, dont il prenoit vn soin extraordinaire. Il demouroit presque tout le iour avec les ouuriers, pour prendre garde à la besogne, & il les payoit luy mesme chaque soir, leur faisant vne courte & frequente exhortation touchant leur salut. Les choses estans disposées, il s'en retourna à Aix; d'où ayant receu les permissions necessaires du Seigneur Archeuesque, il emmena quatre de ses Religieuses; c'est à sçauoir la reuerende Mere Superieure, Marie de la sainte Trinité, la Mere de Bontemps, Marie de Iesus-Christ, & les sœurs Marie de saint Michel, & Marie de saint Gabriel dans le carosse de la Dame d'Aupede, qui avec quelques autres Dames voulut les honorer de sa compagnie.

Il y eut vn concours extraordinaire dans leur maison, dès qu'elles y furent arriuées: les Consuls les visiterent d'abord, accompagnez des principaux habitans de la ville, & d'une foule innombrable de monde, qui estoit attiré par les merueilles que l'on publioit de ce nouuel Institut. Elles arriuerent le premier Samedy de Carême à deux heures apres midy, & le mesme iour le Pere Yuan fit mettre la closture à leur

Conuent; de maniere que l'entr e n'en fut permise que trois ou quatre heures. Plusieurs murmur rent de cete conduite, disant que quand des Religieuses s' tablissent dans vne ville, c'est la coustume de permettre l'entr e de leur Conuent, urant quelques iours pour la satisfaction du public ; mais les plus sages approuuerent ce que le P. Yvan auoit fait, & lou rent le zele qu'il t moignoit pour la conseruation des Vierges, pour lesquelles l' criture & les Peres ont toujours conseill  la retraite & la closture.

Plusieurs filles se presenterent en mesme temps pour estre receu s dans ce nouveau Monastere, l'on en receut quelques-vnes, selon l'esprit de l'Institut par charit , n'ayant vne dot suffisantes, il y en eut vne que les Religieuses ayant receu , le Pere Yvan fit mettre dehors, comme vn esprit incapable de la vie religieuse. Le temps fit connoistre combien il estoit  clair  dans le discernement des esprits ; car cette m me fille ayant  t  admise dans le Nouitiat d'un autre Monastere, les Religieuses furent contraintes de la faire sortir, l'ayant reconnu  inhabile   la Religion.

Nostre feruent Ecclesiastique s'arresta encore quelque temps   Marseille, cathechant, preschant, receuant   confesse les personnes qui s'adressoient   luy, & s'adonnant   de semblables  uvres de piet , & particulierement    tablir son Monastere pour le temporel & le spirituel, en quoy il reussit avec tant de bonheur, que ce Monastere a depuis subsist , & subsiste avec grande benediction   la plus grande gloire de Dieu, de Nostre Dame de Misericorde, &   l'edification de toute la ville.

CHAPITRE LII.

Du voyage du Pere Yvan à Paris , de son sejour , & de son retour en Prouence.

LA Fondation du Conuent des Religieuses de Nostre Dame de Misericorde dans Marseille ne fut pas plustost acheuée, que le Pere Yvan fut rappelé à Auignon , pour y en établir vn troisième , ainsi que i'ay desia dit , & à peine eut il acheué l'établissement de celuy-cy, que la Prouidence diuine par vne voye tout à fait singuliere l'appella à Paris pour le bien de son Ordre.

I'ay remarquay dans la seconde partie que quand Dieu veut faire quelque grand ouurage dans son Eglise, il en inspire le dessein à diuerses personnes ; choisissant apres pour le faire reussir celles dont sa diuine Maiesté veut se seruir. Cette conduite a paru dans la Fondation de l'Ordre de Nostre Dame de Misericorde ; car en mesme temps que le Pere Yvan y trauailloit en Prouence, vne fille de tres-grande pieté appellée Dame Poulin s'y employa aussi dans Paris , sans rien sçauoir de ce qui se faisoit en Prouence ; de maniere que cette Dame ayant presque le mesme dessein que nostre bon Prestre , & que sa premiere fille ; touchant la reception des pauvres Damoiselles, auoit desia fait bastir pour ce suiet vne maison dans la plaine de Grenelle au Fauxbourg saint Germain. Elle auoit mesme desia assemblé quelques filles pour commencer sa Congregation ; lors qu'elle apprit que Dieu auoit inspiré son dessein au Pere Yvan & à ses filles , & que ce fidele seruiteur de Dieu y auoit desia trauaillé avec tant de benediction que son Ordre auoit esté estably sous le titre de Nostre Dame de Misericorde. Cette nouvelle iointe à sa vertu qui estoit singuliere, la fit resoudre à se soumettre humblement avec ses filles à la conduite du Pere Yvan , & ne plus trauailler qu'à le faire venir à Paris, ou à obtenir de luy qu'il

enuoyast de ses Religieuses de la Misericorde pour embrasser avec ses compagnes leur Institut.

Ainsi elle en écriuit au Pere Yvan, & luy fit écrire par plusieurs personnes de grande autorité & vertu; il y eut diuerses Lettres de part & d'autre, & quelque temps s'écoula, sans qu'il y eust rien de conclud. Cependant la Dame Poulin se trouuant atteinte d'une maladie dont elle mourut auant l'accomplissement de son dessein, fit tout ce qu'elle peut pour en venir à bout: Car elle s'obligea par vœu de se faire Religieuse de l'Ordre naissant de Nostre Dame de Misericorde; elle fit faire le mesme vœu à ses filles, & se sentant proche de la mort, elle legua sa maison aux Religieuses de la Misericorde, au cas qu'elles vinssent s'établir dans Paris.

Ce fut le motif du premier voyage de N. bon Prestre en cette grande ville. Car comme tous ceux qui desiroient la propagation de son Institut, le presserent d'y venir à l'occasion de la maison que l'on auoit donnée à ses Religieuses, & des filles qui y estoient desia disposées pour estre receuës dans son Ordre; quoy qu'il eust de la peine à consentir, disant qu'il n'estoit pas encore temps, & que les choses n'estoient encore bien préparées, ainsi que le succès fit connoistre il s'y resolut neantmoins, sollicité par les instances continuelles de diuerses personnes, & attiré par cette occasion fauorable que la Prouidence luy fournit. Le Comte de Carces Lieutenant General, & grand Seneschal pour le Roy en Prouence, ayant dessein de faire le mesme voyage, luy offrit vne place dans son carosse; de façon qu'il la receut avec ioye, & avec grande reconnoissance, ainsi l'un & l'autre profiterent de cette rencontre; car le Pere Yvan receut mille caresses & mille témoignages d'amitié du Comte de Carces, & ce Seigneur receut de sa part beaucoup de consolation, & d'edification des entretiens du Pere Yvan, de son exemple, & du saint Sacrifice de la Messe qu'il celebroit chaque iour, nonobstant les fatigues du voyage.

Nostre bon Prestre estant arriué à Paris se logea premierement, proche la maison de la feuë Dame Poulin, où estoient les filles qui demandoient d'estre receuës dans son Institut.

Quelque temps apres le sieur Roubineau Directeur de l'Hospital des Incurables le logea dans cette belle & agreable maison, où il luy fit mille caresses, & contracta avec luy vne amitié si forte qu'il la continuë encore enuers ses Religieuses par les bons offices qu'il leur rend. Quelque temps apres l'Abbé Olier ayant decouvert les thesors de grace, & de vertu de nostre excellent Prestre, l'attira chez soy comme vn ouvrier tres capable de l'ayder par son conseil, & par son exemple dans le commencement de cét illustre & fameux Seminaire qu'il a estably avec tant de gloire & de benediction: de telle sorte que nostre bon Prestre accepta l'offre du sieur Abbé Olier avec d'autant plus de ioye & d'amour qu'il auoit vne plus haute estime de la vertu de ce grand homme, l'vn des plus pieux & des plus zelez Ecclesiastiques de nostre temps, qui le logea dans la Communauté des Prestres qui seruent à la Paroisse, ayant connu qu'il vouloit seruir avec assiduité, & soumission, comme vn simple habitué. Je ne scaurois dire le respect & l'amour qu'on luy portoit, tant dans cette Communauté, que dans le Seminaire, où il estoit souuent appellé, car on le consideroit comme vn Prestre rempli de l'esprit de Dieu, & qui estoit consommé dans la connoissance des plus grands secrets de la vie interieure, & dans la pratique des plus eminentes vertus.

Ainsi on le faisoit parler dans toutes les conferences, comme vn oracle de sagesse & de pieté, il estoit consulté dans les rencontres les plus importantes, & en tout chacun le respectoit comme vn homme de Dieu; de son costé il auoit tant de respect, & d'amour pour Monlieur Olier, & pour tous les Ecclesiastiques qui s'employoient dans le Seminaire des Clercs, ou dans la Communauté des Prestres, qu'il ne les regardoit pas seulement, comme ses enfans & ses freres; mais encore comme ses maistres & ses Peres; c'est pourquoy il s'attacha au seruice de leur Paroisse, comme s'il eust voulu passer avec eux le reste de sa vie, & qu'il n'eust eu aucune autre chose à faire dans Paris.

En effet au lieu d'auancer l'establissement de ses Religieuses, pour lequel il estoit venu à Paris, il sembla le reculer, &

au lieu de fortifier les petits commencemens qu'il y auoit déjà par la donation de la maison de ladite Poulin, il agit avec tant de froideur, qu'il les laissa entièrement détruire. Car comme des Religieuses Benedictines se furent emparées de cette maison là, apres auoir attiré à leur party la plus ancienne des filles de la mesme Dame Poulin; il ne témoigna nullement d'en estre fasché; & y ayant eu procez pource suiet entre les mesmes Benedictines & les autres filles de lad. Dame Poulin, il se comporta en sorte qu'il monstra n'auoir aucun empressement pour cette affaire. Il en témoigna mesme vne telle indifferance que ses amis luy en firent des reproches, le blasmant de negliger vne œuvre qui estoit de tres-grande importance pour l'auancement de son Ordre: & entre autres le sieur de Montmort Maistre des Requestes, l'un de ses plus intimes amis, & de ses plus puissans protecteurs qui portoit avec zele tous ses interets, & ceux de ses Religieuses de la Misericorde, & qui depuis a esté vn des premiers bienfaiteurs de son Monastere estably dans Paris: ce bon amy, dis-ie, pour lequel il auoit vn respect & vne affection particuliere, comme il prenoit grand soin de faire sortir les Religieuses Benedictines de la maison de la Dame Poulin, l'ayant vn iour rencontré: *Mon Pere*, luy dit il, *ie suis fort estonné du peu de soin que vous auez des affaires de vos Religieuses: vous sçavez ce qui se passe touchant la maison qu'on leur la donnée; tous vos amis travaillent avec empressement pour la leur conseruer, & vous ne vous remuez point.*


Le Pere Yvan rougit à ces paroles; il les receut neantmoins avec humilité, & répondant avec grande douceur: *Hé bien dit-il, mon bon Monsieur que faut il que ie fasse? ie suis prest de faire tout ce que vous iugerez à propos:* Monsieur de Montmort fut touché de la modestie & simplicité de cette réponse; de façon qu'il a depuis aduoué qu'il auoit cōnu par la suite des choses, que le bon Pere auoit esté conduit par l'esprit diuin en cette affaire là, & que son indifferance venoit de sa discretion, & des connoissances particulieres qu'il auoit que la maison de la Dame Poulin n'estoit pas propre pour ses Religieuses. Car si elles s'y fussent pour lors establies outre les dangers

DE N. DAME DE MISERICORDE. 411

dangers qu'elles auroient couru pendant les troubles de Paris, elles n'auroient jamais peu y subsister.

Ce procez que les filles de Madame Poulin intentèrent aux Religieuses Benedictines, qui auoient saisi leur maison, fut la cause du retour du Pere Yvan en Prouence; car ne pouvant plus demeurer dans Paris; sans y plaider au nom de ses Religieuses, il aima mieux abandonner le tout, & s'en retourner en son pays. Ainsi il s'en alla au grand regret des personnes qui commençoient à gouter sa conduite; mais au grand contentement de toutes les bonnes Religieuses, & de toutes les personnes, qui viuans sous sa direction, ne soupirroient qu'après son retour. Depuis ce temps là il a heureusement continué sa course, viuant tantost dans Aix, tantost dans Marseille, tantost dans Avignon, conduisant les Conuents, & plusieurs ames deuotes, & pratiquant les plus eminentes vertus de la perfection Euangelique.

Cependant la Diuine prouidence ayant disposé les choses pour fonder vn Monastere de nostre Institut dans Paris, il y enuoya de ses Religieuses, qui après mille difficultés, & de travaux immenses s'y établirent avec benediction; ainsi que nous dirons à la fin de la derniere partie, où nous rapporterons aussi l'heureux trépas du mesme pere Yvan.





Q V A T R I E S M E P A R T I E
 D E L' I M I T A T E V R
 D E
 I E S V S C H R I S T.
 O V
 D E L A V I E D V R E V E R E N D P E R E
 A N T O I N E Y V A N , P R E S T R E ,
 F o n d a t e u r & I n s t i t u t e u r d e s R e l i g i e u s e s d e
 N o s t r e D a m e d e M i s e r i c o r d e .
 D E S E S V E R T V S .

S O M M A I R E .



*L*E Disciple bien aymé remarque fort à propos dans le dernier Chapitre de son Euan-
 gile, que tout ce que Iesus-Christ a fait n'a
 pas esté écrit; parce que ce diuin Sauueur a
 produit mille & mille belles actions que
 les Euangelistes n'ont pas rapportées : le nombre en

E E e ij

ayant esté si grand, qu'ils n'auroient pas eu le loisir, ny le moyen d'en faire la description. C'est pourquoy le mesme Saint Jean adioust, que le monde ne pourroit pas contenir les volumes que l'on auroit composez, si l'on eust écrit toutes les merueilles que le Fils de Dieu auoit faites.

Nous pouuons dire avec proportion quelque chose de semblable, touchant la vie des seruiteurs de Dieu; Car encore bien que ceux qui ont écrit leurs Histoires, ayent tasché de rapporter fidelement ce qu'ils ont fait ou dit, ou ce qui leur est arriué de considerable: neanmoins il faut auoier qu'ils ont laissé plusieurs belles choses à dire, & parfois les plus illustres, & celles qui auroient donné une plus grande edification. La raison de cecy est, que comme pour bien estaler la vertu, & luy donner l'éclat qu'elle merite, il faudroit marquer les diuerses rencontres, les différentes actions, le temps, le lieu, & les autres circonstances, dans lesquelles elle a paru, outre que ce seroit une chose tres-difficile; cette façon de faire interromproit notablement la suite de l'Histoire, causeroit des redites importunes, & apporteroit de la confusion.

C'est pourquoy la plusspart de ceux qui ont décrit les vies des grands hommes, ont accoustumé de faire à la fin de leur ouvrage, un recueil de leurs principales vertus, dans lesquelles ils rapportent ce qui a esté obmis, & expliquent au long ce qu'ils n'auoient remarqué qu'en passant. J'en vse de la sorte dans cette quatriesme partie, où ie traite des principales vertus de nostre Imitateur de Iesus-Christ, suiuant les memoires que j'ay de ses actions, & de ses Escrits. Car

n'ayant peu dans les parties precedentes de cette Histoire remarquer toutes les actions illustres & exemplaires que cét homme de Dieu a fait durant sa vie : l'en fais vn amas dans cette-cy, les reduisant aux plus principales vertus qu'il a pratiquées, & qui ont paru dans sa conduite avec le plus d'edification.

CHAPITRE I.

Sa Foy.



LA Foy est la premiere demarche, que nous deuons faire pour aller à Dieu, parce que sans foy, il est impossible de luy plaire; & cette vertu qui est la premiere des Theologiques, ne doit pas seulement estre considerée comme la base & le fondement de la Iustice Chrestienne, mais encore comme le progrès & la consommation, puisque c'est d'elle que les Iustes viuent, & que par elle ils surmontent leurs ennemis.

Que l'on ne s'étonne donc pas si l'Imitateur de Iesus Christ, s'est approché de cét Diuin Sauueur par la conformité de sa vie; s'il s'est rendu vn objet agreable à sa Diuine Majesté; s'il a vescu de la vie des Iustes; & s'il a heureusement & avec gloire vaincu ses aduersaires: puisqu'il a esté tousiours rempli d'une ferme & viue foy.

C'est vne marque qu'un vase est plein de quelque liqueur quand il ne peut en receuoir de contraire; ce qui m'oblige à dire que le P. Yvan estoit rempli de foy; parce qu'il ne pouoit rien souffrir qui parust tant soit peu opposé aux sentimens de cette vertu. De maniere qu'il auoit vne auersion tres-grande pour tous les ennemis de nostre Religion, comme sont les Athées, les Infidelles, Heretiques, & les libertins. Il fuyoit leur rencontre, & leur conuersation autant qu'il luy estoit possible; & lors qu'il se trouuoit engagé dans leur com-

pagnie , il faisoit tout ses efforts pour s'en tirer au plûtoſt, ayant peine de moderer le déplaiſir qu'il receuoit de leur veuë, & de leur entretien.

Son zele pour la foy eſtoit ſi grand ; qu'il ne pouuoit ſouffrir qu'on fiſt aucun diſcours en ſa preſence , contraire aux articles de cette vertu , ny meſme qu'on parlaſt avec peu de reſpect, des choſes qui luy appartiennent : quand ce n'eũſt eſté que de quelque ceremonie de l'Egliſe , ſoit que l'on en parlaſt ſerieuſement ou par raillerie. Ce meſme zele luy faiſoit témoigner vne extrême affliction , quand on luy rapportoit qu'il y auoit des perſonnes qui conteſtoient les articles de noſtre croyance, ou qui en parloient avec mépris. L'ardeur de ſa foy parroiſſoit encore , dans le ſingulier reſpect qu'il portoit à l'Egliſe , à toutes les perſonnes Eccleſiaſtiques , & notamment au ſainct Siege , enuers lequel il auoit des tendreſſes & des deſſerences toutes particulieres ; en ſorte qu'il ne pouuoit ſouffrir aucune parole , qui chocquaſt tant ſoit-peu l'honneur deub à ſa Sainteté , ny meſme que l'on diſputaſt de ſon pouuoir.

Comme quelques Eccleſiaſtiques faiſoient des conferances de Theologie dans ſa maiſon ; il y aſſiſtoit avec plaiſir , tandis qu'ils expliquoient quelque myſtere ou article de noſtre Religion : mais dès qu'ils propoſoient des objections contre la verité de noſtre croyance , ce vray Catholique , ainſi que nous auons deſia remarqué , en témoignoit du reſſentiment. Et lors qu'on vouloit pourſuiure les meſmes objections avec chaleur , ſon déplaiſir augmentoit en telle ſorte qu'il ne pouuoit le ſupporter : Ainſi ou il prioit ces Eccleſiaſtiques de finir leurs contentions , ou il les quittoit , & ſe retiroit dans ſa chambre , triſte & affligé.

Sa foy n'eſtoit pas ſeulement ferme & inébranlable , en ce qu'il ne pouuoit rien ſouffrir de contraire à ſa pureté : mais elle eſtoit encore vniuerſelle , & s'étendoit aux moindres choſes de noſtre Religion. Il auoit vn ſi grand reſpect pour les images de Jeſus-Chriſt , de la ſainte Vierge , & des Saints ; qu'il en tapiſſoit les murs de ſa chambre , il en mettoit dans ſon breuiere autant qu'il en pouuoit contenir , les colant à toutes les pages qui eſtoient vuides , ou qui n'auoient rien de ne-

cessaire ; il en portoit tousiours diuerses sur soy , à sçauoir vn Crucifix de cuiure , & vne medaille de la sainte Vierge , pendus au col , & d'autres dans le sein. Mais son respect enuers les saintes Images , alloit plus auant , veu qu'il a trauaillé toute sa vie pour insinuer ce mesme respect à toute sorte de personnes.

A cette fin , il s'employoit avec soin à grauer des planches du Crucifix , de la sainte Vierge , & de diuers Saints. Il en tiroit luy mesme les images , & il les distribuoit gratuitement à diuerses personnes , les exhortant de les porter avec foy & avec veneration. Si bien qu'il est arriué tres-souuent que Dieu a operé des merueilles à l'occasion de ces Images en faueur de ceux qui les portoiert avec deuotion. Les Religieuses de Nostre Dame de Misericorde conseruent cherement plusieurs de ces planches que leur fondateur a grauées , qui sont des glorieux monuments de sa foy enuers les saintes Images : Et le Seigneur continuë de répandre ses benedictions sur ceux qui en portent avec respect.

Mais que diray-je de la grandeur de sa foy enuers l'adorable Sacrement de l'Autel , & le saint Sacrifice de la Messe ? Il n'en approchoit iamais qu'en tremblant , en sorte qu'il sembloit vouloir s'anneantir. I'ay souuent fait cette remarque moy-mesme en luy répondant à la Messe , qu'il tremoussoit & témoignoît vne si grande frayeur pendant icelle , qu'il m'imprimoit à moy-mesme la crainte , encore que ie fusse fort jeune. Car il ressembloit à vn pauvre Criminel qui est deuant son Iuge , & qui attend l'Arrest de sa condamnation. Mais sa foy paroissoit encore plus estenduë , en ce qu'il auoit vne singulière veneration pour toutes les choses qui seruoient à l'Autel , & particulièrement pour celles qui approchent le plus des sacrées especes du Saint Sacrement. Ainsi quant vn Corporal , ou vn Purificatoire estoit rompu , il le conseruoit cherement comme vn tresor , qu'il distribuoit en pieces aux personnes Deuotes , comme des precieuses reliques , leur recommandant d'en faire estat , & les tenir avec deuotion , & de les opposer aux attaques du Demon ainsi qu'une armure tres-forte. Il s'en seruoit luy mesme , ayant souuent éprouué la vertu de ces choses sacrées.

En effet Dieu ayant permis que le Demon parust en l'un de ses Monasteres sous diuerſes formes horribles ; entre les moyens que le P. Yvan fournisſoit à ſes Religieuſes pour les fortifier contre les apparitions, les bruits, & les autres perſecutions de l'ennemy, il leur donnoit à chacun vn petit reliquaire dans lequel il y auoit parmy diuerſes reliques, quelque morceau de Corporal ou de Purificatoire, adjoûtant que ſi elles y auoient vne grande foy, le Demon n'auroit le pouuoir de leur nuire. Le ſuccès faiſoit voir la vertu de ces choſes ſacrées, & parce que les Religieuſes ſe ſentoient extraordinairement fortifiées par ces reliquaires que leur fondateur leur bailloit, éprouuant meſmes que le Demon en eſtoit affoibli & épouuenté. Le Seigneur voulut que cét ennemy auoüaſt à ſa conſuſion, le pouuoir des choſes qui auoient ſerui à l'Autel. Car vn iour cét orgueilleux eſtant dans vne horrible furie contre vne vertueuſe Religieuſe, qui ſe conſiant en Dieu, ſorioit de ſes menaces, après mille imprecations effroyable, *ie t'eſtranglerois*, luy dit-il, *ſi tu n'auois quelque choſe qui me retient*. La Religieuſe ayant rapporté au P. Yvan ce qui luy eſtoit arriué, receut ordre d'iceluy, au cas que le Demon luy apparust derechef, de le conjurer de la part de Dieu, à dire ce qui arreſtoit ſa fureur. La fille obeit, & le Demon eſtant conjuré, répondit après quelque reſiſtances, qu'il ne pouuoit pas exercer ſa rage contre elle, tandis qu'elle auroit ſur ſoy du linge qui auoit touché le tres-adorable Sacrement de l'Autel ; parce que la Religieuſe perſecutée par le Demon, s'eſtoit ſaiſie d'un Corporalier qui contenoit des Corporaux, & des Purificatoires, dont les Preſtres s'eſtoient ſeruis en pluſieurs Meſſes.

Je renuoye ailleurs les merueilles que Dieu a operées en faueur de la foy de noſtre parfait Imitateur de Jeſus-Chriſt, pour dire icy que ſa foy a particulièrement paru dans la façon de ſe conduire luy-meſme, & dans la maniere de diriger les autres. Car pour ce qui regardoit luy-meſme, il a touſiours demandé à Dieu d'eſtre conduit par ſon Diuin Eſprit dans les routes ordinaires de la foy, & autant qu'il a peu il a fuy les rauiffeſſemens extaſes, reuelations & autres voyes extraordinaires. Auſſi encore qu'il ait eu par fois de ces graces ſingulieres,
neantmoins

neantmoins sa vie n'a esté qu'une demarche fidelle dans le chemin obscur, mais simple denüé, & assésuré de la foy. Il estoit, dis je, conduit par ce sentier tenebreux & plein d'angoisses : de façon que ie luy ay souuent ouy dire parlant de luy-mesme, ces paroles du Psalmiste : *Le Seigneur m'a logé dans des lieux obscurs à la façon des morts* ; & celles de Ieremie : *Le Seigneur m'a fait habiter parmi les tenebres, &c.* Lesquelles paroles n'estoient qu'une expression de son estat interieur.

Il ne vouloit point d'autres reuelations que celles que la sainte Eglise propose, ny d'autre veüe que celle des souffrances de Iesus Christ, ny d'autre élévation que l'anneantissement de la Croix. Mais le Lecteur verra mieux que ie ne scaurois luy declarer, par quelle voye il se conduisoit, & par quel chemin il faisoit marcher les autres ; s'il prend la peine de lire ses ouurages. Car il n'y trouuera que dépouillement, desappropriation, soumission d'esprit, abandon, humiliation, aneantissement, conformité à l'estat de Iesus souffrant & agonizant sur la Croix, ou dans le jardin des oliues : & les autres vertus que la foy produit & perfectionne dans une ame fidelle.

C'est pourquoy, encor qu'il ne condemnast la point voye de extases, reuelations, ravissements, &c. Toutefois il ne témoignoit pas d'en faire grand estat. Il tenoit mesme cette voye suspecte ; il la faisoit apprehender par ses discours, & il n'oubloit rien pour en éloigner une ame, & luy en donner une salutaire auersion. En suite il portoit toutes les personnes qui estoient sous sa conduite, à ne suiure que le sentier de la foy, & à agir tousiours constamment dans l'esprit de la foy, inculquant sans cesse qu'il n'y a que cette voye d'assésurée, & que toutes les autres sont dangereuses, si elles ne sont soumises à cette-cy, & réglées par ses maximes. Aussi comme les mysteres de la foy sont cachés, il se cachoit en tout & tousiours, & il s'étudioit aussi de cacher autant qu'il pouuoit les ames qui auoient des graces extraordinaires ; ne voulant du tout point permettre qu'elles fussent connües, que quand Dieu mesme les manifestoit sans leur consentement.

De la Confiance du P. Yvan.

CHAPITRE II.

CETTE vertu fut recommandée à nostre fidelle Imiteur de Iesus-Christ dans sa plus tendre jeunesse, lors que errant dans vn bois & pleurant de ce qu'il se voyoit destitué de tout secours humain, il ouït ces paroles qu'une voix Celeste luy dit : *Pauvre enfant ne te fasche pas , j'auray soin de toy.* Dès ce temps-là il fut rempli d'une confiance filiale envers Dieu, dont il a donné des marques illustres le reste de sa vie. C'est elle qui l'a encouragé à poursuiure ses estudes, non-obstant les miseres, les trauaux, & les difficultés que l'extrême indigence l'a contraint de souffrir dans le pieux dessein qu'il auoit, de se rendre capable de l'estat Ecclesiastique.

La mesme vertu luy a serui de bouclier contre les suggestions de l'ennemy, les foiblesses de la chair, & le murmure des personnes du monde; qui le blâmoient & le persecutoient de ce qu'il traittoit son corps avec trop de seuerité. Car comme on le menaçoit qu'il tomberoit dans quelque extremité, que perdant son corps & son esprit il se rendoit inutile à tout, & qu'il seroit homicide de soy-mesme par ses trop rudes mortifications : *Je ne crains*, répondoit-il, *aucun de ces malheurs ; parce que la bonté paternelle de Dieu me donnera les graces & les forces desquelles j'auray besoin :* Puis il repetoit les paroles de confiance du Prophete Roy Dauid. *Je répondray , Seigneur , à ceux qui me feront des reproches ; que j'espere en vos promesses.*

Le P. Yvan auoit trouué la pratique de cette vertu si nécessaire aux personnes qui s'addonnent à la penitence & à la mortification, qu'il tâchoit de la leur persuader comme vn secours absolument nécessaire. Ainsi il n'exhortoit iamais ses Religieuses à la pratique de la mortification, qu'il ne les exhortast aussi à la pratique de la confiance. *Filles*, disoit il sou-

uent : *La mortification & la confiance. Joignez ces deux vertus, & tâchez de ne se parer jamais l'une d'avec l'autre. Abandonnés vous aux souffrances pour l'amour de Dieu, & espérez que sa Divine bonté aura soin de vous, & ne vous abandonnera jamais.*

Mais parce que chaque chose paroist davantage par l'opposition de son contraire, la confiance de nostre Fondateur s'est montrée avec vn éclat singulier, lors qu'elle a esté plus rudement attaquée par les contradictions des hommes, ou par les tentations du Demon. Il a esté persécuté par tout où il a demeuré ; mais par tout sa confiance l'a rendu invincible & victorieux. Il fut accusé sorcier dans Colignac, & cette accusation continuant encore, lors qu'il demouroit dans l'hermitage de Rians, luy a fait endurer mille mépris, affronts, & autres sortes de maux. Les libertins le passant dans Brignoles pour vn hypocrite & extravaillant, le chargerent d'injures, de menaces, & mesme de coups. Après qu'il se fut arresté dans Aix, on le décria comme vn ignorant, vn fourbe, & vn Prestre incapable de la conduite des ames. On l'interdit mesme des l'exercice de la Predication & de la Confession.

Toutes ces diuerfes contradictions n'ont iamais peu le détourner de ses pratiques de pieté, de Penitence, & de Charité, ny le décourager de la poursuite des desseins qu'il auoit entrepris pour la gloire de Dieu, & le salut du prochain ; parce qu'il se confioit en Dieu. L'on n'a iamais veu en toutes ces fascheuses & injustes accusations, qu'il ait témoigné de vouloir aucunement se venger, non pas mesme se plaindre ny se iustifier. Sa confiance en Dieu estoit son vnique appuy & son seul azile.

Lors que ses amis le pressoient à se iustifier des calomnies dont on noircissoit sa reputation ; lors, dis-je, qu'ils le blâmoient eux-mesmes, de ce que par son silence il donnoit occasion à ses aduersaires de continuer leurs impostures contre luy, il ne leur répondoit, qu'en s'humiliant, & parlant de sa confiance enuers Dieu. *Je suis, disoit-il ; un pauvre Prestre, & un pecheur ; qui merite le mépris, & l'indignation de toutes les*

creatures. O que Dieu me fait vne grande misericorde de vouloir que ie souffre ces confusions là. Sa sainte volonté soit accomplie en moy. l'espere, & me confie en luy, & ie ne me mets en peine d'aucune autre chose. Puisque Dieu est sage, & puissant, & qu'il peut faire cesser toute sorte de contradictions dans un moment, lors que sa Divine Majesté ; le trouuerra à propos ; laissons luy faire, & abandonnons nous totalement entre ses mains.

Mais comme les plus grandes & plus longues persecutions ont esté, lors qu'il a entrepris la fondation, & l'établissement de l'Ordre de ses Religieuses de Nostre Dame de Misericorde ; c'est aussi le plus illustre theatre sur lequel sa confiance ait paru. L'on ne scauroit raconter les soins & peines qu'il eut, ny les difficultés, les oppositions, & les mespris qu'il fut contraint de surmonter, si bien qu'outre ce que nous en auons dit dans la troisième partie, voicy ce qu'il en écriuit luy-mesme en diuerses lettres à vne tres-vertueuse Religieuse de sainte Ursule.

Ma fille, il est veritable que mes guerres ont esté grandes, & d'une telle façon que si la fondation de nostre Institut n'estoit grande, & necessaire pour l'Eglise de Dieu, tous nos desseins auroient esté tout à fait enseuelis. Je suis content pour maintenant, mais j'auray encore de grands troubles, & de terribles persecutions. En la Lettre 31. Les grandes affaires, & les saintes entreprises traissent bien des Croix ; iamaïs ie ne me trouuay de la sorte ; ce que ie n'ose dire est bien terrible & bien cruel.

Lettre 35. Ma fille, priez bien Dieu, & écriuez moy, car j'ay besoin de courage, voyant tant de personnes contre moy. Helas que les commencemens sont pleins de difficultez ! Rien ne se peut auancer sans miracles ; ce qui ne se fera pas en nostre personne.

Ces paroles monstrent assez quelles estoient ses peines, puis qu'estant accoustumé à souffrir, il ne se plaignoit qu'à l'extremité. Mais voicy la vertu qui le soutenoit, & le faisoit agir nonobstant les orages & les tempestes : C'estoit sa confiance inébranlable, ainsi qu'il écrit à la mesme Religieuse. *Lettre 33. Fille, Nostre delaisement de toutes les creatures est extrême. Nous n'auons personne, ce me semble, pour nous, ny hommes, ny femmes, ny Prestres ; & nous ne scauons ce que Dieu fera de nous. Seulement nous viuons en con-*

fiance, & voulons tout ce qui plaira à sa Diuine misericorde.

Voilà son appuy, son bouclier, & les armes par lesquelles il venoit à bout de tous ses desseins, & triomphoit de tous ses ennemis. Voilà, dis-je, la confiance dans laquelle il viuoit, & par laquelle se reposant avec paix en la conduite de la Providence Diuine, il ne se mettoit en peine que de bien faire son deuoir. C'est ainsi qu'il l'écrit dans vne de ses lettres, lors que l'Archeuesque trauersant son dessein, il estoit necessaire de le solliciter pour attirer sa bien-veillance. Lettre 32. *Je ne veux, dit il, me mettre en peine de rien, ie ne veux point parler, ny faire parler à Monseigneur nostre Archeuesque. Dieu l'inspirera quand il plaira à sa Diuine Maïesté. Qu'auons nous affaire de nous mettre en peine deuant Dieu ? laissons luy faire.* C'est l'effet que la confiance doit produire dans nos ames, que d'en oster tout soucy importun, & toute sorte d'empressement, & nous procurer vn profond repos, mesme parmi les troubles & les bourrasques.

Cependant nostre bon Prestre auançoit beaucoup plus par sa seule confiance, qu'il n'eust fait par ses sollicitudes & empressements. Il affoiblissoit son corps par des penitences extrêmes, & sa confiance le fortifioit: car il n'a iamais esté plus robuste, que lors qu'il s'affligeoit par de rigoureuses macerations. Il ne vouloit pas se iustifier; & Dieu le iustifioit, faisant connoître son innocence à tout le monde; en sorte que ceux qui l'auoient calomnié, estoient contraints de publier sa vertu. Il ne vouloit pas solliciter ses Superieurs, ny les autres personnes dont il auoit besoin; & Dieu les sollicitoit en sa faueur, les disposant à luy accorder ses demandes, lors qu'il y pensoit le moins: si bien que l'on ne pouuoit rien refuser à sa confiance. Selon le témoignage que rendit vn iour l'Archeuesque d'Aix dans vne grande assemblée, où l'on parloit diuersement des desseins de nostre Fondateur: Car les vns le blâmant de temerité, les autres louant sa confiance; l'Archeuesque dit, *qu'il auoit reconnu que Dieu le protegeoit d'une façon si singuliere, qu'on ne luy pouuoit refuser aucune chose; adjouctant (qu'il auoit éprouué, que le Saint Esprit le iustifioit, & le protegeoit dans le cœur de ses Superieurs; lors mesme que ses ad-*

uersaires s'efforçoient de le calomnier, & de s'opposer à l'exécution de ses desseins.)

Cette singuliere protection du Ciel que le Pere Yavn sentoitoit en suite de sa confiance, dissipoit toutes ses craintes, & luy donnoit vn courage Diuin ; en telle sorte que dans toutes ses grandes entreprises il vsoit de ces paroles qui témoignent vne confiance inébranlable : *Si ce que i'entreprends est de moy, Dieule détruira ; mais si c'est l'ouurage de Dieu, toutes les creatures ensemble n'en scauroient empescher l'exécution.* Il a expérimenté luy-mesme la verité de ces paroles, dautant qu'il n'a iamais esté confondu dans ses desseins ; mais il en est tousiours heureusement venu à bout, quelque opposition que le Demon ou les hommes ayent suscitée contre luy.

Sa confiance a encore paru dans la victoire des tentations de l'ennemi opposées à cette vertu. Car c'est vne chose admirable que ce bon Prestre ayant mené vne vie innocente, austere, & deuote, ait neantmoins tousiours esté conduit du S. Esprit, dans les voyes terribles & estonnantes de la crainte des Diuins iugemens ; ainsi que l'Auteur de son Eloge funebre la tres-bien remarqué, & nous en parlerons après plus amplement. Le Demon se seruant de cette crainte, le tourmentoit en mille façons pour le porter au desespoir, ou pour le décourager & l'abatre : Mais il auoit ietté de si profondes racines dans la confiance, qu'il estoit tousiours victorieux de l'ennemy ; si bien que les tentations contre la confiance, ne seruoient qu'à luy faire exercer cette vertu, avec plus de force, & de merite.

Ces mesmes tentations de crainte, & de desespoir, s'augmenterent dans l'ame de nostre fidele Ecclesiastique, deux ou trois années auant sa mort : mais d'une façon si rude, qu'il en souffroit vne horrible guerre, & vn effroyable martyre. Sa peine estoit si pressante, qu'il estoit contraint d'aller trouuer plusieurs fois le iour vn vertueux Ecclesiastique son Confesseur, pour luy declarer humblement sa tentation, & recevoir par ce moyen de nouuelles forces. Pendant ces horribles tentations de desespoir, l'on n'a iamais oüy sortir de sa bouche vne seule parole de murmure, ny de meffiance, ny veu aucune marque d'abbatement : au contraire c'estoit pour lors qu'il

témoignoit le plus d'esperance en la misericorde de Dieu.

Le Demon, disoit-il; *m'inquiete, me trouble, me presse, & me tourmente par le souuenir de mes pechez, & les venës effroyables de la iustice Diuine. Il me menace, & il excite en moy de terribles craintes: Mais il a beau faire; ie me moque de luy, & ie ne le crains pas. Car bien que i'aye suiet de trembler, & de me défier entierement de moy-mesme: neantmoins i'espereray tousiours en la misericorde de Dieu par le merite de Iesus-Christ son fils, & ie ne relascheray iamais de ma confiance!*

L'Amour du Pere Yvan enuers Dieu.

CHAPITRE III.

LA vie de l'imitateur de Iesus-Christ n'a esté qu'une continuelle pratique de l'amour Diuin, qui a paru dans ses travaux, dans ses penitences, & dans ses diuers emplois de Charité depuis son enfance, iusques à sa mort. Je ne pretens adjouster en ce Chapitre que quelques traits remarquables, tirez de ses écrits, ou de ses actions, qui nous font connoistre combien cet amour estoit grand dans son cœur, & de quelle façon il en estoit embrasé.

Le deuot saint Bernard nous enseigne qu'il est impossible de bien parler de l'amour Diuin, sans en estre enflamé, & d'exprimer les effets qu'il produit, sans les ressentir. Le Pere Yvan estoit donc bien rempli de ce mesme Amour, puis qu'il en écrit si fortement dans ses Lettres. Lettre 48.

[Pourquoy ne faisons nous pas enuers sa Majesté Diuine, comme son Amour a fait enuers nostre neant; donnant son fils ses delices, son cœur, sa gloire, sa sagesse à la Croix & à la mort pour nous? Ceux qui connoissent ces veritez, & qui commencent à voir Dieu, meurent de ioye & de consolations; ils deuiennent humbles, deuots, sages, craignans Dieu, penitens, simples, sçauans de Dieu, silencieux, retirez, patiens, ioyeux, consolez, & indifferens à tout ce qui plaist à la Diuine]

Majesté. Ils changent comme des saints Paul, & Magdelaine. Rien ne les peut contrister, ny desoler, pourveu que Dieu les possède. Il y a dans cette connoissance vne consolation toute de Dieu & toute Diuine, qui submerge toute l'ame quand elle est simplifiée, denuée, & abandonnée dans la conduite de l'Esprit de Dieu, & de son Directeur; en sorte qu'elle ne sçait où elle est, ny ce qu'elle veut, & fait, sinon que tout est Dieu en elle.

De là l'amour naist avec toutes ses flammes comme le feu du thrône de Dieu, qui emporte & consume tout ce qui n'est Dieu, ou de Dieu dans l'ame, & la remplit de Dieu & de suavitez semblables à celles de la gloire des Bien-heureux. Ainsi submergée dans les consolations d'amour, elle ne void rien, & ne pense à rien que tout Dieu. Elle ne peut vouloir, ny sçauoir, ny desirer, ny estre que Dieu & sa volonté, & celle de l'obeïssance. Elle est toute pleine d'odeurs, douceurs, consolations de Dieu en Dieu dans elle, comme quasi ceux qui iouissent desia de la gloire du Ciel. Elle est dans la presence de Dieu amoureuse dans ce vaste glorieux solitaire, dans les ardeurs du Soleil Diuin, ce qui l'a fait mourir en sa nature, la resuscite dans des plus viues connoissances de Dieu, & de son rien, qui l'eleuent supereminement en la perfection, & en des plus grandes lumieres de verité, où peu à peu elle est insensiblement rauie & transformée. En cet estat l'ame se laisse posséder, attirer, rauir, remplir, gouverner, consoler. Mais encore ce qui est le plus riche, & le plus vertueux; l'ame se laisse mépriser, mortifier, crucifier à Dieu, & à tous pour Dieu, puisqu'elle par ses grands exercices n'est plus sienne, & n'est plus en elle, mais elle est toute à Dieu, & tout son cher fils crucifié, toute vertu & ioye en Dieu, toute pleine & seule yure de la presence de tout Dieu & consolations Diuines. En cet estat, *nec oculus vidit, nec auris audivit, &c.*]

Cette description des effets de l'amour Diuin dans vne ame, n'est que l'image de ce qui se passoit dans l'ame de nostre em-brase Ecclesiastique; si ce n'est que renonçant aux douceurs & consolations, il s'abandonnoit à toute sorte de souffrances exterieures & interieures pour son Amour. Il écrit presque le
même

mesme à vne vertueuse Religieuse de ses penitentes, luy enseignant que la veritable & solide perfection ne consiste qu'à bien aymer Dieu, & luy marquant les signes & les effets de cet amour dans vne ame; en des termes simples & grossiers, mais pleins d'onction de l'Esprit de Dieu. C'est en la Lettre 1.

[Fille, la deuotion ne consiste pas aux haires, disciplines, jeûnes, pelerinages, longs offices, confessions, & communions frequentes, mais en l'adhesion, & conformité à l'Esprit de Dieu, & en la poursuite, recherche & accomplissement de la volonté & bon-plaisir de Dieu en tout ce que voulons, desirons, faisons, patissons, aymons, & viuons. Il est facile d'aymer Dieu qui est beau, grand, infini, immortel, &c. & qui donne le Paradis. Mais il le faut aymer, & embrasser dans le patir, dans les amertumes, douleurs, delaissemens, ignominies, pauuretez, mépris, &c. & mourir en Croix avec luy, pour auoir le Paradis. Si vous estiez amoureuse, l'Enfer vous seroit court avec tous ses tourmens, vous seriez toute en Iesus-Christ crucifié, vous ne sçauriez ny Ciel, ny terre, ny Anges, ny hommes, ny parens, vous ne sçauriez si on vous aime, si on vous connoist, si on vous méprise, ou si on vous loue: mais seulement tout Dieu & tout amour en vous. Vous ne voudriez & ne verriez que Dieu, vous n'auriez ny sens, ny passions, ny estre, ny vouloir, ny faire, ny patir, ny cœur, ny ame que tout ne fust Dieu en vous. Vous ne penseriez & ne diriez que feray-ie? que diray-ie? que deuiendray-ie? mais vous laisseriez le tout à Dieu, & tout à vostre Amour. Vostre soin ne seroit qu'à le contenter, aymer, imiter, réjouir, & vous abandonner entre ses bras, & ietter dans son amour. Les ardeurs, les pleurs, les larmes, les coups, les cris, les lamentations, &c. ne sont pas les meilleurs signes de l'Amour: mais vouloir estre Iesus-Christ patissant, & mourir d'amour en Croix, luy dans vous, & vous dans luy. Vous ne craindriez ny guerre, ny peste, ny famine, ny pauureté, ny mal, ny danger, ny vie, ny mort, ny enfer, ny damnation. Mais vous seriez sans soucy, comme si vous n'auiez ny corps, ny volonté, ny vie, que la volonté & contentement de Dieu pour ame & pour cœur; vous souciant aussi peu de tout ce qui est

icy bas, qu'un seraphin, & vous souvenant aussi peu de tout ce qui est créé & qui n'est point Dieu, que d'une chose qui n'a jamais esté.... L'amoureux voudroit payer pour tous, satisfaire pour tous, mourir pour tous, même pour les damnez & pour les diables, pour le seul contentement de Dieu. Il voudroit vivre dix mil ans tout en tourmens, martyres, mépris, délaissemens de toute creature, & de tout secours même de Dieu, pourveu qu'il l'aimast d'autant plus, &c.]

On voit la même doctrine dans presque toutes ses Lettres & tous ses écrits. Il n'exhorte qu'à l'amour Diuin, & à la pratique des vertus qui naissent de ce même amour; sçavoir est la presence de Dieu, la pureté d'intention, la conformité à la volonté Diuine, la crainte filiale, l'amour des Croix & des souffrances, la charité du prochain, le zèle du salut des âmes, &c. Et d'autant que l'Amour Diuin n'a point de plus grand empeschement que l'amour de nous-mêmes & de nos conuoitises; il n'est point d'auteur qui ait écrit plus fortement ny plus solidement que luy contre cette même amour propre, ainsi que l'on peut voir dans ses écrits imprimez, & dans les autres que l'on fera imprimer.

Il estoit si rempli de l'Amour Diuin, que suivant l'abondance de son cœur, il ne pouuoit parler ny écrire que de ce même Amour. Tous les conseils qu'il donnoit, ne tendoient qu'à bien aymer Dieu. Quand on luy demandoit des penitences à faire: *Aimez bien Dieu*, disoit-il, *il n'y a rien qu'il fasse plus souffrir, & meriter que le pur Amour de Dieu. Vne once d'Amour vaut plus que cent liures de penitence.* Quand on l'interrogeoit des moyens de bien faire l'Oraison: *Il faut*, répondit-il, *bien aymer Dieu.* [Car faire l'Oraison c'est faire l'amour à Dieu, le caresser ainsi que les amans font l'amour à leurs maistresses. Et comme les amans ne s'ennuyent jamais de parler, & de demeurer avec les personnes qu'ils aiment, ainsi les amoureux de Dieu font Oraison en tout-temps & en tout lieu, parce qu'ils se tiennent tousiours & par tout en la presence amoureuse de sa Diuine Majesté.]

Quand on luy demandoit par quel moyen il falloit déraciner les mauuaises habitudes, s'accoutumer à la pratique des plus

heroïques vertus , souffrir constamment , & se bien preparer à la reception de l'Eucharistie : *Il faut* , disoit-il , *que l'amour Diuin fasse toutes ces choses. Le seul Amour* , continuoit il, *fait tout dans vne ame qui luy adhere avec fidelité , & sans amour tout est deffectueux , vain , & inutile.* Il ne vouloit pas aussi que l'on demandast à Dieu dans les prieres autre chose que son amour ; adjôûtant que cét Amour estant dans vne ame, demandoit luy-mesme ce qui luy agreoit , & que ses demandes estoient tousiours exaucées , parce qu'il s'exauce soy-mesme.

L'ardeur de nostre amant le possedoit si fort , qu'il protesta dans ses Lettres, qu'il ne doit parler que d'aymer Dieu : & que quand il luy faudroit perdre cent mille vies , il ne pourroit se contenir d'exhorter tout le monde à aymier Dieu. Ce sont les termes dont il se sert pour exprimer la vehemence de son amour. *Je dois conuier tout le monde à aymier , aymier , aymier ce grand tout , tout , tout , infini Amour ; & ie ne feray iamais autre chose , quand il me deueroit coûter cent million de vies , si non crier , ayez , ayez , ayez , ce grand & infini Amour.* Il estoit si enyuré de cét Amour , qu'écriuant à vn de ses amis , touchant les consolations que l'ame peut receuoir sur la terre , il proteste qu'il n'en connoist que de deux sortes qui naissent de la pureté de l'Amour Diuin.

[Après auoir , dit-il , tout considéré dans les veritez de la sainte Escriture , ie ne trouue que deux sortes de consolations spirituelles. La premiere est en Dieu en nous , mais pour Dieu seulement & rien pour nous. Elle est sans couronne & de peu de merite , & il y a du danger de la prendre pour nous , parce qu'elle est agreable à la nature. La seconde est en l'estat souffrant & en la mort ignominieuse & douloureuse du Fils de Dieu en nous. Elle est toute pleine de couronnes & de merites , mais asseurée , inconnue , & decriée à cause de ses amertumes & desolations , & mort de la nature. Or la premiere est quand ie me réjouis de tout mon cœur & de toutes mes forces de ce que Dieu est immense , puissant , glorieux , sage immortel , bon , misericordieux ; seul tout , mon Dieu & Pere , mon Paradis & ma vie eternelle. La seconde

est de me voir pauvre, infirme, affligé, méprisé, persécuté, &c. sans secours, ny appuy, sans consolation de Dieu, & des creatures, mais delaisné dans vne obscure nuit, & inconnues tenebres. Cette consolation n'est que pour les enfans bien aymez de Dieu. C'est de ceux *quos præsciuit & prædestinauit conformes, &c.*

Si ces paroles, & de semblables que l'on peut lire dans les écrits du Pere Yvan, nous montrent son amour; ses actions, & ses souffrances l'ont encore mieux fait paroître: puisque dès sa plus tendre jeunesse, iusques au dernier soupir de sa vie il a constamment & fidèlement continué dans les pratiques de ce mesme amour. Il estoit par fois si transporté par l'impetuosité du Diuin Amour, mesme en compagnie, que son visage deuenoit enflammé, ses yeux ardens, & tout son corps grandement ému; en telle sorte qu'il estoit contraint de se cacher en quelque lieu secret pour nostre veu, & pour s'abandonner avec plus de liberté, au torrent de l'Amour qui le submergeoit. Parfois comme liquéfié par ce mesme Amour, il fondoit en larmes sans les pouuoir retenir; i'en suis moy-mesme le témoin: car ayant eu l'honneur de manger avec luy, ie l'ay veu plusieurs fois au milieu du repas, si ému & enflammé tout d'un coup; qu'il estoit contraint de sortir de table, & se retirer pour ne pouuoir supporter en la presence des autres, le transport de l'Amour Diuin dont il se sentoit embrasé.

Cet Amour luy faisoit souffrir vn martyre continuel: car il ne pouuoit supporter sans ressentir vne affliction extrême, que Dieu fust offensé, & qu'il ne fust pas conneu, ny aymé par ses creatures. Aussi estoit il desolé quand il apprenoit que l'on auoit commis des crimes énormes contre Dieu: de maniere qu'il s'en plaignoit avec zele, témoignant beaucoup plus de ressentiment & de douleur des injures que l'on faisoit contre Dieu, que de celles que l'on faisoit contre luy-mesme. Le zele de son amour alloit encore plus auant: car pour empêcher que Dieu ne fust pas offensé, & pour procurer qu'il fust conneu & aymé de tous, il n'est point de supplice sur la terre, ny dans les enfers, qu'il n'eust embrassé avec ferueur. Ainsi

qu'il le témoigne luy-mesme dans vne de ses Lettres, en ces termes.

L'Enfer est court à l'amoureux de Dieu, il ne se soucie d'endurer, & de satisfaire pour tous les damnez, pourueu qu'ils fussent sous transformez au contentement de Dieu. Je voudrois, adjoûte-t'il, pour le bon plaisir de Dieu, estre le blanc & le bus de toutes les fureurs & satisfactions de la Iustice Diuine, pourueu que tous fussent le contentement de Dieu, afin que Dieu fust aymé, & ne fust point offensé. Je voudrois endurer autant de martyres que les hommes scauroient faire de pechez, & qu'il ne se fit point de pechez.

Or comme il auroit voulu souffrir pour l'amour de Dieu, autant luy seul que tous les hommes, & tous les Demons pourroient endurer, il auroit aussi voulu agir, & aymer par le mesme amour luy seul, autant que toutes les creatures en sont capables. C'est ainsi qu'il le témoigne dans l'action de grace qu'il a donnée à ses Religieuses, pour faire après la Communion; qui n'est qu'une expression de l'action de graces qu'il faisoit luy-mesme, & vne declaration de son amour, il finit par ces paroles.

Au reste, mon Dieu, mon Amour, de tres-bon cœur, & selon vostre cœur & volonté, ie vous adore, ayme, louë, & sanctifie moy tout seul, autant que tous les Seraphins, & que tous les bien-heureux Esprits & Saints qui sont dans le Ciel; autant en un seul moment qu'ils pourroient auoir adoré, & ayme de toute eternité, s'ils auoient tousiours esté; autant qu'entre tous, moy tout seul, Amen, Amour. Or ie veux de vostre volonté, la mienne estant faite la vostre, que tous les mouuemens de toutes les creatures, des Anges, des Cieux, des elemens, des oyseaux, des bestes, des fucilles, des plantes, des hommes, des Demons, des damnez, me soient des actes de parfait amour enuers Vous, & des actes d'adoration, d'amour, & de parfaite contrition de mes pechez. Helas, Amour, comment se pourroit faire, mon tout, que tousiours, ie vous eusse aymé, & que iamais ie ne vous eusse offensé.

Enfin ayant vécu dans l'Amour & pour l'Amour, il est mort par la violence de ce mesme Amour. Il auoit desiré de mourir

de cette sorte, lors que dans vne de ses Lettres, il enjoint à de ses penitentes de prier pour luy, afin de luy obtenir la grace de mourir en Croix dans l'amour & vnion de Iesus Christ. Nous auons sujet de croire qu'il a esté exaucé, & qu'il a obtenu cette grace : Parce que ayant dit ces dernieres paroles à vne de ses Religieuses, lors qu'il se portoit encore bien: *Je croy que la contrition de mes pechez brisera mon cœur.* Après dis ie, auoir proferé ces paroles d'un ton de voix, & d'une façon qui témoignoit en luy un extrême regret, & une tres-vieue douleur d'auoir offensé Dieu, il ne vesquit que quelques momens, mourant d'une mort subite, comme si l'excez de sa contrition amoureuse eust brisé son cœur, & auancé son trépas.

Combien il a aymé Iesus-Christ Crucifié.

CHAPITRE IV.

AYMER Dieu, c'est le deuoir de tous les hommes qui ne sont créés que pour connoistre & aymer leur Createur. Aymer Iesus-Christ Dieu & homme, c'est l'obligation des Chrestiens qui doiuent le connoistre, & aymer : Mais aymer Iesus-Christ dans les humiliations, & dans les souffrances ; l'aymer dans les mépris, & dans les delaissemens de sa Passion, & de sa Croix ; & l'aymer d'un Amour d'imitation, & de conformité ; c'est la perfection de l'Euangile, la vertu des plus grands Saints, & l'amour que nous remarquons dans les écrits, & dans les actions du Pere Antoine Yvan.

Il me faudroit transcrire en ce lieu tous les écrits de nostre Imitateur, si i'y vouloit rapporter les diuers endroits, dans lesquels il donne d'illustres témoignages de son amour enuers Iesus Christ souffrant & Crucifié, parce qu'il n'y a presque autre chose dans son liure, ny dans les écrits, que les marques de ce mesme Amour. Il portoit un singulier respect aux

Epistres de Saint Paul, *parce que*, disoit-il, *qu'elles ne parlent quasi que de Iesus-Christ, & que l'on y trouue en toutes les pages, le Nom adorable de Iesus Christ diuerses fois repeté.* Il adjoûtoit *que* cette raison le portoit à aymer tendrement ce grand Apostre. Et moy i'adjoûte que non seulement il a aymé le Docteur des Gentils, *parce qu'il parle souuent de Iesus-Christ & de sa Croix : mais qu'encore il l'a parfaictement imité.* En effet il propose sans cesse Iesus souffrant dans tous les écrits, & il semble n'auoir eu autre but dans toutes ses instructions tant publiques, que particulieres, que d'exciter tout le monde à aymer, & imiter Iesus Crucifié.

Escriuant à vne Religieuse, il luy mande qu'il se mocque & ne fait nul estat de ses ieûnes, penitences, & autres pratiques de vertu, si elle ne s'efforçoit d'imiter Iesus Crucifié. Lettre 1. *Que vous seruent, dit-il, vos Confessions, vos Communions, & vos frequentes Oraisons, si vous ne vous transformez en Iesus Crucifié ? Croyez moy, ma chere fille, soyez toute Nostre Seigneur Iesus-Christ avec ses peines, douleurs, amertumes, &c.* Dans vne autre lettre escriuant à la mesme personne : *Tout n'est rien, dit-il, pour le bon plaisir de Dieu en nous, que d'estre crucifié avec son cher fils Nostre Seigneur.* Il sembloit n'estimer rien toutes les autres vertus & graces, à l'égard de l'imitation de Iesus souffrant. Il sembloit mesme faire plus d'estat d'aymer Iesus Christ & de souffrir avec luy sur la terre, que de jouir de luy dans le Ciel. C'est ainsi qu'il en écrit. Lettre 4. *Il vaut mieux estre icy avec Nostre Seigneur patissant, que d'estre jouissant dans le Ciel avec toute la Sainte Trinité. Tous sont capables de desirer le Ciel : mais de mourir, & se tenir en Croix avec Iesus-Christ, ce n'est que pour les amoureux de Iesus-Christ.*

Dans vne autre Lettre qu'il écrit à vn tres-deuot Ecclesiastique, il proteste qu'il n'y a que les amoureux, & imitateurs de Iesus souffrant, qui soyent exaucez dans leurs prieres. *Il faut, dit-il, premierement aymer que prier.* Lettre 61. *Plusieurs prient beaucoup, & pensent exaucez, & rarement sauuez ; mais les amoureux, & fideles, & veritables, sont tous exaucez, & point de damnez, & sur tout les Imitateurs de Nostre Sei-*

gneur Crucifié... Quand l'Amour, & pureté prient, & les Imitateurs de l'estat de Nostre Seigneur Crucifié, ils sont écontez, creus, & exaucez en leurs volontez & desirs... Il n'y a plus grande priere que d'estre amoureux de l'Esprit de Dieu, & jaloux de sa gloire & honneur, & de l'estat de son cher fils Crucifié, auquel il ne peut rien cacher ny refuser.

Mais il parle encore plus clairement dans ses conseils, où il semble ne vouloir point reconnoître de vertu que l'amour & l'imitation de Iesus souffrant. Il semble, dis-je, faire consister en ce seul amour & imitation tous les moyens, toutes les vertus, toutes les pratiques, & toutes les autres choses nécessaires au salut, & à la plus eminente perfection, en sorte qu'il n'y ait point d'autre assurance du salut, ny d'autre marque de la sainteté. Voicy ses propres paroles.

Vous pouvez bien esperer d'estre sauvé, mais vous n'en avez point d'assurance, qu'en la conformité de Iesus-Christ en vous. L'ame predestinée, & illuminée n'a pour exercice, pour regle, & pour ordre, que l'estat Crucifié de Nostre Seigneur..... Qu'avez vous à faire de temps & d'exercice pour servir Dieu, luy plaire, & vous sauver, que d'avoir l'amour & l'estat de Iesus-Christ fait le vostre..... Et dans la Lettre 59. Qu'avez vous à faire de tant de pratiques, que de celles de Iesus-Christ envers son Pere, envers soy-mesme, & envers la nature humaine? Envers son Pere, Comment est-ce qu'il a obey? Envers soy-mesme, comment est-ce qu'il s'est abandonné, humilié, mortifié? &c. Envers la nature humaine, que n'a-t'il pas fait pour la sauver? Ne sont ce pas de grands estonnemens? Soyez donc deuot, & amoureux de Dieu le Pere, comme Iesus-Christ. Abandonnez-vous à toute sorte de Croix, & de mépris comme luy, & mettez vostre vie pour le salut du prochain. Voilà la vraie deuotion, & le plus eminent de tous les exercices du Christianisme.

En la Lettre 54. Il auouë que tous les conseils de son liure ne tendent qu'à faire aymer & imiter Iesus-Christ Crucifié; & qu'il ne l'a composé que pour ce sujet. *Nostre petit liure, dit-il, est naïf comme le Saint Euangile, & il n'est rien que l'estat de Iesus-Crucifié, dans la mer de sa passion, & dans les*
profondes


profondes humiliations de sa vie. En la mesme Lettre 54. Quand ie donnois, dit-il, (parlant de son liure) ces conseils; ie n'ay iamais eu d'autre intention, que de faire tous de l'estat de Dieu souffrant & Crucifié, & de transformer tous en Crucifix, croyant que cét estat est le plus eminent & le plus Dieu, & le plus assuré chemin de la gloire..... Quand j'écriuois ces conseils, ie regardois l'estat de Nostre Seigneur, & les complaisances qu'il vouloit prendre dans les ames, & ie les voulois toutes transformer en Iesus-Christ.

Tous les souhaits qu'il faisoit pour soy, ou pour autrui ne tendoient qu'à l'amour & à l'imitation de Iesus-Christ Crucifié. *Ie prie Iesus-Christ, disoit-il, souvent; qu'il me coste la vie, en me faisant mourir dans le travail, & dans les souffrances pour luy & dans luy. Quel bon-heur, adjoûtoit-il, de mourir comme Iesus-Christ sur la Croix, dans un ocean de douleurs, & d'ignominie, & se transformer en luy. Hors de là ie ne sçay où est la vertu, le Christianisme, & le salut. Quand quelqu'un s'adressoit à luy pour se mettre sous sa direction, il luy demandoit en premier lieu s'il vouloit bien aymer Dieu, secondement s'il ne desiroit pas aymer & imiter Iesus-Christ crucifié, adjoûtant qu'il ne connoissoit point d'autre perfection acquerir. Aussi à moins qu'une personne témoignast de vouloir aspirer à cét amour & imitation de Iesus souffrant, nostre zélé Imitateur n'en prenoit pas volontiers un soin particulier. Il nous en a laissé un témoignage evident dans une Lettre qu'il écrit à une fille de grande vertu, en ces termes. Fille, si tu me veux plaire, au nom de Dieu sois Nostre Seigneur Crucifié, mort, delassé, avec toutes ses peines, ignominies, amertumes, &c. Autrement ie n'ay affaire de toy, ny d'aucune de tes semblables.*

Le souhait ordinaire qu'il faisoit à ses plus familiers, lors qu'il s'entretenoit avec eux, estoit cettuy-cy. *Fussiez vous mort, & crucifié comme Iesus-Christ: c'est adjoûtoit-il, le plus grand bien, & le plus riche thresor que ie puisse vous desirer. Lors qu'il parloit à ses Religieuses de Nostre Dame de Misericorde, se laissant par fois emporter à cét ardent desir qu'il auoit que tous fussent transformez en Iesus-Christ; Filles, leur, disoit-il, d'un ton de voix animé; vous n'êtes pas encore*

mortes , ny crucifiées , ny transformées en Iesus-Christ. Cela me fait mourir ! Helas qu'est-ce que vous faites ? à quoy est-ce que vous vous occupez , sinon à mourir en Croix comme Iesus-Christ & vous transformer en luy ? Je n'auray jamais un parfait contentement en vous , ny de vous , & ie ne vous aymeray jamais comme mes vraies filles ; que quand ie vous verray toutes de Iesus-Christ.

Il ne s'arrestoit pas aux souhaits seulement , mais il passoit à la pratique , crucifiant sa chair par d'horribles , & continuelles penitences : & crucifiant aussi son ame par de continuelles humiliations , contritions , craintes , angoisses , & autres peines interieures ; ainsi qu'on peut voir dans toute la suite de sa vie. Enfin il auoit tellement imprimé cet amour , & cette transformation en Iesus Crucifié , dans son esprit , dans son cœur , & dans toute son ame , qu'un deuot Ecclesiastique de ses amis s'estant plaint à luy par Lettre de ce qu'il estoit trop rude , & trop exact en ce point de la transformation en Iesus-Christ ; il luy répondit ces belles paroles qui meriteroient d'estre gravées sur des lames d'or , & sur des diamans. *Je ne Iesus-Christ crucifié. Je n'ay point d'autre verité , ny d'autre ny d'autre Dieu , ny d'autre Paradis & gloire eternelle. Qui me vaudra , qu'il me prenne ainsi : qui ne me vaudra pas ainsi , qu'il me laisse.*



L'amour, & la deuotion du Pere Yvan enuers le Tres-Saint Sacrement de l'Autel.

CHAPITRE V.

ENTRE tous les mysteres du Christianisme, la Passion de Iesus Christ & le tres adorable Sacrement de l'Autel, ont des rapports merueilleux ; puisque cettuy-cy est le memorial & la representation de l'autre, & non seulement la representation, mais encore la continuation, ou le renouvellement mystique. L'vn imprime l'amour, & le respect de l'autre. Le Saint Sacrement de l'Autel nous donne le souuenir & l'amour des souffrances, & des humiliations du fils de Dieu; & ce mesme souuenir & amour produisent en nous le respect & la deuotion du Tres Saint Sacrement de l'Autel : en sorte qu'il est impossible d'aymer Iesus-Christ dans sa Passion, & ne le pas aymer dans le Sacrement de l'Eucharistie. Nous en auons vn illustre exemple dans la vie de nostre Imitateur ; qui ayant eu l'amour des Seraphins enuers Iesus souffrant & crucifié, a imité les respects & la deuotion de ces Celestes Esprits, enuers le mesme Iesus-Christ, contenu sous les especes du tres-adorable Sacrement.

Il se consacra dès son enfance à l'Eglise, ayant dès lors pris des soins & enduré des trauaux extraordinaires ; en estudiant pour se rendre digne d'approcher vn iour des Autels. Dès l'âge de huit à neuf ans, il fut receu enfant de Cœur dans la Paroisse de Rians, lieu de sa naissance ; auquel lieu, & ailleurs où il a continué le mesme employ, il a tousiours donné des marques singulieres de son amour, & de sa vocation à l'estat Ecclesiastique. Car ayant le soin d'assister au chœur, parrer les Autels, répondre aux Messes, & rendre d'autres offices, Il s'acquitoit de tous ces emplois avec vne diligence & vne ferueur extraordinaire. Il paroissoit déjà qu'il auoit la connoissance, & l'amour du Tres-Adorable Sacrement de l'Autel

Hhh ij

(au quel tout ce qui est dans l'Eglise se rapporte) d'autant qu'il témoignoit vne ioye singuliere, toutes les fois qu'il estoit occupé au service de l'Eglise, & particulièrement à celles de l'Autel, où reposoit le Tres-Saint Sacrement. Aussi acceptoit-il cette occupation avec tant d'amour, que pour y vacquer, il renonçoit à tout autre exercice, & diuertissement. Il quittoit mesme le manger, & le dormir pour travailler dans l'Eglise, y passant & les iours, & les nuits entieres; sans témoigner de l'ennuy, lors qu'il y auoit quelque pressante besongne à faire.

Sa deuotion à parer les Autels, répondre aux Messes, &c. a esté d'autant plus solide, qu'il l'a continuée toute sa vie. Car à mesme qu'il auançoit, en âge, il croissoit aussi en la deuotion du Tres-Saint Sacrement. Ainsi après qu'il fut sorti d'enfant de chœur, & qu'il n'eut plus aucune charge dans l'Eglise, il s'offroit volontairement aux Sacristains, & autres qui en auoient le soin, pour les ayder à balier les Chapelles, nettoyer les lampes, & sur tout à orner l'Autel & le Tabernacle du Tres-Adorable Sacrement. Il auoit en cela vne adresse particuliere qui concouroit avec sa pieté; outre que s'addonnant à la peinture, & à l'art de grauer, il peignoit des images, & grauoit des moules propres à contribuer à l'embellissement des Chapelles. De maniere que son adresse, & sa bonne volonté luy faisoit trouuer de l'occupation; chacun estant bien aise de l'employer. Ainsi dans les lieux où il a demeuré pendant sa jeunesse, dans Rians, dans Tourues, & ailleurs, la semaine Sainte, les veilles des grandes Festes, & les autres iours qu'on a accoustumez de parer extraordinairement les Chapelles, & les Autels; il estoit tousiours appelé, & employé. On l'appelloit mesme par fois des lieux circonuoisins, pour le mesme sujet, & il quittoit tout pour s'y porter avec ardeur, parce qu'il s'agissoit de contribuer à l'honneur du Tres-Adorable Sacrement, par la decoration extérieure.

Il continua encore dans la deuotion de répondre aux Messes, iusques à ce qu'il fut Prestre. Car il s'étudioit de répondre à la Messe qu'il oyoit: Et les iours du Dimanche & des Festes il passoit presque toutes les matinées dans les Eglises pour répondre en autant de Messes qu'il pouuoit. Mais il a conti-

nué encore plus long-temps en cette deuotion. Car mesme estant Prestre, il ne laissoit passer aucun iour, qu'il ne répondist à quelque Messe, quand il en auoit le loisir, & l'occasion. Après qu'il eut estably ses Religieuses de Nostre-Dame de Misericorde, il répondoit ordinairement à toutes les Messes qu'on disoit dans leur Eglise: encore qu'il y en eust plusieurs, chaque iour, & qu'il fust beaucoup auancé en âge. Aussi durant plusieurs années il ne voulut permettre à ses Religieuses d'entretenir vn Sacristain, ou vn enfant de Chœur, parce qu'il en faisoit luy-mesme l'office avec vn exemple si efficace; que i'ay veu dans la Sacristie de ses mesmes Religieuses, plusieurs deuots, & sçauans Prestres s'entredisputer ciuilement, pour à son imitation répondre les vns aux autres pendant leurs Messes.

Mais parce que la vraye, & la solide deuotion enuers le Saint Sacrement de l'Autel, consiste à le receuoir souuent avec les preparations necessaires: c'est en cela que nostre bon Yvan a excellé; auant qu'il fust élevé à la dignité du Sacerdote. Car il a tousiours communiqué tres-souuent, dès que ses Confesseurs luy permirent de s'approcher de la sainte table. Premièrement il communioit tous les mois, après de quinze iours, puis tous les Dimanches, & enfin avec la permission de son Confesseur, il se nourrissoit de cette Celeste viande les iours des Festes aussi, & encore plus souuent. Je ne parle pas de la preparation qu'il apportoit à la Communion, ny de son action de grace, parce que sa vie estoit vne preparation, & vne action de grace continuelle. Aussi menoit-il vne vie Angelique dans la fuite du peché, & des occasions d'iceluy, dans l'étude, & le traual, & dans la pratique des plus eminentes vertus du Christianisme.

La deuotion qu'il auoit pour le Saint Sacrement, ne s'arrestoit pas en sa personne, mais elle s'étendoit à ceux qui estoient sous sa direction: Si bien qu'il a tousiours eu vn tres-grand zele de faire honorer & aymer ce pain des Anges; & par tout où il a demeuré il s'est étudié d'y introduire, ou d'y confirmer le frequent vsage de cette viande Diuine. En effet il n'a iamais voulu souffrir long-temps sous sa conduite, au-

cune personne qui refusast de frequenter les Sacremens de la Confession, & de la Communion, ou de trauailler pour s'en rendre digne. Il excitoit puissamment tous ceux qui s'adressoient à luy, à cette pratique, comme au plus assuré, & plus efficace moyen que nous ayons dans le Christianisme, pour vaincre le vice, & pour embrasser la vertu.

Ainsi il passoit toutes les matinées des Dimanches, & des Festes dans le tribunal de la Penitence, & mesme quelques autres iours de la semaine, pour ouïr les Confessions de ceux qui se presentoient; parce que la plupart des personnes qu'il dirigeoit, auoient accoustumé de Communier non seulement les Dimanches, & les Festes, mais encore d'autres iours. Il est vray qu'il exigeoit de ces mesmes personnes vne grande pureté de vie, & qu'il les corrigeoit de leurs moindres deffauts avec vne tres-grande exactitude. Les Religieuses de Nostre-Dame de Misericorde qu'il a conduites durant plus de vingt années, sont des témoins irréprochables de cette fidele & constante pratique de leur Pere & Fondateur; puis qu'auant mesme qu'elles fussent Religieuses, il les obligeoit à vne perfection heroïque, & leur accordoit la Communion trois ou quatre fois chaque semaine, & encore plus souuent à celles qu'il connoissoit estre mieux disposées. Les personnes du monde qui ont esté sous la direction de ce grand home, peuvent rendre le mesme témoignage du zele qu'il auoit à les porter à la frequente Communion, & combien il estoit exact à leur faire pratiquer pour cette fin les vertus Chrestiennes selon leur estat & profession.

I'adjoûte que ce grand deuot du Tres-Auguste Sacrement de l'Autel, a receu en mourant vne magnifique recompense de sa deuotion; parce qu'il est mort dans la pratique actuelle de la mesme deuotion. Il est mort, dis-je, lors qu'il se pre-paroit actuellement à la Communion. Si bien que son ame fut receüe entre les bras de Iesus Christ au moment qu'il se dispoisoit de receuoir cét adorable Sauueur dans le Sacrement de l'Eucharistie.

Son assiduité , & sa ferueur à celebrer la sainte Messe.

CHAPITRE VI.

DE'S que nostre fidele Ecclesiastique fut pourueu à l'Ordre de Prestre, il accreut son amour, son respect, & sa deuotion enuers la Tres-adorable Eucharistie ; témoignant plus de ferueur, & d'assiduité à l'offrir à Dieu en qualité de Sacrifice, qu'il n'en auoit monstré à la receuoir en qualité de Sacrement. Ainsi depuis qu'il eut celebré sa premiere Messe, il s'attacha à ce Diuin exercice avec tant d'amour & fidelité, qu'il n'a passé vn seul iour le reste de sa vie sans le continuer exactement ; si ce n'est lors qu'il a esté grièvement malade, ou detenu par quelque autre empeschement, qu'il ne pouuoit surmonter.

Quand il se rendit Solitaire il choisit vn hermitage, qui estoit pourueu d'une Chapelle, d'un Autel, & de tout ce qui estoit necessaire pour le Sacrifice de la Sainte Messe ; parce qu'il n'auroit pas voulu manquer de le celebrer chaque iour. C'est encore la raison, qui l'empescha de se cacher dans des caues souterraines, ou se retirer dans des lieux fort éloignez des Villes & des Bourgs, où il auroit esté moins visité, & moins détourné de sa solitude ; parce qu'il n'y auroit pas peu celebrer chaque iour cet Auguste & Diuin Sacrifice ; qu'il regardoit comme le plus tendre objet de sa deuotion, le premier & le principal de ses exercices, & le plus efficace moyen de son salut.

La mesme ardeur qu'il auoit pour la celebration de la Sainte Messe, luy faisoit apprehender de faire des voyages ; craignant d'y trouuer quelque obstacle à sa deuotion ; aussi n'en entreprenoit-il que par necessité : & pour lors il se munissoit de ce qu'il jugeoit necessaire à son pieux dessein, comme d'une bourse de corporaux & choses semblables. Il a fait deux diuerses fois le voyage de Prouence à Paris ; il estoit déjà beaucoup

avancé en âge, outre ce il estoit sujet à plusieurs incommoditez qui le faisoient grandement souffrir : & nonobstant ces choses il a tousiours fidelement gardé sa religieuse coustume d'approcher chaque iour de l'Autel. C'est pourquoy pendant ce voyage il vsoit d'une singuliere diligence, qui sembloit surmonter la foiblesse de son âge, soit à veillier pour faire ses preparations, soit à se lever de grand matin pour satisfaire à sa priere.

Mais sa ferueur estoit encore plus grande. Car il auroit désiré celebrer la Sainte Messe plusieurs fois chaque iour, & quitter tous les autres exercices pour ne s'addonner qu'à cettuy-cy. C'est ce qu'il a souuent témoigné à ses plus intimes, parlant du bon-heur des Prestres de pouuoir approcher de l'Autel en qualité de Sacrificateurs. *Plenst à Dieu*, disoit-il, *que nostre saint Pere voulust me permettre de dire plusieurs Messes par iour. O que ie m'estimerois heureux de ne m'employer à autre chose, qu'à sacrifier mon Sauueur, & me sacrifier avec luy. Mais ce seroit un trop grand bien duquel la creature n'est pas capable.* Il disoit vne seconde chose à ses amis, aussi remarquable que la premiere, sur ce sujet : c'est à sçauoir, [que de toutes les penitences & austeritez, il n'en trouuoit point de plus terrible, que d'estre priué vn seul iour de la Communion, ou du Saint Sacrifice de la Messe.]

Cependant le Seigneur voulut luy donner cette mortification : vne seignée faite mal à propos, luy ayant affoibli la veuë, en telle sorte qu'il ne pouuoit plus lire distinctement, il fut contraint des'abstenir de reciter son office, & de celebrer la Sainte Messe durant quelques mois auant sa mort. Je ne sçauois expliquer les angoisses & les martyres que cette priuation fit souffrir à sa pieté, & à sa ferueur ; car encore qu'il fust doüé d'une grande patience, & qu'il fust accoustumé de souffrir les plus grands maux, sans en donner aucun témoignage ; toutefois il se plaignit de cette mortification à vne vertueuse Religieuse son ancienne penitente, luy faisant écrire les peines extrêmes qu'il enduroit ; & luy recommandant de prier Dieu pour luy. Nous auons sceu cette plainte par la réponse que cette Religieuse luy fit, dans laquelle elle luy mande ces paroles de consolation.

Mon

Mon Reuerend Pere, i'ay receu la nouuelle de l'affoiblissement de vostre veuë. Je la demanderay à Dieu. Mais, mon bon Pere, que cét estat où vous estes est grand ! Toute la sainte Trinité se contente, & darde ses attraits en vostre ame par l'obscurité de vostre veuë. Il falloit encore cela pour parfaire en vous la conformité de Iesus-Christ en sa Passion. Il racourcit en vous l'operation, pour vous offrir à son Pere, comme il est racourcy dans la sainte Hostie. Que cét estat attirera de graces & de benedictions à toutes vos filles, à celles mesmes qui sont éloignés de vous, encore plus que si vous auiez la liberté d'agir.....

Cette vertueuse Religieuse consolait nostre bon Prestre en luy disant que s'il perdoit d'un costé par l'impuissance de celebrer la sainte Messe, il gaignoit de l'autre par sa resignation & conformité au bon plaisir de Dieu. Mais il reparoit encore sa perte par vne autre voye tres-efficace ; car il communioit chaque iour, faisant les mesmes preparations, & actions de grace pour la Communion, qu'il auoit accoustumé de faire pour la sainte Messe. Mais ce n'estoit pas assez pour satisfaire à sa deuotion : d'autant qu'il eut dès lors vne assidue extraordinaire à se tenir durant la journée auprez du Tres-Adorable Sacrement de l'Autel.

La foiblesse de sa veuë ne luy permettant pas d'agir à son ordinaire, il employoit tout son temps, à demeurer en Oraison dans le Sanctuaire de la Chapelle de ses Religieuses, en la presence de son Diuin Maistre. Car après y auoir demeuré toute la matinée, pour mieux continuer l'exercice de sa pieté, il disnoit ordinairement dans vn lieu joignant la Sacristie, d'où il retournoit aussitost après disné dans le Sanctuaire, afin d'y passer le reste du iour, comme vn Seraphin deuant le Thrône de l'Agneau. Aussi estoit-il embrasé des flammes de ces bien-heureux qui s'allumoient tousiours de plus en plus dans son ame, par la presence de son bien-aimé.

Sa posture monstrois son respect, & sa deuotion. Car la foiblesse de ses iambes ne luy permettant pas de se tenir à genoux, ou debout, il estoit à demy assis sur vne petite chaise, la teste baissée dans vn profond recueillement ; son corps estant comme immobile, & reduit en sorte qu'il sembloit vouloir

s'aneantir en la presence de son Souuerain. Quand ses Religieuses luy demandoient pourquoy demouroit-il si long temps dans le Sanctuaire, & qu'elles l'excitoient à chercher ailleurs quelque diuertissement; *Filles*, répondit-il, *le Sanctuaire où est l'Autel & le Tabernacle du Tres-Adorable Sacrement, est ma maison, ma chambre, mon palais, & tout mon contentement. Je ne puis plus demeurer que là, & c'est en ce lieu que vous me trouuerez, lors que vous aurez affaire de moy.* Il faut adjouster que son amour, & son respect s'étendoit à toutes les choses qui seruoient à l'Autel. L'ay déjà dit qu'il auoit vne singuliere veneration pour les Corporaux, & les Purificatoires qui touchent les especes du Corps & du Sang de Iesus-Christ; puisqu'il en portoit sur soy, & en donnoit aux personnes deuotes, pour en porter comme de precieuses reliques. Son respect n'estoit pas moindre enuers les Hosties ou le pain à chanter dont nous nous seruons dans les Messes: Car il en auoit graué luy-mesme diuerses planches fort belles, & il prenoit vn tres-grand plaisir de raccommoder avec le burin celles qu'on luy apportoit.

Mais sa ferueur s'épandoit encores plus loin, après auoir fait les planches, il faisoit luy-mesme le pain à chanter, il pestrissoit luy mesme la pâte, & faisoit toutes les autres choses necessaires, d'une façon qui témoignoit sa foy, son respect, & sa singuliere pieté enuers le Tres-Adorable Sacrement: C'est à sçauoir nuë teste, recueilli, & en silence; si ce n'est qu'il disoit vne *Aue Maria* chaque fois qu'il mettoit les fers sur le feu. Quoy dauantage? Il estoit si affectionné à ce deuot exercice, qu'il témoignoit vne ioye extraordinaire, & vn saint empressement le iour qu'il s'y employoit. Et parçè qu'après auoir tiré du moule les tables des Hosties, il y a des bords à rogner, il n'employoit à cela que la personne qu'il connoissoit la plus innocente & la plus vertueuse: disant, *que les pains à chanter ne doiuent estre maniez que par des personnes très-pures, parce qu'ils doiuent estre changez au Corps de Iesus-Christ le plus pur de tous les corps.* Enfin pour exercer sa pieté en tout ce qui auoit du rapport au Tres-Adorable Sacrement de l'Autel, il se faisoit ordinairement des clefs de son Eglise, il les gardoit

avec respect, il auoit de la peine de les confier à d'autres, se glorifiant d'estre le concierge de la maison de Dieu, & le gardien de Iesus Christ son maistre, dont la presence dans la tres-adorable Eucharistie conserue l'Eglise, & la conseruera dans sa fermeté, & son integrité iusques à la consommation des siecles.

Sa preparation à la Sainte Messe.

CHAPITRE VII.

VNE des maximes du Pere Yvan estoit, [que les Prestres qui celebrent à la Sainte Messe, & les fideles qui communient souuent, doiuent s'employer de toutes leurs forces pour s'y bien preparer.] Et il adjoûtoit, que cette preparation ne consiste pas seulement à se recueillir, & à faire des actes de vertu, le matin auant la Messe & auant la Communion; mais à mener vne vie pure & sainte, & enrichie de la pratique des vertus Chrestiennes: en sorte que la vie soit vne continuelle preparation pour Communier dignement. *Il faut, disoit-il, Communier souuent pour pouuoir mener vne vie sainte; & il faut mener vne sainte vie pour pouuoir Communier souuent. O qu'il est difficile qu'une ame puisse long-temps persuerer dans les travaux, les combats & les autres difficultez de la vie deuote, sans l'appuy, & la force de la sainte Communion! Mais il est encore plus difficile qu'elle puisse Communier utilement, si elle ne travaille à bon escient & de toutes ses forces à se purifier du mal, & se perfectionner dans la pratique du bien. Et c'est en ce sens qu'il expliquoit les paroles de l'Apostre Saint Paul: que celui qui ne travaille pas, soit priné de manger. C'est à dire que ceux qui refusent, ou qui sont trop negligens à travailler à leur perfection, ne meritent pas qu'on leur accorde facilement la sainte Communion.*

Ainsi si d'un costé nostre bon Prestre estoit zélé à exciter ses penitens à la frequente Communion; de l'autre il estoit tres-

exact à les bien disposer , à ne souffrir en eux aucun peché d'habitude , ny aucune affection au mal , & à les porter à faire leur deuoir selon leur estat & condition. Mais cette exactitude , & cette seuerité ont particulièrement paru en sa personne , dans les preparations qu'il apportoit à célébrer la sainte Messe.

Il recitoit dès le soir son office & les prieres vocales que l'Eglise ordonne pour dire deuant la Messe ; afin d'auoir plus de loisir le lendemain au matin de vacquer à l'Oraison & faire les autres preparations interieures. Il passoit la plus grande partie de la nuit en prieres , ou en penitences. Il se leuoit tousiours de tres grand matin , & sa premiere pensée , après celle de la presence de Dieu , estoit celle du saint Sacrifice de la Messe qu'il deuoit célébrer. J'ay appris de luy-mesme que cette pensée de la sainte Messe ne le quittoit point : mais qu'elle l'accompagnoit en tous lieux , en tout temps , & en toutes ses actions , & le tenoit dans vne terrible , & amoureuse crainte , iusques à ce qu'il celebrast actuellement ; & que pour lors sa crainte , & son amour redoubloient. Que ne puis-je declarer les graces Diuines que ce souuenir de la Messe luy attiroit , & les vertus qu'il luy faisoit pratiquer ! Quelle estoit son apprehension de ne tomber dans le moindre peché , ou dans la moindre imperfection qui le rendist indigne , ou moins disposé d'approcher du Saint des Saints ! Avec quelle fidelité veilloit-il sur ses pensées , sur ses desirs , sur ses regards , sur ses paroles gestes , &c. pour ne rien souffrir & ne commettre aucune chose qui seruiſt d'obstacle à la grace du Sacrifice , & pour se rendre de plus en plus agreable à ce Diuin hoste qu'il deuoit recevoir.

Mais ce n'est pas assez , dès qu'il estoit leué , après auoir fait son Oraison , & recité les petites heures de son office , il se rendoit à l'Eglise , & il y demeuroit , s'occupant à diuerses fonctions avec vn grand recueillement & dans l'intention actuelle de se preparer à la celebration du Sacrifice. Son heure de célébrer estant venue , il ne disoit que fort peu de prieres vocales. Sa preparation principale estoit interieure par vne forte & profonde application de toute son ame. Ce qui paroissoit en sa personne , après mesme qu'il estoit reueſtu des ornemens Sacerdotaux : car il demeuroit quelque temps comme s'il eust esté immo-

bile , les mains jointes & serrées l'une dans l'autre , les yeux fermez , & tout son extérieur composé avec vne modestie Angelique : comme s'il eust voulu appeller toutes les forces de son ame & de ses puissances ; pour les employer à vne si sublime & si formidable action ; & que se dépouillant de soy , & des autres creatures , & considerant la hauteur du mystere , il eust voulu se noyer dans la profondeur de ce vaste & immense ocean.

De la pureté & delicateffe de sa Conscience.

CHAPITRE VIII.

IE prends icy occasion de dire quelle estoit la pureté de l'ame , & la delicateffe de la conscience de nostre fidele Imitateur ; parce que c'estoit la plus grande disposition qu'il apportast au saint Sacrifice de la Messe. Il a aduoüé à ses plus familiers quelque temps avant sa mort , qu'il ne se souuenoit pas d'auoir iamais consenti à aucune sale pensée , encore qu'il eust esté furieusement assailly par le Demon , & par de méchantes creatures. Ce seul témoignage semble suffire pour monstrier l'innocence de sa vie , & fonder cette croyance qu'il n'a iamais commis de peché mortel. Car si la grace l'auoit tellement preuenü , & fortifié , qu'il ait vaincu la chair , le plus proche , & le plus redoutable de nos ennemis , & vaincu avec tant d'auantage , qu'elle n'ait iamais peu le faire trebucher mortellement , quoy qu'elle fust animée par les suggestions du Demon , & par les attraites de l'occasion ; n'auons nous pas vn fondement raisonnable pour croire que la mesme grace l'a rendu victorieux des autres ennemis plus éloignez , & moins dangereux ; Mais voicy vn autre argument tres-plausible de la delicateffe de sa conscience.

Celuy qui a vn grand soin d'euitier les moindres imperfections , en a encore plus pour euitier les plus grands deffauts. Y van a tousiours tremblé de peur de manquer à son deuoir , & sa vie a esté vne continuelle crainte de l'offense de Dieu. En

effet on le voyoit tousiours dans vne extrême reserve, soit en ses paroles, soit en ses actions, comme apprehendant sans cesse, de commettre quelque peché qui salist la pureté de son ame. La delicatesse de sa conscience estoit si grande, que dès qu'il croyoit auoir failli, encores que par fois les fautes ne fussent pas mesme des pechez veniels, il n'auoit aucun repos qu'il n'eust purifié sa conscience.

Il ne se contentoit pas d'aller à confesse tous les iours, il arriuoit souuent qu'il s'y presentoit plusieurs fois dans vn mesme iour, & autant de fois qu'il croyoit auoir commis quelque faute. Cependant sa vie estoit si pure, qu'un tres-vertueux Ecclesiastique qui a esté son confesseur durant trente ans, a attesté qu'il n'auoit iamais remarqué en luy aucun peché tant soit-peu considerable, & que la matiere ordinaire de ses confessions, estoit des actes de vertu. Voicy les propres termes qui sont couchez dans l'attestation de cét Ecclesiastique en faueur du bon Pere Yvan.

Je puis asseurer avec verité, qu'ayant esté son confesseur depuis l'année 1623. iusques à l'an 1653. enuiron, ie ne l'ay iamais veu commettre aucun peché, ny imperfection, tant-soit-peu considerable & quand il se confessoit, il s'accusoit le plus souuent des actes de vertu. D'où il conclud son attestation par ces belles paroles qui composent le titre de nostre liure. Pour dire en un mot, il estoit le vray imitateur de Iesus Christ, ou pour mieux dire, il estoit un vray Iesus-Christ par imitation, puis qu'il ne respiroit qu'à l'imitation de Iesus-Christ qu'à sa volonté, qu'à ses inspirations & à tous ses mouuemens. En sorte qu'il pouuoit dire asseurement avec le grand S. Paul : Je vis, & ie ne vis pas moy-mesme ; mais c'est Iesus-Christ qui vit en moy.

La crainte, & la delicatesse de conscience de nostre Imitateur s'augmentant sur la fin de sa vie avec les autres vertus, il ne se contentoit pas d'aller à confesse pendant le iour, il s'y presentoit mesme pendant la nuit. Car s'il arriuoit qu'estant couché il se souuint d'auoir commis quelque faute pendant le iour, comme s'il n'eust peu supporter la pesanteur de la moindre imperfection, il se leuoit à l'heure mesme, & appellant vn

Prestre qui estoit couché dans vne chambre voisine, il se prosternoit à genoux deuant luy, il s'accusoit avec vn tres-grand regret de sa faute, & luy en demandoit humblement la penitence, & l'absolution. Cela arriuoit si souuent que les confesseurs qui l'ont aduoué après sa mort; n'en ont pas sceu dire le nombre. Il est vray que pour l'ordinaire les confesseurs refusoient de luy donner l'absolution, parce qu'ils voyoient que les choses dont il s'accusoit, n'estoient pas matiere suffisante pour le Sacrement. Et pour lors il s'accusoit de quelque peché qu'il auoit confessé auparauant, ou il se contentoit de la benediction du Prestre.

Enfin la pureté, & la tendresse de son interieur, estoient telles, que les choses moins parfaites luy paroissent des pechez, & les moindres pechez luy paroissent des crimes enormes. Quand il n'auoit pas la commodité d'un Confesseur; après auoir demandé humblement, & amoureusement pardon à Dieu de ce qu'il croyoit estre faute, il s'imposoit à l'heure mesme vne tres-rude penitence. Et il agissoit en cecy avec tant de fidelité, & de rigueur, que par fois pour de legeres imperfections, il prenoit la discipline iusques au sang durant les sept Pseumes penitentiaux.

Enfin pour acheuer ce chapitre par vn témoignage qu'il en a luy-mesme rendu, & qui confirme tout ce que nous venons de dire de la delicateffe de sa conscience; il fit cette agreable réponse à vne de ses Religieuses, qui luy demanda comment est-ce qu'il se preparoit à la Confession. *Fille, répondit-il, ie ne sçay en quoy consiste la preparation pour aller à confesse; car ie n'vse d'aucune preparation pour ce sujet là: mais d'abord que ie crois auoir commis quelque peché, pour leger qu'il me paroisse, ie ne le puis souffrir, i'en fais des actes de contrition, & aussi-tost ie cherche un Confesseur. Ainsi la preparation que ie fais pour le Sacrement de Penitence, n'est autre que la pensée, & le souuenir de mon peché.*

Il est assidu à l'Oraison.

CHAPITRE IX.

IL commença la pratique de l'Oraison mentale dans sa plus tendre jeunesse lors qu'il seruoit les Reuerends Peres Minimes du Conuent de Pourrieres , ainsi que nous auons remarqué ailleurs. Il a depuis fidellement continué ; mesme pendant ses estudes nonobstant les miseres de la pauureté qui le contraignoient d'aller de ville en ville , & s'employer à diuerses choses , afin de trouuer sa subsistance. Si bien que s'il arriuoit que les occupations ne luy donnassent pas le loisir de faire son Oraison pendant le iour , il s'y occupoit pendant la nuit , aymant mieux priver son corps du sommeil , que refuser à son ame cette Diuine nourriture.

S'auançant en âge , il s'auança aussi dans la pratique de l'Oraison. Il redoubla les heures de cette Celeste occupation dès qu'il fut fait Prestre , & qu'il eut la consolation d'approcher de l'Autel : parce qu'outre ses prieres accoustumées , le grand office & sa préparation , & son action de grace deuant & après la Sainte Messe , qui pouuoient luy tenir lieu d'Oraison ; parce qu'il s'y addonnoit avec vne application singuliere , il passoit quelques heures en Oraison deuant l'Autel du Saint Sacrement ou de la Sainte Vierge , & il se leuoit encore chaque soir à minuit pour prier avec moins d'empeschement , & de distraction.

Mais dès qu'il se fut rendu Solitaire dans l'hermitage de Saint Roch de Rians , il n'auoit plus de temps réglé pour l'Oraison , parce qu'il s'y addonnoit continuellement , presque sans interruption. En sorte qu'à proprement parler il ne s'occupoit plus qu'à faire Oraison. Il y employoit quelques heures à son leuer. Il s'y occupoit auant & après la Messe. Il la reprenoit après midy & sur la fin du jour. Il la continuoit dans son examen auant que se coucher. Son sommeil estoit vne espee d'Oraison,

d'Oraison, parce qu'il dormoit prosterné sur le marche-pied de l'Autel de sa Chapelle, ou derriere le mesme Autel sur le coffre des ornemens de la sainte Messe. Encore se leuoit il à la minuit pour renouueller son application à l'Oraison, s'y abyssant comme dans vne mer profonde durant quelques heures, & par fois le reste de la nuit: imitant en cela le grand saint Antoine son Patron, qui commençant son Oraison au Soleil couchant, & la continuant toute la nuit, se plaignoit au matin de ce que le Soleil se leuant trop tost à son gré, troubloit par l'éclat de sa lumiere le repos & le calme que l'Oraison luy faisoit goûter dans l'obscurité de la nuit. Il recitoit son office & les autres prieres vocales, avec beaucoup d'attention. Il celebroit la sainte Messe chaque iour avec tant d'application, & il estoit si recueilli dans tous ses autres exercices, que nous pouuons dire qu'il continuoît en tout son Oraison interieure.

Enfin il se rendit l'exercice de l'Oraison si facile, & si familier; qu'il n'auoit plus besoin de temps, ny de lieu, ny de moyen pour le continuer: car il faisoit l'Oraison en tout lieu, & en tout temps, se tenant en tout & par tout humblement & amoureuxment recueilli en la presence de Dieu; en sorte que, ny l'embarras des affaires, ny aucun autre obstacle ne l'en pouuoit plus détourner, ny luy causer de notables interruptions. Il a luy-mesme aduoué diuerses fois à ses plus familiers, que Dieu possedoit si pleinement son ame, & toutes ses puissances, que toutes choses luy estoient Dieu, & le portoient à Dieu; & qu'en tout lieu & tousiours il estoit si appliqué à Dieu, & attentif par amour, & en amour à sa Diuine presence; qu'il ne pouuoit presque plus en estre separé. Heureux estat, qui l'éleuant au dessus de l'ignorance, de la foiblesse, & de la vicissitude des hommes mortels, le rendoit participant des lumieres, de la force, & de la fermeté des Celestes Esprits! Heureux estat, qui vnissant en luy la communication des biens que les Anges possèdent dans le Ciel, avec le partage des maux que les hommes endurent sur la terre, le rendoit l'Imitateur de Iesus-Christ; en ce que à l'imitation de ce Diuin Sauueur, il estoit par sa

continuelle Oraison , & voyageur , & comme comprehenseur tout ensemble.

O comme les graces que cette continuelle Oraison , & cette attention amoureuse à la presence de Dieu , attiroient sur luy , nous sont inconnues : ainsi nous ne sçaurions decrire toutes les vertus qu'elles luy faisoient pratiquer , soit interieurement deuant Dieu , soit à l'exterieur deuant les hommes. Son cœur estoit comme le Sanctuaire du Tabernacle , où le feu de l'amour Diuin estoit toujours allumé & ardent. Son esprit & sa memoire estoient comme un Ciel , où ses pensées chantoient continuellement les loüanges de Dieu , & luy rendoient sans cesse les deuoirs d'une parfaite Religion. Cette presence de Dieu caufoit en luy le profond silence qu'il gardoit , ne parlant que tres-peu , de peu de chose , & à peu de personnes. De là venoit la crainte filiale qui le tenoit dans une grande reserve , & une continuelle circonspection. De là cette rare modestie , qui paroissant dans ses yeux , dans ses gestes , & dans toutes ses démarches ; le faisoit aymer , & reuerer de tous ceux qui auoient le bien de le frequenter familièrement. C'est de là enfin comme d'une seconde source d'où naissoient sa resignation , son dépouillement , son humilité , & les autres vertus desquelles nous parlerons dans les Chapitres suiuaus.

Quant à la matiere de son Oraison , j'en feray icy quelques remarques tirées de ce que luy-mesme en a dit par écrit , ou de viue voix. Le principal & le plus ordinaire sujet de la contemplation durant toute sa vie , a esté les souffrances , la passion , & la mort de Iesus Christ. Un iour que j'auois la consolation de m'entretenir avec luy , des matieres sur lesquelles il faut mediter , après m'auoir excité de ne m'appliquer de moy-mesme qu'à la Passion , & aux souffrances de Iesus-Christ. *Je sçay* , medit-il , *une personne addonnée à l'Oraison dès son enfance , qui durant plus de 20. années n'a point eu d'autre matiere dans son Oraison , que le Crucifix.* Il m'aduoua depuis que c'estoit de soy-mesme qu'il auoit parlé ; & quand il ne l'auroit pas déclaré , il en donnoit assez de témoignages , pour ne nous pas laisser la liberté de le reuoker en doute.

Car il ne parloit , il ne preschoit , & il n'écriuoit que de

Iesus Crucifié, ainsi que nous auons remarqué ailleurs. Il ne conseilloit ordinairement à toute sorte de personnes, de mediter que sur la Passion de Iesus-Christ, disant souuent ces belles paroles de l'Apostre S. Paul : qu'il faisoit profession de ne sçauoir que Iesus Crucifié. De là venoit son amour à porter sur soy, & à faire porter aux autres, des Images du Crucifix, pour imprimer d'autant plus la memoire de sa Passion, de ses souffrances, à faire aussi dresser de grandes Croix sur les chemins pour ce mesme sujet; & à employer tous les soins pour faire connoistre, & aymer la Passion, & mort du Fils de Dieu; parce que c'estoit la matiere de ses pensées & de ses affections.

Pour ce qui regarde la forme, ou la façon qu'il gardoit dans son Oraison; j'ay souuent appris de sa propre bouche parlant sur ce sujet, qu'il n'auoit iamais obserué aucune methode particuliere, & que mesme il n'en auoit iamais sceu d'autre; que de se tenir humblement & amoureusement en la presence de Dieu; & en cet estat aymer Dieu de tout son cœur & de toutes ses forces, le caresser, l'embrasser, & se consumer dans son Amour. Il ne condamnoit point les methodes ordinaires que l'on donne aux commençans, pour leur apprendre à mediter; puis qu'il a permis à ses Religieuses de s'en seruir; mais il ne s'en seruoit pas luy-mesme, & il n'en auoit iamais eu besoin, parce qu'il auoit tousiours esté attiré à l'Oraison par l'Esprit du Seigneur.

Ainsi il ne sçauoit bonnement ce que c'estoit que de faire des meditations; & raisonner sur des poincts; son Oraison estoit vne haute contemplation, & vne vnion amoureuse avec Dieu: ce qui est la plus parfaite Oraison dont la creature soit capable. *Aussi, disoit-il, que dans l'Oraison il faut plus donner à la volonté, qu'à l'entendement; que les extases de la volonté par la voye d'amour, sont les plus nobles, les plus meritoires, & les plus asseurées; & que les rauissements de l'esprit par la voye des lumieres & des connoissances, sont tres-dangereux, & grandement exposez aux illusions du Demon.* Mais les écrits font mieux connoistre la façon de prier, que nos paroles.

Voicy ce qu'il écrit à vne tres-vertueuse Religieuse qui luy

auoit demandé conseil touchant l'Oraison d'vnion. Lettre 11. *Sur ce qu'on vous a dit que ie ne faisois point cette Oraison; si ie ne la faisois, ie ne la pourrois connoistre, ny conseiller, ny aymer, ny sçauoir que Dieu en est plus jaloux, que l'enfant de la mammelle. Je n'ay iamais conseillé que l'union avec Dieu, & de se dénuer, dépouiller, mortifier, & aymer Dieu, & faire cette Oraison en la seule volonté de Dieu par adhesion à icelle, &c.*

Il écrit quasi le mesme à vn tres-pieux Ecclesiastique, qui luy auoit demandé quelques aduis touchant l'Oraison. Lettre 61. [Remarquez comme prient les Anges, & tous les Bien-heureux. Leur priere n'est qu'un regard de ioye, & vne amoureuse presentation de ce qu'ils veulent par charité pour quelqu'un, sans discours, ny raisonnement. Vnissez-vous tant que pourrez à Dieu, comme l'humanité de Nostre Seigneur avec la Diuinité; par conformité, alors vous prierez comme Iesus-Christ, & serez deuot comme luy enuers son Pere. Alors vous serez exaucez comme luy, & tout vous sera Dieu pour tous ceux, pour qui vous prierez. Quand voudrez quelque chose de Dieu; habillez vous de Nostre Seigneur, mettez vostre cœur dans celuy de Dieu, & en l'estat, & vie de son cher Fils crucifié dans le vostre, & toute sa gloire, & ses volontez, & tout ensemble ce que vous voulez luy demander, vous aurez tout ce que vous voudrez sans prier, &c. Aimez & adhezerez à l'Esprit de Dieu, à la place de prier; offrez, honorez, adorez, admirez, caressez, & embrassez: soubmergez vous dans tout Dieu, comme vne goutte d'eau dans la mer, avec toutes vos volontez, desirs, esperances, affections, cœur, vie, forces, necessitez, besoins, infirmittez, dangers tels qu'il vous plaira, & voyez Dieu en vous d'une viue foy, plus vous dedans vous que vous. Soyez tout Dieu, & son bon plaisir, adherant, obeissant, imitant. Ne soyez qu'un, n'ayez qu'une vie, cœur, & estre avec la Majesté, & vn en Iesus-Christ crucifié. Et voilà vne tres-grande Oraison, pour auoir tout Dieu pour luy-mesme, en vous pour vous & pour tous.]

Il est aisé de connoistre par ces paroles du Pere Yvan, quelle

DV VENERABLE P. ANTHOINE YVAN. 455
estoit la forme, & la perfection de son Oraison ; que ce n'estoit
qu'amour , & l'exercice continuel d'un parfait amour , par
vne simple, & nue, mais tres sublime contemplation.

Sa resignation & sa conformité au bon plaisir de Dieu.

CHAPITRE X.

LE principal fruit de l'Oraison estant l'union de l'ame avec
Dieu, & la conformité de la volonté humaine avec la vo-
lonté Diuine ; il ne faut pas demander si nostre Imitateur
possedoit parfaitement cette union & cette conformité ;
puis qu'il estoit si auancé en l'Oraison, & en l'Oraison de pure
contemplation, qui est la plus eminente de toutes. Le premier
témoignage que nous auons de sa conformité à la volonté
Diuine, est qu'entre les liures spirituels dont il se seruoit, il
faisoit si grand estat de celui du Pere Cansfeld Capucin, inti-
tulé la regle de la perfection, ou de la volonté de Dieu ; qu'il
nous a aduoué plusieurs fois, de l'auoir porté sur soy durant
près de quarante années, sans auoir iamais passé vn iour qu'il
n'en leust vn chapitre, ou quelque page. Il conseilloit à tous
ses enfans spirituels de s'y appliquer aussi ; quand il les iugeoit
capables de l'entendre, & d'en faire leur profit : parce que ce
liure du Pere Cansfeld ne traite que de la volonté de Dieu,
qu'il propose pour l'unique regle de la perfection ; reduisant
toutes les vertus, tous les moyens, & toutes les pratiques du
Christianisme & de la vie Religieuse à ce seul exercice, de ne
penser, ne desirer, ne vouloir, n'agir, & ne souffrir, que pour
obeir à la volonté de Dieu reconnue ; sans autre interest, ny
fin, ny intention, que la mesme Diuine volonté. Nostre Imit-
tateur a cheri ce liure, l'a leu, & l'a porté sur soy comme vne
precieuse relique ; & cela durant quarante années, parce qu'il
estoit conforme à ses pensées, à ses desirs, à son affection, & à
ses pratiques, de ne se proposer en toutes choses que le seul
bon plaisir de Dieu, & l'accomplissement de sa sainte

volonté , vniquement , constamment , & inuiolablement.

C'est ce qu'il a témoigné dans ses écrits & par ses actions. En sa Lettre 35. Après auoir parlé des difficultez & contradictions qu'il rencon troit dans l'établissement de la Congregation des filles de Nostre-Dame de Misericorde, il adjoute ces mots qui montrent la pureté de son intention à ne regarder que le bon plaisir de Dieu. [Et ie vous commande de faire des prieres particulieres à la Mere de Dieu durant quelques iours, pour scauoir si Dieu veut cette Compagnie des filles de la Misericorde, & puis vous me manderez vostre sentiment. Toutes nos filles, & beaucoup d'autres disent que Dieu la veut. Priez bien Dieu, & écrivez moy.....Helas, ie n'ay voulu, & ne veux que le seul bon plaisir de Dieu en tout ce que i'ay fait, que ie fais, & feray]

Il estoit si resigné à la volonté Diuine, & si dependant d'icelle, qu'il se regardoit comme son esclaué, mais vn esclaué amoureux qui auroit volontiers accepté toute sorte de souffrances & de martyres pour luy complaire. C'est ainsi qu'il en écrit à vne vertueuse Religieuse. En sa Lettre 31. *Fille, dit-il, veritablement celuy qui n'est pas à soy ne doit rien promettre. Il y a long-temps que ie serois allé vous voir, si i'estois à moy, & si ie pouuois faire ma volonté, & suivre mes desirs..... Je n'auray jamais peut-estre le loisir de faire vne retraite, & auoir vn pen de repos. Helas, ie veux bien le bon plaisir de Dieu en tout; quand ce serois vne prison, ou maladie, ou martyre, ou tout l'état souffrant de Nostre Seigneur Iesus-Christ crucifié en ma personne! Ce qui est trop riche pour moy; puisque tel thresor n'est que pour les Saints.*

Dans vne autre Lettre il témoigne que la mort luy est indifferente, & mesme qu'elle luy seroit auantageuse. Il proteste neantmoins qu'il ne veut rien desirer, mais viure dans vn total abandon à la volonté de Dieu. Il estoit pour lors exposé au seruice du prochain dans la ville d'Aix infectée du mal contagieux. On luy auoit écrit de se conseruer soigneusement avec le Sieur N. qui s'estoit aussi exposé. Il fait donc réponse en cette sorte. Lettre 6. *Je vous recommande Monsieur N. l'ay grand peur qu'il ne prenne mal: ce que ie ne voudrais pas, pourueu*

que Dieu en fust content. Pour moy, quand ie serois mort il y a trente ou quarante ans, il en seroit mieux pour mon salut. Et il me semble aussi qu'il vaudroit mieux que ie mourusse maintenant, que d'attendre davantage : car au lieu de profiter, ie ne fais que perdre. Toutefois ie renonce à mon vouloir, & sentiment, & ie me mets entre les mains de Dieu, qu'il face de moy selon son bon plaisir, ie ne demande rien, sinon misericorde.

Ce grand desir qu'il auoit de ne suiure en toutes choses, que la volonté de Dieu, & n'agir que par elle, & pour elle, l'empeschoit de s'ingerer d'aucune chose, pour bonne & sainte qu'elle parust, à moins qu'il connust par le deuoir de l'obéissance ou de la Charité, qu'il y estoit appelé de Dieu. Et pour lors, renonçant à son sentiment propre, & à tout autre motif, il ne s'y portoit que pour le seul bon plaisir & contentement de Dieu. Ce mesme desir de faire en toutes choses la volonté de Dieu, & la crainte d'estre trompé, le rendoit grandement tardif en toutes ses entreprises pour mieux connoistre cette Diuine volonté ; Mais après l'auoir reconnuë, il estoit prompt, vigilant, & infatigable dans l'exécution pour fidellement accomplir cette mesme Diuine volonté.

Mais il retiroit encore d'autres auantages de cette pratique : car elle le faisoit agir en tout avec la simplicité de colombe, par laquelle euitant toute sorte de duplicité, de feintise, & de détour, il alloit purement & directement à Dieu, ne cherchant qu'à luy plaire, & à luy obeir. Elle luy donnoit aussi la prudence de serpent, & vne singuliere sagesse qui paroissoit en ses paroles, & en ses actions ; parce que estant dépoüillé des passions, & des interets des creatures, qui causent toutes nos imprudences, & nos folies, & estant ennemy de la prudence de la chair qui n'a que d'obscuritez, & de tenebres, il agissoit simplement dans la veüe, & par le mouement de la volonté de Dieu, qui est la source de toutes les pures lumieres, la regle de toute sagesse, & la sagesse mesme essentielle.

Sa conformité au bon plaisir de Dieu, le rendoit encore constant & inébranlable, contre toute sorte d'empeschement & de contradictions : parce que n'agissant que selon la volonté

Divinē , & ne regardant les œuvres , comme les œuvres de Dieu , & de la Sainte Vierge , il ne se soucioit d'aucune chose qui püst luy arriuer à son particulier ; pourueu que la vol'onté de Dieu , & de la Sainte Mere fust accomplie. C'estoit sa maxime ordinaire, ainsi que nous auons déjà remarqué. *Si ce que ie fais est de moy , il sera détruit ; mais s'il est de Dieu , & selon son bon plaisir , rien ne le pourra empescher. Dieu , & la Sainte Vierge se deffendront.* C'est de la sorte qu'il écrit en plusieurs de ses Lettres , & de la mesme façon qu'il parloit , & qu'il se comportoit dans les plus fascheuses rencontres. La seule volonté de Dieu estoit tout son refuge , tout son appuy , & toute sa force.

Ayant esté pourueu de la Cure de Brignoles , comme on luy eut suscité vn procez pour l'en dépoüiller , ses amis se plaignant à luy , & taschant de l'exciter à se plaindre aussi , & à se deffendre , il ne leur faisoit que cette réponse. *Il faut vouloir tout ce que Dieu veut , & demeurer en paix. I'ay accepté la Cure croyant que Dieu le vouloit : ie la quitteray encore plus volontiers , quand ie connoistray que ce sera le bon plaisir de Dieu.* Il fit vne réponse presque semblable à l'Archeuesque d'Aix touchant la Congregation des filles de Nostre-Dame de Misericorde. Car , comme le Prelat l'eut menacé de supprimer la Congregation , & employer à d'autres choses le Monastere qu'il auoit déjà fait bastir , il luy répondit de cette sorte qui montre sa resignation , & sa conformité au bon-plaisir de Dieu. *Monseigneur , vostre Grandeur fera ce qu'elle trouuerra bon : mais elle ne pourra faire que ce que Dieu veut ; & ie seray content , parce que ie ne desire que l'accomplissement de la Diuine volonté.*

Cette conformité au bon plaisir de Dieu , l'éleuant au dessus des euenemens de la vie , & des vicissitudes des choses perissables , le faisoit participer à l'équalité , & à l'immuabilité des Bien-heureux ; en telle sorte que , comme il ne se laissoit point abbatre par l'aduersité , il ne s'éleuoit aucunement par les succez fauorables. Il estoit le mesme dans les contradictions , & dans les applaudissemens : Quand ses desseins reussissoient avec auantage , ou quand ils estoient retardez par de fascheuses oppositions.

oppositions. C'est ce qu'il témoigne en sa Lettre 40. Qu'il écrit, lors que ses filles de Nostre Dame de Misericorde eurent fait leur premiere profession, & que leur Communauté eust esté erigée en vn Ordre Regulier. C'estoit la plus grande ioye, & la plus sensible satisfaction qu'il pust receuoir en sa vie; il écrit neantmoins qu'il n'en fut point émeu, & qu'il se trouua comme auparauant. Voicy ses termes.

Fille, benissez Dieu: veritablement tout est miracle. Je ne sçay nullement comment nos filles ont passé professes, & qu'elles ayent fait les vœux, & que cette pauvre Compagnie soit vne Religion. Je ne sçay que dire, mais ie suis tout estonné que ce que ie croyois impossible, encore que ie le desirasse de tout mon cœur, soit acheué... ie suis content sans contentement. Je suis bien aise imperceptiblement & sans ioye que ie la sçache. Il n'y a rien qui puisse me réjouir. Je croyois que, quand cela seroit, ie mourrois de contentement, & tous le croyoient aussi, & ie me trouue comme i'estois.

Il n'auoit pas moindre zele à recommander & faire pratiquer cette vertu de resignation, & de conformité au bon plaisir de Dieu. Il écrit à vne Religieuse, qu'il ne reconnoist point d'autre deuotion, que l'adhesion, & conformité au bon plaisir de Dieu, & que c'est à quoy elle se doit arrester par amour, & par pratique. En sa Lettre 1. Il écrit à la mesme qu'après auoir esté instruite durant plusieurs années dans les voyes de la perfection, il ne luy faut plus qu'une conformité au plaisir de Dieu, semblable à celle de Iesus-Christ sur la Croix. Vne autre personne luy ayant fait des plaintes de ce que son Confesseur luy auoit osté la frequente Communion; il la console, l'exhortant d'acquiescer paisiblement à tout, & ne desirer que l'accomplissement de la volonté de Dieu en elle. Il adjoûte dans la mesme Lettre que cette pratique de la volonté de Dieu, luy sera mille fois plus vtile que toutes les autres. C'est dans la Lettre 8. & dans la 12. Enfin non seulement il exhortoit tout le monde à faire la volonté de Dieu, s'employant de toutes ses forces pour ce mesme dessein: mais encore il proteste qu'il auroit voulu souffrir tous les maux de cette vie, & mesme ceux de l'Enfer; pour faire que la volonté

Dieu , fust parfaitement accomplie en toutes les creatures; & que toutes fussent selon son plaisir & contentement ; ainsi que nous auons remarqué dans le chapitre de son amour enuers Dieu ; & sur la fin du 26. Chapitre de la troisieme partie , ou est la priere qu'il faisoit chaque iour , & qu'il faisoit faire à ses filles de Nostre-Dame de Misericorde.

De sa desappropriation & dépouillement de toutes choses.

CHAPITRE XI.

VNE ame ne peut iamais estre parfaitement conforme à la volonté de Dieu , si elle n'est dépouillée de toutes choses : parce que Dieu veut estre seul dans elle , comme il est seul dans soy & dans ses perfections ; & il est impossible que la volonté humaine soit estroittement vnue à la Diuine , si elle n'est absolument desappropriée de tout ce qui n'est pas Dieu. C'est en ce sens que le fils de Dieu a dit , que l'on ne pouuoit pas seruir à deux ; & que celuy qui ne renonce à tout , ne peut pas estre son Disciple. Combien moins sera-t'il son amy , son enfant , & vn autre luy-mesme ? Toutes ces vertus se suivent : Conformité , indifference , renoncement , desappropriation. Ainsi que nous voyons en la personne de nostre Imitateur.

Il auoit tant d'amour pour la desappropriation , qu'il en a composé vn liure de conseils , où il n'y enseigne que le parfait dépouillement de toutes choses , pour se transformer en Iesus-Christ : il l'enseigne , dis ie , avec tant de force ; que son liure ayant esté mis és mains de quelques tres-pieux & tres-sçauans Docteurs , pour estre examiné , ceux-cy , n'y trouuerent rien qu'il ne leur parut tres-saint , si ce n'est qu'à leur aduis il proposoit vn dépouillement trop grand , & tel qu'ils le iugerent presque impossible. Mais tant s'en faut que le P. Yvan estant prié d'y apporter quelque moderation y voulut consentir ; qu'au contraire il appuya puissamment ; & confirma ces mesmes conseils touchant le parfait dépouillement , par l'autorité &

l'exemple de Iesus-Christ , & des plus grands Saints de l'Eglise , ainsi que le Lecteur pourra voir en diuerſes Lettres qu'il a écrites , & particulièrement dans la 47. & 48. Mais son dépouillement a encore mieux paru dans ſa pauureté volontaire, dans ſa vie cachée & mépriſée , dans ſes penitences & en pluſieurs actions particulieres ou il a donné d'illuſtres marques de cette vertu.

Vn de ſes amis luy ayant donné dans vne lettre, la qualité de Fondateur de l'Ordre de Noſtre-Dame de Miſericorde , qui eſtoit le plus illuſtre titre qu'il puſt receuoir, & celuy qu'il auoit acquis plus iuſtement ; luy donna occaſion de ſe faſcher. Car il ſe plaignit à luy de ce titre , & le rapportant par reconnoiſſance à la Sainte Vierge ; *Ne m'appellez pas , dit-il , Fondateur : car ce n'eſt que la Mere Dieu qui eſt la Fondatrice de noſtre Ordre.*

Il montra combien il eſtoit dépouillé de l'amour de la vie, lors qu'eſtant expoſé dans vne ville infectée du mal contagieux , comme ſes amis le preſſoient par lettres de ſe conſeruer avec ſoin , & de ſe ſeruir de quelque preſeruatif. Il leur fit cette belle réponſe. Lettre 14. *Puiſque Dieu m'a conſerué iuſques à maintenant ſans artiſice, ny remede, ny preſeruatif aucun ; ie paſſeray outre dans les mains de Dieu. Je luy ay déjà, dès long temps, & ſouuent donné ma vie, mort, maladie, &c. Je ſuis d'auis de ne faire aucune recepte pour viure dauantage, que les ordinaires que Dieu veut. Je vois que ie ne ſuis pas grand choſe pour la gloire de Dieu : au contraire ie perds, & cours danger de me perdre. Il m'eſt tout vn de mourir de la peſte, ou de quelqu'autre maladie. Il auoit déjà témoigné le meſme à de ſes amis qui luy offroient vne maiſon au champs pour s'y retirer, & éuitier le danger de la maladie contagieuſe. Car après les auoir remerciez. Il faut, dit-il. En ſa Lettre 6. *Que ie ne bouge iuſques au bout , on pour mourir , on pour viure. Grand dommage à l'Eglise de Dieu, quand le Pere Yvan ſeroit enterré, il y a cinquante ans. Seulement priez bien Dieu pour moy.**

Il eſtoit ſi deſaproprié de ſa Congregation des filles de la Miſericorde nonobſtant les ſoins , les peines & les trauaux qu'elle luy auoit confeſſé qu'il témoigne dans ſa Lettre 32. De

ne s'en soucier aucunement & de ne vouloir se mettre en peine d'aucunes chose, que de s'abandonner à Dieu, & remettre le tout entre ses mains. *Nos filles, dit-il, ne peuuent point estre Religieuses, que par le moyen d'une main forte..... Je ne m'en veux point mettre en peine..... Qu'auons nous à faire de denancer Dieu? Laissons luy faire, &c. D'autres meilleurs que vous & moy, auanceront cette affaire, &c. N'y pensons plus: Mais laissons le tout entre les mains de Dieu.*

Il fit voir la mesme desappropriation, quand on luy osta la conduite de ses filles, pour lesquelles il auoit tant travaillé, & tant souffert: car il acquiesça avec la douceur d'un agneau, si bien qu'au lieu de se plaindre, il témoigna qu'il en estoit bien aise, l'écriuant ainsi cordialement à vne de ses penitentes. Lettre 38. *Fille, Monseigneur l'Archeuesque, & d'autres ont trouué bon d'examiner toutes choses, & ont donné la conduite de nos filles aux Reuerends Peres Iesuites. Dequoy ie suis bien aise.* Il auoit auparauant témoigné vne semblable desappropriation, touchant la conduite d'un Monastere de Religieuses, dont il auoit le soin. Car comme son Confesseur, craignant qu'il n'y eust quelque attache, luy eust commandé de s'en demettre durant quelque temps; il obeït à l'heure mesme, sans aucune resistance, & avec autant de liberté, que s'il n'en eust iamais eu aucune connoissance. Quelque temps après, son Confesseur l'ayant trouué bon, il reprit avec la mesme liberté, la direction de ce mesme Conuent.

Nous auons déjà parlé diuerses fois du liure des Conseils de nostre Imitateur; il deuoit l'aymer tendrement, parce qu'il l'auoit pratiqué durant quarante ans; parce qu'il l'auoit écrit pour des personnes d'une haute vertu; & parce que Dieu auoit operé des merueilles pour l'autoriser, ainsi que nous dirons dans la derniere Partie. Cependant il en estoit si dépoüillé, qu'il sembloit n'y auoir aucune part. C'est ainsi qu'il en écrit dans la Lettre 47. Où après auoir parlé de la matiere de son liure à vne personne qui travailloit pour le faire imprimer. *Ne vous penez pas tant, luy dit-il, pour faire imprimer mon petit liure. Je ne me soucie gueres. Helas! ie voudrois bien auoir Misericorde, & estre en la bonne grace de Dieu.* Il confirme

le mesme sentiment dans la Lettre 58. Où après auoir dit que le Cardinal de Lyon, & l'Archeuesque d'Arles auoient fait beaucoup d'estat de son liure ; pour ma part, adjoûte il, *ie ne m'en soucie point. Il y a long-temps que ie m'en suis desapproprié, & que j'ay tout laissé entre les mains de Dieu. Je ne veux que Misericorde.*

Il se dépoüilloit mesme, & se desapproprioit de ses bonnes œuvres, en sorte qu'il estimoit vn sacrilege de s'en approprier quelque chose, & en presumer de la recompense. Lettre 48. *Quand ie me desapproprie de la jouissance de Dieu, & de toute consolation ; ie m'humilie, & ie me tiens en tres-bonne verité, indigne de cette jouissance, puisque ie ne la merite que par la mort, & par le sang de Nostre Seigneur, & par les œuvres faites en moy, par luy. Cum feceritis omnia, &c. Que ie m'approprie la jouissance de Dieu, qui n'est pas mienne, & que ie ne merite aucunement qu'en la Passion de mon Maistre : ce seroit vn sacrilege, comme le peché de Simon magus, & Lucifer, & de tous ses compagnons..... Et moy, ie m'approprieray la gloire & jouissance de Dieu, qui n'est pas mienne, & que ie ne merite pas ; au contraire ie merite la damnation, puisque ie suis criminel en mille façons ? O la grande superbe ! Humilions nous & reconnoissons que nous meritions la damnation de Lucifer, & non la jouissance de Dieu. Donc à terre, à terre, & desapproprions nous, tout Prestre & tout Religieux, qui n'est desapproprié de tout, est vn corps de fumier sans ame. Helas pauvres ! se croire deuant Dieu meriter quelque chose ; cela fait trembler les spirituels, & les personnes de graces deuant Dieu.*

Il finis ce Chapitre par vne correction qu'il fit à vne de ses penitentes, par laquelle il montre combien il aymoit le dépoüillement & la desappropriation. Cette penitente, ayant fait vne aumosne considerable à vn pauvre, en ressentit vne grande ioye qui luy continua quelque temps, sans qu'elle en donnast aucun témoignage exterieur. Le Pere Yvan en eut reuelation, & sans que la penitente luy en parlât ; Fille, luy dit-il, *n'avez-vous pas fait vne telle bonne œuvre ?* ouï, mon Pere, répondit la fille. *Allez,* repliqua le Pere, *vous n'avez rien fait qui vaille ; parce que vous ne vous estes pas dépoüillée*

de la ioye que vous en auez senti. La consolation, adjousta-t'il, que nous receuons dans la pratique des bonnes œuvres, tient lieu de payement, si nous ne sommes fideles à y renoncer. Filles, continua-t'il, faut vous dépouiller de vos bonnes œuvres, & vous en humilier grandement. Il faut chercher la satisfaction de Dieu, & non pas la vostre : & c'est une chose trop charnelle, & trop basse pour des ames delicates, & que l'Esprit de Dieu remplit ; de se complaire en la ioye des bonnes œuvres, ou en autre chose qu'en Dieu seul.

Combien il estoit deuot à la Mere de Dieu.

CHAPITRE XII.

L'AMOUR, & la deuotion du Pere Antoine Yvan envers la Sainte Vierge, a esté si grande, & si estenduë, qu'un seul Chapitre ne suffiroit pas pour rapporter tous les témoignage, qu'il en a donnez ; & il faudroit en composer un grand volume, pour décrire tout ce qu'il a dit, tout ce qu'il a fait, & tout ce qu'il a souffert à l'honneur de cette Auguste Reyne del'Vniuers.

Il commença de la choisir pour sa mere, & pour sa Maistresse, & de se consacrer à son seruice dès ses premieres années, lors que s'estant adressé à elle avec confiance, & luy ayant exposé ce qu'il desiroit, il receut l'accomplissement de sa priere. Dès ce temps-là, auquel il n'auoit encore atteint que la douzième année de sa vie, ou enuiron, il se voïa à cette Mere d'Amour, s'obligeant de s'employer toute sa vie à l'honorer, & la faire seruir. Sa fidelité a correspondu à ses promesses. Car il n'a depuis passé aucun iour de sa vie, qu'il ne luy ait donné des témoignages de ses respects, & de sa deuotion ; ou par des prietes, ou par des mortifications qu'il faisoit à son honneur, ou par des entretiens, & des lectures des mysteres de sa vie, ou par d'autres moyens que son zele, & son amour luy suggeroient.

Auant qu'il fust Prestre, il recitoit chaque iour le chapelet, ou le rosaire, ou le petit office de *Beata* & d'autres prieres à l'honneur de la Mere de Dieu avec tant de ferueur; que quand il n'auoit pas eu le loisir de s'y employer pendant le iour, il s'y appliquoit pendant la nuit, passant par fois la plus grande partie d'icelle, à reciter à l'honneur de la Sainte Vierge ses prieres accoustumées. La merueille consiste en ce qu'ayant eu cette deuotion dès son enfance, il a esté trouué plusieurs fois le matin, endormi sur la terre, son chapelet, ou l'Office de la Sainte Vierge en main; ce qui faisoit voir que ce deuot enfant, ayant beaucoup veillé pour satisfaire à sa deuotion; auoit esté surpris par le sommeil qui luy laissoit encore les marques de sa pieté.

Il ieûnoit à l'honneur de la Mere de Dieu tous les Samedis de l'année. Il honnoroit par des respects singuliers, & par de pieuses pratiques toutes ses festes d'obligation, & de deuotion témoignant vne grande ioye quand elles approchoient: ieûnant les veilles d'icelles, se confessant, & communiant à chacune, & tâchant de passer la plus grande partie du iour dans l'Eglise deuant les Autels consacrez à son honneur. Il visitoit tres-souuent les Eglises, & les Chapelles qui luy estoient dediées, & s'employoit avec ferueur à les balier, orner, & faire tout ce qui pouuoit seruir à leur decoration.

Son amour luy suggeroit encore d'autre moyens pour luy témoigner ses respects. L'on ne sçauroit dire combien il honnoroit, & aymoit ses images puisque, comme nous auons déjà remarqué, outre celles qu'il en auoit dans sa chambre, & qu'il portoit sur soy, il en peignoit & en grauoit des moules pour en distribuer aux autres, lors mesme qu'il estoit encore vn ieune écolier. Aussi auoit-il vne singuliere confiance enuers cette toute puissante Protectrice. C'est à elle qu'il s'adressoit dans tous ses besoins. C'est d'Elle qu'il esperoit toute sorte de secours; & son esperance n'ayant iamais esté confondue, c'est par elle qu'il receuoit toutes les graces, toutes les vertus, & tout ce que nous remarquons de considerable dans sa vie. Sa gratitude correspondoit à sa confiance: Car il ne pouuoit se lasser de raconter les obligations qu'il auoit aux

bontez de sa liberale & magnifique Maistresse : disant, qu'elle l'auoit fait tout ce qu'il estoit, qu'elle l'auoit appris à lire, & à écrire, qu'elle l'auoit fait estudier, & l'auoit déliuré de mille perils ; & qu'elle luy auoit obtenu la grace d'arriner à la dignité du Sacerdote.

Dés qu'il fut fait Prestre, comme il eut plus de connoissance des grandeurs, & des Bontez de la Mere de Misericorde, il eut aussi enuers elle vn plus grand amour, & s'efforça de luy rendre de plus grands seruices. Car outre qu'il continuoit les premiers, il en adjoûtoit de nouveaux. Pendant le temps qu'il demeura dans son hermitage, l'vn de ses emplois, estoit de reciter chaque iour diuerses prieres à l'honneur de la Vierge des Vierges. Il recitoit ordinairement le rosaire au tour de sa Chapelle, les yeux, & le cœur leué au Ciel, disant le *Pater* & l'*Aue* fort lentement & à diuerses reprises, afin de mieux mediter le sens des paroles, ou quelque vn des mysteres. Si bien que sa ferueur s'augmentant par tette meditation, le portoit à adjoûter dans l'Oraison Dominicale, des mots qui témoignoient l'ardeur de sa deuotion. *Pater noster qui est in Cælis*, disoit-il, *sanctificetur, adoretur, magnificetur, glorificetur, &c. nomen tuum.* Que vostre Nom soit sanctifié, adoré, exalté, glorifié, &c. Il prononçoit ces paroles avec tant de ferueur, que son visage mesme en paroissoit émeu, & ses gestes animez d'une telle sorte, qu'il eust esté capable d'inspirer le respect, & la deuotion au plus libertins.

Il chantoit chaque iour sur le soir les Litanies de Nostre-Dame dans sa petite Chapelle, avec des sentimens si tendres, que sa voix estoit souuent entrecouppée de diuers soupirs d'amour, & ses yeux noyez des larmes de sa pieté. Vn tres-vertueux Ecclesiastique qui s'arrestoît souuent pour luy répondre aux Litanies, assure dans la relation qu'il nous en a faite, qu'il estoit luy-mesme sensiblement touché des soupirs, des larmes, & des autres sortes de ferueur que nostre deuot Ecclesiastique exerçoit en chantant les loüanges de sa Diuine Maistresse.

Pendant le trauail, & en marchant, il disoit diuerses Oraisons iaculatoires à sa loüange, par diuers tons, & en diuerses langues.

langues. Il chantoit cette-cy en Italien : *Virgine santa, pigliate, pigliate, pigliate il mio cuore.* En François cette autre, Marie Mere de mon Roy , ie vous ayme plus que moy. En Prouençal cette-cy : Maire de Diou , iou siou plus vouestre que miou. Et en Latin : *Maria Mater gratia, Mater Misericordie, &c.* Il exprimoit son amour enuers la Mere de Dieu , en toutes les langues qu'il sçauoit ; pour témoigner qu'il desiroit la seruir en toute façon, & qu'il auroit bien voulu attirer à son seruice toute sorte de Peuples , & de personnes.

En effet en tous les lieux où il a demeuré, il a tâché par ses exemples , & par ses paroles d'y répandre le culte de la Sainte Vierge. Sa pratique ordinaire estoit d'exhorter ses penitens, premierement à aymer , & imiter Iesus-Christ , & après à aymer , & imiter sa Sainte Mere. Et pour les accoutumer insensiblement à s'adresser à cette Auguste Reyne avec confiance , il leur imposoit ordinairement pour penitence , des prieres , & autres pratiques de deuotion à son honneur. Il preschoit toutes les Festes dediées à sa memoire avec tant de zele , qu'il paroissoit par fois en estre transporté. Aussi preschoit-il pour lors plus longuement que de coûtume ; & sa deuotion luy fournissant tousiours de nouvelle matiere , à peine luy permettoit-elle de finir ses sermons. Il luy arriuoit le mesme dans les entretiens particuliers , quand on faisoit naistre l'occasion de parler de la Mere de Dieu. Il en disoit de si belles choses , & si touchantes , & il prenoit vn si grand plaisir d'en parler, & d'en ouïr parler ; qu'il ne pouuoit se lasser d'en poursuivre le discours , ou d'y estre attentif. Sa satisfaction estoit si grande , qu'il en auroit volontiers perdu le manger , & le dormir ; notamment lors qu'il rencontroit des personnes éclairées , & de grande vertu , qui correspondoient à sa deuotion , par la leur.

Sa pieté n'estoit pas moins singuliere à celebrer la Messe de *Beata*. Car il la disoit toutes les fois que les rubriques du Messel le permettent. Il ne chantoit presque iamais d'autre Messe votiuë , à moins qu'il en fust prié , & sollicité. Si bien que le Seigneur agreoit la deuotion de son seruiteur ; car il luy accordeoit liberalement ce qu'il luy demandoit , par l'appli-

M m m

cation de ces Messes là. D'où vient que nostre bon Prestre disoit souuent ces paroles : *Dieu fait des miracles continuels, quand ie luy offre le Sacrifice à l'honneur de sa Sainte Mere : car il m'accorde tousiours ce que ie luy demande pour moy ou pour les autres.* Aussi cette deuotion s'estoit si fort augmentée en luy, que pour la faire continuer mesme après sa mort, il a plusieurs fois témoigné desirer, qu'après son trépas, on chantast pour son ame des Messes de Nostre-Dame, au lieu des Messes des morts.

Son zele estoit égal à reciter, ou faire reciter le chapelet, ou le rosaire. Nous auons remarqué que dès son enfance il auoit accoustumé de le reciter chaque iour : Mais sur la fin de sa vie il en disoit plusieurs le mesme iour, & particulièrement quand sa veuë estant affoiblie, il ne pouuoit plus reciter son office : car pour lors il y suppleoit par le nombre des rosaires qu'il recitoit à la Sainte Vierge. Enfin sa deuotion croissant de plus en plus, quelques années auant son deceds, il adjoûtoit à l'*Aue Maria*, ces paroles de l'Eglise, *Maria Mater gratia, &c.* ainsi qu'il auoit fait adjoûter à ses Religieuses dans les Litanies de Nostre-Dame, ces eloges : *Mater Dei, Mater Misericordie, sanctissima Mater nostra.*

L'on ne scauroit dire les milliers des Chapelets, & des Rosaires qu'il a donnez gratuitement à diuerses personnes, pour leur en imprimer la deuotion. Il donnoit mesme le sien, quand il n'en auoit point d'autre ; & souuent mesme on le luy déroboit comme vne precieuse relique, en telle sorte qu'il fut contraint de recourir à cette singuliere inuention, ayant fait dix hoches sur le bois d'un Crucifix qu'il portoit sur soy, il s'en seruoit comme des grains d'un Chapelet. Ce n'est pas encore tout ; il donnoit de l'argent à de pauvres Religieuses pour leur faire dire le rosaire à son intention. Ainsi quelques années auant sa mort, il leur distribua cent liures, à la charge qu'elles reciteroient cent rosaires pour le repos de son ame, quand il seroit decédé.

Le zele de ce grand deuot de Marie alloit encore plus auant. Car il faisoit vne profession publique de seruiteur de cette grande Princesse ; & il vouloit bien que tout le monde le

ſceust ; puisque dans toutes ſes lettres il ſe ſignoit du Nom de ſa Maiſtreſſe , ſouſcriuant ainſi : *Antoine de Maria* , ou *Yvan de Maria* : de ſorte que ſi ſaint Paul ſe glorifie au commencement de ſes lettres , d'eſtre ſeruiteur de Ieſus Chriſt prenant ce titre : Paul ſeruiteur de Ieſus-Chriſt ; le Pere Yvan ſe glorifie à la fin des ſiennes , du titre de ſeruiteur , ou eſclave de la Mere de Ieſus Chriſt , empruntant ſon Nom , pour ſe qualifier entierement ſoumis à ſon pouvoir.

Mais ſa reconnoiſſance égaloit ſa ſoumiſſion : car il attribuoit à ſa Diuine Bien-faiètrice , tous les bons ſuccez des choſes qu'il entreprenoit. Ainſi en pluſieurs de ſes lettres , voulant declarer qu'il eſtoit venu à bout de ſes deſſeins , nonobſtant les oppoſitions , & les difficultez qui ſ'y eſtoient rencontrées ; *J'ay eu* , dit-il , *de terribles contradictions : mais la Sainte Vierge ſ'eſt bien deffendüe , & a emporté la victoire.* Il a voulu rapporter à la Mere de Dieu toute la gloire de la fondation de ſon Ordre : en effet pour le publier par des caracteres viſibles , & de longue durée , il a graué ſur vne pierre quarrée qui fait le coin de l'Eglise de ſes Religieuſes à Aix ; ces paroles : *La Sainte Vierge Mere de Miſericorde eſt la ſeule Fondatrice de cette Maiſon.* Il a voulu que ſon Ordre fut appellé de Noſtre-Dame de Miſericorde , parce que ç'a eſté à ſon honneur & pour la faire aymer , ſeruir & imiter par ſes Religieuſes , qu'il l'a inſtitué : en effet dans ſa lettre 68. il recommande à ſes filles de reconnoiſtre dans toutes leurs Maiſons la Sainte Vierge , pour leur Mere Superieure , & de luy rendre tous les honneurs que les bien-heureux Eſprits & tous les Saints luy ont rendu & rendent en Paradis : il leur enſeigne dans la meſme lettre pluſieurs pratiques , qui montrent ſon zele à faire aymer & imiter la Mere de Dieu.

L'on ne ſçauoit iamais rapporter tous les témoignages qu'il a donnez de ſa deuotion , & de ſon amour enuers cette incomparable Reyne. Il paſſoit pluſieurs heures à regarder fixement ſes images , & il y trouuoit tant de complaiſance , qu'il auoit peine à en détourner ſa veüe. Quand il ſ'entretenoit de ſes perfections , il paroiſſoit tout transporté ; ſes yeux deuenoient ardens , & ſon viſage rouge comme du feu. *O que ie*

voudrois bien, disoit-il par fois, *que la Mere de Dieu me coûtast la vie, & que ie puisse en perdre dix mille, si ie les auois, pour son seruice.* Il tâchoit d'imprimer aux autres cette ferueur. Car vn de ses disciples, qui, suivant son conseil, chantoit chaque iour les Litanies de Nostre-Dame, deuant vne de ses images placée sur la ruë dans le coin d'une maison; ce sien disciple, dis-je, luy ayant écrit que cette deuotion incommodoit sa santé, & luy causoit de fascheuses defluxions sur les yeux, luy demandant la permission de la laisser. *Gardez bien*, luy répondit-il, *d'interrompre cette deuotion : mais continuez-la, quelque incommodité que vous puissiez en recevoir. Ce seroit vn grand bon-heur pour vous, de perdre la veüe, & la vie pour le seruice de la Mere de Misericorde : mais ie ne vous croy pas assez saint, pour meriter vn si grand thresor.*

Vn iour la Superieure d'un de ses Conuents, luy ayant dit que le Pere N. auoit voulu luy persuader qu'il aymoit plus la Sainte Vierge, que tous les hommes du monde; *Que dites-vous, fille, repartit nostre fidele amant avec promptitude, & comme estant émeu; Vous dites que le Pere N. se glorifie d'aymer plus la Sainte Vierge que tous les hommes ensemble; Ne le croyez pas : Mon amour surpasse le sien. Et ie voudrois aymer cette aimable Mere d'amour plus que tous les Seraphins, & que tous les Esprits bien-heureux ne l'ayment, & ne l'aymeront durant l'éternité.* Et continuant de parler selon les transports de son cœur; *Cette belle, adjousta-t'il, & incomparable Marie, cette belle & aimable Mere de Dieu, comment ne l'aymeray-je pas de tout mon cœur, & de toute mon ame, après Iesus-Christ son fils? ayant receu de sa bonté tant de graces, tant de faueurs, & tant de protection. Tout passe par les mains de cette riche & conome de Paradis. Je luy dois plus que toutes les creatures. Aussi, ie la voudrois aymer moy seul plus que toutes les creatures ensemble.*

Je cherche, poursuiuoit-il, dans mon esprit, & dans les liures, quelque grand eloge pour l'honorer. Mais ie n'en trouue point de plus grand, ny de plus admirable que celui de Mere de Dieu. Ha, que cette Maternité est sureminente! Dieu ne peut rien faire de plus grand. Elle m'ébloüit, & ie m'y perds, com-

me dans un immense ocean. D'autres fois il protestoit qu'un des motifs pour lesquels il desiroit le Ciel, estoit le desir d'y voir, & y aymer la belle Marie Mere de Dieu. Je n'espere aussi, adjoûtoit-il, d'entrer dans le Paradis, que par ses intercessions, qui m'obtiendront la Misericorde du Pere eternal par les merites de Iesus-Christ son Fils. Je veux luy auoir cette obligation; & quand tous les Saints, & tous les Esprits bien-heureux voudroient s'employer pour me procurer la gloire eternelle; ie les refuserois, si la Sainte Vierge n'estoit avec eux: parce que c'est à elle, après Iesus-Christ, que ie veux estre redevable de mon salut. Ce sont des expressions de sa pieté, & de son amour envers la Mere de Dieu. Mais le plus illustre monument qu'il nous en ait donné, est l'Ordre qu'il a establi sous le titre de Nostre Dame de Misericorde; par lequel il continuë mesme après sa mort de rendre ses devoirs à cette Reyne des Cieux, en la personne de ses Religieuses, par les saintes instructions, & les bons exemples qu'il leur a laissez.

*Il est deuot aux Anges, & particulierement à
Saint Michel.*

CHAPITRE XIII.

LA deuotion aux Saints Anges est establie immédiatement après le culte de la Sainte Vierge, auant celuy de tous les autres Saints, tant de l'Ancien que du Nouveau Testament: puisque nous voyons que l'Eglise dans les Litanies, met après la Sainte Vierge, Saint Michel, & Saint Gabriel qu'elle fait le mesme dans la Confession generale, *Confiteor Deo, &c.* & qu'en toutes les autres prieres, offices, & ceremonies elle garde tousiours cét ordre, de ranger les Anges après la Mere de Dieu, auant tous les autres Saints. Dequoy on pourroit ce me semble donner cette raison; que les Anges estant les fils aînez de la Maison du Seigneur, & les hommes quelque sainteté qu'ils ayent, n'en estant que

les cadets ; il est bien iuste que les aînez occupent la premiere place. C'estoit la pratique du bon Pere Yvan : car après la deuotion de Nostre-Dame , il pratiquoit celle des Saints Anges , & particulièrement du grand Saint Michel , & de son Ange gardien

Il a déclaré plusieurs fois que Dieu luy auoit donné le grand Saint Michel pour son protecteur dans les pieux desseins qu'il entreprendroit , & pour son deffenseur dans les oppositions que les Demons , & les hommes susciteroient contre luy : ainsi il recouroit à luy avec confiance , comme à son appuy , & azyle ordinaire dans les combats que le Demon luy liuroit , & dans les persecutions qu'il enduroit du costé des hommes : de telle sorte qu'estant fortifié par l'assistance de ce glorieux Seraphin (ainsi qu'il l'appelloit) il venoit heureusement à bout de tous ses pieux desseins.

Il faisoit le mesme pour les personnes qui viuoient sous sa direction : Car lors que quelqu'une d'icelles estoit tourmentée par de dangereuses tentations ; après auoir employé les moyens ordinaires pour la secourir , son dernier & asseuré remede , estoit d'implorer l'assistance de ce prince du Paradis , luy faisant des prieres particulieres ; visitant les Chapelles qui luy estoient dediées ; celebrant la Messe à son honneur ; & s'appliquant à d'autres pieuses pratiques ; outre qu'il exhortoit les personnes tentées à faire le mesme , ou quelque chose de semblable. Enfin il receuoit le secours qu'il auoit demandé , de maniere que sa confiance n'estoit iamais confondue.

Mais il auoit particulièrement recours à ce Colonel de la milice du Ciel , lors que dirigeant des ames d'une voye extraordinaire qui auoient des extases , des reuelations , &c. il apprehendoit d'estre trompé par les illusions du Demon , ou par les fourberies de l'amour propre. Car pour lors il luy redoubloit ses prieres , & ses vœux , afin d'obtenir par son moyen les lumieres necessaires pour discerner les tromperies de Satan , & pour y resister. Je ne scaurois dire les auantages que cette pratique luy auoit apporté. Car ayant tousiours eu la direction de diuerfes ames d'un estat eminent , & hors du commun , il ne luy est iamais arriué d'auoir esté long-temps de-

ceux, dans leur conduite ; non pas même en celles qui auoient deceu plusieurs sçauans & habiles personnages ; qui depuis ont esté encore trompez, pour n'auoir suivi les sentimens de nostre éclairé Directeur. Il attribuoit cette grace & plusieurs autres semblables, aux intercessions de son bien-heureux Protecteur, en reconnoissance dequoy il s'est tousiours employé avec zele, pour le faire connoistre & honorer.

Pendant qu'il demouroit dans son hermitage, chaque iour après auoir chanté les Litanies de Nostre Dame, il chantoit aussi vne Antienne, & vne Oraison à l'honneur des Saints Anges, & faisoit d'autres prieres particulieres à Saint Michel, & à son Ange gardien. Il a trauaillé dans Cotignac, Brignoles, & ailleurs où il a exercé la charge de Curé, à repandre cette deuotion des Saints Anges ; y portant ses Parroissiens par les instructions, & par les exemples qu'il leur en donnoit.

Dés qu'il fut logé dans Aix en la Chapelle de Nostre Dame de Beauueser, après y auoir establi le culte de Nostre-Dame de Misericorde, il y procura aussi la deuotion de Saint Michel, & de l'Ange gardien ; ayant fait faire vn tableau, & dresser vn Autel à leur honneur, & obtenu des Indulgences pour les fideses qui visiteroient cette Chapelle le iour de la Feste de ces bien-heureux Esprits. Et afin de celebrer cette Feste avec plus grande solemnité dans sa Chapelle ; exposant le Saint Sacrement ce iour là, il y passoit la matinée à ouïr les confessions de ceux qui se presentoient ; l'apresdiné il preschoit les eloges des Saints Anges avec vn zele merueilleux, finissant la iournée par d'autres deuoirs qu'il leur rendoit.

Mais sa deuotion enuers Saint Michel a encore mieux paru dans l'institution de son Ordre des Religieuses de Nostre-Dame de Misericorde. Car ayant receu mille faueurs en s'y employant, par l'assistance de ce glorieux Archange ; il a voulu laisser des marques de sa reconnoissance, qui dureront autant que son Ordre subsistera. De façon qu'il a obligé ses Religieuses à le choisir pour le Patron vniuersel, après la Sainte Vierge, de tout l'Ordre en general ; & de chaque Monastere en particulier. Il les a encore obligées d'en celebrer la Feste avec toute la solemnité qu'elles pourront, en cette qualité de

Patron , & d'en faire memoite en leur Office durant toute l'année. De plus il leur a souuent témoigné qu'il desiroit qu'elles fissent bâtir dans toutes leurs Eglises , vne Chapelle à son honneur , quand elles pourront le faire commodement. Enfin il les a diuerses fois exhortées en general , & en particulier , d'auoir , enuers ce bien-heureux Esprit , vne tendre confiance , vn grand amour , & vn profond respect.

Il en parloit souuent dans ses entretiens particuliers , avec de grands sentimens de veneration ; racontant vne chose qui luy estoit arriüée , qui montre avec quel respect l'on doit parler de ces bien-heureuses Intelligences ; c'est à sçauoir , qu'estant vn iour en la compagnie de quelques pieuses personnes , comme entre diuers discours de deuotion , on parla du grand Saint Michel , il dit que c'estoit son saint , son deuot , son confident , & semblables paroles familiares ; & que quelque temps après s'estant mis en Oraison , Dieu luy fit vne correction si terrible , de n'auoir pas parlé avec assez de respect de ce glorieux Esprit , qu'il en pensa mourir de regret , & de confusion.

Cette deuotion de nostre bon Pere a continué iusques à sa mort , si bien que quelques iours avant son deceds , ayant oüi vne docte , & pieuse Predication dans la Chapelle de ses Religieuses de la Misericorde , à l'honneur du grand Saint Michel ; il en sentit vne si grande ioye , qu'il ne peut se contenir de la témoigner au Predicateur , & s'en conjoüissant avec luy , de le remercier des beaux , & doctes eloges qu'il auoit donnez à son illustre Protecteur. Il donna encores des marques de cette deuotion , dans le dernier discours qu'il eut avec la Superieures de son Monastere , vne demie-heure avant sa mort ; car entre diuers conseils de perfection qu'il luy donna , il l'entretint de la gloire , de la grandeur , & de la puissance de Saint Michel. Il se réjoüit dans l'esperance de le voir bien-tost dans le Ciel , & se joindre à luy pour la protection de son Institut ; & en dernier lieu il exhorta avec zele cette mesme Superieure d'estre bien deuote à ce glorieux Seraphin , & de faire exactement continuer dans toutes les maisons de son Ordre , les deuoirs qu'il auoit ordonnez à son honneur.

De

De sa deuotion à diuers Saints.

CHAPITRE XIV.

L'AVTEVR de l'Oraison Funebre de nostre Imitateur, a tres-bien remarqué, que l'vne de ses perfections consistoit en ce qu'il estoit vn vray Catholique, n'ayant iamais peu souffrir ce qui alloit au partage, ou à la diuision dans l'Eglise. Ce qui ne se doit pas entendre de sa foy seulement; mais encore de sa deuotion & de sa charité: parce que non seulement il croyoit tout ce que la Sainte Eglise croit; mais encore il aymoit, & approuuoit sans aucune faction, ny partialité, tout ce que la Sainte Eglise ayme, & approuue: de façon que comme l'Eglise embrasse le Clergé Seculier, & Regulier; les Parroisses, & les Communautéz des Religieux: Le Pere Yvan les aymoit aussi, & les reueroit egalelement.

Aussi semble-t'il que Dieu ait voulu luy faire éprouuer toute sorte de condition; afin que les connoissant, il fust egalelement porté enuers toutes: Car ayant commencé à seruir d'enfant de chœur dans la Parroisse de Rians, qui est serui par des Prestres seculiers, il continua cette fonction dans le Conuent des Religieux Minimes de Pourrieres; & l'ayant discontinué, il la reprit dans la Parroisse de Pertuis, qui est serui & par des Prestres seculiers, & par des Religieux Benedictins.

Si dés qu'il fut Prestre, il exerça la vie Apostolique dans la charge de Curé en diuers lieux: Dieu l'appella après, dans vn Hermitage pour luy faire imiter la retraite des Anacorettes; s'estant logé quelques annés après dans la Communauté des Peres de l'Oratoire; il a enfin acheué le cours de sa vie, dans vne chambre particuliere, en la conduite & ses Religieuses. Si bien que durant ces diuers changemens, & tout le temps de sa vie, il a egalelement témoigné d'amour, & de respect

pour toutes les conditions qui sont dans la Sainte Eglise, sans que l'on ait iamais reconneu en luy aucune faction, ou partialité ; ny aucun sentiment qui ne fust Catholique, conforme à la pratique de la Sainte Eglise, & éloigné de la diuision, & du schisme.

Cela a paru dans la deuotion qu'il a eüe à diuers Saints, Parce qu'il en a particulièrement aymé, de toute sorte d'estat, ordre, & condition. Et premierement il estoit grandement deuot à tous les Saints dont il est fait mention dans l'Escripture; c'est à sçauoir aux Patriarches, & aux Prophetes de l'Ancien Testament, aux Apostres & aux Disciples de l'Euangile. En effet il en parloit avec vn respect singulier, & avec tant de zele, que son visage paroissoit émeu, quand il proposoit leurs sentences, ou qu'il racontoit leurs belles actions. Ce qui procedoit sans doute de sa lecture continuelle de la Sainte Escripture ; Car comme il ne lisoit presque point d'autre liure ; cette lecture, luy imprimant les rares exemples de ces grands personnages, luy imprimoit aussi l'amour, & la deuotion.

Il reueroit particulièrement entre les Saints de la loy écrite, Moysé, & Elie ; le premier, à cause des merueilles de sa verge, sa penitence dans le desert, & sa communication familiere avec Dieu ; & le second, à cause de son zele ardent à procurer la gloire de Dieu, & de sa seuerité enuers les Pecheurs : aussi tenoit-il beaucoup de l'vn, & de l'autre. Entre les Apostres, il témoignoit auoir des tendresses particulieres enuers Saint Pierre, Saint Paul, & Saint Iean. Enuers Saint Pierre, à cause de sa grande foy, son grand amour, & sa longue penitence ; il aymoit tendrement Saint Paul, pour le regard de son zele enuers Iesus-Christ crucifié, & de ses travaux pour l'Eglise ; & il cherissoit Saint Iean, à cause, disoit-il, qu'il auoit esté tousiours fidele à Iesus-Christ, & la Sainte Vierge, n'ayant iamais abandonné ny l'vn, ny l'autre.

Il auoit encore vne deuotion singuliere pour toute la Sainte famille de Iesus-Christ, pour Saint Ioachim, Sainte Anne, Saint Ioseph, Saint Iean Baptiste, &c. Si bien qu'il faisoit des penitences extraordinaires les veilles de leurs Festes, &

s'arrestoit long temps à prier deuant leurs Autels : ce qu'il fit voir vn iour la veille de Saint Ioachim, ainsi que nous dirons dans la cinquième partie, au Chapitre de ses extases.

Sa deuotion s'estendoit encore à tous les Fondateurs des Ordres : C'est à sçauoir à Saint Basile, Saint Augustin, Saint Benoist, Saint Bernard, &c. Et notamment depuis qu'il eut entrepris la fondation de son Ordre de Nostre-Dame de Misericorde : Car estant pour lors vni de profession avec ces grands hommes, il s'vnissoit à eux par affection, & par ses prieres, pour obtenir par leur moyen la participation de leur grace, & de leur esprit. Ainsi il les auoit escripts dans le Catalogue de ses saints Patrons, & il recommandoit souuent à ses Religieuses de s'adresser à eux ; Il estoit deuot à tous les Saints Anachorettes, parce qu'il vouloit imiter leur vie, & particulièrement de Saint Anthoine, & de Saint Yvan dont il portoit les noms. Je laisse la deuotion qu'il auoit à Saint Charles Borromée, parce qu'il auoit trauaillé à reformer les Ecclesiastiques ; à quoy aussi il desiroit s'employer.

Mais la deuotion qui a plus paru en luy, a esté celle qu'il a eüe enuers Saint Philippe Neri ; car il prenoit vn singulier plaisir de l'appeller souuent en langue Italienne, *Il mio Padre Filippo*. De plus ne se contentant pas d'imiter les vertus interieures de ce grand Saint, il tâchoit encore de se conformer à son exterieur : de façon qu'il portoit sa soutane à la façon de celle avec laquelle on dépeint ce grand Saint. Et quand on luy faisoit le poil, il renoit son image entre ses mains, s'en seruant comme d'un miroir pour le mieux exprimer. Il a joint la deuotion enuers Saint Philippe Neri, à celle qu'il portoit à Saint Ignace de Loyola. Il ne pouuoit se lasser de louer cettuy-cy, de ce qu'il auoit eu tant de zele pour la gloire de Dieu dans l'établissement de sa Compagnie. Il le proposoit souuent dans ses conferances qu'il faisoit à des Ecclesiastiques, pour le leur faire imiter. La deuotion qu'il portoit à leur glorieux Pere s'étendant aux enfans, il auoit vne grande estime pour les Peres Iesuites, se confiant particulièrement à eux ; & les consultant en ce qui luy arriuoit de plus considerable.

Quelques iours auant sa mort estant interrogé par vne personne de condition , quel sentiment elle deuoit auoir des Peres Iesuites dans les disputes du temps , il répondit , que les Iesuites auoient bien fait jusques à present , qu'il croyoit qu'ils suiuiot le bon chemin , & que l'on pouuoit estre asseuré dans leur conduite.

Enfin il estoit singulierement deuot au grand S. Alexis , témoignant qu'il faisoit vn estat merueilleux de sa vie cachée , & de sa façon de mourir , dans l'abandon & le delaisement de toutes les creatures : si bien qu'estant prié diuerses fois de prescher le jour de sa Feste , il le fit avec grande joye & vne singuliere ferueur. Il auoit mesme témoigné plusieurs fois qu'il luy portoit enuie , touchant la maniere en laquelle il estoit mort ; & qu'il souhaitoit de tout son cœur de le pouuoir imiter : en quoy nous pouuons dire , que son desir a esté exaucé ; puis qu'il est mort subitement , estendu à terre , les mains jointes , & leuées au Ciel , (ainsi qu'on dépeint Saint Alexis ;) sans auoir peu receuoir aucun secours , ny soulagement de personne du monde.

*Combien il estoit charitable enuers les ames
du Purgatoire.*

CHAPITRE XV.

L'EGLISE triomphante du Ciel , celle qui souffre dans le Purgatoire , & celle qui combat sur la terre , n'estant qu'un mesme corps mystique sous Iesus-Christ qui en est le Chef : tous les fideles de chacune d'icelles doiuent estre vnis ensemble , par les liens d'une mutuelle charité. Ainsi nous deuons nous conjoindre avec les Bien-heureux , de la gloire qu'ils possèdent ; secourir nos freres , qui sont encore parmy les combats de cette vie ; & compatir à ceux qui supportent les rigueurs de la Iustice Diuine dans le Purgatoire. C'estoit la pratique du Pere Antoine Yvan. Car comme il estoit

grandement deuot aux Saints de Paradis, selon ce que nous en auons remarqué; il estoit zelé pour le salut des fideles de la terre; & il auoit vne charité singuliere pour procurer du soulagement aux ames du Purgatoire.

A cét effet outre qu'il appliquoit pour le repos de ces pauvres ames, la plus grande partie de ses jeûnes, & autres mortifications; outre qu'il leur appliquoit encore la pluspart de ces Messes, & que de plus il recitoit souuent l'Office des Morts, les sept pseaumes Penitentiaux, & semblables prieres vocales, que l'Eglise ordonne pour le soulagement des fideles trépassés, sa charité luy fit inuenter vne deuotion singuliere, & extraordinaire; d'autant plus satisfactoire, qu'elle estoit plus rude, & plus penible.

C'est que, pendant le temps qu'il a demeuré dans l'Hermitage de Rians, il alloit chaque soir à la minuit faire sa priere pour les morts dans le Cymetiere de la Parroisse, quoy qu'il fust notablement éloigné de son Hermitage, & le chemin tres-difficile; il y alloit dis-je, nu-pieds, nuë-teste chargé de sa cotte de maille & de ses chaînes de fer, & bien souuent il y prenoit la discipline jusques au sang; & cela en tout temps; sans que les changements des saisons, ny les injures de l'air pûsse le détourner de ce deuot, & charitable exercice.

Le Demon ne pouuant souffrir, cette deuotion extraordinaire de nostre feruant Solitaire, luy parut diuerses fois en chemin sous des formes horribles, excita des bruits épouuentables & de terribles orages, pour le détourner; mais comme il ne laissoit pas de continuer gourageusement l'exercice de la charité, cét ennemi eut recours à vne illusion effroyable, de laquelle toutefois, nostre genereux Prestre demeura victorieux. A peine estoit-il arriué au Cymetiere, que le Demon luy fit voir comme si tout le Cymetiere se remuast, & que tous les morts sortissent d'une façon horrible de leurs tombeaux. Les cheveux de nostre bon Prestre s'herifferent, tout son corps fremit; neantmoins demeurant ferme sans reculer, & animé par la foy, & la confiance qu'il auoit en Dieu, il se prosterna à terre, il implora le secours Diuin; il s'adressa particulièrement à la Sainte Vierge & au glorieux Saint Michel son Patron, iusques

à ce que tous ces fantômes ayant paru, il demeura calme & assuré.

Il continuoit dans Brignoles, & ailleurs cette pieuse coutume, d'aller prier Dieu dans les Cymetieres pour le soulagement des trépassés. Car outre les prieres qu'il y faisoit le jour, lors qu'il en auoit le loisir, il y alloit encore tres-souuent passer vne partie de la nuit : & cela luy arriuoit particulièrement quand il y estoit poussé par de secrets mouuements de l'Esprit de Dieu, ou sollicité par des apparitions des ames du Purgatoire, qui venoient implorer l'assistance de ses suffrages.

Vn jour vne femme, qui auoit esté retirée du peché par son moyen, & portée à la pratique des vertus Chrestiennes, vint après sa mort dans sa chambre luy faire connoistre par des bruits, par des soupirs, & semblables marques l'état pitoyable où elle estoit dans le Purgatoire. Il ne l'eut pas plutôt reconnuë, qu'il se mit à prier pour elle, à célébrer la Sainte Messe, donner des aumônes, faire des penitences, & autres choses pour son soulagement. Mais comme les bruits que l'on excitoit dans sa chambre continuerent encore quelque temps; enfin nostre charitable Prestre alla passer la nuit en prieres sur le tombeau de cette personne, & depuis il n'entendit plus aucun bruit, & il senti mesme vne tres grande joye de la deliurance de cette ame.

Les dernieres années de sa vie, estant dans vn Monastere de son Ordre de Nostre Dame de Misericorde, quelques Religieuses du mesme Ordre qui estoient decedées, & qui souffroient encore dans le Purgatoire, luy parurent les vnes après les autres; & avec elles plusieurs personnes qui auoient esté affectionnées à l'Ordre, & qui estoient aussi condamnées aux flammes du Purgatoire; luy demans avec tres grandes instances, & d'extraordinaires empressements qu'il priast pour elles, qu'il jeünast, & notamment qu'il celebrast la Sainte Messe; faisant connoistre qu'elles en receuoient vn soulagement singulier, & que c'estoit le plus efficace moyen de les secourir promptement. L'on ne scauroit dire la charité que ce charitable Pere a exercé enuers elles, & le soin qu'il prenoit pour contribuer à leur deliurance; car outre ce qu'il faisoit, & ce qu'il

souffroit luy-mesme à leur occasion, il excitoit toutes les personnes de pieté de sa connoissance, à cooperer au soulagement de ces ames captiues: ainsi que l'on pourra voir en diuerses lettres qu'il en écriuit pour lors, & que l'on fera imprimer au plûtoſt dans le ſecond volume de ſes Epistres.

Le Demon enuieux du bien qu'il procuroit à ces ames, ſe ſeruit de mille artifices pour l'en détourner. Car il excita des bruits épouuentables, parut ſous des formes horribles, vſa de menaces, & fit d'autres violences conformes à ſon orgueil, & à ſa cruauté: Mais bien loin que ce pieux Eccleſiaſtique relâchaſt des exercices de ſa charité: qu'au contraire il les augmenta, & continua d'encourager les autres personnes qui ſ'y employoient avec luy; juſques à ce que ces meſmes ames donnerent des marques ſenſibles de leur deliurance, & de leur gratitude enuers ceux qui auoient procurer leur repos: comme l'on verra vn iour amplement dans les Croniques de cét Inſtitut.

Sa deuotion à ſoulager ces heureuſes affligées, eſtoit ſi grande, qu'il y exhortoit tout le monde. Pour cét eſſet il nous a dit pluſieurs fois, qu'il approuuoit grandement la pratique de certains Curez de ſon temps; qui eſtant menacez de la greſſe, de la foudre, ou de quelque autre tempeſte, couroient aux Cymetieres, & y chantoient avec deuotion, les prieres que l'Egliſe ordonne dans le rituel pour les trépaſſez, afin d'eſtre guarantis du danger qu'ils apprehendoient. Il adjoûtoit que cette deuotion eſtoit tres-agreable à Dieu, & tres-efficace; que les morts prient pour les viuans, en meſme temps que les viuans prient pour les morts; & que Dieu oûtroie à ceux-là, l'eſſet de leur demande, en recompence de leur charitable ſecours enuers ceux cy.

Auſſi auoit il éprouué en ſa perſonne ce qu'il conſeilloit aux autres: car c'eſtoit ſa coûtume de celebrer des Meſſes pour les morts, & de leur rendre d'autres pieux offices, quand il auoit quelque grande grace à demander; & toutes les fois qu'il entreprenoit quelque affaire de grande importance. Ainſi vn iour cherchant vne maiſon propre pour vn Monaſtere de ſon Ordre, & en ayant trouué vne conuenable à ſon deſſein;

comme il preuit qu'il auroit de la peine à l'obtenir, il voila de dire deux trentenaires de Messes pour les ames de Purgatoire. Chose admirable! Le mesme iour qu'il fit ce vœu, le maistre de la maison, la luy liura à vn prix fort raisonnable, contre l'attente de tout le monde.

De son zele.

CHAPITRE XVI.

I'AY déjà dit quelque chose du zele de nostre Imitateur, lors que j'ay traité de sa façon de prescher: J'ay remarqué qu'il preschoit avec vne ferueur extraordinaire, criant sans cesse contre les vices, & s'épuisant pour la conuersion de ses auditeurs. Il estoit vn Elie en chaire, rempli de feu & de flamme; vn Iean Baptiste dans le desert, ne preschant que le Baptisme de la Penitence; & vn Saint Paul dans la Synagogue, où il annonçoit avec des transports, les denoirs des fideles enuers Iesus-Christ. On pouuoit avec raison l'appeller vn enfant de tonnerre, parce qu'il tonnoit sans cesse, & fulminoit les arrests de la Iustice Diuine; & sa langue pouuoit estre comparée à la Verge de Moïse: veu que frappant sur les cœurs rebelles à la grace, elle les ramolissoit, & en faisoit réjaillir les eaux de la contrition.

Comme il preschoit les veritez de l'Euangile à tout le monde sans flater & sans respect humain; & que souuent par ses inuectiues contre le vice, il faisoit rougir ses Auditeurs, on l'auoit menacé plusieurs fois de le mal-traiter, s'il ne moderait l'ardeur de son zele: mais il ne laissoit pas de continuer. Si bien qu'un iour estant interrogé par quelques-vns, touchant la liberté dont il vsoit en ses predications, il fit cette belle, & genereuse réponce: *Qu'il ne preschoit contre le vice qu'en general, ainsi que Dieu l'ordonne dans l'Escripture; que si quelques-vns se plaignoient de son zele, il y en auoit plusieurs qui en receuoient de grands profits; qu'il esperoit que ceux-là mesme*
qui

qui en faisoient des plaintes , en profiteroient un iour , & luy sçauroient bon gré d'auoir expliqué naïfvement les maximes de l'Euangile ; qu'au reste il ne cherchoit que le salut des ames ; & que ce luy seroit vne grande misericorde de souffrir quelque peine , en confusion pour ce sujet là ; mais qu'il s'estimoit indigne d'un si grand bien.

Il repetoit presque dans tous ses sermons , ces paroles avec vn ton de voix qui témoignoît sa ferueur. *Nous mourrons bien-tost , & nous ne pensons pas à faire penitence de nos pechez. Nous auons la mort dans le sein , nous sommes continuellement en danger de la damnation eternelle , & nous auons le courage d'offencer Dieu. Tu sçais bien , ô pecheur , & tu le sçais assurement que tu as fait beaucoup de pechez , & que tu as irrité la colere de Dieu ; & qui est ce qui t'a assuré que Dieu t'a pardonné , & que sa iustice n'est plus irritée contre toy ? Tu es certain d'auoir mérité la damnation eternelle , & tu n'es pas certain que Dieu t'ait déchargé de cette damnation ; tu es donc tousiours dans l'incertitude de ton salut : & cependant , misérable , tu ne trembles pas ; & au lieu de pleurer & de faire vne rigoureuse penitence , tu ne penses qu'à rire , & à te divertir ? La iustice Diuine n'a pas espargné Iesus-Christ , parce qu'il s'estoit chargé de nos pechez , encore qu'il fust innocent : & tu crois qu'elle t'épargnera après tant de crimes que tu as commis ? ô auenglement ! ô scandale ! Les iustes tremblent , & à peine seront sauuez. Les Anges , & les Seraphins tremoussent deuant la Diuine Majesté : & les pecheurs ne craignent pas ; & des vers de terre , des criminels & n'apprehendent pas ! O que la iustice Diuine est terrible ! ô que la rigueur de ses iugemens est épouuantable ! C'est vn échantillon des refrains de nostre zelé Predicateur dans tous ses sermons.*

Quand il oyoit parler des conuersions , & des fruiçts merueilleux que les Peres de la Compagnie de Iesus , & autres font dans les païs infideles , ou ailleurs , il en tressailloit de ioye ; il en parloit avec vne singuliere satisfaction , & il en remercioit Dieu par des sentimens d'vne parfaite reconnoissance. Au contraire quand on luy racontoit les desordres que les Turcs , les heretiques , & les libertins causent contre l'Eglise , au pre-

judice des ames; il en palmoit presque de douleur, demeurant par fois interdit par l'excez du regret que la perte des ames luy faisoit ressentir. Après il s'en plaignoit avec des paroles, & des gestes si touchans, qu'il auroit esté capable d'émouuoir les plus endurcis; témoignant estre disposé à souffrir mille martyres, pour empescher que les hommes ne fissent point d'offence contre Dieu, & que par ce moyen, ils ne perdissent leurs ames si cheres, & si pretieuses à Iesus-Christ.

Ce grand zele du salut des ames, le pressoit si fort, qu'il témoignoit se repentir d'auoir demeuré plusieurs années dans vn Hermitage, à ne trauailler qu'à son auancement particulier; regrettant ces années là comme perduës, parce qu'il ne les auoit employées à procurer le salut du prochain. Le mesme zele le portoit à se plaindre sur ses vieux ans, de ce qu'ayant fait de trop rigoureuses penitences en sa jeunesse, il ne luy restoit pas des forces pour prescher, ou faire des Catechismes. Il disoit encore, qu'il portoit enuie aux jeunes Ecclesiastiques, qui pouuoient faire des missions, & aller de lieu, en lieu gagner des ames à Iesus-Christ. Aussi les y exhortoit-il avec ferueur, assurant ques'il eust esté de leur âge, il n'auroit choisi que cét employ là.

Or comme il auoit vn zele ardent pour la conuersion des pecheurs, il n'en auoit pas moins pour l'auancement des ames deuotes. Ainsi son affliction estoit extrême, quand il apprenoit le relaschement de quelque personne de grande vertu. Il auoit vne si haute estime d'vne ame fidele, & qu'il croyoit estre selon le cœur de Dieu, qu'il disoit qu'elle valoit tout vn mondes, & que Dieu en fait plus d'estat, que d'vn million d'autres ames imparfaites. *J'irois volontiers, adjoûtoit-il, aux extrémités de la terre, pour en trouuer vne, si ie sçauois qu'il y en eust. Et il n'y a ny peine, ny soin, ny perte, ny suplice que ie n'acceptasse de tout mon cœur, pour contribuer à la perseuerance, & à l'auancement d'vne telle ame.*

De là procedoit la grande exactitude, dont il vsoit, en reprenant les moindres defauts des personnes deuotes qui estoient sous sa conduite. Car les fautes de ces personnes-là, luy estoient des martyres, & comme des glaiues qui perfoient

son ame de mille regrets. C'est ainsi qu'il en écrit à vne Religieuse : à laquelle après auoir raconté quelques faueurs que la Sainte Vierge auoit departies à quelques filles qu'il dirigeoit, il finit sa lettre par ces paroles. *Au nom de Dieu, ma fille, priez pour moy. Car quand ie ne vois toutes mes filles saintes comme des Anges, après les graces qu'elles ont receues, ie n'ay point de patience.* Dans vne autre lettre il témoigne de ne vouloir souffrir sous sa direction les ames lasches, qui après auoir quitté le peché, ne trauaillent fidelement & diligemment à acquerir la perfection. Il écrit encore à vne de ses penitentes, *que si elle ne trauaille solidement à deuenir parfaite dans l'imitation de Iesus-Christ, elle ne luy plaira pas, & il la laissera, comme ne se souciant nullement d'elle, ny de ses semblables.*

Vn iour estant interrogé par vne vertueuse fille, si Dieu estoit parfaitement aymé de ses creatures ? *O fille, s'écria t'il, eusse-je perdu mille fois la vie, & que tout le monde aymast Dieu. Mais cela n'est pas : cela n'est pas. Non, toutes les creatures n'ayment pas Dieu, repartit il, par diuerses fois avec de tres. grands sentimens, Tous ne le connoissent pas, & ne voyent pas des yeux de la foy, ce que sa Diuine Majesté a fait pour eux. O quel dommage, ô quel malheur ! de viure sans aimer Dieu, & sans reconnoistre ses grandes misericordes. Cela fait mourir. Ayez-le donc bien, ma fille, pour tous ceux qui ne l'ayment pas, & demandez luy souuent pardon pour moy, & pour tous.*

Il s'estoit exposé trois fois au seruice du prochain pendant la peste, ainsi que nous auons remarqué ailleurs ; donnant chaque fois de tres. illustres témoignages de son zele ardent à procurer le salut des ames. L'Esprit de Dieu l'auoit souuent poussé à visiter des personnes qui après auoir commis des crimes enormes, differoient plusieurs années de s'en confesser. Il les visitoit, les exhortant avec ferueur à se conuertir, faisant mesme des prieres particulieres, & de rudes penitences à leur occasion. Il reussissoit quelquesfois heureusement ; souuent il n'en receuoit que des affronts, des menaces, & des confusions : Mais il ne laissoit pas de continuer, quand il y estoit porté par les mouuemens du Saint Esprit.


Il assistoit quelquefois les criminels qui estoient conduits au suplice : s'acquittant si bien de cét employ , que l'on auoit recours à luy , quand il y auoit quelque obstiné à conuertir. En effet comme vn iour les Confesseurs ordinaires , nepouuoient rien auancer , pour adoucir l'esprit d'un mal-faïcteur , qui après auoir ouï lire sa condamnation , vomissoit mille blasphèmes contre Dieu , & mille imprecations contre ses Iuges , on appella le Pere Yvan , qui après auoir inutilement combattu par quelques pressans discours , l'opiniaistreté de ce miserable , s'offrit de mourir pour luy ; afin de le tirer du danger de la damnation , qui luy paroissoit infailible dans son impatience , il s'offrit , dis-je , avec tant de naïueté & de zele , que le Criminel en estant émeu rentra dans soy , aduoüa ses crimes , detesta son obstination , demanda pardon à tout le monde , se confessa , & mourut Chrestienement.

Il estoit vn iour au parloir de ses Religieuses , occuppé en affaires de tres grande importance , lors que l'Esprit de Dieu luy ayant fait connoistre , qu'une Dame de ses penitentes s'approchoit de l'agonie , sans qu'elle eust aucune personne auprès d'elle , qui la pust assister , il y courut à l'heure mesme , quittant sans dire mot , les personnes qui estoient avec luy. Comme il entroit dans la maison de cette Dame , il trouua dans la sale plusieurs personnes , qui s'entretenoient de diuerses choses , sans prendre garde au peril où la malade estoit. Sa ferueur éclattant en cette rencontre : *N'avez-vous pas honte , leur dit-il , de vous amuser à des discours inutiles , pendant que la pauvre malade se meurt sans aucun secours ?* A ces mots tout le monde effrayé , entre avec luy dans la chambre de la malade , & trouuent qu'elle entroit déjà dans l'agonie. Elle eut neantmoins encore assez de force , pour receuoir les dernieres instructions du Pere Yvan : ce qui donna de l'exercice à ce zelé Confesseur , qui ne cessa de l'exhorter , & l'encourager , & de prier Dieu pour elle , iusques à ce qu'elle eust expiré.

Vn iour après auoir chanté la Sainte Messe , il fut saisi d'un grand regret , touchant le mauuais estat dans lequel vne certaine ame se trouuoit. Comme il pensoit , qu'est-ce qu'il deuoit faire pour cette ame , qu'il ne connoissoit pas encore ; on

le pressa d'aller disner, à cause qu'il estoit fort tard : Il fit vne réponse semblable à celle de Iesus-Christ à ses Apostres, *que sa viande consistoit à faire la volonté du Pere eternal.* En mesme temps voicy venit à luy vn pauvre homme vieil, & sourd qui ne s'estoit confessé depuis plus de dix ans. Le Pere Yvan, reconnoissant d'abord que c'estoit la personne, pour qui Dieu luy auoit donné de si grands regrets, l'accueillit avec grande charité ; & l'ayant mené dans la Sacristie, pour luy parler à haute voix sans estre entendu des autres, il luy fit faire vne entiere confession de toute sa vie, luy donna vne bonne aumône, & il le renuoya après l'auoir exhorté de se preparer à la mort ; qui luy arriua deux ou trois iours après.

Il semble que le iour n'estoit pas suffisant, pour exercer le zele de nostre feruent Imitateur ; il s'y employoit mesme pendant la nuit. Vn soir allant visiter des malades, & porter des aumônes secretes à de pauvres honteux, il rencontra vno troupe de jeunes hommes, qui sortant de la debauche, pretendoient aller en de mauuais lieux. Dès qu'ils l'apperceurent, s'approchant de luy, ils luy demanderent où est-ce qu'il alloit si tard ? *Mes enfans*, leur répondit-il, *j'allois voir des malades.* Mais ayant conneu le mal que vous vouliez faire cette nuit, ie suis venu icy pour vous en détourner, & vous conduire dans vos maisons. *Je vous conjure de vous retirer, de peur qu'il ne vous arriue quelque grand malheur.* Le respect qu'ils auoient pour luy, leur fit aduoüer leur mauuais dessein, & condescendre à ses prieres. Ainsi ils se separerent : en telle sorte que le Pere Yvan conduisit les plus debauchez, iusques dans leurs maisons.



Sa charité enuers les Pauures.

CHAPITRE XVII.

LA vie de nostre Imitateur n'a esté qu'un exercice continuél de charité enuers les pauures , ainsi que j'ay fait voir en chaque partie de son Histoire ; en la premiere , que dès l'âge de sept à huit ans il donnoit aux pauures iusques à ses habits ; dans la seconde , qu'estant à Cotignac , & depuis à Brignole , il a esté le pere des pauures , leur departant charitablement , tout ce qu'il auoit ; & en la troisiéme que s'estant establi dans Aix , son premier employ fut le soin des pauures malades , & des pauures honteux ; qu'il entreprit de Catechiser & prescher familièrement en langue vulgaire pour les pauures , & qu'il a continué le reste de sa vie à travailler pour le soulagement des pauures. Je n'adjousteray en ce Chapitre , que quelques remarques des vertus , & des graces , qui accompagnoient ses charitez.

En premier lieu , encore qu'il fist la charité avec grande profusion : neantmoins il vloit de prudence , & de discernement ; obseruant le temps le plus propre , & les personnes plus necessiteuses. Ainsi il faisoit particulièrement ses aumônes pendant l'hyuer , lors que les pauures ne pouuant travailler pour gagner leur vie , ont un plus grand besoin d'estre secourus. Il les faisoit assembler chaque iour au matin à la porte de son Eglise ; là il les Catechisoit , les faisoit prier Dieu , & après il leur faisoit vne aumône considerable , donnant au double aux personnes vieilles , & aux infirmes. L'affluance des pauures qui accouroient à luy , estoit si grande , que le nombre en estoit par fois de plus de deux cents ; en telle sorte que tout le monde s'étonnoit de voir qu'un pauvre Prestre , qui n'auoit pas cinquante écus de reuenue , pust faire tant d'aumônes , & les continuer si long temps.

Secondement il obseruoit exactement le conseil du Fils de

Dieu, de donner l'aumône en secret. Car il faisoit ordinairement ses charitez le matin avant le iour, ou le soir fort tard, lors qu'il ne pouuoit facilement estre apperceu. Et quand il estoit contraint de faire l'aumône de iour, & publiquement; dès qu'il l'auoit faite, il se retiroit, & s'alloit enfermer dans sa chambre, ou ailleurs, de peur d'en receuoir des remerciemens, ou des loüanges. Dequoy voicy des exemples.

Il y auoit dans Aix vne vertueuse femme, qui faisoit chez soy les boüillons des pauures malades : Nostre Imitateur la visitoit souuent, pour s'informer d'elle, du nombre, & de l'état des pauures, & pour l'encourager à continuer ses soins en leur endroit. Pendant qu'elle luy répondoit, ce charitable Prestre luy mettoit dans la main des écus, & autres pieces d'argent, sans luy dire mot; & aussi tost après luy tournant le dos, il se retiroit. Souuent il arriuoit que cette bonne femme, ayant à parler à luy, l'appelloit, & le pressoit de reuenir à elle, ou de s'arrester; mais faisant semblant de ne la pas oïr, il continuoit son chemin avec tant de vitesse, qu'il sembloit s'enfuir, comme s'il eust esté poursuui par quelque voleur. Il est vray qu'il apprehendoit la vanité, & la complaisance propre; qui est vn des plus dangereux, & des plus subtils voleurs de la vie spirituelle.

Vne autrefois se doutant de l'indigence d'un bon Religieux, il luy demanda s'il auoit besoin de quelque chose. Le Religieux luy aduoüa qu'il auroit bien voulu vn Breuiare, & vne paire de sandales, dont il auoit tres-grand besoin. Le Pere Yvan luy ayant acheté ces choses-là, le visita dans sa chambre, & luy laissa son present avec tant d'adresse, que le Religieux ne s'en apperceut pas. Il luy mit encores vne piece d'or dans la main; après quoy, il se retira sans mot dire, & sans vouloir écouter le Religieux qui courant après luy, l'appella par diuerses fois pour le remercier.

C'estoit la coustume de nostre prudent Ecclesiastique de s'enfuir, toutes les fois qu'il faisoit l'aumône; en sorte que quand on la luy demandoit deuant plusieurs, il faisoit semblant de la refuser: mais en mesme temps faisant signe au pauvre de s'approcher, il la luy donnoit par derriere, luy tournant le dos,

comme s'il eust voulu le rebuter ; en vñant particulièrement de la sorte, enuers ceux qu'il connoissoit honteux. Car quand il les rencontroit, s'approchant d'eux, comme s'il eust eu quelque affaire à leur communiquer, il leur donnoit secretement l'aumône, sans qu'ils la luy demandassent, & sans que personne du monde s'en pust appercevoir.

L'on a particulièrement fait cette remarque en luy, pendant son dernier séjour dans Auignon. Ou entre plusieurs honteux qui s'adressoient à luy, il y auoit vne femme qui conduisant vne sienne fille aueugle, le venoit trouuer chaque iour après la Messe, comme ayant à l'entretenir de quelque affaire. Le Père Yvan s'approchoit d'elle, feignant de vouloir l'écouter, ou luy parler ; mais c'estoit pour luy donner quelque piece d'argent : Ce qu'il faisoit avec tant de subtilité, qu'à peine pouuoit-il estre apperceu de ceux qui estoient à sa compagnie, non pas mesme de ceux qui obseruoient ses actions pour les imiter.

La troisiéme vertu qui accompagnoit sa charité, estoit la ioye qu'il auoit en l'exerçant. Dieu ayme, dit Saint Paul, celui qui donne avec ioye. Le P. Yvan donnoit avec grande allegresse, témoignant vne ioye singuliere, quand on luy fournissoit de quoy soulager la misere des pauvres. Ainsi ayant vn iour receu d'vne pieuse personne quelque somme d'argent, pour ses besoins particuliers, il eut tant de ioye, de ce que cét argent luy donnoit le moyen de secourir les pauvres, qu'il ne peut pas se contenir de dire ces parole : *Benit soit Dieu ! Vaicy de l'argent pour les pauvres. Il y en anra bien pour les réjoïir.* En effet il le distribua aussi-tost avec plus de satisfaction, qu'il n'en auoit eu en le receuant.

Il auoit cette sainte pratique de distribuer aux pauvres, ce qu'on luy donnoit pour luy-mesme. Il receuoit les aumônes que les personnes charitables luy offroient, parce qu'il faisoit profession d'estre vn pauvre Prestre. Mais ayant d'ailleurs de quoy viure, il restituoit aux pauvres ce qu'il auoit receu, comme vn bien qu'il croyoit leur appartenir. Ainsi pendant la derniere peste de la ville d'Aix, estant allé à la conferance de santé, il receut vne paire de souliers qu'vne personne de vertu luy

luy auoit acheté. Il en offrit l'argent à la mesme personne : mais ayant esté refusé , il le donna à vn Religieux qui estoit venu faire la queste en ce lieu-là. Les peres ne témoignent pas plus d'amour à leurs propres enfans , que le Pere Yvan en faisoit paroistre enuers les pauvres. Aussi ne l'appelloient-ils que du nom de nostre bon Pere , quand ils le saluoient , ou quand ils s'adressoient à luy. Si bien que lors qu'il estoit absent de la ville , les pauvres s'adressant à celuy qui tenoit la place ; *Quand est-ce , disoient-ils , que nostre bon Pere viendra ? Helas quand est-ce que nous verrons ce bon Pere ! Dieu le face viure , & nous le renuoye en santé.*

Je passe à la derniere remarque que l'on doit faire sur sa charité enuers les pauvres ; c'est à sçauoir que l'Esprit Diuin luy reueloit tres-souuent l'indigence des personnes honteuses , qui n'osoient se decouurir , & le portoit à les assister secretement. Pendant la derniere peste de la ville d'Aix , vn pauvre Religieux n'osant demeurer dans son Couuent , à cause des pestiferrez qui y estoient , souffroit la derniere misere , estant mesme en danger de mourir de faim ; lors que le Pere Yvan l'ayant rencontré , & connoissant son extrême besoin ; luy donna vn écu d'or dans vn morceau de papier. Le Religieux croyant que ce fust vne image , ou quelque'autre present de deuotion , le receut avec respect. Mais ayant trouué que c'estoit vne piece d'or , il remercia Dieu d'auoir reuelé au bon Pere Yvan son extrême besoin , & de l'auoir excité à le secourir d'une si obligeante maniere.

Vn autre iour nôtre aumônier estant pressé de dîner , conneut interieurement que quelque pauvre deuoit venir à luy : cela l'obligea à differer son repas. Et en mesme temps voila arriuer vne pauvre Dame de condition , qui estant reduite à vne extrême necessité , se mouroit presque de faim , n'ayant rien mangé de quelques iours ; le Pere Yvan luy bailla son dîné avec plus de ioye que s'il l'eust mangé luy-mesme , & de plus il luy donna vne piece d'argent. Vn autre fois la mesme Dame ayant besoin de sept , ou huiët liures pour les frais d'un procez , n'osoit declarer sa necessité à personne du monde. Le Pere Yvan le connut , & sans dire vn seul mot à la Dame , il luy mit dans la

main, la somme dont elle auoit besoin, & après il s'enfuit sans qu'elle pust l'arrester pour luy faire ses remerciemens.

Il y auoit dans Aix vn homme de condition qui mourant de faim, n'osoit declarer sa misere à aucun, pour ne faire de la honte à ses parens, qui estoient tres considerables. Le Pere Yvan le conneut par reuelation : & ainsi rencontrant ce Gentil-homme, il luy donna vne pistole sans luy rien dire. Cét acte de generosité ayant fait connoistre à ce noble hon-teux, la confiance qu'il deuoit auoir à son bien-faïcteur, le porta à luy decouurir sincerement ses miseres : ce qui obligea aussi nostre aumônier de luy continuer son secours.

Vne autre fois allant par les ruës, il se sentit fort pressé d'entrer dans vne grande maison : ayant obey à ce mouuement, il connut bien-tost que c'estoit vne inspiration du Seigneur. Car il trouua dans cette maison vne Demoyelle, avec cinq ou six enfans qui mouroient de faim, la mere n'osant sortir pour pouuoir aux necessitez de sa famille, parce qu'elle n'auoit qu'une juppe qui estoit toute déchirée. Le Pere Yvan la consola, luy donna vne aumône considerable, & en mesme temps il alla luy chercher vne juppe, qu'il luy apporta luy-mesme avec vne ioye singuliere.

Cét amour de nostre charitable Prestre enuers les pauvres, a perseueré en luy toute sa vie, puisque l'on en a trouué des marques, mesme après sa mort. En effet les Religieuses ayant après son trépas ouuert vne cassette qui luy appartenoit, y trouuerent quelque argent, avec vn billet écrit de sa main, qui faisoit voir sa bonne volonté enuers les pauvres : car il contenoit ces paroles. *Cét argent m'a esté donné par vn grand Seigneur pour en faire des charitez. Ne manquez pas de le distribuer aux pauvres aussi tost après ma mort.* Par ce grand Seigneur, il entendoit le Seigneur des Seigneurs, duquel toutes choses prouiennent ; d'autant que cet argent estoit vn fruit de ses épargnes, qu'il ne faisoit que pour auoir dequoy donner aux pauvres.

Enfin il estoit si porté à secourir les pauvres, que rien ne pouuoit l'en détourner ; non pas mesme le danger de perdre la vie. Ainsi durant la derniere peste dont la ville d'Aix fut

affligée, comme il distribuoit largement l'aumône à vne grande quantité de pauvres, les Consuls de la ville le prierent, de ne pas souffrir, que les pauvres s'assemblassent en si grand nombre au tour de son Couuent, pour crainte de la communication du mal. Il leur obeit : Mais il continua de donner l'aumône aux mesmes pauvres en vn lieu plus separé. On tâchoit encore de l'en détourner, en luy faisant apprehender ce mal contagieux. Mais bien loin de le craindre, il disoit que les pauvres seruiroient de preseruatif, à luy, & à son Monastere.

En effet encore qu'il eust vne tres-grande communication avec les pauvres, plusieurs desquels estoient frappez de cette furieuse maladie : neantmoins il en fut preserué, ses Religieuses aussi, & toutes les personnes qui le seruoient. De sorte qu'il attribuoit cette conseruation aux prieres des pauvres, suivant la promesse que le Saint Esprit nous en fait par le Prophete Dauid, en ces paroles. *Bien-heureux est celuy qui est charitable enuers les pauvres : dautant que le Seigneur le deliurera dans les mauuais iours.*

De sa Pauvreté volontaire.

CHAPITRE XVIII.

PLUSIEVR S'ayment les pauvres ; mais peu ayment la pauvreté ; & la pluspart de ceux qui se montrent les plus affectionnez à les secourir, sont souuent les moins disposez à estre pauvres eux-mesmes, & à vouloir faire profession de la pauvreté. L'Imitateur de Iesus-Christ a eu l'vn, & l'autre. La Prouidence Divine l'auoit fait naistre de pauvres parens, & passer son enfance dans les travaux, & les miseres de la pauvreté. Il y auoit alors, ce semble, de la contrainte pour luy ; mais des qu'il fut auancé en âge, il pratiqua par vertu, le reste de sa vie, ce qu'il auoit souffert par impuissance dans ses premieres années. Ainsi il n'a voulu s'éleuer au dessus de la bassesse de son extraction. Il n'a jamais voulu amasser de l'ar-

gent, ny acquerir des biens, encore qu'il en ait eu le pouuoir. Il n'a mesme iamais voulu faire, ny souffrir aucune chose en sa personne, ny en ce qui le regardoit, qui fust opposé à l'esprit de pauvreté, ou tant soit peu contraire à l'amour, & à la pratique de cette rare, & Euangelique vertu.

L'étoffe de ses habits estoit tousiours de la plus grossiere, & de la plus simple qu'il pust trouuer; n'ayant iamais voulu porter de la soye, non pas mesme à sa ceinture, ny au cordon de son chapeau qui estoit de laine, ou de coton: La façon n'en estoit pas moins simple, & grossiere, que l'étoffe. Les habits qu'il portoit sous sa soutane, estoient conformes à ceux des paisans, & pauvres laboureurs. Il s'étudioit d'imiter en son habit Ecclesiastique, les Peres de l'Oratoire, auant mesme qu'il entraist dans la Congregation: avec cette difference toutefois, qu'il paroissoit plus pauvre. Car il faisoit coudre sa soutane par le deuant, depuis enuiron la ceinture, iusques au bas; il la portoit plus courte; & au lieu des boutons, il se seruoit d'agraffes, pour mieux pratique la pauvreté, ainsi qu'il le disoit luy-mesme.

Ce fut la réponse qu'il fit à vne de ses Religieuses de la Misericorde, touchant la longueur de sa soutane. On luy en auoit fait faire vne fort longue à la mode des plus honorables Ecclesiastiques. Ce bon Pere l'ayant vestue, dès qu'il apperceut qu'elle traïsnoit, il la dépoüilla à l'heure mesme, & la donna à ses Religieuses pour la roigner, en telle sorte qu'elle ne vint que iusques aux fouljers. Les Religieuses firent d'abord quelque difficulté de luy obeïr: mais il les pressa & les y contraignit, protestant qu'il ne la porteroit iamais, quelle ne fust roignée. Cela ayant donné occasion à vne Religieuse de luy demander, pourquoy est-ce qu'il ne vouloit pas, que sa soutane fust si longue. *Parce, répondit-il, que cela n'appartient qu'aux riches Ecclesiastiques; & ie suis un pauvre Prestre, qui veux estre vestu à la façon des pauvres.* Mais il surpassoit la pauvreté ordinaite des plus indigens Ecclesiastiques; d'autant que ceux-cy portent des chemises; & luy ne portoit point de linge, comme nous auons desia remarqué.

Lors que l'Archeuesque d'Aix l'eut obligé de moderer la

rigueur de son abstinence, il obeït; mais en sorte qu'il retint toujours en son manger les marques d'une grande pauvreté. Ainsi il ne pouvoit souffrir qu'on le seruist de plus d'une sorte de viande, se faschant contre ses Religieuses, & leur imposant des penitences, quand elles faisoient autrement. *Parce que, disoit-il, une sorte de viande suffisant pour la nourriture du corps, le reste estoit superflu, & contraire à la vraye pauvreté.* Pour cette mesme raison il ne vouloit pas qu'on luy donnast des viandes exquisés, & de grand prix; parce que la nature s'en peut passer, & le vray pauvre se doit contenter du nécessaire.

Pour imiter en la façon de viure, la pauvreté des Religieux qui en font une plus grande profession; il ne vouloit point de nappe sur sa table; mais il se seruoit d'un mesme linge, pour nappe, & pour seruiete. Il ne vouloit point aussi user d'assiette, se servant pour cet effet du petit plat dans lequel on luy apportoit la viande. Quand il estoit contraint de manger chez des personnes de condition, l'amour de la pauvreté luy faisoit sentir diuerses difficultez. Car il ne pouvoit souffrir qu'avec bien de la peine; la diuersité, ni la quantité des viandes dont on le seruoit. Et il n'en souffroit pas moins, quand on luy changeoit d'assiette: ce qu'il empeschoit autant qu'il luy estoit possible. Si bien que ceux qui sçauoient sa coutume prenoient occasion de luy oster son assiette, & luy en donner une autre, pendant qu'il beuvoit; tant il auoit d'aersion pour toutes les choses superflues, qui derogent à l'esprit de la parfaite pauvreté.

Quand ses Superieurs luy eurent deffendu de coucher sur la terre, il se dressa un lit, mais un lit de pauvre: car pour n'y auoir rien de superflu, il ne voulut pas qu'il fust plus long, ny plus large que son corps, de maniere qu'il y estoit comme dans une biere; encore n'y mettoit-il qu'un peu de paille pour toute commodité. Sa couuerture estoit un gros manteau qu'il auoit fait faire de l'étoffe, & à la façon de ceux que les pauvres bergers portent dans les bois, avec un coqueluchon qui luy seruoit de coiffe, quand le froid le contraignoit d'en user. Les Religieuses l'ayant persuadé sur ses vieux ans de coucher

sur vn matelas , elles ne peurent iamais l'induire à se seruir des draps : Ainsi il a tousiours couché avec ses habits , & sur la fin de sa vie il couchoit entre deux couuertures , disant que les pauures ne deuoient auoir des draps, puisqu'on pouuoit s'en passer sans incommodité.

Passant par Auignon au retour de son premier voyage de Paris, comme il fut contraint d'à arrester quelques iours pour la consolation de ses Religieuses , & de ses amis , il logea chez vne personne de merite , & de vertu , & l'un de ses plus intimes , qui voulut luy donner vne chambre tapissée , & vn beau liēt de soye : mais l'amour de la pauureté ne luy permit pas de l'accepter. De maniere qu'il demanda s'il n'y auoit point d'autre chambre , & d'autre liēt ; on luy répondit qu'il n'y en auoit point , qu'au plus haut de la maison , ou estoit le logement des seruiteurs. Il y monta , & ayant veu qu'il n'y auoit rien de somptueux , ny de riche : mais que tout y estoit simple , & grossier , comme pour les valets. *Voicy, dit il, ce qu'il me faut, si vous desirez que ie m'arreste chez vous : car pour cette chambre tapissée , & ce beau liēt de soye que vous m'auēz fait voir ; ie n'en veux point : cela est trop riche pour moy qui ne suis qu'un pauvre Prestre. Laissez moy coucher dans ce liēt des seruiteurs ; autrement ie vous quitteray.* Il falut que le maistre du logis condescendist à son inclination , en telle sorte que quelque priere qu'il luy fist , il ne pût iamais l'induire à se loger dans vn lieu plus commode. On prit garde dans cette maison , ainsi qu'ailleurs , qu'il ne quittoit point ses habits en se couchant : mais qu'il dormoit à la façon des plus reformez Religieux.

Il n'a iamais voulu posseder aucun bien ; non pas mesme vne maison. La chambre où il logeoit n'a iamais esté à luy , on la luy prestoit comme à vn pauvre ; & dans cette chambre il n'y auoit rien qu'il ne ressentit la pauureté. Il n'auroit pas mesme voulu accepter vn breuiaire , dont la relieure eust esté riche , & pretieuse. Il ne se plaisoit que dans la compagnie des pauures ; il ne visitoit les riches , qu'il ne fust appelé par eux-mesmes , ou pour quelque affaire importante à la gloire de Dieu. Quand les personnes riches le visitoient , il les entre-

tenoit avec grande simplicité, & grossièrement, pour ne leur donner occasion d'arrester long-temps dans sa chambre ; à moins qu'il les conneust craignans Dieu, charitables, & qui ne se glorifioient pas dans leurs richesses. Car pour lors il les receuoit avec ioye, les caressoit, & il les traittoit avec cordialité : quoy que neantmoins simplement & sans contraindre, comme s'il eust conuersé avec les pauvres.

Il luy est souuent arriué, qu'estant visité par des grands Seigneurs Ecclesiastiques, ou seculiers, après les auoir entretenus quelques moments dans sa simplicité ordinaire, il les quittoit sans leur faire compliment, pour parler à de pauvres Prestres, & autres qui ayant à faire à luy, n'osoient s'en approcher ; le voyant en la compagnie des personnes de grande condition. C'estoit sa coûtume ordinaire de quitter la compagnie des riches, pour celle des pauvres. Aussi bien loin d'affecter quelque politesse, quand il deuoit conuerser avec les grands ; il s'embloit estre fort aise, d'auoir quelque chose en soy qui les rebutast.

En effet estant appelé par le Duc d'Angoulesme, pour lors Gouverneur de Prouence, il en aduertit la Superieure de son Conuent de la Misericorde, & luy demanda si elle auoit quelque chose à enuoyer à ce Prince. Pendant qu'il parloit, la Religieuse sentit vne odeur d'oignon, & d'ail si forts, qu'elle en fut incommodée ; & se doutant que cette odeur vint du Pere Yvan, *Mon Pere*, luy dit elle, *ie pense que vous avez manié, ou mangé des ails, ou des oignons.* Oüi, fille, repartit le Pere, *i'en ay manié, & i'en ay mangé, & ie suis encore tout parfumé de l'odeur.* Ah mon Pere ! repartit la fille, *ie vous conjure de vous lauer les mains, & la bouche, auant qu'aller chez le Gouverneur.* Ce Prince, & ceux de sa compagnie n'ont pas accoustumé de flairer cette puante odeur. O fille ! repliqua le Pere, *vous parlez comme une mondaine. Suis-je vn grand Seigneur, ou quelque Prelat, qui ne mange que des viandes exquisés ? Je suis vn pauvre Prestre ; ie veux que le Gouverneur, & tout le monde le sçache : oüi, que ie ne suis qu'un pauvre Prestre qui se nourrit d'ails, & d'oignons. Je m'y en vay en l'estat où ie suis : & s'il ne me veut souffrir ainsi, à la bonne heure ; ie m'en re-*

tourneray ; & en seray bien aise. La fille n'osant plus repliquer ; le Pere s'en alla faire sa cour en pauvre Prestre : ce qui n'empescha pas que le Gouverneur ne le receust avec grande affection & cordialité.

Les mondains ne tirent pas tant de vanité de leurs richesses, que nostre Imitateur se glorifioit de sa pauvreté. Le plus agreable titre qu'il se donnast, estoit celuy de pauvre Prestre. Il s'en seruoit en toute rencontre, & particulierement quand il estoit contraint de parler de soy. Car pour lors, il disoit, *qu'il n'estoit qu'un pauvre Prestre, que Dieu auoit retiré de la boue, & de la poussiere ; s'appliquant ordinairement ces paroles du Prophete Dauid. Dieu a tiré l'indigent de la terre, & a éleué le pauvre du fumier.* Il prononçoit ces mots particulierement quand on le louoit, & qu'on témoignoit faire estat de sa vertu.

La plupart cachent leur origine ; quand elle est basse. Nostre Imitateur faisoit sçauoir la sienne à tout le monde, & n'auoit plus grande consolation que de parler de la bassesse de son extraction, & des miseres que son indigence luy auoit fait souffrir. Vn iour comme vne personne releuée en dignité racontoit en bonne compagnie, qu'elle estoit de fort mediocre condition ; le Pere Yvan l'interrompant, *si ie me mess, dit-il, à raconter d'où ie suis issu, ie vous seray bien taire, & vous aduouerez que ie suis sorti d'une extraction bien plus basse que la vostre.* En suite il fit naïfvement le narré de son Histoire avec grande edification des assistans. Cét amour de la pauvreté luy a continué iusques à sa mort. Car sur la fin de ses iours il n'entretenoit ses Religieuses que de sa pauvreté, de ses miseres, & de celles de ses parens. C'estoit la matiere quasi de tous ses discours, notamment dans Paris en son dernier voyage, où il n'estoit pas connu.

Enfin le Seigneur a voulu qu'il ait donné des marques de sa pauvreté en mourant, ainsi qu'il en auoit donné pendant sa vie ; & qu'il soit mort en pauvre, comme il auoit veü en la façon des pauvres : puisqu'en effet il est mort sur le pauëde la Sacriltie de son Eglise, seul, & sans estre assisté de personne du monde ; sa mort soudaine n'en ayant pas donne le loisir.

l'Humilité

L'Humilité du Pere Antoine Yvan.

CHAPITRE XIX.

LA Pauvreté volontaire n'est pas vne vertu Chrestienne; mais vne espede d'hypocrisie, ou vne adresse politique, si elle n'est accompagnée d'une sincere, & profonde humilité. D'où vient que le sage condamne dans l'Escripture, le pauvre orgueilleux, & le public indigne de l'approbation des gens de bien; de ce que renonçant au faste extérieur des richesses, il nourrit vn autre faste de sa propre estime, qui le rend l'objet de la haine de Dieu, & des hommes. De sorte que ce n'est pas assez de pouvoir dire avec Saint Pierre, parlant à Iesus-Christ, Seigneur nous auons tout laissé par vne pauvreté volontaire; puisque les Payens en ont fait autant selon la remarque de Saint Ierosme: Mais il faut adjoûter les autres paroles du mesme S. Pierre; nous vous auons suivi dans les sentimens, & dans la pratique de la vraye humilité. Car suivre le Fils de Dieu, c'est l'imiter, & cette imitation consiste à estre parfaitement humble: puisque c'est l'exemple qu'il nous a donné toute sa vie, & la leçon qu'il a particulièrement voulu nous inculquer, quand il a dit, ces Diuines paroles: apprenez de moy qui suis doux, & humble de cœur.

Son Imitateur a fidelement pratiqué cette leçon, puisqu'il en a donné tant de marques, & de si illustres témoignages. Il ne parloit iamais de soy qu'avec mépris. Se publiant *indigne de tout employ, incapable de tout bien, & de toute vertu, & capable seulement de faire mille maux, & de scandaliser tout le monde.* C'est ce que ie luy ay souuent ouy dire parlant de sa personne, & c'estoient les eloges ordinaires qu'il se donnoit, quand il estoit contraint, de declarer les sentimens qu'il auoit de soy-mesme. Ainsi écrivant à vne personne qui luy auoit demandé quelque conseil de perfection, il commence par ces termes humilians. *Je suis grossier, dans les tenebres, & dans*

les peché depuis ma naissance : Neantmoins.... Dans sa Lettre 14. répondant à vne fille, qui luy auoit écrit qu'on luy conseilloit de quitter sa conduite ; parce qu'on le blâmoit d'estre ignorant. Après quelques lignes, si l'affaire, dit-il, touchoit un autre Prestre, qui fust vostre conducteur ; le vous ferois voir combien il y a de superbe, & d'amour propre. Mais parce que cela me regarde, ie n'humilie, ie supporte tout, de peur que ie ne me plaigne, que ie ne m'excuse, on loue : & ie crois que peut estre Dieu le veut ainsi, à cause de mon incapacité, & de ma superbe.

On ne scauroit rapporter tous les termes dont il vsoit pour se mépriser, & glorifier Dieu dans ses humiliations. *Helas !* disoit-il bien souuent, *ie m'étonne, de ce qu'estant issu de si pauvres parens, j'ay peu arriuer à la dignité de Prestre. Je puis bien dire avec le Prophete David ; Dieu a élevé le pauvre de la bouë & de la pousiere. l'ay une grande confusion de ne pouuoir pas luy estre reconnoissant. La plupart des Saints, adjoûtoit-il, (avec de profonds sentimens d'une sincere humilité) ont quitté de grands biens pour Dieu ; comme Saint Romuald : Mais qu'est-ce que ie puis donner à Dieu, n'estant de mon origine qu'un pauvre laboureur. C'estoit en ces termes qu'il entretenoit ordinairement ses Religieuses, leur disant d'une façon tres-humiliante pour luy. Filles, les autres Religieuses ont de grands personnages pour leurs Fondateurs : mais vous n'avez qu'un pauvre Prestre. Il faut en cela vous humilier, & prendre patience. Il fuyoit avec soin & exactitude, tout ce qui auoit de l'éclat, & qui pouuoit le faire estimer. Vne personne de vertu qui connoissoit son merite, ayant fait tirer secretement son portraict, le gardoit chèrement dans son cabinet, comme vne relique ; lorsque le Pere Yvan l'ayant visité, & s'estant aperceu de son image, ne fit pas semblant de le voir, iusques à ce qu'estant demeuré seul dans le cabinet, il s'en saisit secretement, si bien que l'ayant porté chez soy, il le déchira en mille pieces avec mépris & dédain, comme si c'eust esté le portraict de quelque méchant & abominable pecheur.*

Vn autrefois estant nouvellement arriué à vn des Conuents de son Ordre, vn Seigneur de grande condition duquel

il n'estoit pas connu, luy demanda s'il ne scauoit pas ou estoit le Pere Yvan, Fondateur de l'Ordre de Nostre-Dame de Misericorde, que l'on estimoit vn grand seruiteur de Dieu, & duquel on disoit tant de merueilles. Nostre humble Prestre, surpris de ceste demande qui le fit rougir, trouua vn moyen de ne se pas declarer, & de s'humilier sans dire point de mensonge. *Monsieur*, répondit-il, *ie ne suis qu'un pauvre Prestre nouvellement arriué en cette ville.* Ce Seigneur n'estant pas satisfait de sa réponse, continua de l'interroger, & luy dire des loüanges du Pere Yvan. Il luy répondit la mesme chose qu'auparauant. Mais enfin craignant qu'il ne vint quelqu'un qui le decouurist, il tourna le dos, & s'alla cacher dans vne maison voisine, iusques à ce qu'il creust de ne plus rencontrer par ce mesme Seigneur.

Il luy estoit arriué plusieurs fois de s'enfuir, & de se cacher, quand il scauoit que des personnes de condition deuoient venir le visiter, pour luy donner des témoignages de leur estime; comme n'ayant rien tant à cœur, que de viure inconnus, & decouurir les talens de nature, & de grace dont Dieu l'auoit enrichi. Aussi auoit-il presque tousiours à la bouche ce conseil du liure de l'Imitation de Iesus-Christ. *Aymez à n'estre pas connu, & à estre estimé vn neant.*

Il auoit tant d'amour pour cette pratique d'humilité; que dans vne impression que l'on fit de ses Conseils, des pieuses & doctes personnes l'ayant prié d'adoucir quelques maximes touchant ce point de se cacher, & viure inconnu, il confirma ses sentimens par vne tres-belle réponse qu'il fit, en sa lettre 47. ou ie renuoye le Lecteur. Ce desir de viure inconnu a fait, qu'il n'a iamais osé de luy mesme, accepter aucun employ dans l'Eglise; que quand il y a esté poussé par la necessité ou par la charité, ou par le commandement de ses Superieurs; ainsi que nous auons remarqué, dans l'Institution de son Ordre & auparauant quand il fut appellé à la charge de Vicairé, & puis de Curé.

En tous ses emplois il a tousiours recherché, & embrassé, ce qu'il y auoit de plus bas, de plus vil, & de plus méprisable; de maniere, que mesme les dernieres années de sa vie, il balioit

l'Eglise de ses Religieuses, & tenoit à honneur de frotter le
 le marche-pied de l'Autel. Ayant choisi la façon de vivre,
 la plus horrible qu'il püst mener, selon sa profession, il se com-
 portoit non seulement en pauvre Prestre, ainsi que nous
 auons remarqué; mais encore comme s'il eust esté grossier,
 ignorant, incivil, idiot, & incapable des bonnes choses: ce
 que le rendant l'objet du mépris, & de la raillerie de ceux qui
 ne le regardoient que des yeux de la chair, luy à fait recevoir
 mille affronts, mille brocards, & mille sorte d'injures, dans la
 pluspart des lieux où il a demeuré; si bien que nous pouuons
 dire, qu'il s'attiroit luy mesme ces humiliations, par les pra-
 tiques de son humilité.

Cette vertu luy faisoit encores souffrir de plus grands maux:
 car, comme d'une part il faisoit des ceuures merueilleuses par
 son zele, & que de l'autre il monstroit vne extrême bassesse
 en sa personne; on luy imposoit diuers crimes énormes: c'est
 d'escroquer d'hypocrisie, de remerité, de superstition & mesme
 d'estre sorcier; La persecution estât quelquefois alée iusques à
 le mal traiter en sa personne, & le charger de coups de bâton,
 comme s'il eust esté vn faquin. Il receuoit ces mépris, & ces
 mauvais traitemens avec tant d'humilité, que bien loïn de se
 plaindre, & de se iustifier, il s'humilioit dauantage, attribuant
 tout ce que l'on disoit, & faisoit contre luy, à son incapacité, &
 à ses offences, & s'estimant encore digne de plus grand mépris.
 Il n'auoit jamais demandé ny voulu recevoir aucune re-
 paration des injures qu'on luy auoit faites: mais dès qu'il
 croyoit auoir offensé quelque personne, il offroit d'en faire
 satisfaction publique. Ainsi ayant vn iour repris vne Dame
 avec son zele accoustumé, comme il crout d'auoir excédé dans
 sa correction, il en eut vne confusion si grande, qu'il se per-
 suada de uoir repaier sa faute publiquement. A cecy effect il
 voulut se confesser dans l'Eglise deuant tout le monde à voix
 haute, & en presence de la personne qu'il auoit corrigée, pour
 montrer qu'il auoit failli. Il vouloit mesme s'abstenir de ce-
 lebrer la Sainte Messe, si son Confesseur qui connoissoit la
 pureté de ses intentions, & son humilité profonde, ne luy
 eust défendu de faire ces humiliations.

Vne autrefois ayant representé fortement à vne femme le tort qu'elle auoit dans les plaintes qu'elle faisoit de quelque pesonne, & voyant qu'elle entroit en colere contre luy, pour l'apposer il se mit à genoux deuant elle, & luy demanda tres-humblement pardon.

Les fondemens sur lesquels il appuyoit cette rare vertu; (ainsi que l'on peut colliger de ses écrits.) Estoiert en premier lieu, la connoissance qu'il auoit de la faiblesse de la nature, & de la necessité absoluë de la grace de Dieu. Il connoissoit, dis-je, qu'il ne pouuoit rien de luy-mesme, & qu'il falloit que Dieu fist en luy tout le bien par sa grace; c'est pourquoy il ne s'attribuoit aucun bien; mais il le rapportoit fidelement à Dieu. Voicy comment il en écrit à vne Religieuse. Lettre 19.

Qu'aucun ne se glorifie de rien qu'il fasse, ny de rien qu'il veuille. Nous sommes bien peu de chose deuant les yeux de Dieu.... Helas! quand nous considerons que si Dieu veut quelque chose de bon de nous, il faut que luy-mesme le fasse en nous. Nous auons bien sujet de nous humilier, & de craindre.

Secondement il s'humilioit dans le bien qu'il faisoit, & dans toutes les vertus, & les graces qu'il receuoit de la main de Dieu; parce qu'il reconnoissoit qu'elles ne luy estoient données que par les merites de Iesus-Christ, & que de luy-mesme il ne meritoit que l'Enfer. Nous en auons rapporte diuers témoignages tirez de ses écrits, dans le Chapitre de sa desappropriation.

Le troisieme fondement de son humilité, estoit l'imitation de celle de Iesus-Christ. Ainsi comme on luy écrit vn iour que son liure estoit trop humiliant, & trop crucifiant; il fait vne belle réponse. Lettre 47. Ou après auoir parlé comment Iesus-Christ s'estoit humilié, & chargé des pechiez de tous les hommes, il adjoûte cestriches paroles, *Quel mal y a-t'il donc que s'innite Nostre Seigneur en son humilité, & en la pratique de ses humiliations, moy qui suis criminel; & luy l'Agneau innocent? Quelle raison y a-t'il que luy soit estimé le plus malheureux de tous, coupable de la mort, & d'infins supplices; & que moy, qui suis le Loup, Lyon, Dragon, digne de sa mort, & de ses peines, se m'estime capable du Ciel & de la gloire, & que*

me traite delicieusement & comme un Saint? Helas! estimez vous ce pecheur qui est cause des opprobres, & des ignominies du Fils de Dieu?

En quatrième lieu son humilité estoit fondée sur le mépris, & la hayne qu'il auoit de soy-mesme, comme pecheur, & ennemy de Dieu: ce qui le portoit à s'estimer moins que les bestes, que la bouë, & que les Demons. Il l'écrit ainsi à vn de ses amis dans sa Lettre 52. Où après auoir rapporté ce passage de Saint Paul. *Omnia propter Christum detrimentum fieri, & arbitror ut stercora.* Il adjoûte ces paroles. *Il faut que ie m'estime moins que cela en pratique, puisque ie suis mon plus grand ennemy, & de Dieu, & de verité, & d'une nature pire que le Diable.* Je pourrois enfin dire que l'humilité de nostre Ecclesiastique estoit encore fondée sur la crainte continuelle qu'il auoit de Dieu, & de soy: ainsi que nous verrons dans le Chapitre suiuant.

Sa crainte continuelle.

CHAPITRE XX.

IE joins ce Chapitre de la crainte au precedent de l'humilité; parce que selon la doctrine du Pere Yvan, ces deux vertus sont si estroitement vnies, qu'il est impossible d'auoir l'une sans l'autre. *Sans crainte, dit-il, il n'y a point d'humilité.* L'auteur de son éloge funebre remarque particulièrement en luy, & louë avec de grands eloges cet esprit de crainte: En effet c'est vne chose admirable qu'ayant toujours mené vne vie pure, innocente, & chargée de merites, il ait tremblé sans cesse deuant la Majesté Diuine, comme s'il eust esté le plus méchant, & le plus criminel d'entre les hommes. Ses écrits sont pleins de conseils qui persuadent cette crainte du Seigneur, & de soy-mesme, à tout le monde, & particulièrement aux ames deuotes. Il tâche de l'inculquer avec tant de zele, qu'il la propose comme vn des plus necessai-

seres moyens du salut ; comme vne marque infallible pour discerner les ruses de Satan , & de l'amour propre ; comme vn bouclier impenetrable contre toute sorte de tentations ; & comme la plus solide voye pour plaire à Dieu , imiter Iesus-Christ & perseuerer iusques à la fin. Ainsi que l'on peut voir dans le liure de ses Conseils , dans ses Epistres , dans le liure intitulé Trompette du Ciel , & dans les autres que l'on en fera imprimer.

Il tâchoit d'imprimer la mesme crainte , dans tous ses sermons , & dans tous ses entretiens familiers : mais il l'imprimoit encore plus efficacement par son exemple ; Car comme il trembloit sans cesse , on le voyoit dans vne continuelle apprehension , recueilli , modeste , n'osant presque parler , ny se remuer , les yeux , & la teste baissée , ses mains arrestées à la façon de ceux qui sont dans les fers. Enfin la posture , & le geste de tout son corps , estoit dans vne telle reserue , & circonspection , qu'il sembloit regarder continuellement sur sa teste , le thrône effroyable sur lequel Iesus-Christ sera assis au iour du iugement ; ou sous ses pieds , les tourmens épouuentables des damnez ; ou à ses côtez , les Anges , & les Demons , témoins de ses actions , & de ses paroles , & par tout , la presence d'un Dieu redoutable , & terrible.

Vne vertueuse Religieuse luy ayant demandé fort simplement , l'opinion qu'il auoit d'elle. Elle , luy répondit-il , *vous me demandez quelle opinion i'ay de vous ; écoutez-moy bien ; ie m'en vay vous dire. I'ay opinion , qu'à grand peine vous serez sauuée , & que ce sera vn des plus grands miracles que Dieu ait fait , si vous auez Misericorde. Voilà mon opinion , & que vous deuez tousiours trembler deuant Dieu , comme la plus méchante de toutes les creatures , vous tenir suspecte , & auoir peur de vous comme d'un dragon , d'un Diable , & du plus grand ennemy que vous ayez. Mon bon Pere , repliqua cette fille , vous me faites peur. Ha fille , continua le Pere , il faut tousiours craindre : Pour moy , ie tremble tousiours , quand ie me couche , quand ie me leue , quand ie mange , quand ie travaille tousiours ie tremble , & i'ay vne peur continuelle de moy.*

Quand on luy parloit des bonnes actions , & des penicences

qu'il auoit faites , & qu'il auoit grand sujet de se réjouir de s'estre addonné au seruice de Dieu dès son enfance : *Helas !* disoit-il , d'un ton de voix , & d'une façon si humble , & si craintive , qu'il sembloit vouloir s'anneantir ; *Pourquoy me dites vous que ie me dois réjouir de ma vie passée ? au contraire ie dois trembler comme un pauvre criminel qui est douant son Iuge ; attendant sa condamnation. Je sçay bien que i'ay peché ; & que i'ay mérité l'enfer : mais ie ne sçay pas si Dieu m'a pardonné ; & nul ne me peut assurer que Dieu m'ait fait miséricorde. Je ne sçay pas aussi si mes penitences ont esté faites pour le pur Amour de Dieu , & pour son bon plaisir : ou si ie les ay faites par amour propre , ou si ie n'ay point esté trompé par illusion. Tout cela me fait peur : toutes mes œuvres me donnent de l'apprehension. Car qui sçait si elles ont esté bonnes , ou mauvaises ; si ie les ay faites en estat de grace , ou de peché ? Helas ! qui pourroit m'assurer que Dieu les a acceptées ? O que les ingemens diuins sont à craindre ! l'espère néanmoins , disoit-il , en Dieu par les merites de Iesus-Christ. Et l'espère qu'il me fera miséricorde. Mon Dieu, miséricorde.* Cette crainte faisoit qu'il auoit peur de toutes ses œuvres , & qu'il n'osoit mesme les regarder qu'en tremblant , ainsi qu'il l'écrit d'une manière touchante dans ses Lettres 86. & 87.

Quelques graces qu'il eust , & qu'il connust en soy , il se regardoit tousiours comme sur le penchant d'un precipice , & dans un tres grand peril de se perdre , & de se damner. *Helas , s'écrioit il , nous auons bien sujet de craindre ! puisque si Dieu ne nous tenoit continuellement , nous perdriens tout , & nous nous damnerions.* Un de ses amis luy ayant dit un iour dans un entretien familier , qu'il auoit sujet de se consoler , & ne pas tant faire de penitences , attendu que Dieu luy faisoit la grace de luy estre fidelle , & de le bien seruir ; s'écriant comme s'il eust receu quelque coup mortel , ou qu'il eust ouy des choses scandaleuses ; *Ha ! Monsieur , dit-il , pourquoy me parlez-vous ainsi ? Il est vray que tout ce que i'ay de bon , vient de la Miséricorde Diuine : car de moy , ie n'ay que le peché. Mais c'est la cause de ma peur , veu que les graces que ie reçois n'estant pas méennes , ie seray contraint d'en rendre un compte tres-exact du mauvais usage*

usage que j'en fais. Tout ce que Dieu fait maintenant pour moy, sera un iour contre moy en punition de mes infidelitez. Qui sçait si le bien que ie fais, est un bien, & non pas un grand mal? Quel scandale, si ie me fiois en moy? sçachant que ie ne suis qu'un pecheur, ennemy de Dieu, & de toute verité. Je ne me puis fier qu'en la bonté de Dieu par le merite de Iesus-Christ. Priez-le qu'il me fasse misericorde.

Il apprehendoit encore de se relâcher dans la voye de Dieu, & ne pas perséuerer iusques à la fin. Il apprehendoit, dis je, de perdre tout ce qu'il auoit acquis, de commettre de grands pechez, & de scandaliser tout le monde, ainsi qu'il luy ay souuent ouy dire.

Il apprehendoit si fort la mort, que la seule pensée le faisoit fremir; & cette frayeur le rendoit si timide dans les maladies, que ceux qui d'ailleurs n'auroient pas conneu sa force, & son courage, l'auroient passé pour vne personne tres-foible. Je l'ay veu au premier accès d'une fièvre qui luy dura quelques iours; ie l'ay veu, dis je, si effrayé, qu'il m'excita à compassion: & i'estois beaucoup plus touché de sa crainte, que de sa maladie que ie ne voyois pas estre dangereuse. Ce qui est merueilleux, ainsi que j'ay desla remarqué est, que nostre Imitateur ait tousiours apprehende la mort, & qu'il n'ait iamais aymé la vie, ny voulu trauailler à sa conseruation, l'ayant exposé pour la gloire de Dieu, & pour le salut du prochain, autant de fois qu'il en a eu l'occasion.

Mais ce n'estoit pastant la mort qu'il apprehendoit, que les accidens qui precedent, ou accompagnent la mort: à sçauoir les inquietudes, les impatiences, & notamment l'agonie. C'est ainsi qu'il on écrit à vne de ses penitentes, lors qu'il settoit dans Aix pendant la peste. *Fille, dit-il, ie vous prie de continuer vos prières, sur tout afin que si nous mourons, ce soit en paix, en la bonne grace de Dieu, & pour luy; & que nous demeurions en paix contents, & resignés, dans les douleurs que cause le mal. Je n'ay peur que de ce côté-là. Il vouloit dire du côté des troubles, & des impatiences que causent les douleurs de la mort, qui offrent souuent la paix, & la resignation d'une ame, si elle n'est secourue d'une puissante grace.*

Il apprehendoit si fort les troubles, & les violences que le Demon a accoustumé de faire à vne ame pendant l'agonie, qu'il ne pouuoit y penser sans fremir. Ai si il a souuent témoigné; qu'il desiroit ardemment imiter les Saints Martyrs qui estoient morts promptement par le glaue, ou par d'autres semblables supplices, sans souffrir vne longue agonie.

Nous pouuons dire que Dieu l'a exaucé dans ses desirs; car il decedé d'une mort subite, qui ne luy a pas donné le loisir d'estre agonisant, ainsi que nous dirons à la fin de cette histoire: mais Dieu n'a pas laissé de luy donner le merite, & les peines de l'agenie d'une façon autant merueilleuse, que redoutable. Car ayant esté auerti par reuelation de sa mort, quelques années au parauant, la terrible crainte des Iugemens de Dieu s'augmenta en luy de telle sorte, les dernières années de sa vie; qu'il souffrit durant ce temps-là vne agonie terrible, & pitoyable. C'est le témoignage, qu'un tres-pieux Ecclesiastique son Confesseur nous en a rendu, & par lettres, & de viue voix; nous assurant qu'il auoit reconnu, que le Pere Antoine Yvan auoit souffert les dernières années de sa vie, les peurs, les angoisses, les troubles, & les autres peines des mourans, par la terreur des Iugemens de Dieu, & par les continuels reproches, & les terribles menaces que le Demon luy faisoit. Ce mesme Ecclesiastique nous a déclaré que le Pere Yvan en estoit par fois si furieusement trauaillé, qu'il estoit contraint de se leuer la nuict, & recourir à son Confesseur; pour s'humilier en luy découurant ses peines, & trouuer par ce moyen quelque soulagement. Ainsi que nous auons desia remarqué. Cette espee d'agonie ayant continué dans Paris, (où il est mort, quelques mois après son arriuée) il estoit si absorbé, & comme submergé dans cet ocean de crainte & d'apprehension, qu'il n'en pouuoit plus sortir. Il sembloit auoir effacé de sa memoire, toutes les images des autres choses; pour ne s'arrester qu'à celles, qui luy representoient la rigueur des Iugemens de Dieu, & l'exact compte qu'il faut rendre à l'heure de la mort. Aussi ne parloit-il plus que de cette maniere à ses Religieuses, & aux autres personnes qui s'entretenoient avec luy. O disoit-il de temps en temps, que les Iugemens de Dieu sont bien dispo-

rens de ceux des hommes ! A peine le iuste sera sauué : Et que sera-ce des pecheurs, qui n'auront pas fait penitence de leurs crimes ?

Quelque peu de temps auant sa mort, vne personne de grande condition, le trouuant tout pâle, tout tremblant, & presque transi de frayeur deuant le Saint Sacrement, dans la Chapelle de ses Religieuses, *Mon Reuerend Pere*, luy dit-il, *il me semble que vous tremblez, & que vous estes tout émeu d'appréhension.* Oui, Monsieur, répondit le Pere, *ie tremble, & suis saisi d'une terrible crainte, parce que ie me vois à la veille de ma mort.* Quoy mon Pere, repartit ce Gentil-homme, *vous auez peur de mourir, après auoir vescu si saintement & fait de si rudes penitences ?* Ha, Monsieur, repliqua le Pere, *que les iugemens de Dieu sont effroyables !* Il profeta ces dernières paroles avec vn accent, & vn ton de voix si touchant, que cette personne en fut émeuë, & en demeura grandement edifiée.

Le Pere Leon dans l'eloge qu'il a composé de nostre Imitateur, parlant de sa crainte, nous en fournit vn illustre témoignage en ces termes. *Toute sa vie a esté vne parfaite conformité à Iesus mourant delaisé sur le gibet. Aussi auoit-il vne deuotion toute particuliere à cette Diuine agonie, & à cette parole d'abandon, vt quid dereliquisti me ? En vn mot la haine de soy-mesme, quoy qu'il fust innocent ; l'honneur du peché, bien qu'il n'en eust point commis ; la crainte des iugemens de Dieu, bien qu'il n'eust nul sujet de les apprehender ; auoient noyé, englouty, & abismé cét incomparable seruiteur de Dieu.*

Ie l'ay veu, adjoûte le mesme Autheur, ce saint Penitent, & ne l'ay veu qu'une fois. Mais ie l'ay veu tout effrayé, & s'en ay demeuré tout transi ; du son de cette trompette, percé de ces clous ; noyé dans cette mer, abismé dans cét ocean. Mon cher Pere, me dit ce venerable, & aymable vieillard, en m'embrassant peu de iours deuant sa mort ; s'ay acheminé ma carriere, vous allez encore recommencer la vostre : Breschez l'Euangile, annoncez Iesus-Christ aydez-le à sauuer les ames. Puis, comme si ces trois paroles luy eussent esté vne parantése, vn diuertissement à sa continue occupation, & quasi vn sujet de scrupule ; mais ô mon Pere, me fit-il, que les iugemens de Dieu sont épouuantables !

Ô qu'aprouchant de ma fin, il y a a craindre pour un miserable pecheur comme moy, qui ne merite que les Enfers ! O que Dieu est terrible ! ô que ses iugemens sont redoutables !

Enfin il a continué dans cette crainte terrible, mais amoureuse, & accompagnée de confiance, iusques à sa mort, ainsi que nous auons remarqué dans les Chapitres precedens.

Il n'auoit point de respect humain.

CHAPITRE XXI.

CELVY qui craint Dieu parfaitement, ne craint que Dieu ; si bien qu'il est exempt de la vaine crainte des creatures. Nous en auons l'exemple en la personne du Pere Antoine Yvan Imitateur de Iesus-Christ. La crainte l'auoit rendu courageux ; en sorte que tremblant continuellement deuant Dieu, il ne trembloit iamais par aucun respect humain, ny par aucune crainte des hommes, ou des Demons. La peur de perdre la bien-veillance de Dieu, de perdre le Ciel, & de perdre son ame en perdant la grace ; luy auoit osté la crainte de perdre l'estime, & l'amitié des hommes, de perdre son honneur, de perdre les biens de la terre, & mesme de perdre sa vie, quand il s'agissoit du seruice de Dieu, ou du salut du prochain. Ainsi il travailloit constamment, & genereusement à l'un, & à l'autre, sans rien apprehender. Il prechoit les veritez Chrestiennes dans leur pureté, sans aucune dissimulation honteuse, & sans aucun lâche accommodement. Ses conseils estoient solides sans aucune vaine complaisance. Ses corrections estoient respectueuses, mais fortes, & sincerés. Il entreprenoit les ouurages de Dieu avec humilité ; mais il les poursuinoit avec zele, & avec perséuerance, quelque affront, confusion, mépris, & autre peine qu'il en deust receuoir.

C'estoit vne des maximes de sa conduite, qu'il faut desobliger tous ceux, & celles qui nous empeschent d'aller à Dieu, & d'acquiescer la perfection. Il inculque souuent ce conseil dans

son liure, & dans les lettres, nomment dans la 53. Qu'il écrit à vn Ecclesiastique de ses amis, en laquelle, *Desobligez, luy dit-il, tous, pour estre détachez de tous, & priué de tous: afin que tous vous laissent avec tout Dieu, sans empeschement, &c. Chassez, & desobligez sans affection & complaisance, tous ceux qui sont amis de vostre ennemy qui est vostre nature.*

Il n'a iamais paru auoir de l'attache à aucune creature, non pas mesme à ses plus proches parens. L'ay remarqué ailleurs, qu'il portoit grand respect à sa mere, en qualité de fils: mais qu'entant que Prestre, il la traitoit avec la mesme exactitude & seuerité, que les autres penitentes. Estant Curé à Brignoles, il se trouua chargé par le deceds de sa mere, de l'education d'une sienne niepce orpheline. Il l'a fit recevoir dans la Congregation des filles de Sainte Vrsule: mais à la façon des pauvres, en qualité de sœur conuerse; encore qu'il l'eust pu faire recevoir pour sœur du chœur, attendu les seruices qu'il rendoit à cette Congregation là. Il montra qu'il n'auoit point d'attache à ses parens, dans la conduite de cette fille: car il vouloit qu'elle fust la dernière de ses compagnes; & qu'elle fust la plus humble, & la plus obeïssante, & la plus diligente au travail. Il la reprenoit avec plus de seuerité, que les autres, & bien loin de procurer qu'elle eust des dispences particulieres, ou qu'on la favorisast, parce qu'elle estoit sa parente: au contraire il commandoit, qu'on la traitast avec moins de complaisance, & qu'on la fist travailler avec plus d'assiduité. De manière que la fille ne faisant pas son deuoir, nonobstant tous les soins que l'on en auoit, le Père Yvan son oncle la fit sortir de cette maison; de peur qu'elle n'y seruist d'obstacle à l'auancement des autres filles.

Il en vsa de mesme façon enuers vne autre de ses niepees, qui auoit voulu estre Religieuse dans son Ordre de Nostre Dame de Misericorde. Il la fit recevoir nouice, en qualité de sœur laye, après l'auoir faite passer par toutes les épreuues des pretendentes. Il vouloit qu'elle fust traitée indifferemment avec les autres sœurs du travail. Il deffendoit qu'on luy fist aucune caresse particuliere. Il s'informoit soigneusement de ses fautes, & la punissoit avec seuerité. Enfin ayant recon-

ne qu'elle ne se comportoit pas, de la façon qu'il eust desiré pour la perfection, & pour le bon exemple de la Communauté; il luy fit oster l'habit de nouice, & l'ayant tirée hors du Conuent, il la maria.

Il reprenoit publiquement dans ses sermons, les pechez publics, & de scandale, sans aucun respect humain. Vn iour à l'occasion du Publicain de l'Euangile, il parla fortement contre les injustices, & les extortions que commettent les receueurs des dōtanes, & gabelles, quand ils excèdent leur commission. Quelques personnes de condition, & d'autorité, qui appuyoient ces gens là, en estant indignées, firent de grandes plaintes contre nostre zelé Predicateur, le reprirent aigrement, & vserent de rudes menaces contre luy, s'il ne retractoit ce qu'il auoit dit, & s'il en parloit vne seconde fois. Il se comporta dans cette rencontre, ainsi que les Apostres, quand ils furent conduits deuant les Princes des Prestres en Ierusalem, & inhibez de prescher le nom de Iesus-Christ. Car sans s'émouuoir des reproches, ny de menaces qu'on luy fit; *Je ne puis*, répondit-il, *retracter ce que j'ay dit, parce qu'il est conforme à la sainte Escriture: & je ne puis taire aussi, ny dissimuler ce que la mesme Escriture m'enseigne, lors qu'il est à propos de le publier.*

Vne autre fois pendant qu'il preschoit le iour de l'Ascension, l'Archeuesque d'Aix, qui depuis a esté Archeuesque & Cardinal de Lyon; accompagné de plusieurs Prelats, entra dans l'Eglise où il preschoit, le sermon estant desia auancé. Il s'arresta d'abord, iusques à ce que les Prelats eussent pris leurs places: & après s'adressant à eux avec vne sainte liberté. *Messeigneurs*, leur dit-il, *j'enseigne à ce bon Peuple, le chemin par lequel Iesus-Christ a marché pour monter au Ciel: Je leur ay dit qu'il auoit commencé par l'humilité de la Cresche, &c. Mais, Messeigneurs, ie n'ay pas peu dire que Iesus-Christ fust monté au Ciel en carrosse, avec un grand train de seruiteurs; ny qu'il ait marché dans le luxe, ny dans les festins; ny dans les grandeurs, ny dans les diuertissemens que vous auez. Je parlerois contre l'Euangile, & contre ma propre conscience. Et partant vous deuez bien trembler en l'état où estes, ne suiuant pas le che-*

min que Iesus Christ vous a montré. Et si vous ne suivez pas Iesus-Christ qui suivez vous donc ? ou est-ce que vous pretendez arriver, tenant un chemin contraire à celui du Fils de Dieu ? Ces Prelats se regardant mutuellement, ne pouvoient assez admirer le courage, & la liberté, que le Pere Antoine Yvan auoit dans la Chaire, qui d'ailleurs paroissoit si timide & si craintif.

Il reprenoit avec la mesme liberté, ceux qui parloient pendant son sermon, ou qui ne s'y tenoient pas avec modestie. Et lors qu'après les auoir repris en general, ils ne se corrigeoient pas, il s'adressoit à eux, & les appellant par leur nom, ou les designans par les marques exterieures qu'ils auoient ; *N'avez-vous pas honte, leur disoit-il, à haute voix, de venir au sermon pour y parler, au lieu d'écouter la parole de Dieu. Sortez hardiment, poursuioit-il, si vous ne voulez vous taire, & allez parler en d'autres lieux. Les Eglises ne sont, que pour prier Dieu, pour y écouter la parole, & y faire d'autres actes de Religion.*

Il arriuoit par fois qu'il y auoit de petits enfans qui pleuroient pendant le sermon, ou des libertins qui ne vouloient pas s'y tenir modestement. Alors il s'arrestoit tout court ; disant qu'il ne continueroit pas son sermon, qu'on n'eust fait sortir les personnes qui troubloient l'attention, & empeschoient le fruit de la parole de Dieu. Il disoit souuent à ces immodestes, s'adressant à eux en particulier : *Ce n'est pas Dieu qui vous a amenez icy, mais le Demon ; puisque cés ennemy se sert de vostre immodestie, pour empescher que les bonnes ames ne profitent de la Predication.* Il estoit aussi souuent auenu que des personnes de condition ayant receu de semblables confusions par nostre Predicateur, à cause de leur immodestie, luy en faisoient des plaintes, & des reproches : mais il ne laissoit pas de continuer dans son zele ordinaire, sans nulle consideration des creatures.

Ainsi comme il estoit vn iour au milieu de son sermon, il vint vne Dame parée avec grand luxe, & qui entr'autres choses vaines, & immodestes, portoit quantité de mouches sur son visage, & entroit la teste leuée, comme si elle eust voulu

se faire regarder. Son arriuée ayant causé du bruit, obligea le Pere Yvan à se tourner vers elle. Mais il n'eust pas plütoſt apperceu son luxe, & son immodestie, qu'il luy fit publiquement cette rude & forte reprehension *C'est pour cela, Madame, que vous avez tant tardé de venir, pour nous montrer ces vilains emplâſtres que vous avez mis sur voſtre viſage ? Vous deuriez rougir de honte de venir ouyr la parole de Dieu avec tant d'immodestie, & ſi peu de deuotion.* Cette perſonne qui d'ailleurs auoit de bons ſentimens de pieté, penſa tomber morte de la conſuſion qu'elle receut. Neantmoins elle en profita : & dès lors meſme elle ſe rendit plus modeste, & plus retenuë.

Il s'apperceut vne autre fois au milieu de ſon ſermon qu'il y auoit vn jeune homme qui s'eſtant placé vis à vis d'une fille, la regardoit continuellement d'une façon immodeste, & luy faiſoit des ſignes qui choquoient la retenuë requiſe dans la maiſon de Dieu. Cét objet alluma ſon zele, & donna de l'exercice à ſa liberté Euangelique : car ſ'adreſſant au jeune homme d'un regard, & d'un ton de voix animé : *Miſerable*, luy dit-il, *n'as-tu pas honte de venir faire l'amour dans l'Egliſe, au temps qu'on y preſche la parole de Dieu, & de te ſeruir d'un lieu de pureté, & de ſainteté, pour un commerce ſi ſale, & ſi infame ? Va & ſors à l'heure meſme de cette Eglife. Ne crains-tu pas que i'attire ſur toy les malediétions du Tout-puiſſant, pour te faire chaſtier d'une punition exemplaire ?* Ces paroles toutes de feu, non ſeulement effrayerent le jeune homme qui ſortit à l'heure meſme avec conſuſion : mais encore elles imprimerent la crainte à tous les autres auditeurs, qui apprehendans vne ſemblable correction, ſe tindrent dans leur deuoir, & dans vne telle modestie, qu'ils n'oſoient preſque pas ſe regarder mutuellement.

Il vſoit de cette meſme liberté pendant les Meſſes, & les autres offices de l'Egliſe, ne pouuant ſouffrir qu'on y parlaſt, ny qu'on y connuſt aucun acte d'immodestie. Auſſi dès qu'il voyoit quelques perſonnes tomber dans ce manquement, il les auertifſoit avec douceur : mais quand elles continuoient, il les reprenoit à haute voix avec zele, les menaçant de la Juſtice Diuine. Son courage s'étendoit encore plus loin. Car ſi allant par les ruës, ou entrant en quelque maiſon, il euſt rencontré quelque

quelque chose qui ne fust pas selon Dieu, ny selon les regles de la vertu Chrestienne, il prenoit le parti du Seigneur, corrigeant avec zele, & discretion ceux qu'il trouuoit en faute. D'où il arriuoit, que par tout où il alloit, il y imprimoit la crainte par la seule presence: en sorte qu'il n'y auoit point de libertin qui n'apprehendast son abort. Ainsi aucun n'osoit venir à ses sermons, ny dans son Eglise, quand il y estoit, qu'il ne se resolust d'y demeurer avec modestie: Et c'estoit assez de dire mesme parmi les ruës, voicy le Pere Yvan, pour obliger les plus débauchez à se maintenir dans leur deuoir.

L'en ay veu vn exemple dans l'antichambre d'un grand Seigneur. Il y auoit dans cette antichambre vn homme de condition, & d'autorité, grandement libertin qui s'entretenoit de discours des honnestes, & impies. Quelques personnes discrettes qui estoient presentes, l'auoient prié de changer d'entretien, ayant pour cet effet, proposé d'autres matieres. Mais cela n'auoit serui qu'à luy donner occasion d'inuenter de nouvelles railleries contre la vertu, & de continuer ses impietez avec plus d'impudence: lors que le Pere Yvan arriua dans le mesme lieu. Effet merueilleux de la presence des seruiteurs de Dieu: Il y eut assez de celle de nostre bon Prestre, pour arrester le discours du libertin, & humilier son orgueil. Car dès qu'il le vit, il cessa de parler: & comme s'il eust apprehendé que s'apperceuant de son impieté, il luy en fist vne seuer correction, sçachant sa coûtume, & qu'il n'auoit point de respect humain; il se leua, alla au deuant de luy, l'accueillit avec grande ciuilité, & ne l'entretint que de choses modestes, & deuotes.

Il refusoit avec cette mesme generosité Chrestienne, les prieres, & les instances des plus grands, & plus puissans Seigneurs, quand il les iugeoit tant soit peu contraires à la gloire de Dieu, ou à la perfection. Ainsi ayant visité vn Cardinal qui estoit tres-puissant dans le Royaume, comme il en fut fortement sollicité à l'instance d'une grande assemblée de personnes de condition qui y estoient; de faire vne exhortation dans le lieu où il étoit. Monseigneur, répondit nostre genereux Prestre, *c'est icy vne sale de bal, & de diuertissement, & non pas vn lieu*

propre à y prescher la parole de Dieu. Et d'ailleurs ces Messieurs & ces Dames ne demandent une exortation que pour contenter leur curiosité, & auoir occasion de railler. C'en est pas ainsi qu'il faut ouyr la parole de Dieu. Venez, Monseigneur adjoûta-t'il, avec tout ce grand monde; venez dans mon Eglise: le vous y prescheray ce que l'Esprit de Dieu m'inspirera. Le Cardinal, & toute la compagnie le presserent encore: mais il ne leur fit autre réponse, sinon qu'il ne vouloit pas leur obeïr en cela; parce que c'estoit profaner la parole de Dieu, & qu'il s'étonnoit fort de ce qu'ils n'auoient pas honte de luy faire vne telle proposition.

Il est vray que cette liberté l'auoit souuent fait passer pour vn grossier, & vn inciuil dans l'esprit de ceux qui ne connoissoient pas sa vertu: mais ses actions faisoient voir le contraire, cōme nous en pouuons iuger, par cette rancontre qu'il eut dans le premier voyage qu'il fit à Paris. Le Cardinal de la Rochefoucaud ayant ouy parler de luy, & des moules de Nostre-Dame qu'il grauoit sur le cuiure, desira luy parler; & voir quelqu'un de ses ouurages. Le Pere Yvan y estant allé, accompagné d'un Ecclesiastique du seminaire de Saint Sulpice, après auoir salué son Eminence, luy presenta vn tres beau moule de Nostre-Dame, qu'il n'auoit acheué que depuis quelques iours. Le Cardinal l'ayant considéré, & y ayant fait ietter des images, le trouua si bien fait, qu'il voulut le retenir. En effet l'ayant pris dans sa main: *Mon bon Pere*, dit-il, *parlant au Pere Yvan*, *ce moule est très-beau; y a-t'il long-temps que vous l'avez fait?* Monseigneur, répondit le Pere, *il n'y a que quelques iours que ie l'ay acheué. Puisque vous avez fait cestuy-cy*: repliqua le Cardinal, *ie le retiendray, & vous en ferez de plus beaux.* Non pas, s'il vous plait, Monseigneur, repartit le Pere, *Vostre Eminence ne le retiendra pas: car ie l'ay fait pour moy, pour le porter, & le garder tousiours, & ie ne le veux laisser à personne du monde.* En mesme temps il reprit son moule d'entre les mains du Cardinal, & le remit dans sa poche, sans autre excuse ny compliment.

Le Cardinal fut vn peu surpris de cette action: neantmoins il ne témoigna nullement d'estre fasché contre nostre bon

Prestre; car il le renuoya avec ciuilité, après luy auoir fait donner des medailles, & d'autres images qu'il luy auoit demandées. Mais tous ceux qui furent presens à cette action, n'en iugerent pas si fauorablement: car plusieurs en murmurèrent comme d'une action inciuile, & indiscrete. L'Ecclesiastique qui l'accompagnoit, en rougit de confusion, & ne se put tenir de luy en faire des plaintes, après qu'ils furent sortis. Un autre Ecclesiastique encore de Saint Sulpice, des plus familiers du Pere Yvan, luy en fit de tres-grands reproches, le blâmant [qu'il ne sçauoit pas viure avec les personnes de condition, & disant qu'il deuoit en cette rencontre auoir obligé le Cardinal de la Rochefoucaud, qui estant tres-puissant, auroit peu le seruir dans son dessein de faire à Paris vn establissement de ses Religieuses de Nostre-Dame de Misericorde.] Le bon Pere Yvan, qui auoit agi par vn autre esprit qu'on ne croyoit pas, sans s'émouuoir nullement, *aisez-vous*, répondit il; *vous ne sçavez pas pour quelle consideration, j'ay fait ce refus-là, mais vous le sçaurez dans quelques iours.*

Quelques iours après le Cardinal de la Rochefoucaud deceda: comme donc l'Ecclesiastique qui auoit fait le plus de plaintes au Pere Yvan touchant son refus, luy en porta la nouvelle; Et bien, luy dit le Pere Yvan, *n'ay-ie pas fait prudemment, quand j'ay refusé mon moule à ce bon Cardinal? Quelle reconnoissance en pouuois ie esperer, puisqu'il deuoit si tost mourir? Mon moule seroit maintenant entre les mains de quelque valet, qui n'en connoissant pas la valeur, le vendroit à vil prix à des personnes qui ne s'en seruiroient que par interest, ou qui peut-estre l'employeroient à de mauuais vsages. C'est esté une forte inspiration singuliere du Saint Esprit qui m'a poussé, & m'a fortifié à ne le pas accorder, ie l'en remercie de tout mon cœur! J'ay encore mon moule, & ie m'en seruiray pour faire honorer la Mere de Dieu, Nostre-Dame de Misericorde.* Cette rencontre obligea l'Ecclesiastique à demander pardon au bon Pere Yvan, des plaintes qu'il luy auoit faites; & le confirmant dans la croyance qu'il auoit desia de son eminente vertu, luy fit connoistre qu'il ne faut iamais censurer les actions des seruiteurs de Dieu, quoy quelles paroissent dignes de blâme.

Mais la generosité de nostre Imitateur a particulièrement paru pendant , & après l'établissement de ses Religieuses de Nostre-Dame de Misericorde ; car quand il s'est agi de conseruer ses Religieuses dans la pureté de leur fondation , & d'empescher que les personnes du monde , ne leur fissent faire aucune chose contre leur regle ; il se declaroit contre tous , sans nul respect humain , & sans auoir égard , ny à la condition , ny à l'autorité des personnes : mais seulement à ce qui estoit de son deuoir.

De sa simplicité.

CHAPITRE XXII.

LA crainte de Dieu bannissant de l'ame toute autre craintē, la fait agir avec grande simplicité : parce que la personne qui ne craint que Dieu , n'agit aussi que dans la veuë de Dieu , & de ses Diuines volonte , & ne s'applique qu'à faire son deuoir. Ainsi elle marche simplement dans les voyes de la loy du Seigneur ; sans faintise , sans déguisement , sans detour , & sans faire des reflexions inutiles sur soy , ny sur les autres , ny sur aucune chose crée : mais en tout ce qu'elle dit , ou fait , ou pense , ou desire , elle va purement & simplement à sa fin , qui est d'obeir fidelement à Dieu , de luy plaire , & faire son salut. Or quoy que cette vertu soit interieure , & l'une des plus eminentes du Christianisme : neantmoins elle se manifeste par des actions exterieures qui paroissent ordinairement viles , & méprisables aux yeux des mondains ; ainsi que dit le Patriarche Iob , que la simplicité du Iuste est méprisée. C'est dans ces sortes d'actions que le Pere Yvan s'est fait mépriser dans le monde : mais il s'est rendu recommandable deuant Dieu , & nous a laissé des exemples d'une tres-grande simplicité.

Ayant vn iour esté conuié à la nopce d'une personne de condition , & de vertu , il fut fort estonné en entrant dans la sale du festin , d'y voir une grande assemblée de Gentils-hommes ,

& de Dames ; parce qu'il auoit esperé de n'y trouuer que celuy qui l'auoit conuié , & des personnes de sa famille. La veuë de ce grand monde , dont il n'auoit iamais aymé la conuersation , le fit aussi tost resoudre de se retirer. C'est pourquoy après auoir salué la compagnie , & s'estre vn peu recueilli , pendant quel'on s'entretenoit de diuerses choses , & que l'on preparoit le banquet , s'adressant à vn valet de chambre , *auertissez* , luy dit-il , *vostre Maistre que i'ay dit le Benedicité , & qu'il se mette à table quand il luy plaira.* Après cela il se déroba secretement , & s'en retoutna dans sa cellule : comme donc toutes choses furent prestes , & que l'on commençoit de s'asseoir , chacun demande le Pere Yvan , & l'on s'empresse de le chercher , iusques à ce que le valet de chambre à qui il auoit parlé , recita ce qu'il luy auoit dit. Les vns se prirent à rire , les autres en murmurèrent : mais la pluspart demeurerent bien edifiées de cét exemple de simplicité , & de modestie.

Vne autre fois ayant esté aussi conuié chez vn Prince : comme il fut assis à table au milieu d'une grande assemblée de diuerses personnes , il prit sa refection au premier seruice que l'on fit , mangeant avec sobriété selon sa coûtume , & la portée de son estomac. Après quoy sans témoigner de faire aucune reflexion , ny au lieu , ny à la compagnie , voyant qu'on ostoit les plats , il pria la seruiete , le leua debout pour dire graces , & sortit de table immediatement après. Le Prince qui l'auoit inuité , s'adressant à luy ; *Mon Pere* , luy dit-il , *où est-ce que vous allez ? ce n'est que le commencement du repas ? voicy que l'on apporte le second seruice.* Monseigneur , répondit le Pere Yvan , *je ne sçay pas si vous auez coûtume de disner plusieurs fois le iour ; pour moy , ie ne disne iamais qu'une fois , & après ie sors de table. I'ay déjà fait mon repas des viandes que l'on m'a seruies : il me faudroit disner encore vne fois , ce que ie ne puis. I'ay dit graces , & ie vous remercie , Monseigneur , priant Dieu de vous rendre vos biens.* Ce proceder donna occasion à quelques vns de rire de la simplicité du Pere Yvan. Les plus modestes en furent edifiez , & les plus sages regarderent cette action là , comme vn exemple de sobriété , & vne secreete , mais forte condamnation de l'excez au manger en la quantité.

& en la diuersité des viandes. J'ay remarqué ailleurs avec quelle simplicité nostre bon Prestre receut le Côte d'Alais, gouverneur de Prouance, lors que Dieu le luy enuoya pour appuyer les pieux desseins, par son autorité. Depuis ce temps-là ce Prince ayant conceu vne haute estime de la vertu du Pere Yvan, le visitoit, ou le faisoit souuent appeler chez soy, conferant avec luy de l'estat de sa conscience, des moyens de glorifier Dieu, & notamment des affaires des filles de Nostre-Dame de Misericorde. Le bon Pere, sans se seruir d'aucun compliment, qui parust affecté pour s'insinuer dans son amitié, ou pour la conseruer, luy parloit tousiours avec grande naïfueté; ne regardant principalement en luy, que la qualité d'un Chrestien, qui vnissant la grandeur de sa condition, & de son autorité, à la solide vertu, & deuotion, pouuoit s'opposer aux desseins des méchants, & fauoriser les entreprises des gens de bien. Ainsi il luy proposoit simplement les veritez de l'E-uangile, que peu de personnent osent déclarer aux grands; ne luy dissimulant aucune des choses qu'il croyoit estre necessaires à son salut.

Par fois ce Prince voulant le retenir chez luy pour dîner, ou le priant de s'y arrester plus long-temps: si le Pere Yvan auoit pour lors quelques affaires; *Monseigneur*, disoit-il, *ie suis pressé, il faut que se m'en aille*: après quoy il se retiroit sans autres excuses. Ce mesme Prince venant ouyr la Messe dans l'Eglise de Nostre-Dame de Misericorde prioit le bon Pere, de se mettre à genoux au près de luy, pendant le sacrifice, & de ioindre ses prieres aux siennes. Le Pere obeissoit; mais souuent dès que la Messe estoit acheuée, il se retiroit dans la Sacristie, sans accompagner le Prince, & sans mesme luy faire aucun compliment. Les Gentilshōmes de la Cour du Prince s'estoiēt mocquez plusieurs fois de nostre bon Prestre, le blâmant d'inciuilité; mais le Prince qui connoissoit le fond de sa vertu, prenoit de l'occasion d'en faire plus de cas, & de le louer plus hautement, comme vn Prestre qui estoit simple, dépouillé de tout respect humain, & qui ne regardoit que Dieu.

Comme ce Prince ayant vne haute estime de quelques filles de nostre Institut, à raison de leur vertu singuliere les visitoit

souuent, & s'entretenoit avec elles ; il estoit souuent arriué que le bon Pere jaloux de leur perfection, & craignant que des visites de cette sorte, ne portassent prejudice à leur humilité, & à leur soumission, auoit témoigné au Gouverneur, qu'il ne les agreeoit pas, faisant pour ce sujet des actions qui paroissent indiscrettes deuant le monde : mais que la simplicité rendoit tres precieuses deuant Dieu.

Plusieurs fois, pendant que le Gouverneur s'entretenoit avec elles à la grille, de leur Couuent ; Le Pere y entrant sans ceremonie, *Monseigneur*, disoit il, *qu'est-ce que vous parlez tant à ces filles ? Elles sont des imparfaites : vous ne devez pas les croire, ny vous arrester à leur discours.* Mon bon Pere, répondoit le Gouverneur, *nous parlons de Dieu : ne vous fâchez pas. Je suis si edifié de leur entretien, que je vous prie de ne me priver pas du profit que j'en retire.* *Monseigneur*, repliquoit le Pere, *cela ne va pas bien : Je crains que vostre entretien, & l'honneur que vous leur faites, ne leur soient prejudiciables, les faisant deuenir suffisantes, & orgueilleuses.* Après cela il se retiroit sans mot dire. Le Gouverneur admiroit cette genereuse simplicité : & bien loin d'en estre fâché, il protestoit qu'il en estoit grandement edifié, & que par là il conceuoit vne plus haute estime du Pere Yvan, que s'il l'eust resuscité des morts en sa presence ; adjouctant qu'après des actions si simples, il ne pouuoit pas douter qu'il ne fust vn vray homme de Dieu, qui agissoit purement selon les lumieres du Saint Esprit, sans aucune consideration des creatures.

Le Cardinal de Lyon estant vn iour venu à l'Eglise des Religieuses de Nostre-Dame de Misericorde pour ouyr la Messe, & après s'entretenir avec le Pere Yvan, voulut que le mesme Pere Yvan demeurast à genoux à ses côtez pendant le Sacrifice. Le Pere obéit : Mais dès que la Messe fut acheuée, il se leua tout doucement sans que le Cardinal s'en apperceust, & s'en alla dans la Sacristie ; pour ouyr la confession d'un Prestre, qui se disposoit à celebrer. Le Cardinal suivi de plusieurs personnes de condition, sortit du Sanctuaire, sans prendre garde au Pere Yvan : iusques à ce qu'estant arriué au milieu de l'E-

qui estoit gisant dans vn lit. Cettuy cy l'ayant fait appeller: *Mon Pere*, luy dit-il, *ie vous coniure de prier Dieu, & la sainte Vierge pour moy, & m'obtenir la grace de releuer de cette maladie. Releuer de cette maladie*, repartit brusquement le Pere, *Ah bon homme ! il ne faut pas que vous y songiez. Vous estes fort vieil ; & vous avez assez vescu , pour aller deuant Dieu rendre compte de vostre vie, & que pretendriez-vous faire, si vous échappiez , si non souffrir & languir dans vn âge decrepit ? Il faudroit que vous fussiez malade vne seconde fois ; & ainsi en mourant , vos maux finiront : Après quoy prenant occasion de parler à ce payfan (qu'il connoissoit d'ailleurs estre vn grand homme de bien) du Paradis, des auantages de la mort des Iustes, de la misericorde de Dieu, par le merite de Iesus-Christ ; des miseres de la vie presente , & de semblables matieres ; il le disposa si bien, qu'il ne songea plus à guerir ; mais à se preparer à vne sainte & heureuse mort, qui luy arriua bien-tost après,*

Vne autre fois estant appelé de bon matin avec presse, pour aller assister vne malade qui se mouroit ; il y accourut, ayant encore sa coiffe de nuit, quoy que les ruës fussent desia pleines de monde. C'estoit en luy vne simplicité ordinaire d'aller par la ville visiter des malades, ou d'autres personnes mesme de condition, avec sa robe de chambre, son bonnet carré, & ses pantouffles. L'Archeuesque l'ayant vn iour rencontré en cét habit, le fit appeller; & comme il se fût approché de luy: *Pere Yvan*, luy dit il, *pourquoy allez vous vestu de la sorte par les ruës ? Ne craignez-vous point qu'on se mocque de vous ? Monseigneur*, répondit le Pere, *ie n'ay point de raison à rendre à vostre Grandeur ; parce que ie ne fais point de reflexion à ce que ie porte, quand ie sors de ma chambre : mais ie vay simplement où ie suis appelé, sans prendre garde comment ie suis vestu. L'Archeuesque admirant sa simplicité : Allez*, luy dit-il, *Mon bon Pere priez Dieu pour nous.*

Enfin la simplicité du Pere Yvan estoit si grande qu'il a creu plusieurs années, & lors mesme qu'il preschoit, que les mousches que les Dames mettent sur leur visage, estoient des emplastres, qui couuroient quelque blessure, ou quelque

tumeur : de maniere qu'il ne perdit cette croyance , ainsi qu'il l'a declaré luy-mesme , que par le discours qu'il en ouyt d'un predicateur. Après quoy , qui s'étonnera s'il n'auoit point de respect humain , ny de crainte inutile , mais vne forte & genereuse confiance ? puis que selon le Sage , celuy qui marche simplement , marche confidemment.

De sa douceur.

CHAPITRE XXIII.

VNE des plus grandes merueilles de la vie du Pere Yvan , consiste en ce qu'il a vny dans sa conduite vne rigueur exacte , avec vn aimable douceur. Il se seruoit de la rigueur contre soy-mesme . se traittant comme vn ennemy de Dieu , & comme s'il eust esté coupable de toute sorte de crimes , & il employoit la douceur enuers le prochain ; se comportant à l'endroit d'un chacun avec affabilité , benignité , candeur & mansuetude Quoy qu'il ait tousiours pratiqué de très rudes penitences ; il estoit neantmoins très reserué à en permettre aux personnes qu'il dirigeoit , & lors qu'on luy demandoit cette permission. *Vn once d'amour , disoit il , vaut mieux que cent liures de penitence , & vne legere mortification de la volonté est plus precieuse , & plus méritoire , que plusieurs austeres macerations du corps.*

Ainsi dans l'établissement de son Ordre de Nostre-Dame de Misericorde , bien loin d'y mettre son propre esprit , qui estoit vn esprit de rigueur , & de penitence ; il y a laissé vn esprit de grande douceur , par des constitutions qui ne sont pas gênantes pour l'esprit , & qui permettent pour le corps l'usage de la viande , du linge & d'autres petites commoditez , qui sont compatibles avec la perfection reguliere & la foiblesse du sexe.

Cette douceur le rendoit ennemy des procès , & de toute sorte de troubles. Ainsi quand on luy intenta un procès à l'oc-

casion d'un Benefice qu'on luy auoit resigné, il voulut s'en demettre en mesme temps, pour ne pas plaider; mais des personnes de credit, & de pieté l'en ayant détourné, il s'accommoda, & se mit en repos. Vn autre fois deux Ecclesiastiques luy ayans encore intenté vn procès, touchant vne chapelanie qu'il auoit, il les visita avec ciuilité, & ayant conneu par leurs discours, qu'ils estoient resolu de plaider: *s'ay vnus*, leur dit-il, *vous desirés le ronger; le voila, ie vous le quitte, rongez le tant qu'il vous plaira. Pour moy qui suis vn pauvre Prestre, ie ne demande quele repos, & la misericorde de Dieu.*

Comme il ne vouloit point auoir des procès, & qu'il ay-
moit mieux se dépouiller de son bien, que de le disputer en
plaidant, selon le conseil de l'Euangile; aussi ne pouuoit il
souffrir que les personnes qu'il dirigeoit, en eussent; à moins
qu'elles y fussent contraintes par des motifs de conscience.
C'est pourquoy avant vn iour appris, que l'on auoit conseil-
lé à deux Demoyelles de ses penitentes, de plaider contre
leurs maris pour la conseruation de leur dot, il escriuit vne
Lettre pleine de zele; dans laquelle condamnant le conseil de
plaider, comme tres meschant, il leur conseille de se laisser
plustost dépouiller de tous leurs biens, & reduire à l'extre-
mité, que d'intenter des procès. Voycy les termes de sa
Lettre. *Filles que N. & N. ne suuent point le conseil qu'on
leur donne, de plaider contre leurs maris; car ce conseil ne
vaut tout à fait rien. Elles n'auanceroient gueres, & ne fai-
roient le plaisir de Dieu. Qu'elles se contentent d'estre cruci-
fiées & dépouillées: elles ont trop d'honneur de mourir pau-
ures à la Croix, comme Iesus-Christ.*

Nostre Imitateur n'estoit pas seulement ennemy des pro-
cès, mais encore des contentions & disputes particulieres, ain-
si que nous auons remarqué ailleurs. Quand on luy deman-
doit son sentiment sur quelque matiere de deuotion ou sem-
blable, il le disoit humblement, & avec grande naïf-
veté, selon les purs sentimens de l'Euangile, & de
la plus solide perfection. Que si quelqu'un le contestoit
en ce qu'il auoit dit, d'ordinaire il ne répondoit plus, ne se

mettant nullement en peine de soutenir ce qu'il auoit dit; mais il se taisoit, s'humiliant, comme s'il eust esté ignorant, & incapable de parler. D'autrefois il se retiroit doucement de la compagnie, baissant la teste, & haussant les espaules, comme s'il eust eu de la confusion d'auoir parlé, & donné occasion de dispute. Quand il répondoit, il donnoit de nouvelles marques de son humilité, & de sa mansuetude; car *ie suis, disoit-il, vn grossier, qui des les choses simplement il me semble que ce que i'ay dit est bon; mais vous le pourrez mieux apprendre des plus sçauans.*

Il auoit melme vne prudence singuliere à euitier les contentions: car lors qu'il se trouuoit engagé dans des disputes particulieres touchant la Foy, ou la Morale, & qu'on luy demandoit son sentiment, il s'en excusoit autant qu'il pouuoit, disant qu'il estoit *vn grossier, & qu'il benissoit Dieu de l'auoir fait vne lourde beste*; & quand on le pressoit de dire precisement son auis: *il me semble, disoit-il, qu'un tel authcur est de ce sentiment.* Après cela il se taisoit, & escoutoit avec mansuetude l'opinion des autres, sans plus répondre, à moins que l'on choquast ouuertement la Foy Orthodoxe, où les bonnes mœurs: car alors il répondoit avec vn zele moderé, & respectueux, ou bien il s'éloignoit de la compagnie. Enfin il suiuoit en toute rencontre ce conseil que l'Apostre nous donne par son exemple, quand il dir, *si quelqu'un aime à contester, nous n'auons pas cette coustume dans l'Eglise de Dieu.*

La mansuetude, dit Saint Ierosme, consiste à ne pas résister aux contradictions des méchans; mais à leur céder humblement, & de souffrir leur insulte avec patience. C'est ainsi que nostre Imitateur a pratiqué cette vertu; car encore qu'il ait eu des persecutions, & des contradictions par tout où il a demeuré: toutes fois on n'a iamais veu qu'il ait résisté avec chaleur; mais au contraire il s'humilioit deuant ceux qui luy faisoient de la peine: il souffroit leurs iniures avec douceur, sans se plaindre; gardant le silence, pour ne les pas aigrir davantage par la iustification. Si bien que quand il estoit obligé de répondre pour obeïr au commandement des Supérieurs, ou pour satisfaire à sa conscience; il ne parloit de soy qu'au

uec meſpris, ny de ſes aduerſaires qu'avec reſpect; monſtrant toujours la douceur d'un agneau, & vne manſuetude ſemblable à celle de Jeſus Chriſt

Eſtant vn iour allé demander quelque permiſſion à vn Archeueſque pour ſes filles de Noſtre Dame de Miſericorde, il le trouua accompagné des perſonnes qui s'eſtoient ouuertement déclarées contre luy; ce fut vne occaſion favorable pour donner de ſolides marques de ſon humilité, & de ſa douceur: car ces perſonnes l'ayans receu avec vn tres grand meſpris, & avec des iniures en preſence de l'Archeueſque, & d'autres Prelats, iuſqu'à l'appeller hyppocrite, fin, ignorant, idiot, incapable de la conduite des ames, il les écouta avec la meſme ſerénité qu'il euſt ouy des paroles indifferentes. Après quoy ſaluant humblement la compagnie, il ſe retira, ſans dire vn ſeul mot pour ſa iuſtification; de façon que l'Archeueſque, & les autres Prelats furent grandement edifiez d'un ſi rare exemple de manſuetude & d'humilité; & ceux-là meſme qui l'auoient iniurié, en demeurèrent confus.

Vne autre fois eſtant allé demander permiſſion au Vicaire d'un Archeueſque, pour le voyage de quelques vnes de ſes Religieuſes, qui eſtoient deſtinées pour faire vn eſtabliſſement de leur Ordre dans Paris; il fut receu avec vn extreme rigueur, & vn extraordinaire meſpris; car non ſeulement ce Vicaire le rebuta avec dédain, mais encore il le chargea de paroles outrageuſes, iuſques à luy faire ce ſanglant reproche: *vous ne vous contentez pas d'auoir trompé la Prouence, vous voulez encore aller faire l'hyppocrite à Paris.*

Noſtre Imitateur receut cét affront avec la manſuetude d'un Ange; car ſans ſe troubler, ny donner aucune marque de colere, ny d'émotion, ſans meſme luy reſpondre vn ſeul mot pour ſe iuſtifier; il le ſalua avec reſpect, & ſe retira paſſiblement.

Dans vne autre rencontre, vn Prelat l'auant fait appeller, pour luy demander compte de quelque merueille que l'on publioit de ſes Religieuſes de la Miſericorde; il y vint avec diligence: mais dès qu'il entra dans la chambre, le Prelat ſe mit en colere contre luy, & le chargea de reproches, ſans lui don-

net le loisir d'ouurir la bouche pour faire son compliment. Le bon Pere se mit à genoux, comme vn Nouice deuant son Maistre, ou comme vn criminel deuant son Iuge, & les yeux bas en la façon d'un suppliant, il écouta les inuectiues que le Prelat luy fit d'une façon tres mortifiante & outrageuse, accompagnée de rudes menaces. Nostre humble Ecclesiastique n'estoit point coupable de ce dont le Prelat estoit si fasché; il receut neantmoins avec vne profonde humilité, & vne merueilleuse mansuetude, cette rude reprehension, qui dura assez long temps. Il a receut, dis ie, sans s'émouuoir, ny faire aucune action qui témoignast de l'impatience, ou de l'inquietude; iusques à ce que le Prelat s'estant teu, le Pere se leua debout, lui fit vne profonde reuerence, & sans répondre vn seul mot, il se retira & sortit du Palais. L'on ne scauroit exprimer combien le Prelat fut estonné du silence, & de la douceur de nostre bon Prestre, & combien il en fut edifié.

Les conseils de nostre bon Prestre estoient conformes à ses actions; ainsi vne de ses penitentes ayant vn iour ouy que l'on disoit d'elle : *voilà la sainte, laissons là passer*, & craignant d'auoir fait quelque peché, qui eust donné occasion de dire ces paroles, en fut si affligée, qu'allant trouuer le Pere Yvan, elle lui raconta le fait avec des larmes, & des sanglots. *Ah Filles* lui respondit le Pere Yvan, *il ne faut pas que les louanges, ny les mepris vous affligent si fort; il faut souffrir le tout humblement, & sans dire mot, si ce n'est à vostre Espoux. Helas Amour, ie vous offre &c.* En suite lui ayant proposé l'exemple de ce Nouice, qui fut enuoyé par vn Superieur au Cimmetiere, pour apprendre des corps morts, à ne se pas plus émouuoir par les loüanges, que par le mépris: *Fille*, lui dit-il, *il ne faut iamais combattre, mais estre combattuë, & laisser combattre l'Espoux, vous humiliant, & aneantissant dans le tout. Par ce moyen vous vous trouuerez exempte de tout embarras, & vostre ame demeurera en repos, & en Dieu.*

Quoy qu'il aye passé dans l'opinion de plusieurs, pour vn Prestre rude & seuer, à raison de son zele, & de son exactitude; il estoit neantmoins doux & benin dans sa conduite, & dans sa conuersation familiere. Il receuoit les pecheurs avec grande

affabilité, les attirant, & les encourageant à se convertir. Il consolait les affligés, & les personnes timides, s'accommodant à elles pour les gagner; si bien que s'il se mettoit en colère, ce n'estoit que contre les hyppocrites, & les obstinez, & contre les âmes dévotes qu'il voyoit en danger de reculer, ou de se relâcher par negligence, ou par presumption. En quoy nous pouvons dire qu'il imitoit la conduite de Dieu, qui semble traiter durant cette vie avec plus de benignité les pecheurs, que les Justes: souffrant ceux-là avec patience, & les attirant par les grâces, pour leur donner confiance en sa miséricorde, & les préserver du desespoir; & affligeant ceux-cy, en les punissant du moindre défaut, pour les maintenir dans leur deuoir, & les garantir de la presumption.

L'esprit de Dieu imprime la crainte au commencement; mais il console, & réjouit à la fin. Le Pere Yuan en usoit de la sorte. Il estoit contre le vice, & reprenoit les moindres imperfections avec rigueur. Mais dès qu'une personne s'humilioit, & reconnoissoit ses fautes, il la consolait, la fortifioit, & lui tesmoignoit des tendresses paternelles. Voyant un jour qu'une Dame de condition, & de pieté, apres avoir parlé quelque temps à une de ses Religieuses de la Misericorde, continuoit son entretien pendant mesme l'heure de l'Oraison; il entra dans le parloir, & avec une sainte liberté: *Madame, lui dit-il, vous parlez trop long temps à cette Religieuse. Laissez-là, qu'elle s'en aille prier, pour obeyr à ses Constitutions: ie ne veux pas répondre pour elle.*

La Dame prenant en bonne part la reprehension du Pere, lui fit des excuses; & quittant la Religieuse entra dans l'Eglise, pour y faire elle-mesme l'oraison: si biẽ que le P. edifié de sa pieté, craignit de lui avoir donné sujet de trouble, ou de fâcherie: ainsi voulant la consoler: *Je pense, Madame, lui dit il, que vous n'estes pas fâchée de ce que ie vous ay dit. Je suis grandement edifié de voir qu'au lieu de vous rebuter, vous estes venue faire vos prieres avec deuotion. Je connois par là que vous estes deuote; j'en benis Dieu, & le prie de vous conserver. Allez, vous estes une bonne Dame, ie vous promets que ie prieray pour vous.* Ces paroles donnerent tant de consola-

tion à la mesme Dame, qu'elle a auoté que pour lors elle se sentit toute remplie d'une ioye extraordinaire; & qu'elle conseruoit le souuenir de cette rencontre, comme vne des plus fauorables de sa vie.

La douceur du Pere Yvan a encore paru en ce qu'il aimoit tendrement les petits enfans, & se plaisoit de conuerser familièrement avec eux. Il recitoit parfois son office à la porte de l'Eglise, & pour lors les petits enfans du voisinage s'assembloient autour de luy, & y demeuroient sans mot dire, iusques à ce qu'il eust acheué. Leur presence sembloit l'animer à faire ses prieres avec plus de ferueur, se voyant enuironné d'ames innocentes, & de leurs Anges tutelaires, auxquels s'vnissant par amour, & par application, il taschoit d'exprimer sur la terre les loüanges que les Bien-heureux chantent incessamment dans le Ciel. Aussi après qu'il auoit acheué son office, il caressoit ces petits enfans, & les entretenoit familièrement des actions, & des accidens de son enfance. Il les instruisoit d'une façon admirable à estre bien obeyssans à leurs parens, à bien prier Dieu soir & matin, à ne pas se quereller &c; leur racontant des Histoires des Saints d'une maniere simple & enfantine.

Quand il alloit par les ruës les petits enfans couroient à luy, pour luy toucher & baiser les mains. Il les receuoit avec vne simplicité d'enfant, & vn amour paternel. D'autres fois les petits enfans courans après luy, s'écrioit : *Pere Yvan, Pere Yvan, dans sa bourse n'a point d'argent.* Ce bon Pere faisant approcher ces enfans, leur demandoit qu'est ce qu'ils disoient: les enfans repetoient le mesme que dessus: *Pere Yvan, Pere Yvan &c.* Il leur repliquoit avec vne douceur & simplicité singuliere; *cela est vray, mes enfans, cela est vray* puis il s'entretenoit avec eux, comme s'il eust esté vn enfant: Aussi auoit-il acquis cette glorieuse enfance, qui nous est necessaire selon l'Euangile, pour entrer dans le Royaume des Cieux.



De son obeysance.

CHAPITRE XXIV.

AYANT esté contraint dès ses premières années , de servir , pour gagner sa vie , il exerça l'obeyssance , dès cet âge là , avec tant de fidelité & de perfection ; qu'il paroïssoit bien dès lors , que ce n'estoit point la crainte des chastimens , ny semblable motif seruite qui le faisoit obeyr : mais la veüe de Dieu , & l'amour qu'il auoit desia pour la vertu.

En effet il se priuoit des diuertissemens de son âge , pour obeïr plus exactement à ce qu'on luy commandoit ; il souffroit mesme de notables incommoditez , pour ne pas manquer à l'obeïssance ; iusques à coucher sur des pierres , pour estre plus diligent à se leuer le matin ; ainsi que nous auons remarqué dans la premiere partie.

Pendant qu'il estoit enfant de Chœur de la paroisse de Rians , le Vicaire qui l'auoit emmené à Aix , pour porter son manteau , & vn petit pacquet , l'ayant renuoyé incontinent pour le seruice de son Eglise ; il partit à l'heure mesme , quoy que le iour fust desia auancé ; de maniere qu'estant surpris de la nuit en chemin , sans sçauoir où se retirer , ayant apperceu de la lumiere dans vne maison des champs , & s'en estant approché , il passa la nuit dans le four de cette maison , avec beaucoup de crainte & de frayeur ; iusques à ce que les seruiteurs de cette mesme maison l'ayant trouué à la pointe du iour , le prirent pour vn espion de volleurs , le chargerent de coups , & le renuoyerent tout éploré. Ce pauvre enfant souffrit tous ces maux avec vne rare patience , sans qu'il en fist aucune plainte , ny qu'il se dégoustast de continuer son seruice , avec la mesme obeyssance qu'auparauant.

Auancant en aage , il auançoit en docilité ; de maniere qu'o

Vuu

comme il auoit esté vn seruiteur tres-obeyssant, il fut aussi vn escholier tres-soumis, n'y ayant aucun de ces Condisciples, qui fût si ponctuel aux ordres des Regens que luy; non seulement en ce qui regardoit ses estudes; mais encore en toutes les autres choses, qui luy estoient ordonnées.

Estant Prestre, & pourueu de la charge de Curé dans Cointignac, il choisit vn saint Directeur, ainsi que nous auons déjà remarqué, auquel il obeyssoit, comme vn Disciple à son Maistre, luy rendant fidelement compte de tous ses exercices, sans qu'il eust osé rien entreprendre de considerable, qu'après l'auoir consulté, & receu son consentement. Il pratiqua la mesme obeissance pendant sa solitude dans l'hermitage de Rians, s'estant soumis à la conduite d'un Prestre d'une grande vertu, par l'auis duquel (entre autres marques de sa soumission) il cessa de toucher sur le marchepied de l'Autel de la Chapelle; parce que ce Prestre luy dit, qu'il y auoit de l'indecence, & que c'estoit manquer de respect à la dignité, & à la Sainteté du lieu.

Il sortit de sa solitude, & accepta la charge de Vicair de sa Paroisse de Brignole par le conseil de deux Prestres de grande vertu. S'estant arresté dans Aix, il quitta ses penitences extraordinaires, & s'accoustuma à viure d'une façon cōmune, pour obeyr au commandement que son Ordinaire luy en fit. Dans la Fondation de son Ordre, il n'a iamais rien fait de son mouuement seul; car il s'adressoit aux Superieurs en toutes choses, & il n'agissoit, qu'autant qu'ils luy en donnoient de permission. Son Ordre estant estably, quand quelque fille se presentoit pour y estre receuë, il s'informoit particulierement si elle estoit bien obeyssante à ses parens, ou à ceux qui en auoient la conduite; de telle sorte que trouuant le contraire, il la renuoyoit, & n'en vouloit plus ouyr parler.

Il faisoit si exactement obeyr ses Religieuses à leurs Superieures, qu'il n'y auoit point de vertu qu'il n'exigeast avec plus de seuerité, que l'obeyssance; ny de fautes qu'il punist si seuerement, que celles qui estoient contraires à la soumission; demaniere que quand on luy demandoit, à quelles sœurs il luy plaisoit que l'on accordast la Communion, *aux obeyssantes,*

répondoitil, disant *qu'il y a que celles qui obeyssent, fidel'mēt qui doiuent souuent communier.* Mais il obeïssoit luy mesme avec grande soumission; car il quittoit toutes choses, & mesme; des compagnies tres-honorables: pour aller au parloir, quand ses Religieuses le faisoient appeller, & souuent s'adressoient à la portiere: *Fille, disoit-il, vostre Superieure m'a fait appeller, aduertissez là, que ie suis icy pour faire l'obeissance.*

Il obeïssoit encore aux Confesseurs qu'il mettoit aux Conuents de ses Religieuses; en sorte qu'il n'y osoit rien faire de considerable sans leur consentement. Ainsi comme vn iour estant à Marseille, quelques pauvres Religieuses ayant demandé l'aumosne à son Monastere, la Superieure se fut adressée pour sçauoir ce qu'il agreoit qu'elle donnast, il la renuoya au Prestre quien estoit le Confesseur; & quoy que cēt Ecclesiastique s'excusast de dire son sentiment en sa presence, & qu'il luy deferast, il persista neantmoins dans sa soumission, & ne voulut permettre, que l'aumosne que cēt Ecclesiastique témoigna agréer.

La Superieure de son Monastere d'Auignon, où il demouroit les dernieres années de sa vie, nous a déclaré qu'elle en dispoisoit comme d'un Nouice; & que ce bon Pere la rendoit confuse par son obeissance prompte & exacte à tout ce qu'elle luy proposoit. Vn vertueux Ecclesiastique de la mesme ville a fait vne semblable declatation: c'est à sçauoir, qu'estant le Confesseur de nostre bon Prestre les dernieres années de sa vie, il auoit remarqué en luy vne singuliere obeissance; & qu'il s'estoit rendu si dépendant de sa conduite, qu'il venoit à luy chaque iour, & mesme plus souuent, pour le consulter dans ses peines intérieures, se soumettant avec vne merueilleuse docilité à tout ce qu'il luy ordonnoit.

Enfin son obeissance a continué iusques à sa mort; car estant venn à Paris quelques mois auant son decés, pour obeyr à la volonté diuine qui luy fut manifestée par vne voye extraordinaire, il seruoit d'enfant de Chœur à ses Religieuses; répondant aux Messes, & faisant avec soumission tout ce qu'elles luy proposoient, autant que l'infirmité de son âge, & la

foiblesse de sa veüe le luy permettoient.

Je laisse à dire les soins qu'il prenoit pour inculquer à tous & particulièrement aux personnes deuotes, l'amour & la pratique de l'obeïssance; parce que ses conseils, ses Lettres Spirituelles, & tous ses autres écrits, semblent ne porter qu'à cette vertu, comme à la plus necessaire pour marcher seurement, & ne se pas égarer dans les voyes de la perfection.

CHAPITRE XXV.

Combien il estoit chaste & pudique

ESTANT allé à Lyon âgé d'environ vingt-cinq ans, ainsi que j'ay remarqué ailleurs, il y donna vne illustre marque de sa chasteté. Vne femme impudique, après auoir inutilement em ployé diuerses ruses pour l'attirer, voyant qu'elle n'auançoit rien, parce que ce chaste & pudique garçon, ny prenoit pas garde; son innocence & sa pudeur ne luy permettant pas de souffrir en soy des pensées des honnestes, ny de croire que les autres en fussent capables: cette effrontée ayant eu l'impudence de lui declarer son infame dessein le prit par les mains, & s'efforça de le tirer dans sa chambre. Le chaste ieune homme fut d'abord si surpris, qu'il en demeura interdit; mais estant reuenu à soy, la honte & la colere luy montant au visage, il se dépestra des mains de cette Megere, & l'ayant repoussée avec horreur, il s'enfuit de sa maison, & n'y voulut iamais plus retourner. Il auoit quelques hardes dans cette maison, dont il auroit eu grand besoin; mais ne pouuant les retirer sans y aller luy mesme, il aima mieux les laisser, ainsi que le chaste Ioseph laissa son manteau, pour ne retomber dans le peril, duquel la grace l'auoit rendu victorieux.

Vne autre fois il s'estoit logé dans vne maison, où auoient habité des personnes, qui sous les apparences d'une fausse pieté, menoient vne tres-méchante vie avec vne femme li-

bertine, cette mesme femme croyant que nostre Ecclesiastique, n'auroit pas plus de vertu que les autres, dont il occupoit la place, tasche de s'insinuer dans sa chambre, cachant son pernicieux dessein sous diuers pretextes de deuotion, de zele, de charité &c. Yvan ne découurant pas d'abord ses ruses, s'entretenoit avec elle, comme avec vne femme de vertu; iusqu'à ce que cette hyppocrite luy ayant vn iour fait connoistre sa peruerse intention, quoi que sous des paroles couuertes, il la traitta avec tant de rudesse, & de menaces, qu'elle fut contrainte de s'enfuir bien viste avec confusion; en telle sorte que depuis elle n'osa plus retourner chez lui, ny mesme paroistre en sa presence.

Ces perils auoient rendu nostre Imitateur si prudent, & si craintif, que la moindre apparence du vice contraire à la chasteté, lui faisoit peur. Aussi auoit il fait vn diuorce general avec toute sorte de femmes, filles & vefues, ne les visitant, ny receuant leurs visites, que par necessité ou par charité, lors que les affaires de Dieu, ou du prochain le requeroient. Encore leur parloit-il le moins qu'il pouuoit, sans complaisance, & pour l'ordinaire avec des paroles rudes & mortifiantes.

Il estoit si exact à euitier les entretiens inutiles avec les femmes de quelque estat ou condition qu'elles fussent, que quand il reconnoissoit après leur auoir parlé deux ou trois fois, qu'elles ne profitoient pas de son entretien, & que ce n'estoit pas par deuotion qu'elles s'adressoient à luy, mais par quelque autre motif humain; il fuyoit leur rencontre, & ne vouloit plus leur parler. Vne Dame de haute condition estant venue vn iour dans vne Eglise de ses Religieuses pour lui parler, le fit aduertir qu'elle auoit à lui communiquer quelque affaire: le Père Yvan qui la connoissoit desia, sortit en mesme temps de la Sacristie, & passant deuant elle sans la regarder, trauersâ l'Eglise, & s'alla enfermer dans sa chambre. La Dame fit de grandes plaintes, & beaucoup de menaces contre ce proceder du Pere Yvan: ce que luy ayant esté rapporté: *Il arriuera,* répondit il, *ce qu'il plaira à Dieu. Pour moy ie ne me puis résoudre de parler aux femmes sans necessité. C'est vn temps per-*

du, & une occasion de laquelle le Demon se sert pour insinuer ses tentations, ou pour donner sujet de scandale aux simples. Cette Dame aime trop à parler: ie scauois bien qu'elle n'auoit rien d'important, ny de necessaire à me dire, & qu'elle vouloit ne m'entretenir que de bagatelles. Dieu est pur & sage, il ne veut pas ces amusemens, qui ne sont que des ruses & des pieges de l'ennemy.

Sa modestie estoit si grande, qu'il ne regardoit iamais aucun fixement, & notamment les femmes. Quand il leur parloit, ou quand il estoit en leur compagnie, il tenoit les yeux bas & arrestez contre la terre, ou bien il regardoit à costé. Il estoit si reserué en ce point qu'il n'osoit pas mesme regarder leurs mains. Si bien que lors qu'il luy arriuoit de n'en auoir pas aussi tost détourné la veüe, il en demandoit pardon à Dieu, il s'en confessoit, & en faisoit penitence, comme d'un grand peché. Il auoit particulièrement cette rare modestie, quand il marchoit par les ruës; car il portoit la teste basse, les yeux contre terre, & tout son visage dans le recueillement, comme s'il eust fait oraison. En effet il disoit ordinairement son rosaire par les ruës, & par les chemins. Cest pourquoy il ne saluoit aucun, & ne rendoit le salut à personne, à moins que l'on fût auprès de lui, & qu'on l'aduertist. Comme il passoit vn iour deuant vne Dame de condition qui estoit sur la porte de son logis, sans la regarder, elle l'appellant par son nom, le pria de s'arrester; mais le pere continuant son chemin sans faire aucune réponse, la Dame s'auança dans la ruë, & l'arrestant elle-mesme par son manteau, voulut luy parler des choses indifferentes: lors le Pere se tournant vers elle sans la regarder au visage? *Que demandez vous*, lui dit il fort serieusement, *vous avez tort de ne me laisser continuer mon chemin? retirez vous, & me laissez en repos*: Mon bon Pere repliqua la Dame, *ie suis la Conseillere N. mere de la Comtesse N. Ce n'est pas le temps, ny le lieu de m'arrester*, répondit le pere, *laissez moy aller, & ne me destournez pas de mon chemin*. La Dame fut d'abord picquée de dépit de ce traitement; neantmoins connoissant le merite du pere Yvan & sa

simplicité, elle témoigna depuis qu'elle en estoit bien edifiée.

Il blâmoit grandement les Confesseurs, & les Directeurs qui se rendent complaisans & familiers à leurs penitentes, & qui n'osent les reprendre de leurs fautes, ny les humilier, loient toutes leurs actions, adherent à tous leurs sentimens, & au lieu de leur imprimer vne salutaire crainte, ils s'étudient à se faire aimer par des lâchetes & des bassesses indignes de leur caractère, & de leur autorité.

Il vsoit d'une conduite entièrement opposée à cette-cy; car sans témoigner jamais aucune familiarité à ses penitentes, il les reprenoit exactement de toutes leurs fautes, & leur en faisoit voir la griefueté sans aucune flatterie, leur résistant avec force en tout ce qu'il luy sembloit contraire à la perfection. Il les portoit à la mortification des sens & des passions, à se mépriser, au dépouillement de tout desir, & affection propre, & à l'imitation de Iesus crucifié, ainsi que l'on peut voir dans le liure de ses Lettres, dont la plus part ont esté enuoyées par luy à ses penitentes. Il n'obmettoit aucune occasion de les humilier autant que la discretion Chrestienne le luy permettoit, & à mesure qu'il connoissoit vne ame plus forte & plus vertueuse; il l'exerçoit par des épreuues plus rudes, & plus humiliantes; imitant la conduite de Dieu, qui chastie plus rigoureusement les ames qu'il trouue plus dignes de son amour.

Enfin il imprimoit par sa direction vn si grand respect à toutes ses penitentes, qu'elles ne pouuoient penser à luy, sans estre saisies de crainte; de maniere que plusieurs d'entr'elles ont auoué que la seule pensée du Pere Yvan leur Confesseur, les faisoit trembler, & leur renouvelloit le souuenir des iugemens de Dieu.

Vne de ses filles luy ayant demandé vn iour fort simplement, d'où venoit que l'on ne pouuoit penser à luy, sans auoir vne crainte respectueuse qui n'estoit pas à la confiance, & qui portoit l'ame à estre fidelle à Dieu. O Fille, répondit le Pere, que cette crainte est bonne & admirable! ie demande cette grace à Dieu pour moy, & pour mes penitentes, & ie fais ce que ie puis, pour tenir tousiours l'ame dans cette crainte, accompagnée

de confiance ; de peur de donner quelque entrée aux complaisances de l'amour propre , qui empescheroit l'esprit de Dieu , & gasteroit tout ; & pour faire mourir la chair , & le sang , qui sont les plus grands ennemis de la vraye deuotion. Ma fille, plus vous auancerez , plus cette crainte sera grande en vous.

Il a tousiours couché vestu ; non pas tant pour se mortifier , que pour estre plus chaste , fuyant autant qu'il pouuoit de voir , ou de toucher aucune nudité sur son corps. Comme il estoit suiet à des coliques pierreuses , & à d'autres incommoditez , il auroit peu souuent se soulager en portant sa main , ou faisant d'autres remedes aux parties iacommodées ; mais l'amour de la chasteté lui faisoit souffrir de grands maux , & d'horribles douleurs , plustost que de se toucher , ou de se laisser toucher par d'autres personnes.

Enfin nostre Imitateur auoit receu du Ciel vn don si singulier de continence , & il a si bien , & si fidelement conserué ; que l'on a sceu de luy sur la fin de sa vie , qu'il ne se souuenoit pas d'auoir jamais consenty à aucune pensée contre cette vertu.

L'on ne scauroit exprimer les tendresses qu'il auoit pour les vierges , ny les soins qu'il prenoit de conseruer en elles le tresor de la virginité , il leur deffendoit comme la mort , d'estre familiares à aucun , pour saint qu'il parust , & il leur deffendoit encore la conuersation du grand monde , comme vn enfer. Il vouloit qu'une vierge fust cachée & inconuue à tout le monde , qu'elle oubliast tout , & qu'elle bannist de son ame toute autre pensée , affection , & souuenir que celuy de Dieu , & de sa sainte volonté. Il le repete en diuers endroits de ses conseils & de ses Lettres , & particulièrement écrivant à vne de ses penitentes. LETTRE VII. Filles , dit-il , cachez vous dans les trous de la pierre , ne parlez que dans la necessité , & par la force de l'obeyssance. Ne vous rendez nullement familiares d'aucun , pour saint qu'il soit. Croyez moy , tout cela empesche l'Espoux ; qu'il ne vous souuienne d'aucune creature , & faites en façon que tout le monde vous oublie.

Vn iour vne des filles de la Congregation ayant donné
vn

vn Chappelet à vn Medecin qui les seruoit, & qui le luy auoit demandé avec instance ; le Pere Yvan fut si en colere contre elle, d'auoir osé donner vn present à vn homme sans sa permission, qu'après l'auoir reprise avec aigreur, & luy en auoir fait l'humiliation publique deuant ses sœurs, il la mit en penitence durant quelques iours. Vne autre fois, auant que ses filles fussent Religieuses, en ayant trouué vne à l'entrée de la ruelle du lit, d'vne personne de condition, où le maître du logis luy parloit de quelques affaires secretes, à cause que sa chambre estoit pleine de monde, dès qu'il les apperceu : *Quel scandale, s'écria-t'il, n'avez vous pas honte, Monsieur de parler à cette fille ainsi en secret ?* le Seigneur qui connoissoit le zele du Pere Yvan, ne s'en émouuant point : *Mon Pere,* répondit il, *vous sçavez bien que ie n'ay aucun mauuais dessein, ny la fille aussi. Et si ie luy ay parlé dans ce lieu, c'est esté à cause du grand monde que vous voyez dans ma chambre, parce qu'ayant à luy communiquer quelque affaire secrette pour vous la rapporter, ie n'ay point trouué d'autre endroit commode.*

Monsieur, répartit le Pere Yvan, *toutes ces raisons ne me contentent point, il faut auoir peur de scandaliser vostre prochain par le mauuais exemple. Cette fille qui est simple, croira peut estre qu'il est permis de parler à des hommes en secret, parce que vous luy avez parlé de la sorte, & elle pourroit estre trompée. Cela ne vaut rien, ie vous prie de ne luy parler plus de cette façon.* Après se tournant vers la fille qui estoit dans la confusion, & toute tremblante : *Allez,* luy dit il, *impudente, sortez d'icy, & retournez au plustost dans vostre maison, vous me la payerez.* Cette fille sortit à l'heure mesme, & se rendit chez ses sœurs le plus promptement qu'elle put, ou le Pere Yvan estant arriué aussi tost qu'elle luy fit vne tres-seuere correction deuant toutes ses sœurs.

Cette seuerité du Pere Yvan auoit imprimé vne si grande crainte à toutes ses filles, touchant la conuersation des hommes, que la seule pensée, ou souuenir d'iceux, les faisoit trembler : ainsi qu'il arriua à vne d'entr'elles, qui ayant parlé quelque fois à vn bon Religieux des choses de deuotion,

prit garde que la pensée de ce Religieux luy venoit dans l'esprit, mesme pendant l'oraison, & qu'elle auoit ie ne sçay quel desir de le voir, & de s'entretenir avec luy. Cette veüe l'ayant mise dans la peine, & dans le trouble, comme elle l'eust communiqué au Pere Yvan. Ce zelé Directeur luy fit voir que la pensée, & le desir qu'elle auoit eu de voir ce Religieux, & de luy parler, estoit si contraire à l'esprit de Dieu, & si opposé à la perfection, & que par là elle s'estoit exposée à vne occasion si dangereuse à l'auancement de son ame, que cette obeyssante fille se confirmant dans sa resolution de fuyr toute sorte de conuersation avec les hommes, comme vn tres pernicieux venin: ne voulut plus voir ce Religieux, ny en ouyr parler.

De l'amour qu'il auoit pour les souffrances, & les mortifications.

CHAPITRE XXVI.

CE seroit icy le plus long chapitre de la vie, & des vertus, du R. Pere Yvan, si ie voulois rapporter tous les témoignages qu'il a donné tant par ses actions, que ses écrits de l'estime, & de l'amour qu'il auoit pour toute sorte de souffrance, & de mortification. C'est la vertu qu'il recommande le plus, & presque la seule qu'il inculque sans cesse dans ses conseils, & dans ses Lettres, & celle encore dont il semble auoir fait vne profession plus expresse durant toute sa vie.

Ainsi écrivant à vne de ses penitentes : *Fille, luy dit il, ménagez bien ce peu de patir que Dieu vous mande pour le réjouyr, car cela vaut mieux que de ressusciter les morts, & que de conuertir tout le monde. Tout n'est rien, Lettre 4. pour le bon plaisir de Dieu en nous, que d'estre crucifiez en Croix avec son cher Fils..... Il n'y a point de Ciel point de gloire, point de felicité en ce monde, point de couronnes, que de souffrir avec nostre Seigneur. L'aimerois mieux esire, eter-*

nellement crucifié avec mon Iesus-Christ, & avec toutes les maladies du monde, que d'estre eternellement parmi les Seraphins.

Il écrit le mesme dans son autre Lettre 5. Il pousse encore plus auant l'estat qu'il faut faire des souffrances; lors qu'écrivant à vn de ses Disciples, il l'exhorte à n'estimer ny vertu ny grace, ny don quelconque, si la Croix ne s'y trouue: dans ses Lettres 48. 50. 51. & 52.

L'amour des mortifications, & des souffrances luy auoit donné vne telle aduersion pour telle sorte de plaisirs, douceurs, & consolations mesme spirituelles, qu'il n'en parloit qu'avec mépris & indignation, comme des choses honteuses, & indignes du Christianisme & comme des ruses du Demon, & des marques de la damnation eternelle. Voyez la Lettre 47.

Pour persuader combien les douceurs & les consolations sont à postposer aux secheresses, amertumes & autres peines; Il racontoit vne vision qu'une de ses filles spirituelles auoit eüe en cette sorte. [Vne fille, disoit il, de grande vertu, vit nostre Seigneur Iesus Christ au milieu de l'Autel, & deux ames à ses costez, vne à la droite & l'autre à la gauche. Ce Seigneur en caressoit vne avec des tendresses singulieres; & il rebutoit l'autre, feignant de ne vouloir souffrir ses approches, comme si elle eust esté son ennemie. La premiere iouyssoit des douceurs de son Epoux, & estoit toute remplie de consolation: la seconde au contraire n'auoit que des souffrances, estant delaissee, & ne receuant que des rebuts; neantmoins elle ne se depitoit point, & ne perdoit point courage; car elle se prosternoit aux pieds de son Seigneur, & plus elle en estoit rebutée, plus elle s'en approchoit, plus elle l'adoroit & l'aimoit, & plus elle s'efforçoit de l'embrasser, & de le caresser. *Quelle pensez-vous, adioustoit le Pere Yvan, auoir esté la plus chérie, & la plus agreable à Dieu? c'estoit la rebutée, & la mortifiée; car la carressée trouuoit son plaisir; mais la rebutée, faisoit le plaisir de son Seigneur, & non pas le sien.*]

Il confirmoit cét exemple par l'experience qu'il auoit fait luy mesme durant vn long temps.

nommément de ceux qui auoient esté punis à l'occasion des festins, comme Holofernes, Balthasar &c.

Estant assis à table, refusant de manger de diuerses viandes bien apprestées, dont on le seruoit, il se fit apporter vn oignon. & quelques fruits, & ne voulut manger autre chose. Plusieurs de l'Assemblée en murmurèrent, tous en furent mortifiés; mais la plus part s'en edifierent grandement, & à son exemple, ils firent plusieurs actes de mortification pendant le repas.

Durant le temps qu'il faisoit cette abstinence si extraordinaire, dont il est parlé dans la seconde partie de cette Histoire; vn iour de Pasques, pour tous mets delicieux, il ne mangea qu'une anchoye avec vn peu d'huile, & de vinaigre. Il a tousiours couché vestu à plate terre, ou sur des ays, ou sur vn peu de paille, iusques aux dernieres années de sa vie, qu'on l'obligea à coucher sur vn matelas.

Il laisse les diuers instrumens de penitence, dont il se seruoit, & que i'ay remarqué ailleurs, deux chaînes de fer, dont il se ceignoit étroitement les reins, vn colier dentelé, & armé de petites éguilles, dont la seule veüe donnoit de la peur, diuerses disciplines de cordes tres déliées, & de petites chaînes garnies de rosettes, dont il se maceroit avec vne extrême rigueur; quatre sorte de hayres tres picquantes, la premiere faite de deux grandes placques de fer blanc, dentelées en forme de rappe, la seconde vne cotte de maille pesant quinze liures, la troisieme vne tunique tissüe de ionc marin, & la quatrieme de crin, de laquelle il ne se seruoit que rarement, & lors qu'il estoit malade.

Enfin il auoit traité son corps avec tant de rigueur, qu'estant desia vieil, il sembloit luy en demander pardon; & vn iour estant interrogé par vn Prelat de grande vertu, s'il étoit de forte complexion? *Monsieur*, répondit il, *ie suis d'un temperament fort & robuste, mais ie me suis gasté par les penitences de ma ieunesse.* Il n'a toutesfois cessé de se mortifier iusques à la fin de sa vie; de maniere qu'on lui trouua après sa mort vne discipline maillée, dont il se seruoit encore en l'age de 78. ans. Il se plaignoit ordinairement de ce qu'il estoit

contraint de manger, de boire & de dormir, assurant qu'il n'y auoit point de rude mortification qu'il n'eust volontiers acceptée pour estre deliuré des soins de son corps. Aussi ne mangeoit il iamais sans se mortifier ; finissant tousiours ses repas avec faim ; *parce* , disoit il , *que c'estoit vne chose saine & sainte.*

Il s'estoit accoustumé dès son enfance à souffrir le froid quelque violent qu'il fût ; en telle sorte qu'il ne se chauffoit point , mesme dans la vieillesse , si ce n'est qu'il y fust obligé par condescendance : & pour lors dès qu'il s'approchoit du feu, son visage & les mains deuenoient rouges , comme du sang. Il a aduoué auant que mourir , que depuis cinquanteans, il ne s'estoit point assis à son aise , pour se mortifier. En effect ceux qui ont conuersé avec luy , peuuent se souuenir , ainsi que plusieurs ont remarqué , qu'il ne l'ont iamais veu commodement assis ; mais tousiours sans s'appuyer , ou se tenant sur le bout de la chaise , ou d'un costé seulement , ou de quelque autre maniere incommode.

A l'occasion de quoy cét homme de Dieu , disoit avec de grands sentimens de regret , & de zele : *que nous perdons beaucoup par nostre lascheté , & negligence ; en ce que sans incommoder nostre santé , nous pourrions nous mortifier en toute sorte de rencontres , & trouuer de quoy souffrir quelque chose pour Dieu : ce qui seroit d'un tres grand merite : il adioustoit , que c'estoit un des plus assurés , & des plus efficaces moyens , pour auancer en la vie deuote , & que Dieu faisoit plus d'estat de cete fidelité à se mortifier continuellement en de petites choses , que des grandes mortifications , que l'on ne souffre que rarement , & quelquesfois plustost humeur , que par amour.*

Le passe sous silence les peines d'esprit , & les persecutions exterieures , dont la vie a esté trauaillée , outre les soins extraordinaires qu'il prenoit à se bien acquitter de ses emplois ; & que de plus il estoit suiet à des douleurs & des maladies violentes , qui le tourmentoient tres-souuent ; mais qu'il enduroit avec la patience d'un Ange , de quoy en voicy vn exemple singulier.

Pendant qu'il demeueroit chez les Peres de l'Oratoire à

Aix : vne personne de pieté l'estant allé voir dans sa chambre sur les 9. heures du matin, le trouua en vn estat & posture, qu'il fut touché de compassion de ses maux, & d'admiration de sa patience. Il le trouua pale, défait, & à demy mort, gisant sur la paille, tourmenté d'une horrible colique, sans estre secouru, ny soulagé par aucun. L'excès de la douleur, & la violence, avec laquelle il resistoit; l'agitoient si fortement, qu'il en suoit à grosses gouttes, son corps en estoit tout trempé, & la sueur auoit esté si extreme, qu'ayant penetré la paille, elle paroissoit sur le plancher, comme si l'on eust répandu vne quantité d'eau. Le pauvre patient taschoit de se secher par des mouchoirs qu'il pressoit après auoir cueilli la sueur leur faisant rendre presque autant d'eau, que s'il les eust plongés dans vne fontaine. Il y auoit plusieurs heures qu'il enduroit cét horrible mal, qu'il enduroit, dis-je, avec vne force extraordinaire, & vne resignation sans exemple; puis que pouuant estre secouru par des Peres de l'Oratoire, qui logeoient en des chambres voisines, s'il les eust appelez; il souffrit tout seul sans se plaindre, sans demander du soulagement à personne, & sans mesme faire aucun bruit.

Mais quoy que toute cette Histoire soit remplie des austeritez & des mortifications de ce fidele Imitateur de Iesus souffrant; encores n'auons nous pas tout dit, & la plus grande partie nous en est inconnüe, ainsi qu'il a auoté luy-mesme à l'un de ses plus familiers : *qu'encores que l'on sceust beaucoup de choses de ses penitences, & de ses mortifications, si est-ce que l'on n'en scaura iamais la troisieme partie.* Ce qui a esté confirmé par vn Prestre de Brignoles, qui auoit esté son Disciple; lequel après auoir leu les remarques que le Pere Leon a faites dans son Eloge, touchant les penitences, & les mortifications du Pere Yuan, a attesté que cét autheur n'en auoit pas seulement touché la troisieme partie. Enfin il portoit sur soy la preuue de ses austeritez, & de ses macerations; car sa chair s'estoit tellement endurcie, que la peau auoit fait vn calus, estant deuenüe rude comme du cuir. En effet ceux qui après sa mort eurent l'honneur de le lauer, pour l'enseuelir, furent estonnez de trouuer la peau si rude qu'il leur sem-

bloit manier du bois ou de l'écaille ; ce qui estoit vne marque euidente de la rudesse avec laquelle il s'estoit traité , & de l'amour qu'il a tousiours eu pour la pratique de la mortification.

CHAPITRE XXVII.

Combien il estoit vigilant , & amy du travail.

LE travail estant vne espee de mortification , & la premiere penitence que la iustice diuine imposa à l'homme après son peché ; le Pere Yvan l'a tousiours aimé , & s'y est appliqué avec vigilance pour se rendre penitent , & mortifié en toute façon. La necessité l'auoit contraint de travailler dès sa plus tendre ieunesse , pour auoir de quoy subsister , iusques à ce qu'il fust Prestre , & que les emplois de son caractère luy fournirent des voyes plus aisées , & plus honorables pour viure : mais il a encore depuis continué à aimer le travail , & s'y addonner dans tous les emplois qu'il a eus : l'amour de la vertu , & le desir de se rendre conforme à I. Christ, n'ayant pas eu moins de pouuoir sur luy , que la necessité. La charité du prochain , le zele des ames , & la fidelité dans ses charges luy ont causé des travaux immenses ; parce qu'il a tousiours eu vne singuliere vigilance pour s'en acquitter dignement. Il auoit vn merueilleux soin de tout ce qu'il entreprenoit , & son ardeur estoit infatigable à l'accomplissement de ce qu'il auoit entrepris , travaillant nuit & iour en ce qui dependoit de luy , quand le bien des affaires le requeroit ; de maniere que l'on pouuoit librement se reposer sur luy , lors qu'il se chargeoit de quelque affaire ; parce que l'on estoit assuré qu'il ne negligeoit rien de sa part , & qu'il en prenoit tous les soins que la prudence Chrestienne pouuoit luy permettre. Aussi n'est il iamais arriué que personne ait eu iusto suiet de se plaindre de sa negligence , & il a aduoué luy mesme sur la fin de sa vie , qu'il ne se souuenoit pas d'auoir iamais

mais esté surpris par aucune affaire ; parce qu'usant de preuoyance , il se trouuoit tousiours préparé , quand il falloit agir.

Il a esté tres diligent toute sa vie à se leuer de grand matin en tout temps ; encore qu'il eust esté contraint de se coucher fort tard , & qu'il se leuast ordinairement à la minuiet pour faire son Oraison. Il estoit tousiours le premier leué dans ses voyages , pour auoir loisir de dire son Office , & celebrer la Messe auant l'heure du départ. Et quand il auoit quelque chose à faire avec diuerses personnes , il estoit tousiours le premier en besogne , & celuy qui sollicitoit les autres à travailler. Quoy qu'il demeurast dans vne maison éloignée de celle deses filles , auant qu'elles fussent Relligieuses , il estoit neantmoins chaque iour , dès les quatre heures du matin , & encore plutôt à la porte de leur logis , afin de pouruoir à leurs affaires , & les exciter par son exemple à estre diligentes. Si bien que les Paysans qui ont accoustumé dans Aix de s'aller louer à la place publique pour la culture des champs , dès le grand matin auant le iour , s'estonnoient de rencontrer le Pere Yvan dans les rues , dès qu'ils sortoient de leur maison ; se disans les vns aux autres : *Voyez quelle est la diligence de ce bon Pere ; il se leue plus matin que nous ; pour aller faire de bonnes œures , encore qu'il püst dormir à son aise.*

Il a continué toute sa vie dans la mesme diligence , non obstant qu'il fust vieil & infirme ; de façon que le iour mesme qu'il mourut , il se leua auant quatre heures du matin , pour faire son Oraison. Surquoy vne de ses Relligieuses luy ayant fait des plaintes , de qu'il continuoit de se leuer si matin estant vieil , foible & infirme , & qu'elle apprehendoit qu'il n'en fust incommodé ; *Ma fille*, répondit il , *ie ne sçauois faire autrement. Il faut mourir en priant Dieu ; car présentement ie ne pourrois faire que cela.* Il eut vn quart d'heure après l'accomplissement de son desir , mourant dans la priere , ainsi que nous dirons.

Sa diligence consistoit encore à bien employer le temps , s'occupant vtilement , & avec merite , ou dans les fonctions de sa charge , ou dans les exercices de sa deuotion , & de sa

charité , ou dans quelque occupation manuelle . Vne des vertus qu'il a pratiquées plus fidelement , pendant sa vie , a esté la fuite de l'oisiueté par vn continuel trauail ; car outre que son esprit estoit tousiours occupé en Dieu , il appliquoit son corps sans relasche à des œuures exterieures ; si bien qu'on ne pouuoit entrer dans sa cellule , pendant qu'il a esté solitaire , & dans ses autres employs , quel'on ne le trouuaست occupé en quelque chose : lire , écrire , estudier , peindre , grauer , faire quelque penitence , ou chose semblable , c'estoient ses emplois ordinaires.

Il dépeignit pendant sa solitude diuers Tableaux de deuotion pour diuerses Eglises , Chappelles & maisons particulieres . Il graua pendant ce temps là diuers moules , des Images de Iesus-Christ , de la sainte Vierge , des Saints & autres ; & continuant d'exercer ces deux arts de peindre & de grauer le reste de sa vie , il s'y addonnoit dès qu'il auoit quelque moment de loisir , & qu'il ne pouuoit vacquer à ses autres occupations plus serieuses.

Il semble mesme qu'il aimoit le trauail avec quelque sorte d'excés ; puis qu'il trauailloit sans prendre aucun repos , lors mesme qu'il luy estoit necessaire . Ainsi on l'a veu plusieurs fois arriuer dans sa chambre , venant de bien loin , tout harassé , & mesme mouillé ou de sueur , ou de pluye , & aussitost qu'il estoit arriué , sans se donner aucun moment de repos , prendre vn liure ou vn pinceau , ou vn burin , ou quelque autre chose pour s'occuper.

Tout son relaschement consistoit à se promener quelques fois , encore estoit il occupé ; car en se promenant il recitoit son Chapelet , ou il ruminait quelque belle sentence de l'Ecriture , ou il composoit des Cantiques spirituels , touchant ses desirs de s'vnir étroitement à Dieu , les difficultez qu'il y trouuoit , & semblables matieres . Nous auons vn de ses Cantiques qu'il chantoit luy mesme pendant qu'il peignoit , ou qu'il grauoit , qui en des termes rudes & grossiers contient les plus belles maximes de la Theologie mystique . Enfin il a aduoilé luy mesme qu'il aimoit tant le trauail , qu'il croyoit que ses Religieuses auroient de la peine de trouuer après sa

DV VENERABLE P ANTHOINE YVAN. 551
mort des Directeurs qui trauaillassent si volontiers que luy.
Elles en auront, disoit-il; de plus pieux, & de plus doctes que moy, mais ie ne pense pas qu'elles en ayent de plus laborieux.
Nous pouuons adiouster, qu'il a voulu laisser cette vertu pour heritage à ses Religieuses; leur ayant ordonné le trauail manuel, comme vn des poincts essentiels de leur Institut.

CHAPITRE XXVIII.

De son silence.

LE silence n'est pas vne mortification moins austere, que le trauail continuel; parce que si nostre nature nous porte à faire peu, pour viure dans l'oisiueté, & dans la mollesse; elle nous induit à parler beaucoup, pour contenter nostre curiosité, & nous diuertir par les entretiens familiers. Nostre Imitateur suivant les routes de la grace, qui sont opposées à celles de la nature, occupoit incessamment ses mains, & faisoit souuent reposer sa langue. Il faisoit vn si grand cas du silence, qu'il en proposoit la pratique, comme vne vertu entierement necessaire aux ames qui aspirent à la perfection. Ainsi que l'on peut voir dans ses liures.

Mais ses œuures estans conformes à ses paroles, il pratiquoit fidelement le conseil qu'il donnoit aux autres, touchant l'amour de la solitude & du silence, la fuite des compagnies & des entretiens superflus; car il a vescu si Religieux à garder le silence, que s'estant déclaré ennemy des grands Parleurs, il a tousiours tasché d'éuiter leur conuersation, & il parloit luy mesme si peu à si peu de personnes, & de si peu de choses; qu'il viuoit au milieu des grandes villes, avec autant de recueillement, que s'il eust esté dans vne vaste solitude au milieu d'une grande forest. Il n'y auoit que la necessité, le zele de la gloire de Dieu, & la charité du prochain qui le fissent parler: entore estoit il pour lors si reser-

ué dans ses discours , qu'il s'estudioit à ne dire précisément que ce qu'il iugeoit nécessaire. Enfin cét amour de la solitude, & du silence le porterent, à quitter la charge de Curé qu'il exerçoit dans Cotignac , pour se retirer dans l'hermitage de S. Roch de Rians : ou il a vescu en hermite durant dix années, & où il auroit passé le reste de ses iours, si la Prouidence diuine , qui le destinoit à d'autres emplois, ne l'eust obligé d'en sortir.

C'est icy particulièrement, que nostre solitaire fit vne profession authentique de peu parler ; car craignant d'estre obligé à rompre le silence par la rencontre de quelques personnes, il se tenoit presque tousiours enfermé dans son hermitage, & quoi que plusieurs personnes desirassent conferer avec luy, attirés par la haute estime qu'ils auoient conceuë de sa vertu, neantmoins il ne sortoit point de sa cellule ou de sa Chapelle, ou du bois voisin, qu'il n'y fust contraint par quelque pressante necessité, ou poussé par les mouuemens de la charité Chrestienne.

Il alloit souuent visiter les malades de l'Hospital du bourg prochain, pour les consoler , & leur distribuer quelque aumosne ; mais il exerçoit ces œuvres de Misericorde à la hâte, & comme s'il eust esté fort pressé de retourner au plutôt dans sa cellule ; de maniere que dès qu'il auoit acheué son œuvre, il retournoit à son hermitage avec diligence marchant les yeux bas & profondement recueilli en la presence de Dieu, sans parler à aucun, & mesme sans saluer ceux qu'il rencontroit par les chemins ; de peur d'estre contraint à rompre le silence.

Estant obligé de celebrer la Messe tous les Dimanches, & festes pour les freres Penitens du Bourg, qui luy auoient fait bastir sa cellule, & luy donnoient de quoy s'entretenir, comme il ne pouuoit euitier par fois de parler a eux pour répondre, ou pour demander les choses necessaires, quand cela arriuoit, il parloit à si peu de personnes, & en si peu de paroles, que les moins deuots le faisoient passer dans leur esprit & dans leur entretien pour vn homme sauuage ; tandis que les plus esclairez le regardoient comme vn homme du

Ciel, qui ne vouloit s'entretenir des choses de la terre, & qui estant détaché des creatures, viuoit absorbé dans la contemplation du Createur.


Encore estoit il fâché d'estre exposé à la veüe, & aux visites des personnes du monde, & il auroit bien voulu se cacher en quelque lieu desert, à l'exemple de S. Antoine, ou dans quelque caverne à l'imitation de S. Benoist. Pour cét effet il prenoit vn plaisir singulier, de voir rompre, & remuer de grands rochers; esperant d'y trouuer quelque lieu souterrain pour y faire sa demeure. Il en chercha mesme en diuers endroits, avec quelques Ecclesiastiques qu'il auoit attiré par son exemple, & ayant trouué dans vn coin du terroir de Rians, appelé Montmajour, vne grotte souterraine que l'on nomme des rousles, dont l'entrée est fort étroite, & le dedans fait en forme d'une Eglise, il voulut s'y arrester; mais le Seigneur permit qu'on l'en détournast; parce que sa santé auroit esté en peril danc ce lieu là, qui estoit tres froid & tres-humide.


Enfin il s'exerça si bien à garder le silence, pendant le temps qu'il fut hermite, qu'il en a fidelement conserué la pratique le reste de sa vie; lors qu'il eut repris les fonctions Ecclesiastiques dans le seruice des Autels, & la conduite des ames. Ainsi il a tousiours fuy, autant que la discretion Chrestienne le luy permettoit, de faire des visites dans les maisons seculieres, & particulierement des personnes riches & puissantes, qui ne luy laissoient pas la liberté de s'en retirer aussitost qu'il l'eust voulu. On ne l'a iamais ouy demander ou raconter des nouuelles indifferentes, qui ne regardoient point la gloire de Dieu, ny le bien du prochain; & bien loin de témoigner de la satisfaction, quand on parloit en sa presence des nouuelles qui ne seruent qu'à contenter la curiosité; il auoit de la peine d'en souffrir l'entretien: en sorte que ie l'ay souuent veu en de semblables rencontres, ou imposer le silence à ceux qui parloient, quand il auoit authorité sur eux, ou proposer quelque discours de pieté, ou se retirer insensiblement de la compagnie.

Ce mesme amour du silence, & de la solitude le portoit à

demeurer seul dans sa chambre, ou dans l'Eglise aussi long temps qu'il pouuoit ; ayant tousiours témoigné de la peine à recevoir des visites dans sa chambre, à moins qu'elles fussent nécessaires, ou pour des suiets importants. Encore taschoit il de renvoyer au plustost ceux qui le venoient voir, leur donnant librement congé, ou leur faisant connoistre par son silence, qu'il desiroit estre seul. Il gardoit mesme le silence, lors qu'il alloit par les ruës ; comme j'ay desia remarqué, marchant pour ce suiet les yeux contre terre, pour n'estre obligé de regarder personne, & de donner ou recevoir les saluts ; si ce n'est des petits enfans qui se presentoient à luy, pour baiser ses mains, & luy demander sa benediction.

Peu de temps avant son decés vn vertueux Prestre l'estant venu visiter, comme il le trouua, sortant de la priere, il luy demanda familièrement qu'est ce que Dieu luy auoit dit, *Dieu est sage*, répondit le Pere Yvan, *il parle fort peu*. Environ ce mesme temps, les Religieuses l'ayant fait appeller à la grille de la Sacristie pour leur faire conference touchant le suiet qu'elles deuoient considerer dans la retraite : *Mes filles*, leur dit il, *adorez le silence, que Dieu a gardé durant l'éternité, meditez le, aymez le. O que ce silence est estonnant, & plein de merueilles !* Il dit ces paroles d'un ton de voix si animé, & d'une maniere si touchante, qu'il parut bien qu'il estoit ému par quelque communication extraordinaire de l'esprit de Dieu. En effet perdant la parole il fut contraint de se retirer ; si bien qu'il alla se mettre en vn coin du Sanctuaire de son Eglise ; pour s'abandonner aux larmes & mouuemens de l'esprit diuin, & contempler ce mesme silence, qu'il venoit de proposer à ses Religieuses.





CINQVIE'ME ET DERNIERE PARTIE.

DE L'LIMITATEVR
DE
IESVS-CHRIST,
OV
DE LA VIE


DV V. P. A. YVAN,
PRESTRE ET FONDATEVR &c.

De ses graces extraordinaires, de ses dons
gratuits, & de sa mort.

P R E F A C E.

Quoy que le don de Prophetie , le discernement des esprits , la vertu des guerisons , l'operation des merueilles , & les autres graces gratuites , ne soient pas tousiours des marques assurees , de la sainteté de ceux à qui Dieu les departe ; puis que l'Ecriture nous enseigne que Balaam & Cayphe ennemis de Dieu ont prophetisé : neantmoins ces faueurs extraordinaires,

nous doiuent confirmer dans la haute estime des personnes, dont la vie, estant d'ailleurs accompagnée d'innocence, & des plus eminentes vertus, se trouue encore enrichie de ces talens surnaturels. Aussi voyons nous, que les Historiens des vies des Sain's, ont tres soigneusement remarqué ces graces, dans les personnes, dont ils nous rapportent les actions. Et mesme le Sauueur de nos ames a bien voulu, que les Euangelistes qui nous ont escrit ses œuvres, & ses enseignemens, nous ayent pareillement recité les merueilles, qu'il a operées par la confirmation des vns & des autres. De maniere que c'est icy le dernier trait de la ressemblance du venerable Pere Antoine Yvan, avec son Diuin Original. Car il n'a pas seulement imité dans ses actions, & inseré dans ses escrits les vertus que Iesus-Christ nous a enseignées par ses exemples, & par ses paroles : mais encore il a participé à plusieurs dons gratuits de cet adorable Sauueur : les memoires de sa vie estans pleines de Propheties qu'il a faites, de marques qu'il a données du discernement des esprits, & de semblables graces, dont le Ciel l'auoit enrichy. C'est ce qui est rapporté dans cette derniere partie, qui finit par le recit de sa mort, & de quelques merueilles arrivées depuis son decez.



CHAPITRE I.

De ses extases & ravissements.

'Exercice auquel nostre pieux Ecclesiastique s'est addonné avec plus d'assiduité, & de ferueur, a esté celuy de l'Oraison. Il commença de s'y appliquer dès ses premieres années, lors qu'il estoit au seruice des P P. Minimes du lieu de Pourrieres; ainsi qu'il est rapporté dans la premiere partie de cette Histoire. Il y a fidelement perseveré le reste de sa vie dans tous les diuers emplois qu'il a eus iusques à sa mort, avec tant de bon-heur qu'il est decedé en faisant l'Oraison. L'on ne scauroit declarer les graces singulieres que le Seigneur luy a départies par cette celeste occupation. C'est par cette voye de lumiere & de feu, qu'il receuoit les hautes connoissances, dont son esprit estoit esclairé & les pures flammes de l'Amour diuin, dont son ame estoit embrasée. C'est l'oraison qui l'encourageoit à entreprendre les grandes choses qu'il a faites pour la gloire de Dieu & le bien des ames. Enfin c'est par l'Oraison, & dans l'Oraison que s'élevant au dessus de toutes les creatures, il estoit parvenu à la parfaite vnion avec Dieu, & auoit esté fauorisé des dons & graces, que nous admirons dans sa vie & entre autres des extases & ravissements.

Il estoit tousiours profondement recueilli en la presence de Dieu, soit qu'il marchast, qu'il trauaillast, & mesme quand il prenoit sa refection. On la veu souuent si abstraite en Dieu qu'il n'oyoit presque rien de ce qu'on disoit; de telle sorte qu'il se faisoit violence, pour répondre à ce qui luy estoit proposé. Parfois s'occupant à grauer des planches ou à peindre des Images de la S. Vierge, il estoit si absorbé en la contemplation des choses diuines, que le burin, ou le pinceau luy tombant des mains, il demouroit quelque espace de temps immobile, & comme rauy: après quoy son visage paroissoit tout changé, & sa voix si foible, qu'il auoit de la peine à parler. D'autrefois estant à table il perdoit le manger, &

estoit contraint de se leuer, & se retirer en quelque coin pour adherer aux mouuemens de l'esprit de Dieu, qui se communiquoit à luy par de douces & puissantes impetuositez.

Vne personne de qualité accompagnée de plusieurs domestiques, l'ayant vn iour visité dans sa solitude ; lors qu'il demouroit à l'hermitage de saint Roch, & trouuant sa cellule fermée, le chercha dans le bois, où elle le trouua au pied d'un arbre, faisant oraison, mais d'une maniere qui donna de l'admiration à tous ceux qui estoient presens. Ce deuot Prestre estoit à genoux, les mains jointes, les yeux & tout son visage dans vn profond recueillement : on l'appella diuerses fois par son nom, sans qu'il répondist ; on le tira par la soutane, & par le bras, & on vint même de quelque violence pour le faire reuenir à soy. Mais enfin comme on reconneut qu'il estoit absorbé, & ravi en Dieu, cette Dame, & ses gens s'arrestèrent là avec respect, iusques à ce que le ravissement finy, il eust la liberté d'ouyr, & de parler.

Vne autre fois faisant du pain à chanter, il tenoit les moules sur le feu, lors que tout à coup étant preuenü par vne affluence de grace, son corps demeura immobile, & son visage deuint lumineux & ardent, comme s'il eût esté enflammé. Vne vertueuse fille qui estoit presente, & qui luy auoit, prenant garde à ce changement, & ne sçachant ce que c'estoit, se prit à crier, à l'appeler fortement par son nom, & à le tirer par le bras. Mais le Pere ne répondant rien, & ne donnant aucune marque de vie, cette innocente fille se prit à pleurer, & à se plaindre, craignant qu'il ne fût tombé dans quelque dangereux accident. Enfin, après auoir attendu quelque temps continuant à pleurer, à crier, à l'ébranler, elle estoit sur le point d'appeller du monde, quand le Pere reuint à soy ; qui apperceuant l'émotion de la fille ; *Mon enfant*, luy dit-il, *pourquoy pleures tu, & quel est le sujet de ton apprehension ?* *Mon bon Pere*, repartit la fille, *que ne répondez vous, lors que ie vous appellois, ou que ne me faisiez vous quelque signe, pour m'oster la crainte que j'auois qu'il ne vous fust arrivé quelque mal ?* Le Pere changeant de discours, voulut cacher la grace que Dieu luy auoit faite ; mais la fille le pressa si fort par ses prieres, & par ses larmes qu'il luy raconta simplement,

comment il auoit esté rauy, & que le grand S. Michel luy é- tant apparut en esprit, luy auoit déclaré de la part de Dieu, plusieurs choses importantes, touchant l'Ordre de ses Reli- gieuses qu'il entreprenoit; & l'auoit assuré qu'il en seroit le Protecteur. La fille fut confirmée dans la croyance qu'elle adiousta aux paroles du Pere Yvan, par la reflexion qu'elle fit, & que la crainte l'auoit empêchée de faire auparauant; que pendant qu'il estoit rauy, elle auoit apperceu vn esclat extraordinaire sur son visage, & senty la presence de ie ne sçay quoy, qui auoit imprimé dans son ame vn tres grand respect, & parfumé la chambre d'une odeur extraordinairement suuue.

Nostre feruent Ecclesiastique auoit eu plusieurs autres fois de semblables rauissemens, dans lesquels l'esprit de Dieu luy manifestoit la volonté, & luy découuroit plusieurs importants secrets, touchant sa conduite, ou celles des personnes qu'il dirigeoit. Parmy ses extases; l'esprit de Dieu l'auoit quelques fois eleué en l'air vne toise sur terre, où il auoit demeuré soustenu dans cette eleuation, iusques à ce que le Tout Puissant retirant son concours extraordinaire, il retomboit insensiblement à terre, se trouuant debout ou à genoux, en la mesme posture qu' auparauant.

Parlant vn iour avec quelques vns de ses disciples de ces graces gratuites, il leur témoigna, qu'il n'en auoit iamais receu, qu'il n'en eust senti vne tres sensible affliction, & vne tres grande crainte, comme de choses tres suspectes, & exposées aux illusions du Demon, & qu'à cette fin il auoit long temps prié Dieu, & la sainte Vierge de l'en exempter, ou les luy changer en de salutaires humiliations. En effet il n'eut ces dons que tres rarement, après qu'il eut quitté son hermitage; de maniere qu'il nous a souuent auoué que Dieu l'auoit conduit le reste de sa vie, par des lumieres interieures, & par de grandes veritez de la foy, & de l'Euangile: lumieres & veritez qu'il estimoit d'autant plus assurées & salutaires, qu'elles operent; disoit il, de plus grands effets dans les ames, & sont plus éloignées des artifices de l'ennemy. Neantmoins sur la fin de ses iours, les forces de son corps se

diminuant , celles de son ame sembloient s'augmenter; car il vacquoit à l'Oraison avec tant d'application qu'il y employoit plus de temps que la foiblesse de son age ne luy permettoit , & il y estoit si absorbé qu'on auoit de la peine à le faire reuenir à soy ; ainsi que ses Religieuses de la Misericorde ont remarqué à Auignon , & à Paris , où il a passé ses dernières années

Estant dans Auignon la nuit de la veille de S. Ioachim ; après auoir fait collation , il entra sur les six heures dans l'Eglise de ce Monastere , pour faire ses prieres deuant l'Autel de ce grand Patriarche. Il auoit dessein d'en sortir bien tost pour se retirer dans sa chambre ; parce qu'il faisoit grand froid & que d'ailleurs il estoit incommodé ; mais ayant voulu considerer les grandeurs de ce glorieux Saint , il s'y appliqua de telle maniere , que perdant le souuenir de toute autre chose , mesme le sentiment du froid , il y demeura à genoux , & la teste decouuerte iusques à neuf heures , sans se remuer. Il y auroit peut estre passé le reste de la nuit , s'il n'en eust esté détourné. - Car la Tourniere qui auoit soin de luy , ne l'ayant point rencontré à sa chambre , ny ailleurs , où elle l'auoit cherché , le trouua dans l'Eglise , mais s'y appliqué qu'elle eut de la peine à le faire reuenir à soy. La Superieure luy fit des plaintes de ce que demeurant si long temps à genoux , & la teste nuë pendant le froid & le serain , il se mettoit en danger de tomber griefuement malade. Le deuot Prestre ne luy répondit qu'en s'humiliant comme vn Nouice , & se rerira dans sa chambre , tout confus de ce qu'on l'auoit apperceu en cét estat.

Il luy estoit souuent arriué le semblable dans Paris ; car comme il se tenoit presque tout le long du iour deuant le saint Sacrement de l'Autel , dans la Chapelle de ce Monastere ; il s'appliquoit si fortement , qu'on auoit de la peine à le rappeller à soy , quand quelqu'un vouloit entrer dans la Chapelle , dont il gardoit les clefs , ou quand ses Religieuses l'appelloient par la cloche , ou autrement à la grille du Chœur , ou de la Sacristie , qui sont fort proches au lieu où il faisoit son oraison. Heureuse vieillesse de ce grand homme , qui se consummoit en silence dans les communications avec Dieu ,

DV VENERABLE P. ANTOINE YVAN, 561
tandis que la plus part des vieillards sont grands parleurs,
& perdent vainement le temps en des entretiens inutiles,
& souuent ridicules.

CHAPITRE II.

Apparitions de la sainte Vierge.

LE Pere Yvan traualloit à faire des Images du S. Esprit, pour les distribuer à ses Religieuses, & à d'autres personnes de piété, aux festes de la Pentecoste ; lors que se sentant attiré au recueillement d'une façon extraordinaire, il se leva soudain, & alla se cacher en vne chambre voisine, pour n'estre apperceu de ceux qui estoient avec luy. Il fut ravi, & pendant son ravissement, Nostre Seigneur luy apparut accompagné de sa tres-sainte Mere sur vn char de nuës éclatantes ; & quelque temps après luy apparurent aussi les premieres filles de l'Ordre de Nostre Dame de Misericorde, qu'il auoit nouvellement fondé. Le Fils, & sa sainte Mere enuifageant ces filles d'un regard doux & fauorable, la sainte Vierge leur donna des tendresses de Mere & de nourrice ; car elle ouurit son sein, & pressant ces chastes mammelles, elle répandit abondamment sur elles de son sacré lait. La vision disparuë, nostre pieux Ecclesiastique demeura rempli de crainte, & de confusion, ne sçachant d'abord ce que cela signifioit ; mais ayant derechef recours à la priere, Nostre Seigneur luy fit connoistre[que c'estoit vn témoignage du soin, que la sainte Vierge auroit de proteger son nouuel Institut, contre les oppositions de l'ennemy, & qu'ainsi il ne deuoit rien apprehender, ains auoir bon courage, & continuer avec confiance ce qu'il auoit commencé.]

Cette apparition produisit en suite de si grands effets dans l'ame du Pere Yvan, que pour en conseruer le souuenir, & laisser vn monument authentique de sa gratitude, il la graua sur vne planche de bois, de la façon qu'elle estoit ar-

Zzz iij

riuée: il la'graua, dis ie, avec tant de diligence, qu'il laissa toutes ses autres occupations, iusques à ce que l'ayant acheuée, il en tira des Images qu'il distribua à ses Religieuses leur expliquant ce qu'elle signifioit, & les excitant à se rendre dignes filles de la sainte Vierge, en reconnoissance de ce qu'elle vouloit estre leur Mere. On conserue avec respect cette planche dans le Monastere des mesmes Religieuses d'Aix, comme vn illustre monument de la protection de la Mere de Dieu enuers leur Ordre.

Quelques années auparauant, quand il voulut entreprendre la Congregation des filles de Nostre Dame de Misericorde, comme il craignoit d'estre trompé, & que preuoyant les furieuses contradictions dont il seroit assailly, il apprehendoit de n'estre pas assez fort; estant en oraison, la sainte Vierge s'apparut à luy, toute resplendissante, qui après auoir dissipé sa crainte, le fortifia par ces paroles qu'elle luy dit. *Tuan, mon fils, ne crains point d'estre trompé dans le dessein de l'ordre des Religieuses, que l'on te propose sous le nom de ma misericorde. C'est l'ouurage de mon Fils & le mien. Je t'ay choisi pour y travailler: ayes bon courage, car ie te protegeray.* La vision disparuë, nostre bon Prestre se trouua grandement consolé, & fortifié. Il est vray qu'il ne laissa pas d'apprehender, & se défier de soy, & des autres personnes qu'il falloit employer, parce qu'il craignoit tousiours. Il luy resta neantmoins vne assurance interieure, forte, & inébranlable, que l'affaire s'acheueroit, nonobstant toute sorte d'opposition; puis que ce n'estoit pas l'ouurage des hommes, mais de Dieu, & de la sainte Vierge. En effet quand on luy en parloit du depuis, il faisoit cette réponse: *si le dessein est du Pere Tuan, il sera destruit, & aneanti; mais s'il est de Dieu, & de sa sainte Mere, il s'acheuera, & sera permanent.*

Lors que la ville d'Aix estoit dans ses plus grandes calamitez, & que les troupes du Gouverneur de la Prouince s'approchoient, menassant de la mettre au pillage. Nostre charitable Prestre, qui depuis long temps faisoit des vœux, & des prières pour la conseruation de cette ville, dans laquelle il auoit commencé l'establissement de son ordre, fut consolé par

cette vision mystérieuse. La Reine des Cieux luy apparut avec vn visage serein & Majestueux, courrant de son manteau Royalla ville d'Aix, & la deffendant des attaques des ennemis. Il conneut aussi tost par cette vision, que la Mere de Misericorde auoit pris cette ville sous sa protection, & la vouloit garantir des maux dont les ennemis la menaçoient. Pour confirmation de cette apparition, & afin que l'on en conseruast le souuenir, la sainte Vierge commanda au Pere Yvan d'en faire faire vn tableau, où elle fût représentée en la façon qu'il l'auoit veüe. L'euénement monstra la fidelité des promesses de la Reine des Cieux; car les troupes du Gouverneur ayans pillé tous les lieux circonuoisins ne furent pas plustost campées deuant la v. l. e d'Aix, qu'on les fit retirer par le traité de paix qui fut conclu, suivant les ordres que le Roy auoit enuoyez; par lesquels les habitans de cette ville furent deliurez de leur crainte, & recouurerent leur liberté, au moment qu'ils apprehendoient d'estre saccagez.

CHAPITRE III.

La Mere de Dieu le protege singulierement.

Pendant qu'il demeueroit dans l'hermitage de S. Roch. dont nous auons parlé en la premiere partie, il peignoit vn iour le Ciel de sa Chapelle, representant la sainte Vierge qui tenoit le pied sur le Demon; lors que cét ennemy faisant éclatter la rage qu'il auoit contre luy, le poussa avec furie, & le precipita du plus haut eschaffaut contre vne grille de fer, qui estoit à la fenestre, au bas de la Chapelle. Ceux qui estoient presens, voyant sa cheute, s'écrierent de frayeur, croyant que il se seroit cassé la teste: neantmoins il ne receut aucune incommodité, & se trouua aussi sain, & entier apres cette cheute qu'auparauant. Estant depuis interrogé comment est-ce qu'il estoit cheu de si haut, & avec tant de roideur contre des barreaux de fer, sans auoir receu aucune blessure.

ie ne puis , répondit il , attribuer ma cheute qu'à la malice du Demon , & ie dois ma conseruation au secours de la Mere de Dieu. i'estois assez bien logé pour ne pas tomber , mais i'ay senti ie ne sçay quoy qui m'a entoué de ma place , & m'a precipité. avec furie : & ayant d'abord imploré l'assistance de la sainte Vierge : i'ay senti aussi le secours de son bras , qui m'a soutenu & accompagné iusques à terre , sans nulle lésion , ny autre incommodité.

Vne autre fois grauant sur le cuiure vn crus , pour en tirer des Images de Nostre Dame de Misericorde , ce qui estoit son occupation ordinaire aux heures de recreation , le burin en glissant , se ficha bien auant dans sa main , & luy fit vne grande blessure. Outre la douleur qu'il sentit , il conceut vne sensible affliction de ce que la playe estant profonde , il apprehenda que quelqu'un de ses nerfs fût offensé , & qu'en suite il ne pût plus se seruir de sa main pour continuer son travail à la Sainte Vierge. Cette consideration luy faisant souhaitter la guarison , il banda sa playe avec vn linge , & s'en alla viste deuant l'Image de Nostre Dame de Misericorde dans la Chapelle de son Conuent. Où estant arriué il découvrit sa playe , & la montrant à cét Image avec vne simplicité enfantine , & vne confiance filiale : *Bonne Mere de Dieu dit il , ie viens de recevoir cette playe à vostre occasion , en travaillant à des moules pour vous faire honorer : s'il vous plaist que ie continuë ce travail , il faut me guarir , autrement ie ne le pourrois pas. ie vous demande cette grace , si telle est vostre volonté , & celle de vostre Fils.*

Après cette priere prenant del'huile de la lampe , qui brûle deuant l'Autel , il en oignit sa playe , en y faisant dessus le signe de la sainte Croix , & recitant quelques prieres vocales. Nous pouuons dire que sa priere fut efficace & que Dieu recompensa sa foy & sa simplicité , puis que sa playe se trouua en mesme temps guerie entierement ; si bien que s'en estant apperceu , il en rendit tres-humbles graces à sa bienfaitrice , & retournant dans sa chambre , il continua l'ouura-ge qu'il auoit commencé.

Rencontrant vn iour enmy la ruë vn ieune enfant de condition

dition, qui prononçoit des paroles libertines, & faisoit des actions dignes de blasme, il le reprit premierement avec douceur : mais comme cét enfant continua avec opiniastreté & insolence, il le menaça; & se croyant obligé d'vser de rudesse, il le frappa si legerement avec le bout de la manche de sa robe de chambre, qu'il ne le toucha presque pas; à cause qu'il s'en fuit. Neantmoins ce petit libertin se prit à crier de toutes ses forces, & a se plaindre malicieusement, que le Pere Yuan l'auoit rudement battu, & avec colere. Les parens accourent, & aueuglés par l'affection de leur enfant, sans examiner si ses cris estoient iustes, & ses plaintes raisonnables, ils s'emportent furieusement contre nostre bon Prestre, le chargent d'iniure, & luy font de terribles menaces.

Ce patient Ecclesiastique voyant que les personnes qui l'iniurioient n'estoient pas en estat d'oïr ses iustifications, escouta paisiblement leurs reproches, sans respondre vn seul mot; & s'en alla dans sa chambre : ou estant arriué, apres s'estre profondement humilié deuant Dieu, & luy auoir demandé pardon de l'occasion qu'il auoit donné, quoy que innocenment, à ses personnes là de se mettre en colere, il s'adressa à la sainte Vierge, & la supplia de leur faire connoistre la verité de la chose, & d'apaiser leur courroux. Il apprit quelque temps apres, que ces mesmes personnes croyant qu'il auoit voulu les mespriser en la personne de leur enfant, estoient de plus en plus irritées, & vouloient se seruir de leur autorité & puissance, pour luy susciter de facheuses persecutions. Il eut derechef recours à la Reyne des Cieux sa protectrice; & celebrant la sainte Messe à son honneur, il luy recommanda avec son ordinaire confiance cet affaire, & les suites qu'elle pouuoit auoir. Enfin la sainte Vierge exauce les prieres de son seruiteur; car après la Messe, ces personnes se trouuerent si touchées de regret d'auoir creu leur enfant, & des'estre emportés contre le P. Yuan qu'elles vinrent le trouuer, & luy demanderent pardon des iniures qu'ils luy auoient dites, & des mauuais desseins qu'ils auoient eus contre luy. Ils le remercierent mesme de la correction qu'il auoit faite à leur enfant, & furent depuis de ses meilleurs amis.

CHAPITRE IV.

Connoissances extraordinaires.

ENtre ceux qui ont eu des connoissances extraordinaires, les vns ont découuert les choses passées, mais secreites, ainsi que Moyse a décrit la creation du monde; les autres ont déclaré les choses presentes & inconnuës, comme Elisée manifestoit les embusches du Roy des Assyriens; & les autres ont reuelé les choses futures, qui dépendent de la seule volonté de Dieu, telles qu'estoient les reuelations des anciens Prophetes, touchant la venuë du Messie. C'est suiuant cét ordre, & cette différence du temps, que ie diuise les connoissances de nostre Imitateur.

L'esprit de Dieu luy auoit souuent fait connoistre les pechez de ceux qui s'adressoient à luy; en suite dequoy ce prudent Confesseur, faisoit souuenir les penitens des fautes qu'ils auoient commises & oubliées. Et quand il auoit que les penitens n'osoient pas s'accuser de leurs pechez, ou qui les deguisoient par honte, ou autrement, il les portoit suauement à les declater; car il les luy manifestoit luy mesme, leur indiquant le temps, le lieu, & les autres circonstances de leur peché; de maniere que par ce moyen il les conuoit fortement à aduoüer la verité, & les incitoit à produire des actes de contrition; non seulement pour auoir offensé Dieu, mais encore pour n'auoir osé s'en accuser humblement & sincerement.

Vne personne de condition luy celoît vn iour en se confessant, quelques vns de ses grands pechez, tant par honte, que par crainte d'en estre reprise. Cét esclaire Confesseur penetrant l'estat de sa conscience, & la peine qu'elle auoit à se decourir, luy demanda, après qu'elle eut acheué de s'accuser; si elle ne laissoit aucun peché à dire, & s'il n'y auoit plus rien dans son ame, qui la troublast; luy proposant diuers motifs, tirez de l'importance du Sacrement, de la Misericorde,

& de la Iustice de Dieu, & semblables : pour l'encourager à decouvrir les blessures mortelles de son ame. Enfin, comme elle perseueroit à couvrir ses playes, nostre zelè Prestre, touché de douleur, & de compassion de l'estat déplorable de cette personne: *N'avez vous pas honte, luy dit-il, d'abuser du sang, & des merites de Iesus-Christ, & de vouloir tromper Dieu, en me celant vos pechez ? ne craignez vous point que Dieu vous abandonne entre les mains du Demon ? Qui vous a promis que vous aurez le loisir de faire vne autre confession, & que vous ne mourrez pas damnée après celle-cy ; en laquelle vous commettez vn enorme sacrilege, me cachant volontairement telle, & telle offence que vous avez faite en tel lieu, & en telle façon ? Car ie sçay que vous en avez le souuenir, & que vostre conscience en est presentement bourrelée.* Il y en eut assez pour ouurir le cœur, les yeux, & la bouche de cette penitente, qui aussi tost poussant des sanglots, & fondant en larmes reprit sa confession, & l'acheua heureusement. Après quoy elle donna mille benedictions à son Confesseur, & pour en faire connoistre la vertu, publia elle mesme ce qui estoit arriué.

Vne autre fois vne Dame se confessant à luy exaggeroit fort ses malices, s'accusant d'estre la plus meschante, & la plus grande pecheresse du monde ; mais ce n'estoit qu'en des termes generaux, sans declarer aucun peché en particulier. Le Pere Yvan qui connut qu'elle ne s'accusoit de la sorte, que par hypocrisie, pour estre estimée humble : *Madame, luy dit il tres simplement, vous vous accusez d'estre si méchante ; croyez vous que ie le sçauois desia, & qu'on me l'auoit dit.* Ces paroles furent comme vn coup de lancette, qui ouurant la playe de cette malade, luy en fit ietter hors l'infection ; car s'emportant aussi tost avec colere : *Comment, mon Pere, dit-elle, vous le sçauiez ? & qui sont ces meschants, qui vous ont parlé contre ma reputation ? Ah si ie les connoissois, ie les ferois bien repentir.* Le Pere écouta ses plaintes avec patience : après quoy, faisant doucement reuenir cette personne à elle mesme, il luy fit detester son orgueil, & son hypocrisie, la disposa à faire vne humble & sincere confession de tous ses pechez, & luy donna des remedes salutaires, pour ne plus

tomber ende semblables fautes, luy faisant voir par des pechez secrets qu'il luy manifesta, que c'estoit Dieu qui luy auoit donné la connoissance de son interieur.

Ces lumieres extraordinaires de nostre Confesseur, ne luy seruoient pas seulement dans le tribunal de la Penitence; mais encore pour porter à la confession des personnes qui en estoient éloignées, & qui refusoient mesme d'y aller. Il y auoit dans Aix vn ieune homme débauché, qui auoit esté recommandé aux prieres du Pere Yvan. Ce bon Prestre ayant prié pour luy, & connu ses pechez plus secrets, l'auoit souuent excité à faire penitence, & à amender sa vie libertine. Le ieune homme l'auoit tousiours refusé, tournant en raillerie ce qu'on luy disoit serieusement pour son salut. Enfin le trouuant vn iour disposé à la correction : *Nostre Seigneur*, dit-il, *est grandement irrité contre vous, & est prest de vous chastier seuerement, si vous ne changez de façon de viure.* Il luy découurit en suite plusieurs pechez secrets qu'il auoit commis de maniere que ce ieune gentilhomme connoissant que le P. Yuan luy parloit de la part de Dieu, se sentit viuement touché, fit vne bonne confession generale de tous ses pechez, & mena depuis vne vie Chrestienne.

Vn homme de qualité griefuement malade, & en danger de mourir, ne vouloit se resoudre à se confesser, quelques instances qu'on luy en fist. Ses parens, après luy auoir amené diuers Prestres & Religieux, appellerent enfin le Pere Yvan, qui obtint du malade sans beaucoup de peine, ce que les autres n'auoient pû gagner: mais il l'obtint par vne adresse admirable. Après quelques paroles de ciuité & de consolation, *Mon bon Monsieur*, luy dit-il, *vous n'avez pas esté confessé, depuis que vous estes malade: mais ie croy bien, que si Dieu vous fait la grace de vous mieux porter, la premiere fois que vous sortirez, vous irez à l'Eglise, pour le remercier du recouurement de vostre sante, & qu'en mesme temps vous receurez le Sacrement de Penitence, & la Communion.* Ouy, *mon Pere*, répond le malade, *ie vous assure que ie le feray.* Mais, *Monsieur*, ajoуста le Pere, faisant signe à ceux de la chambre de se retirer, *y a t'il long temps que vous n'avez*

esté à confess. Il le malade ayant spécifié le temps, *ie vous diray bien*, poursuivit le Confesseur, *les pechez que vous avez faits depuis ce temps là, sans vous donner la peine de vous examiner avec inquietude; car n'avez vous pas fait tel, & tel &c.* luy declarant en particulier ses principaux manquemens avec les circonstances necessaires.

Le malade également estonné, & touché des connoissances de son Confesseur, luy aduoua le tout humblement, & avec sincerité; adioustant luy même les pechez que le P. ne luy auoit pas spécifiés, & tout ce dont il se souuenoit depuis sa dernière Confession. Le Confesseur repliquant encore, luy demanda si auant sa dernière confession, il n'auoit pas commis telle, & telle faute dont il ne s'estoit iamais accusé. Le malade ayant répondu qu'il estoit vray, & ayant encore confessé quelque peché qu'il croyoit n'auoir iamais bien déclaré; le Pere l'encouragea & l'aida à faire vne confession generale de toute sa vie; en suite de laquelle il receut les autres Sacremens de l'Eglise, peu de iours après il deceda, laissant en sa mort de grandes marques d'un bon Chretien.

Nostre esclairé Directeur auoit des connoissances extraordinaires, non seulement des pechez de ses penitens, mais encore de plusieurs autres choses éloignées & secretes, qui ne pouuoient estre sceuës par les voyes communes. Estant à Aix, pendant le procès que ses Religieuses d'Avignon auoient à Rome, contre d'autres Religieuses, comme il le recomman doit à Dieu dans le sacrifice de la Messe, Dieu luy en fit connoistre l'issuë; de maniere qu'après la Messe, faisant appeler de ses Religieuses à la grille de leur Monastere: *Le procès*, leur dit il, *que nos filles d'Avignon ont à Rome, est iugé: elles l'ont perdu.* Quelques semaines après, l'on en eut des nouvelles de Rome, qui furent conformes à ce que le Pere auoit dit; & l'on remarqua que le procès auoit esté iugé en ce même temps qu'il en auoit eu la connoissance.

La Superieure du Couuent de la Misericorde d'Aix, allant vn iour avec de ses Religieuses à Avignon en lictiere, se trouua surprise de la nuit dans vn bois, en tres grand dan-

ger; d'autant que la nuit estant fort obscure, les mules s'estoient égarez du chemin, & il y auoit à craindre qu'elles ne tombassent dans quelque precipice. Les Religieuses ayans imploré l'assistance de la sainte *Vierge*, Mere de Misericorde, vn ieune garçon parut dans le bois, portant du feu, avec lequel elles allumerent vn flambeau qu'elles auoient. Elles eurent quelque pensée que c'estoit vn Ange, parce que le garçon disparut sans qu'on peust apperceuoir d'où il estoit venu, ny où il estoit allé.

En ce mesme temps le Pere Yuan leur Fondateur, éloigné d'elles de quatre à cinq grands lieues, eut vne pleine connoissance du danger où elles estoient; ce qui l'obligea à se mettre en priere si bien que le lendemain d'un grand matin, estant venu au Monastere de les Religieuses, il les exhorta à prier pour leurs sœurs qui estoient en chemin; adioustant qu'elles auoient esté en peril le soir precedent, & que Dieu les en auoit deliurées. Ce qui se trouua veritable, par les premieres lettres que les mesmes Religieuses escriurent, dès qu'elles furent arriuées à Auignon.

Quelques mois auant son dernier voyage à Paris, visitant dans Auignon vn Ecclesiastique qui traueille presentement, avec benediction dans vne Paroisse, dont il est Curé; *Mon enfant*, luy dit il avec la simplicité ordinaire, *la sainte Vierge, Mere de Misericorde m'a fait connoistre que tu as resolu d'aller faire mission hors de ce Diocese, & m'a commandé de te donner ce Breuiare que ie t'apporte; parce que le sien est si usé, que tu as de la peine à t'en seruir.* Ce deuot Ecclesiastique receut la visite & le don du Pere Yvan, comme vn present du Ciel, & il a depuis adoué à plusieurs personnes, & à moy mesme; [qu'il étoit vray, qu'il auoit resolu d'aller faire mission dans le Diocese de Gap en Dauphiné, quand le Pere Yvan vint à luy: mais que ce bon Pere ne l'auoit peu sçauoir que par vn moyen extraordinaire; parce qu'il n'auoit communiqué son dessein à personne: adioustant encore la verité estre telle, que son Breuiare estoit tout frippé; mais que le Pere Yvan ne l'auoit peu connoistre par les voyes ordinaires; parce qu'il le tenoit si caché, qu'il ne le laissoit voir à personne.]

CHAPITRE V.

Il connoit l'interieur des personnes.

Pendant qu'il estoit Vicaire dans Brignole, & qu'il dirigeoit la Congregation des filles de sainte Vrsule, entrant vn iour dans leur maison pour ouyr à confesse vne malade, il se tourna vers vne des filles qui l'accompagnoient, & dit que cette fille auoit besoin de parler à luy. Puis s'approchant d'elle : *Fille*, luy dit il la nommant par son nom : *Dieu veut que tu me parles*. La chose estoit ainsi que le P. Yvan le disoit, car elle estoit fort pressée dans son interieur, de parler à luy, sans qu'elle l'eust fait connoître à personne. Ayant donc commencé à découurir ce qui estoit dans son ame, comme elle auoit de la peine à continuer, cét éclairé Directeur la soulagea entierement, luy declarant luy mesme tout ce qu'elle auoit dans son interieur, beaucoup mieux qu'elle n'auroit sceu faire elle mesme.

Dans la mesme maison des Vrselines, vne fille de grande vertu, ayant des choses extraordinaires à communiquer, n'osoit se declarer au Pere Yvan, quoy qu'elle en eust toutes les enuies du monde. Le Pere penetrant son interieur : *Ma fille*, luy dit il, *tu as besoin de me parler*. Elle s'en excusa par crainte, & endura durant quelques iours de tres grandes peines, pour ne pouuoir se resoudre à les declarer, iusqu'à ce que nostre charitable Prestre, en ayant compassion, luy declara luy mesme ce qu'elle souffroit dans son ame, & luy manifesta mesme beacoup de choses qu'elle sentoit, mais qu'elle ne pouuoit exprimer.

Vne fille de la mesme Congregation, ayant prié nostre bon Prestre de voir vne sienne sœur, qui auoit besoin de son assistance, fut fort estonnée d'entendre cette réponse. *Fille, pense à te guerir toy m-esme, car tu en as plus besoin que ta sœur*. Cette fille souffroit pour lors de tres grandes inquietu-

des dans son esprit, sans les oser découvrir. Le Pere connoissant son mal, luy dist qu'elle allast dans l'Eglise, où elle trouueroit vn Prestre qui la soulageroit. Elle obeyt, & trouua vn bon Prestre, qui luy parla de ses peines, & la guerit. Elle reuint aussi tost vers le P. Yvan, pour le remercier du cōseil qu'il luy auoit donné ; mais le Pere la preuenant ; *Et bien*, luy dit-il, *tu es guerie ; il faut qu'à l'aduenir tu sois plus resignée à la volonté de Dieu, que tu n'as pas esté.*

Vne vefue de grande condition de la ville d'Aix, desirant se separer d'auec son fils, en suite de quelque contestation, qu'ils auoient eue par ensemble, n'osa executer son dessein sans l'aduis de nostre bon Prestre qui estoit son Directeur. Comme elle venoit pour le consulter, dès que le Pere la vit penetrant ses pensées, & preuenant ses paroles : *Madame*, luy dit il, *gardez vous bien de quitter vostre fils, Dieu vous feroit rendre compte des fautes qu'il feroit, estant separé de vous : il faut que vous soyez plus patiente, & que vous le supportiez avec plus de resignation.* La Dame fut si surprise de ces paroles, qu'elle pensa tomber en défaillance, si bien qu'estant reuenue à soy, *Mon bon Pere*, luy répondit elle, *je suivray fidelement vostre conseil. Je ne puis douter que vous ne me parliez selon les lumieres de l'esprit de Dieu, puis qu'il n'y a que luy, qui ait peu vous manifester mes pensées & mon dessein : car le conseil que vous me donnez à present, touchant mon fils, c'est le mesme que j'estois venue presentement vous demander, sans que j'en aye parlé, ny donné aucune connoissance à ame du monde.*

Il arriua presque le mesme à vn gentilhomme de Marseille, qui ayant enuoyé querir le Pere Yvan, pour luy communiquer quelque affaire secrette, & tres importante, n'eut pas la peine de le luy declarer ; car dès que le Pere fut arriué chez luy : *Monsieur*, luy dit il, *vous m'avez fait appeller pour telle affaire, & pour me demander un tel auis.* Le gentilhomme, qui n'auoit découuert cette affaire à personne, fut fort estonné de voir que nostre bon Prestre auoit penetré ses pensées & son dessein ; & le luy ayant aduoué, il suivit fidelement son conseil, comme d'une personne tres esclairée, & qui

qu'il connoissoit enrichie de dons extraordinaires.

Estant prié de recommander à Dieu vne femme qu'on croyoit dangereusement malade, il découurit qu'elle estoit sa maladie, sans l'auoir veüe, & sans auoir ouy parler de son mal. Il y auoit long temps qu'elle estoit mariée sans auoir des enfans; de maniere qu'on auoit perdu esperance qu'elle en deust auoir. Et ainsi estant tombée malade, on la traitoit comme hydropique; croyant qu'elle ne pouroit guerir de cette infirmité que par miracle. Nostre pieux Ecclesiastique l'ayant recommandée à Dieu, connut pendant sa priere, l'estat de sa maladie; si bien que trouuant ses parens grandement desolez par l'apprehension qu'ils auoient qu'elle mourust: *Vous seriez fort estonnez*: leur dit-il, fort naïfement, *si elle auoit deux beaux enfans dans le ventre*. L'on ne tint pas compte de ces paroles; parce qu'il sembloit au iugement des Medecins, n'y auoir nulle apparence; neantmoins elles se trouuerent veritables; car quelques mois après cette femme accoucha de deux beaux enfans.

Estant appelé à la maison d'une personne de condition, il s'arresta quelque temps à y regarder avec attention le tableau du feu Roy, de quoy s'apperceuant la personne qui l'auoit appelé: *Mon Pere*, luy dit elle, *d'où vient que vous regardez si fixement le tableau du Roy; en telle sorte qu'il semble que vous en soyez émeu?* Helas, répondit le Pere avec grande naïfueté, *que ce pauvre Prince est à plaindre, i'en ay bien de la compassion*! Il ne parla pas dauantage, encore qu'il fust interrogé. Quelque temps après on receut les nouuelles d'une coniuration faite contre le Roy; & cette personne de qualité, dont nous venons de parler, remarqua que la coniuration auoit esté tramée dans le temps que le Pere Yvan regardoit le tableau: d'où il vit clairement que Dieu luy en auoit donné la connoissance. En confirmation de cecy, parmy les lettres que nostre zelé Ecclesiastique auoit écrites en ce temps là à diuerses personnes de pieté, nous en trouuons vne, dans laquelle il mande à vne Religieuse de tres haute vertu ces paroles. *Ma fille, priez pour le Roy, ie vous le commande par la sainte obeys-*
sance. La force de ces mots témoigne assez la viue impres-

sion que Dieu luy auoit donnée des besoins que le Roy auoit pour lors d'estre secouru par les prieres des gens de bien; puis qu'il vſe de commandement, & qu'il commande avec toute l'autorité permise à vn Directeur enuers sa penitente, de prier pour le Roy, & de plus à ne s'appliquer qu'à cette priere durant 8. iours, & mesme d'y rapporter ses plus pieux exercices, luy ordonnant de faire l'oraison, & la communion pour cette mesme fin. Par où l'on void que la vertu de nostre excellent Prestre estoit vniuerselle; car non seulement il estoit bon Chrestien, mais aussi bon suiet du Roy; & que rendant à chacun ce qui luy est deu, il trauailloit continuellement, pour la gloire de Dieu, & dans les occasions il s'interessoit pour le seruice, & la conseruation de son Prince.

Alant dans vne maison particuliere, & y trouuant vne Demoiselle de ses penitentes, & de grande vertu, dès qu'il l'apperceut: *Ma fille*, luy dit il, *que faites vous icy, & que ne partez vous à l'heure mesme pour aller à Brignolles, voir Madame vostre mere qui se meurt?* cette Demoiselle toute émeuë luy demanda a'où il le ſçauoit, *parce que les dernieres nouvelles qu'il auoit receues, l'asſeuroient quelle se portoit bien.* Le Pere luy repliqua [qu'elle estoit à l'extremité, & que differant de partir, elle ne la trouueroit plus en vie; mais que si elle s'en alloit avec diligence, elle auroit encore la consolation de luy parler, & receuoir sa derniere benediction; après quoy elle rendroit l'esprit entre ses bras] La Demoiselle qui connoissoit le merite de son Confesseur, se disposant à l'heure mesme de luy obeyr, se mit en chemin, & le plus diligemment qu'elle peut, elle se rendit d'Aix à Brignolles, où elle éprouua combien son Confesseur estoit éclairé, puis que trouuant sa mere à l'extrémité, à peine eut elle le loisir de luy dire quelques paroles, & receuoir sa benediction; après quoy elle expira entre ses bras.

Il quitta vn employ considerable dans Aix, pour se retirer de la compagnie d'un Prestre, qu'on luy auoit donné pour compagnon, quoi que ce Prestre fust en vne si haute reputation qu'il estoit estimé vn Saint, si bien qu'il attiroit tout le monde après soy. Quelque temps après l'hypocrisie de ce Pre-

estreant découuerte ; les Superieurs le priuerent de son emploi, & le chasserent melme de la ville.

Au contraire vn Prestre qui n'auoit iamais veu ni connu, l'estant venu voir dès qu'il l'apperceut, il s'écria de ioye, & l'accueillant avec des demonstrations extraordinaires d'amitié, le receut comme son enfant, & l'a depuis tousiours aimé avec des tendresses paternelles. Comme le temps découurit les fourberies du premier, qui estoit estimé vn saint, il fit connoistre la vertu de cestuy-ci, qui estoit inconnu & dans le mépris.

On lui amena vne personne que tout le monde estimoit sainte, à cause des frequentes extases qu'elle auoit. Il ne l'eut pas plustost regardée attentiuement qu'il reconnut que c'estoit vne hypocrite, & qu'elle s'extasioit naturellement, pour se faire estimer. Il la tira à part, & lui ayant fait connoistre dans vn entretien particulier l'offence qu'elle commettoit de tromper le monde, & qu'elle s'exposoit en vn danger euident de la damnation eternelle; il l'a toucha si viuement, qu'elle aduoüa sa faute, & s'en amenda, & fit vne salutaire penitence.

Je ne raconteray pas icy l'illusion qu'il découurit en vne de ses penitentes, que tout le monde estimoit sainte, & qui en auoit apparemment toutes les marques exterieures, & estoit dotée de tant de graces extraordinaires, extases, visions, reuelations, propheties & semblables, qu'on la regardoit comme vn prodige de vertu, & de sainteté; cependant tout cela estoit du Demon, ainsi que le Pere Yvan le découurit, & qu'il rapporte luy mesme dans vne de ses lettres, qui est la 83. de celles que j'ay fait imprimer.

Vn bon Berger, grand seruiteur de Dieu, appelé Laurens, qui estoit sous la direction de nostre esclairé Prestre, lo venant visiter, fut deliuré d'vne illusion, qui l'exposoit à quelque danger. Dès qu'il arriua, le Pere Yvan accourut à luy, l'embrassa, & luy fit cent caresses, comme à vne personne, dont il connoissoit depuis long temps l'innocence, & la simplicité. En suite le conduisant dans son Eglise, après auoir prié Dieu, il luy fit voir plusieurs tableaux des merueilles

que la sainte Vierge auoit operées; il luy monstra aussi l'enceinte du Conuent qu'il auoit fait bastir, & luy raconta ingenuëment la misericorde du Seigneur dans la Fondation de son ordre; si bien que ce Berger estoit rai de toutes ces choses, & fondoit en larmes de consolation & de ioye. Nostre Prestre luy demanda compte de son troupeau, & de ses petites affaires; à quoy le Berger répondit avec tant de naïfueté, que moy mesme y estant present, ie ne pouuois assez admirer la simplicité de l'un & de l'autre. Mais ce qui m'edifiada uantage, fut que le Pere Yvan, comme s'il eust penetré le dessein de ce Berger, luy demanda s'il n'auoit point intention de passer outre, & d'aller visiter d'autres personnes. Le Berger luy répondit qu'ouy, & que *Dieu luy ayant reuelé, qu'il y auoit quelques Saints dans les Prouinces voisines, il s'estoit resolu de les aller voir pour se recommander à leurs prieres. N'anez pas honte*, luy dit nostre bon Prestre, *de susure des reuelations, sans les auoir examinées, & communiquées à un Directeur? Ne voyez vous pas que c'est vne tentation du Demon? pour vous faire abandonner vos affaires, vous tirer de vostre recueillement, & auoir occasion de vous tenter de vanité? Voulez vous aller raconter vos reuelations à ces seruiteurs de Dieu, afin qu'ils sçachent que vous estes aussi saint qu'eux? Allez superbe: retournez vous en chez vous: ayez peur de scandaliser les autres par vos mauuais exemples, & de vous damner, si vous suiuez les lumieres de vostre propre esprit.* Il n'est pas croyable avec quelle humilité & soubmission, le pauure Berger receut la reprimande de son zelé Directeur; car se mettant à genoux en vne posture, qui sembloit s'aneantir, luy demanda sa benediction, & sans nulle repliche il obeït, & s'en retourna à l'heure mesme. Je fust touché de la prompte obeïssance de cet innocent berger: si bien que ayant demandé au Pere Yvan, pourquoy il l'auoit traitté avec tant de rigueur. *C'est un saint homme*, me répondit il, *qui a de grandes communications avec Dieu. Ce qui luy a esté reuelé de ces personnes saintes, est tres vray: mais la visite qu'il vouloit leur rendre, estoit vne pure tentation du Diable. I'espere qu'il profitera de la correction que ie viens de luy faire.*

Il faudroit vn volume entier pour rapporter tous les témoignages, que le Pere Yvan a donné du discernement des esprits, & de la connoissance qu'il auoit de l'interieur des personnes. Il a souuent fait rougir des hypocrites, qui sous des belles apparences d'humilité, cachotent vn orgueil insupportable. Souuent aussi il a eu du mespris, ou plustost de la compassion pour des personnes que tout le monde reueroit comme saintes. Et au contraire il auoit vn singulier respect, & témoignoit des tendresses singulieres pour d'autres personnes qui estoient méprisées, & persecutées; parce que Dieu luy faisoit connoistre la meschanceté de ceux là, & la sainteté des derniers. Enfin il m'a adoucié sa simplicité, que Dieu luy faisoit connoistre l'interieur d'une ame, non seulement par ses actions, & par ses discours, mais encore par son marcher, par ses regards, & par la seule veüe de son visage, & de son maintien exterieur.

CHAPITRE VI.

Predictions.

DIEU commença à découurir la grace de connoistre les choses à aduenir, dont il auoit enrichi nostre illustre Prestre, dans le premier employ qu'il eut dans la parroisse de Cotignac. Car dès lors il lui fit predire plusieurs choses de grande importance, qui sont arriuées long temps après, de la façon qu'elles auoient esté predites, & ont esté attestées par des personnes dignes de foy, & par celles mesmes, en faueur de qui les predictions estoient faites.

Ayant esté prié par vne femme de vertu du mesme lieu de Cotignac, de recommander à Dieu vne sienne fille qu'elle pretendoit marier, il s'en acquitta si heureusement; que Dieu luy fit connoistre dans sa priere, ce qui estoit conuenable au bien de cette fille. En suite dequoy, l'ayant rencontrée; *Ma fille luy dit il, tu deurois te rendre Religieuse, Mon Pere, ré-*

pondit la fille, *ie ne me sens pas appelée à la Religion, mais au mariage. Et bien, repartit le Pere, puis que tu veux te marier, il faut que tu épouses un tel ieune homme qu'il luy nomma.* La fille ayant repliqué ingenuëment qu'elle n'aimoit pas celuy-là, & qu'elle auroit plustost de l'inclination pour quelques autres qu'elle declara par leur nom. *Je s'advertis, dit le pere, que si tes parens ne te marient à celuy duquel ie te parle, tu seras miserable.* La fille estonnée par cette menace, ne répondit plus mot; mais changeant de sentiment, elle obeït, du consentement de ses parens, au conseil qui lui auoit esté donné. Le temps a fait connoistre la verité des paroles de nostre esclairé Ecclesiastique; parce que la fille a vescu tres heureusement avec son mari, & l'on a remarqué que tous les autres qu'elle vouloit choisir, ont esté reduits à de grandes miseres; les vns estans morts dans vne extreme pauvreté, & les autres ayans malheureusement fin leur vie par vne tragique mort.

Dans ce mesme lieu de Cotignac, consolant vne Demoiselle de ses penitentes, sur ce qu'elle estoit grandement affligée, & mesme traitée avec rudesse par son mari, à cause qu'elle n'auoit point eu de garçon, il lui promit que le mauuais traitement qu'elle enduroit, finiroit bien tost, & qu'elle seroit heureuse dans sa vieillesse. Comme cette femme desolée luy eut répondu, qu'elle ne voyoit nulle apparence de ces promesses, attendu l'humeur fascheuse de son mari: *Ma fille, luy repartit le pere, voicy l'assurance que ie te donne: tu es enceinte d'un garçon qui sera Capucin, & après celuy là, tu en auras un autre qui sera ton appuy, & ta consolation.* La chose estant arriuée en la maniere que nous venons de dire; la Demoiselle a ioüy du bonheur que le Pere Yvan lui auoit fait esperer; si bien que le garçon qu'il auoit predit deuoit estre Religieux, estant effectiuement Capucin, est venu dans cette ville faire ses prieres au tombeau du Pere Yvan dans l'Eglise de ses Religieuses de la Misericorde, où il a presché, & a confirmé ce que nous venons de d'escrire.

Estant Curé à Brignolles, deux Demoiselles s'adresserent à luy, pour le prier de les receuoir sous sa direction. Il leur

découvrit d'abord leur interieur, & de plus il leur predict ce qui leur devoit arriuer de plus important, & notamment le genre de vie qu'elles embrasseroient, contre ce que pour lors elles témoignoient desirer. Car l'une montrant vn grand zele pour embrasser la religion de sainte Vrsule; & l'autre au contraire témoignant de l'indifference pour la religion, & mesme d'auoir des sentimens contraires; le Pere predict à la premiere, qu'elle ne seroit point Religieuse, & à la seconde, qu'elle le seroit en peu de temps, predictant encore à celle-cy, ce qui luy arriueroit de plus considerable dans l'estat religieux. La chose se trouua veritable à l'égard de toutes deux, ainsi qu'elles mesmes ont attesté.

Il y auoit dans la mesme ville de Brignolles vne femme de condition, & d'une singuliere pieté, grandement affligée de ce que depuis long temps, elle n'auoit point receu de nouvelles de son mari, qui commandoit vne galere dans l'armée Nauale du Roy, pendant le siege de la Rochelle. Le P. Yvan passant vn iour deuant sa maison, fut fortement inspiré d'y entrer, & de donner quelque consolation à cette personne desolée. Il l'a consolée en effet, l'assurant[que son mari se portoit fort bien, & qu'elle ne tarderoit pas de le voir dans sa maison:] adioustant encore sur ce qu'elle témoignoit en douter, [que non seulement son mari reuiendrait bien tost, mais encore qu'il mangeroit des viandes qu'elle faisoit pour lors preparer; l'exhortant à cette fin de les assaisonner le mieux qu'elle pourroit, pour qu'il les trouuast plus agreables.]

Trois iours après, cette Demoiselle estant allée à l'Eglise, pour se confesser, ne se fust pas plustost prosternée au pied du Pere Yvan, que ce bon Confesseur luy commanda de se releuer, & s'en retourner avec diligence dans sa maison. Elle répondit[qu'elle y iroit après s'estre confessée, mais qu'elle le prioit de luy faire cette grace que de l'ouyr auparauant.] *Je vous dis*, repliqua le Pere, *que vous alliez vistement chez vous, parce que vostre mari est arriué, & desire vous voir à l'heure mesme.* Elle insista encore, ne pouuant croire ce qu'elle oyoit. Enfin le Pere Yvan luy ayant fait le mesme commandement pour la troisiéme fois, elle se leua, & en mesme

temps elle ouyt vn grand bruit vers la porte de l'Eglise, causé par des personnes qui l'a cherchoient, pour luy faire sçauoir la venue de son mari qui estoit de retour, conformément aux paroles du Pere Yvan.

Nostre bon Prestre s'estant arresté dans Aix; vn honneste homme qui souffroit beaucoup par les emportemens, & les autres deffauts de sa femme, le visitoit frequemment, pour se plaindre a luy, & trouuer quelque soulagement dans son entretien. Le Pere le consoloit, & l'encourageoit à souffrir patiemment pour Dieu. Vn iour ce mesme homme ayant des suiets pressants & extraordinaires d'affliction, & d'angoisse du costé de sa femme, s'estoit resolu de se separer d'elle, & l'abandonner entierement, si le pere Yvan approuuoit son dessein. Mais l'homme de Dieu ne fut pas de cét aduis; au contraire ayant appris sa resolution, il fut quelque temps sans répondre, demandant en silence les lumieres du Saint Esprit. Après quoy regardant cét homme d'un visage serein: *Ayez, luy répondit il, encore vn peu de patience, & ne faites pas ce que vous auez resolu; car Dieu le fera.* Peu de iours apres, cette femme mourut; si bien que le mari se trouuant separé par l'ordre de Dieu, sans y auoir contribué, euita par sa patience, & par sa soubmission au Pere Yvan, le scandale, les pertes, & les autres desordres que la separation luy auroit causez, s'il l'eust procurée de luy mesme.

Il fit vne semblable predication à vne femme de qualité qui l'estoit venuë trouuer pour luy communiquer le dessein qu'elle auoit de marier sa fille avec vne personne sortable à sa condition, & le supplier de le recommander à Dieu, & à nostre Dame de Misericorde. *Je le feray tres volontiers, dit le Pere Yvan, mais n'acheuez pas le mariage, quoy que les preparations en soient fort auancées, que ie ne vous aye parlé vne seconde fois sur ce suiet.* Il prit ce temps là pour prier Dieu: apres quoy la Demoiselle estant retournée vers luy; *Ma fille luy dit il, bien que vostre enfant vous soit à charge, ne la mariez pas encore, Dieu en aura soin par vne autre voye.* La mere ne comprit pas pour lors ce que nostre bon Prestre luy disoit; mais elle ne tarda pas de le connoistre par le decès de sa

filles qui arriua peu de iours après.


Vne personne de pieté, estant faschée de ce qu'une sienne soeur s'estoit renduë religieuse dans vn Conuent qui n'estoit pas reformé, vint trouuer le Pere Yvan pour luy communiquer son déplaisir, & en receuoir quelque consolation. Elle l'a receut effectiuement, & beaucoup plus grande qu'elle n'auoit esperé; car cét excellent Prestre preuoyant l'aduenir, *ne vous fachez pas*, dit il à cette Demoiselle, *vostre soeur sortira bien tost du Conuent, où elle est entrée, & se rendra Religieuse, parmi nos filles de nostre Dame de misericorde.* Peu de temps la fille ne trouuant pas la regularité qu'elle desiroit, dans le Conuent qu'elle auoit choisi, en sortit; & s'estant adressée aux Religieuses de Nostre Dame de Misericorde du Monastere de Marseille, elle y fut receuë, après auoir demandé cette grace avec ferueur & humilité.

Lors que le deffunct Comte de Carces partit d'Aix pour aller du costé de Draguignan, à la rencontre du President d'Oppede, à dessein de combattre quelques troupes, qui estoient entrées dans la Prouence; tout le monde esperoit vn heureux succès de son voyage, attendu le grand nombre des gentilshommes, & d'autres personnes qui l'accompagnoient, & qu'il y auoit peu de gens dans le parti ennemi: Le Pere Yuan predict neantmoins le contraire dans des termes tres clairs. Il se rencontra dans vne maison qui regardoit sur la rue, par où le Comte de Carces passoit avec toute sa suite. Chacun admiroit de si belles troupes, qui s'en alloient chantans d'allegresse, comme si elles eussent desia r'emporté la victoire; lors que le Pere Yuan s'adressant à ceux qui estoient avec luy dans la mesme maison; *vous voyez*, leur dit il, *avec quelle ioye ces personnes vont contre les ennemis? hélas! en quel estat les verrez vous reuenir.* Il profera ces paroles d'un accent, & d'un geste de pitié & de compassion; qui donnoient entierement à connoistre, qu'il n'en esperoit rien de fauorable. En effet ces troupes ayans esté mises en déroute, s'en retournerent en desordre d'une maniere pitoyable.

Il auoit predict vne chose presque semblable l'année auparavant. La ville d'Aix estoit horriblement tourmentée par

les differents partis du Gouverneur de la Prouince, & du Parlement : en telle sorte qu'il se passoit peu de iours qu'il n'y arriuaft quelque desordre.

Enfin les deux partis s'irriterent si fort, qu'ayant pris les armes de chaque costé, la veille de S. Sebastien, ils furent sur le point de faire vn furieux massacre. Plusieurs personnes de qualité, & nommement quelques Prelats se mirent en deuoir d'appaiser les esprits de part & d'autre, & trauaillerent avec tant de vigilance, & de succès, que les partis posèrent les armes sans donner vn seul coup. Tout le monde croyoit que la reconciliation estoit faite, & qu'il n'y auoit plus rien à apprehender. Le Pere Yvan se trouuant pour lors malade, en sorte qu'il ne pouuoit s'éloigner de sa maison, se mit en priere, pour implorer la misericorde du Seigneur, & détourner les fieux du de sa iustice; puis prenant son Crucifix, il fit plusieurs signes de croix en l'air, *pour chasser, disoit il, les Demons, qu'il luy sembloit voir en troupes dans tous les endroits de la ville, pour y allumer le feu de la desunion, & de la guerre.* On luy vint rapporter en ce mesme temps que tout estoit accordé, & que la paix estoit faite. *Helas,* répondit il, *poussant vn profond soupir, la paix est faite, à ce que vous dites, & on le croit ainsi: vous le verrez demain.* L'on vit en effet que cette paix n'auoit esté qu'une disposition à la guerre; car le lendemain il arriua ce grand soulèvement de toute la ville, par lequel le Gouverneur fut arresté avec les principaux de son parti; plusieurs y furent tuez; & ça esté la principale source des desordres, qui sont depuis arriuez en la Prouence.



CHAPITRE VII.

*Suite des prediçons touchant la mort, ou la santé
de diuerses personnes.*

ESTANT au parloir des filles de Sainte Vrsule de Brignoles, il fut prié par vne de ces mesmes filles, de luy prestre vn Crucifix qu'il portoit, pour l'appliquer sur vne Nouice malade depuis long temps. Le Pere ne sçauoit rien de la maladie de cette Nouice, preuoyant neantmoins quelle en seroit l'issuë, quoy que les Medecins fissent esperer qu'elle reuiendroit en santé; *ie veux bien*, luy dit il, *vous prestre mon Crucifix, pour l'appliquer sur la malade; mais cela ne contribuëra nullement à sa santé: car elle mourra bien tost; ce qui arriua peu de iours après.*

Dans la mesme ville de Brignoles, vne femme de vertu, qui suiuoit sa conduite, estant venuë à luy dans l'Eglise Parroissiale, où il exerçoit l'office de Vicaire, pour se confesser, & pour communier; il l'a receut, & luy administra ces deux Sacremens. Après quoy il l'aduertit de mettre ordre à ses affaires, & qu'elle mourroit dans peu de iours. Comme cette personne eut répondu qu'elle se portoit fort bien, & ne sentoit nulle incommodité; *cela n'empeschera pas*, repliqua le P. *que vous ne mourrez dans trois iours: preparez vous avec diligence, & n'oubliez rien pour mourir en bonne Chrestienne.* La penitente sans s'effrayer, parce qu'elle estoit douée d'une haute pieté, creut aux paroles de son Confesseur, dont elle connoissoit la vertu & le merite; si bien qu'ayant donné ordre à toutes choses, selon son conseil, & s'estant disposée, par son assistance à vne bonne mort; elle deceda le mesme iour qu'il luy auoit predict.

Il donna vn semblable aduis à Madame d'Orcin de la mesme ville. Il en auoit eu vn soin particulier, pendant qu'il demouroit à Brignoles, & continuant de la diriger par ses lettres.

depuis qu'il se fut arresté à Aix; vn iour luy faisant réponse, touchant quelque affaire qu'elle luy auoit communiquée, il luy manda qu'elle ne deuoit plus songer qu'à l'affaire de son salut, & à se preparer promptement, & soigneusement à la mort, l'assurant qu'elle en seroit bien tost surprise. La Dame fut d'abord estonnée de cette Lettre: mais s'estant remise de son estonnement, fit diuers actes de resignation à la volonté du Seigneur; & dès lors elle fit les mesmes preparations, que si elle eust esté dangereusement malade, quoi qu'elle se sentist en tres bonne santé. Ce fut vn grand bonheur pour elle; parce que peu de iours apres elle fut atteinte d'une maladie mortelle.

Sentant que son mal empiroit, elle en fit escrire au fleur d'Orcin son filz qui estoit pour lors dans Aix en la charge de Greffier criminel de la Cour du Parlement: qui aussi tost en fit donner aduis au bon Pere Yuan, & le supplia de recommander à Dieu & à la sainte Vierge la pauvre malade. La Dame d'Orcin sa femme porta cette nouuelle à nostre Imitateur, & le pria de dire la Messe du S. Esprit à l'intention de sa belle mere. Le Pere s'y accorda; mais s'estant mis en priere, pour faire ses preparations, Dieu luy fit connoistre, que la malade estoit decedée dès les huit heures du soir precedent: c'est pourquoy au lieu d'une Messe du S. Esprit, il celebra vne Messe des morts pour la deffuncte. La Dame d'Orcin qui s'estoit arrestée dans l'Eglise, pour assister à cette Messe, fut fort; estonnée de voir le Pere reuestu des ornements noirs, & d'ouïr vne Messe des morts, au lieu de celle du S. Esprit; & croyant que le Pere Yvan auoit negligé sa demande, pour satisfaire à celle de quelque autre personne, elle en eut beaucoup d'inquietude & de chagrin; iusques à ce que la Messe estant acheuée, elle voulut aller faire ses plaintes au Pere Yvan den'auoir pas celebré la Messe suiuant la priere qu'elle luy en auoit faite. Mais le Pere la preuenant, *Ma fille, luy dit il, ne vous affligez point. Madame d'Orcin vostre belle mere mourut hier au soir sur les huit heures. Dieu luy a fait misericorde, & c'est pour son soulagement que j'ay celebré la sainte Messe. Nen dites rien à Monsieur d'Orcin vostre mari; mais faites le partir au*

plustost pour le bien de ses affaires ; accompagnez le , & gardez bien de le laisser partir seul. Portez de l'eau de canelle , & semblables eaux cordiales ; parce que vous en avez besoin dans vostre voyage.

Cette Dame également surprise , & affligée creut ce que le Pere Yuan luy dit , elle partit d'Aix le mesme iour avec son mari , & porta avec soy des eaux cordiales. A peine auoient ils fait trois ou quatre lieues , qu'un homme qu'on leur enuoyoit de Brignoles , les ayant rencontrez , & leur ayant dit brusquement que la Dame d'Orcin leur mere estoit morte , & qu'il venoit expressement le leur faire sçauoir , le sieur d'Orcin saisi d'une viue douleur , à cette nouuelle inopinée , cheut de son cheual , tomba en défaillance , & puis en des conuulsions si violentes ; que l'on eut peur qu'il ne restast mort sur la place. Mais enfin on le fit reuenir à soy , quoi qu'avec bien de la peine , par le secours des eaux cordiales , que sa femme auoit apportées par le conseil du bon Pere Yuan.

Dans Aix vne Dame l'estant venuë consulter pour quelque affaire temporelle , receut vn aduis spirituel qu'elle n'attendoit pas. Car dès que le Pere se fut approché d'elle , sans luy donner le temps de parler : *Ah Madame* , luy dit il , *pourquoy n'estes vous pas encore conuertie ? Que vous me faites de pitié : Mon Pere* , répondit la Dame , *vous me faites peur toutes les fois que ie viens à vous ; mais pourquoy me dites vous cela presentement ? Ce n'est pas pour vous épouuenter* , repartit le Pere , *que ie vous parle de la sorte : mais afin que vous mettiez ordre à vostre conscience , & que vous vous prepariez à la mort ; car vous mourrez demain.* Quoy que la Dame parust émeuë de cette prediçtion ; neantmoins elle ne témoigna pas d'en estre pleinement persuadée , interpretant le mot de demain , pour vn iour à aduenir , prochain ou éloigné ; mais ce fut le lendemain immédiatement suivant qu'elle deceda d'une mort soudaine & impreuë.

Preschant du dernier iugement , & à son ordinaire poussant fortement cette matiere de crainte , après auoir inculqué la terreur du iugement du Seigneur , & l'incertitude de l'heure de la mort ; *il faut* , dit il à les Auditeurs , *que vous pensiez se-*

rienfement à ce que ie viens de vous dire, que la mort est plus proche de vous, que vous ne croyés pas; car bien tost quelques uns de cette compagnie mourront de la fièvre, ou de la colique. Trois iours après, deux de ces personnes qui estoient pour lors presentes à son Sermon, moururent, l'une de la colique, & l'autre de la fièvre.

Le Seigneur de Richelieu pour lors Archeuesque d'Aix, & depuis Cardinal, & Archeuesque de Lyon, sur son départ pour Rome, assistant à vn Sermon du Pere Yuan, en fut apostrophé de cette sorte: [Monseigneur vous vous disposez pour le voyage de Rome, & vous partirez bien tost; faites bien preparer tous vos gens à la mort; car tous ceux qui vous accompagneront dans ce voyage, n'en reuiendront pas.] La chose arriua ainsi qu'il l'auoit predite; car vn des premiers de la suite del' Archeuesque, mourut à Rome, quelque temps apres qu'il y fut arriué.

Estant entré dans le Conuent de ses Religieuses de la Misericorde d'Aix, pour ouyr à confesse vne fille griefuement malade de douleur de costé; cette fille le pria de la toucher à l'endroit de son mal, disant qu'elle esperoit d'estre guerie par son attouchement. Le Pere pour la contenter auança sa main; mais comme s'il eust esté esclairé de quelque nouuelle lumiere, qui l'en eust détourné, il retira promptement sa main sans la toucher; puis s'adressant à la malade: *Ma fille*, luy dit il, *ie ne veux pas vous toucher. Dieu m'a fait connoistre qu'il veut vous appeller à soy par cette maladie; c'est pourquoy ie vous veux priuer de la satisfaction que vous me demandez; afin que cette priuation vous serue pour demeurer moins de temps en Purgatoire, & iouyr plus tost de la gloire du Ciel.* La fille accepta de bon cœur cette mortification, & s'estant disposée à la mort, elle deceda saintement deux iours apres: si bien qu'ayant demeuré quelque temps en Purgatoire, elle se fit voir le iour auquel elle en fut deliurée, paroissant à des Religieuses du mesme ordre, sous la forme d'une verge d'or fin; ce qui estoit vne marque de sa pureté, & de son amour.

Marguerite Beauuois, femme à Sperit Broucier, habitans de la ville d'Aix, estant malade à l'extremité, & desia resignée

à la mort, par l'aduis des Medecins qui auoient iugé sa maladie mortelle, & sans remede; fit appeller le bon Pere Yvan pour se confesser à luy generally des pechez de toute sa vie. Elle témoignoît vn grand empressement pour faire cette confession, craignant que la mort ne la surprist, iusques à ce que le Pere estant venu, après l'auoir vn peu considérée: *Marguerite*, luy dit il, *ayes bon courage, & ne te troubles point, touchant la confession que tu auois resoluë de faire; car tu viendras bien tost à confesse dans nostre Eglise, ou tu auras plus de force, & plus de liberté qu'à present.* Il semble que ces paroles furent vn remede efficace pour la guerison de la malade; veu que dès lors elle commença à se mieux porter, & contre l'esperance des Medecins, se trouuant tout à fait remise peu de iours apres, elle vint se confesser à nostre bon Prestre, dans l'Eglise de ses Religieuses, & rendre graces à nostre Seigneur du recouurement de sa santé.

Dans la mesme ville, la Dame de Richioux le pria d'aller visiter la Demoiselle de guerre, femme du sieur de Guerre Avocat en Parlement, sa fille tellement malade, que les Medecins l'auoient abandonnée; & mesme elle auoit perdu toute sorte de connoissance. Le Pere y alla, il considéra la malade, sans luy parler, parce qu'elle n'estoit pas en estat de l'ouyr, & fit en suite quelque priere pour elle; puis se tournant vers la Dame de Richioux qui estoit presente: *Ma fille*, luy dit il, *vous avez grand tort de vous affliger si excessiuement, de la maladie de vostre fille, ie vous assure que bien loin de mourir, elle recouvrera bien tost la santé.* Quelques iours apres la malade se trouua mieux: si bien qu'estant venue voir en la compagnie de sa mere, nostre excellent Prestre, elle le remercia de sa visite, & des prieres qu'il auoit fait à son occasion.

Comme il auoit souuent predict la guerison des autres, il predict vn iour la sienne. Estant tombé malade, la fièvre dont il estoit atteint, deuint si violente, que les Medecins desesperans de sa santé, l'aduertirent de se preparer à la mort. Il répondit qu'on se trompoit, & qu'il ne mourroit pas de ce mal là. La fièvre redoublant encore, & s'augmentant de plus en plus, les Medecins protesterent qu'il ne pouuoit échapper, que

par miracle, & qu'on deuoit le faire disposer de ce qui estoit à luy, comme estant tres proche de la mort. Il soustint tousiours qu'on auoit tort de s'allarmer, & qu'il esperoit de releuer de sa maladie. On luy proposa neantmoins de se demettre de quelque petit benefice qu'il auoit, & de recevoir le viatique. Pour le premier il le fit avec ioye, témoignnant de la satisfaction à se dépouiller de tous les biens de la terre; pour le second, *ie veux bien*, dit il, *recevoir la sainte Communion, mais ce ne sera pas pour viatique*. En effet, il voulut communier à jeun, & comme le Prestre luy presenta le tres adorable Sacrement, *ne me le donnez pas*, luy dit il, *pour viatique, car s'en anray besoin une autre fois*. Peu de iours après il se porta mieux, & depuis a vescu quelques années en bonne santé.

CHAPITRE VIII.

Il prie pour la guerison des malades.

LE sieur Balthasar Orcin de Brignolles le mesme dont nostre bon Prestre auoit predit la venue à sa femme, estant tombé malade apres son retour du siege de la Rochelle, il luy survint vne si violente inflammation sur vn bras, que la partie s'estant extraordinairement enflée, la gangrene s'y mit en peu de iours. Le Seigneur de Gondy pour lors General des Galeres, aduertí du danger de ce Gentilhomme, luy ennoya ses Chirurgiens pour en auoir soin, comme d'un de ses meilleurs Officiers. On n'obmit aucune chose pour sa guerison; mais le mal surmontant tous les remedes, & s'augmentant de plus en plus, les Chirurgiens conclurent que, pour sauuer la vie au malade, il falloit luy couper le bras gangrené. Le malade y ayant consenti, le iour, & l'heure estoit assignée: l'on auoit mesme dressé tout l'appareil pour l'operation; quand le Pere Yvan s'y opposa, & obtint la guerison par vne voye plus douce, & plus fauorable.

Il y auoit trois iours que nostre charitable Prestre estoit en priere,

priere, & en penitence pour obtenir la guerison de cét infirme. Il auoit mesme passé plusieurs heures à genoux, à l'entourde son lit, sans estre apperceu ; si bien que se trouuant present, lors que les Chirurgiens luy vouloient couper le bras, il se leua, & se faisant voir : *il ne faut pas*, dit il avec vne sainte liberté, *que vous fassiez à present cette operation* ; puis se tournant vers la femme du malade, *gardez vous bien*, poursuivit il, *de laisser couper le bras à vostre mary : ayez patience, Dieu y pouruoirra*. Les Chirurgiens firent quelques instances de passer outre : neantmoins ils differerent iusques au lendemain. Le Pere Yvan ayant célébré la Messe de bon matin, reuint à la chambre du malade, & prenant son bras grangrené, que les Chirurgiens auoient percé en plusieurs endroits sans qu'il en eust receu aucun soulagement ; *regarde*, luy dit il, *ces deux doigts, avec lesquels j'ay consacré le S. Sacrement de l'Autel, il faut que ces mesmes doigts qui viennent de toucher ton Createur & ton Sauueur te guerissent, ils le pourront faire si tu as la foy*. Il toucha en suite le bras du malade, avec les doigts de la consecration ; en mesme temps les trous que les Chirurgiens auoient faits au bras du malade, s'estans ouuerts, il en sortit du pus en abondance ; si bien que le malade se trouua à l'heure mesme extraordinairement soulagé & peu de temps après entierement guéri.

Dans la mesme ville, vne autre personne de qualité, ayant aussi vne grande inflammation en vn bras, qui luy cauait vne ardente fièvre, les Chirurgiens après diuers remedes auoient resolu d'y faire des incisions, de peur que la gangraine ne s'y mist. Le Pere Yuan fut appelé pour disposer le malade à souffrir patiemment l'operation qu'on vouloit faire sur son bras : il le consola, l'exhorta à endurer avec resignation son mal, comme vn effet de ses pechez, & le disposa à mener vne vie plus deuote, si Dieu le remettoit en santé. Puis se mettant à genoux, il fit quelques prieres, après lesquelles s'estant dressé, il forma le signe de la Croix sur le bras du malade, qui à l'heure mesme se trouua soulagé & guéri.

Dans la ville d'Aix, vne personne de vertu, atteinte aussi d'une grande inflammation à la jambe, en souffroit vne vio-

lente fièvre, & il y auoit plus d'un mois qu'elle en estoit incommodée. Le Pere Yuan ayant esté appelé, l'a vint visiter, & dit quelques paroles de consolation & d'instruction; puis, comme le malade se plaignoit de la violence de son mal, *ayez patience, adiousta le Pere, & confiez vous en la bonté de Dieu, & de la sainte Vierge, Mere de Misericorde, j'espere que vous en receurez du soulagement.* L'effet suiuit les promesses; car le P. ayant touché la partie malade & formé dessus le signe de la croix, vne heure après cette même partie enflée & enflammée, s'ouurit; de maniere que la matiere corrompue en estant sortie, elle recouura l'entiere guerison, Cela estant arriué en la presence d'un fils de la malade, qui s'estant depuis rendu Religieux parmi les Freres Mineurs Conuentuels, en a donné vne attestation authentique.

Le sieur Raybaut Prestre, & Directeur des Religieuses de la Misericorde d'Aix, auoit depuis quelques années vne grosse tumeur sur vn genouil, dont il estoit fort incommodé. Le Pere Yuan l'ayant sceu, après auoir prié Dieu pour luy dans le sacrifice de la Messe, luy fit decouurer sa tumeur, sur laquelle il forma le signe de la Croix, & fit vne onction de l'huyle de la lampe, qui veille deuant le S. Sacrement de l'Autel dans l'Eglise des mesmes Religieuses. Ce mesme iour la tumeur s'estant ouuerte & purgée, il en fut pleinement gueri.

Vne Religieuse de la Misericorde dans la mesme ville, auoit aussi vne tumeur au genouil si enflammée, qu'elle luy cauoit vne extrême douleur, & la mettoit en danger d'une fièvre dangereuse. Le Pere Yuan luy commanda de decouurer sa playe à vn Chirurgien, & receuoir tous les remedes qu'il ordonneroit. La fille obeyt; mais au lieu d'estre soulagée par l'emplastre que le Chirurgien luy appliqua, la douleur, & l'inflammation s'augmenterent avec excès. Il semble que le Pere Yuan en eust vne connoissance extraordinaire; car ayant demandé à la fille, comment elle se portoit, sans qu'elle se plaignit de sa douleur, *ie crains, luy dit il, que les remedes du Chirurgien, n'ayent acreu ta douleur & ton inflammation.* Ce qui estoit vray, ainsi que nous venons de dire. Neantmoins la fille continuant de dissimuler son mal par ver-

ru, & ayant répondu que cela n'estoit rien; *ie veux*, repliqua le Pere, *que tu ostes cét emplastre, & ie prieray la sainte Vierge de te guerir.* La Religieuse obeyt, & le Pere se mit en priere, & fit plusieurs signes de Croix sur la malade; en telle sorte qu'elle se trouua en mesme temps guerie, sans aucun autre remede.

CHAPITRE IX.

Continuation du mesme sujet.

CETTE Demoiselle de Cotignac, qui prit pour mari le ieune homme que le Pere Yvan luy assigna, comme nous auons dit dans le chapitre precedent, estant allée à Marseille voir son fils malade à l'extremiré; rencontra nostre bon Ecclesiastique dans la rue, où elle mit pied à terre: aussi tost s'adressant à luy, toute éplorée: *Helas mon Pere!* luy dit-elle, *mon enfant se meurt, & vous sçavez que se n'en ay point d'autre.* Fille, *ne t'affliges pas tant*, répondit le Pere, *Dieu t'assistera: allons voir ton enfant.* Elle commença à se consoler, & à esperer bien de son enfant. Dès qu'ils furent arriuez à la chambre où estoit le malade, luy ayant demandé comme il se portoit; *il ne faut pas*, luy dit le Pere avec grande simplicité, *que tu meures, car cette folle (parlant de la mere) mourroit aussi.* Puis eleuant les yeux & les mains vers le Ciel: *Mon Dieu*, continua-t'il avec vne confiance filiale, *il ne faut pas s'il vous plaist que cét enfant meure.* Après cela s'approchant du malade il luy toucha la teste par trois fois, & fit sur luy des signes de la Croix: si bien qu'à l'heure mesme il se sentit soulagé; & le Medecin qui auparauant desespéroit de sa santé, estant venu peu de temps après, le trouua non seulement hors de danger, mais encore entierement deliuré de sa fièvre.

La Dame d'Oppede, mere du premier President du Parlement de Prouence, femme d'une tres haute pieté, & no-

tamment d'une charité singulière envers les pauvres, pria le Pere Yuan de visiter une femme languissante depuis longtemps, & percluse de tous ses membres par une paralysie universelle. Le Pere la visita en compagnie de la même Dame, la consola, l'encouragea à souffrir patiemment, & l'exhorta encore à être reconnoissante envers Dieu, & bien deuote à la Sainte Vierge, si elle recouvroit sa santé. La pauvre malade soupira à ces derniers mots, comme ayant perdu espérance de sa guérison; neantmoins elle connut bien tost, que nostre bon Prestre auoit eu raison de l'exhorter à la reconnoissance; car ayant reçu de luy une petite Image de la sainte Vierge qu'on mit à son col, & le signe de la sainte Croix qu'il forma sur elle, estant sorti immédiatement après, elle se trouua soulagée, & en peu de temps entièrement guérie.

Ayant visité un autre malade qui souffroit des douleurs aiguës & violentes par tout son corps, apres quelques paroles de consolation, il l'exhorta à se resigner à la volonté diuine, & à unir ses douleurs à celles que nostre Seigneur Iesus-Chr. auoit souffert durant sa passion. Il se dispoisoit en suite à sortir, lors que la malade le regardant d'une façon qui témoignoit, & la violence de ses douleurs, & la confiance qu'il auoit en luy; *Helas mon bon Pere! priez bien Dieu & la sainte Vierge Mere de misericorde pour moy, & ne sortez point que vous ne m'ayez donné vostre benediction.* Le Pere touché de compassion, s'arresta encore un peu auprès d'elle, fit quelques prières, & puis il luy donna sa benediction, & sortit. Il semble qu'en sortant, il fit aussi sortir la maladie: car à peine fut-il hors de la maison, que la malade se trouuant guérie de ses douleurs, se leua de son lit, & se prosternant à genoux, elle remercia Dieu, & sa sainte Mere, de la santé qu'elle croyoit auoir obtenuë par le moyen de leur bon, & fidelle seruiteur.


Quand on bastissoit le Monastere des Religieuses de Nostre Dame de Misericorde dans Aix, il arriva que le fils du maistre Maçon, qui estoit un garçon volage, au lieu de s'aider à auancer l'edifice, retardoit souuent le trauail des Manœuvres, les amusant par ses folatreries, ou les inquietant par

de petits outrages qu'il leur faisoit. Nostre bon Prestre l'auoit reprimandé plusieurs fois, & menacé qu'il luy arriueroit quelque malheur, s'il ne s'amendoit, & notamment depuis qu'il auoit esté cause de la cheute d'une pauvre Manœuvre, appelée Marie, qui arriua en cette sorte.

Marie portoit sur sa teste vn seau d'eau au plus haut estage du bastiment, dont on faisoit le plancher, Comme elle fut arriuée à la cime du degré, & qu'elle ne sçauoit par où passer, n'y ayant que des trous de toutes parts; le garçon de qui nous venons de parler, indiqua l'endroit le plus dangereux, disant qu'il estoit le plus assuré, La pauvre Marie n'eut pas fait 4. pas qu'elle cheut: si bien que le seau qu'elle portoit, demeurant suspendu entre deux solives, elle tomba iulques en bas de l'edifice sans estre arrestée à aucune chose. Tous ceux qui la virent cheoir, s'écrierent de frayeur, qu'elle ne se brisast, tombant de si haut à trauers les poutres, & les solives de plusieurs estages. Nostre charitable Prestre se trouua present à cét spectacle, & éleuant aussi tost son cœur à Dieu, & à la S. Vierge, il implora leur secours. Il semble qu'il eut à l'heure mesme l'assurance de la conseruation de cette Manœuvre; car tandis que les autres s'écrioient de peur, il ne s'émeut nullement; mais au contraire consolant la fille, dès qu'il la vit tomber, *courage*, luy dit il, *Marie, ne crains point, la Mere de Misericorde t'assistera, & te preseruera.* Elle sentit alors mesme la verité de cette promesse; car s'estant redressée de sa cheute, elle se trouua saine, & entiere sans autre mal, que celuy de la honte, & de la peur, qui estant gueri par les paroles de consolation que le Pere luy dit, elle retourna au travail, avec autant de courage, qu'auparauant.

Les menaces que le Pere Yvan auoit faites à ce garçon, ne tarderent pas d'auoir leur effet: car le lendemain, comme il montoit le degré du bastiment, chargé d'un pesant fardeau de pierres, il cheut si rudement que s'estant meurtri en diuers endroits de son corps, tant par sa cheute, que par les pierres qui estoient roulées sur luy, il demeura sur le paué, sans mouuement, & sans presque aucune marque de vie. Le Pere Yvan le voyant tomber, s'écria d'apprehension, & estant accourru,

fut le premier à le releuer. Il le trouua comme s'il eust esté mort : c'est pourquoy le donnant à d'autres personnes qui y estoient aussi accourruës, les chargea de le porter dans la maison de ses parens. Le Pere & la mere du garçon, qui logeoient dans vn lieu fort proche, estants arriuez en mesme temps, & avec eux tout le voisinage ; le bastiment retentit de gemissemens, & de cris, chacun croyant que l'enfant fust mort, ou sans esperance de vie. Nostre bon Prestre neantmoins, les consolant : *Allez, leur dit il, ne craignez pas, le garçon se portera bien, qu'il soit plus sage à l'aduenir, & qu'il se souuienne de sa cheute.* Le reste du iour, & de la nuit suivante se passa, sans qu'on peust auoir aucune esperance de la guerison du blessé, iusques au lendemain, que le Pere Yuan celebrant la Messe de la sainte Vierge à l'intention du malade, il commença de reuenir, & à donner des marques de sa guerison ; de maniere que la Messe estant acheuée, il se trouua entierement gueri. Les parens vinrent dès aussi tost remercier nostre charitable Prestre, qui s'humiliant, & parlant de soy avec mépris, les porta à faire leurs remerciemens à Dieu, & à Nostre Dame de Misericorde, de la guerison de leur fils ; les reprimandant de la trop grande liberté, qu'ils luy auoient donnée, & les exhortant d'auoir plus de soin à l'aduenir, de veiller sur ses mœurs, pour le faire corriger des mauuaises habitudes qu'il auoit desia contractées.



CHAPITRE X.

Autres guerisons merueilleuses.

NOstre excellent Prestre n'a pas seulement suivi Iesus-Christ dans la pratique de ses vertus ; mais il semble encore l'auoir imité dans les guerisons merueilleuses qu'il a faites ; car comme ce diuin Sauueur guerissoit quelques fois les malades par son attouchement , & quelquesfois aussi par sa parole : nous trouuons que le P. Yvan a obtenu la santé à diuers malades, non seulement par ses prieres, ou'en les touchant, mais encore en leur commandant de quitter leur mal, & se mieux porter, Quelques fois il sembloit suspendre leur mal pour quelques heures , c'est à dire pour le temps seulement qu'il estoit necessaire d'employer à quelque pressante affaire , après lesquelles , les personnes se remettant dans leur lit, sentoient de nouveau la violence de leur mal ; presque de la sorte qu'on raconte de S. Pierre à l'endroit de sainte Petronille. Quelquesfois encore, par vne merueille tout à fait singuliere , il sembloit transferer le mal de la personne qui en estoit atteinte , à vne autre puis se portoit bien , & de celle cy , le faire repasser à la premiere. Ces sortes de guerison ont esté particulièrement faites en la personne de quelques Religieuses del'Ordre de la Misericorde , entre lesquelles il y en a encore de viuantes, qui en rendent des témoignages authentiques.

Vne des premieres filles de cét Ordre, estant tombée grieuement malade au commencement de sa Fondation ; le Pere témoigna d'en estre bien aise, disant[que la maladie luy seruiroit pour se mieux détacher des creatures, & assuiettissant sa chair, luy donneroit le moyen d'éleuer son esprit à Dieu avec plus de liberté.] Le succès répondit à ses intentions. Cependant le Demon ayant suscité de furieux orages contre l'ordre naissant, la santé de la fille parut necessaire pour les dissiper.

eut recours aux prieres; puis s'adressant à la malade: *Fille, luy dit il, que veut dire que veut dire que vostre mal est si long & si violent? Mon Pere, répondit la fille avec beacoup de peine: Dieu veut que ie fasse penitence de mes pechez, c'est une grande misericorde que sa bonté exerce enuers moy, de me faire souffrir, car ie suis une tres méchante creature. Vous dites vray, Fille, poursuivit le Pere, Que Dieu vous fait une grande misericorde de vous donner le moyen de souffrir. Helas, nous ne meritions pas un si grand bien: ie souhaiterois neantmoins, que vous ne fussiez plus malade, pour les affaires de Nostre Congregation. Si vous estes fidelle, continua-t'il & bien obeyssante, vostre mal s'en ira au commandement, que ie vous fais de vous leuer. La fille ne repliqua point: mais demandant ses habits, & faisant signe au Pere de se retirer, elle se leua à l'heure mesme avec force, & en bonne santé.*

Vne autrefois la fille dont nous parlons, estoit atteinte d'une violente douleur de migraine, quand le Comte d'Alais, pour lors Gouverneur de Prouence, pressé de luy communiquer quelque affaire de grande importance, s'adressa au P. Yuan; qui commanda en mesme temps, à la portiere de son Monastere, de faire venir cette fille au parloir. *Mon bon Pere, répondit la portiere, vostre charité ce sçait pas que la sœur que vous demandez, est malade à l'extremité; ayant une si grande douleur de teste qu'elle ne sçauroit ouvrir les yeux ny parler, ny souffrir qu'on luy parle, ny qu'on fasse le moindre bruit, sans pousser de grands cris. Ah fille, repartit le Pere Yuan, que dites là: que cette fille soit bien malade maintenant qu'il est necessaire qu'elle vienne au parloir? Après ces mots, ils'arresta tant soit peu sans parler: puis reprenant son discours, il n'importe, continua-t'il. Allez luy dire que ie luy commande de se leuer, & si son mal l'Empesche, qu'elle le preste à la sœur qui est auprès d'elle, & qu'elle vienne promptement au parloir: si elle est bien humble, elle viendra sans aucune peine. La portiere obeyt sans repartie, & nonobstant la resistance de la sœur infirmiere, elle dit à la malade ce que son Confesseur luy'auoit ordonné. O force extraordinaire de l'obeyssance, quand elle est accompagnée de simplicité, & d'humilité! la*

de maniere que quand vne fille estoit trop long temps malade, après auoir employé les remedes de la medecine, la Supérieure auoit recours au bon Pere Yuan, & le prioit de commander à la malade de se mieux porter.

Quelques fois ce sage Prestre s'en excusoit par humilité; quelques fois aussi il le refusoit absolument pour le bien & la perfectiō de la malade. Mais ordinairement pour se cacher, ainsi qu'il luy estoit ordinaire, il se seruoit du nom de la Supérieure parlant à la malade de cette sorte; *vostre mere dit qu'il ne faut pas que vous soyez malade; elle veut que ie vous commande de vous leuer. Lenez vous donc, & nous connoistrons par là, si vous aimez bien l'obeyssance.* La fille se trouuoit guerrie, & le Pere Yuan prenant de là occasion de faire connoistre à ses Religieuses la grandeur, & le merite de l'obeyssance, leur imprimoit vne haute estime, vn grand amour, & vn zele singulier pour la Pratique de cette vertu.

CHAPITRE XI.

Autres merueilles arriuées par son commandement.

IL commanda à vne de ses filles spirituelles, qui a esté depuis vne des premieres de l'Ordre de la Misericorde, de frequenter quelques personnes de grande pieté, luy faisant esperer qu'elle retireroit de grands profits de leur conuersation. Elle obeyt, & d'en peu de temps elle éprouua ce que son Confesseur luy auoit promis, par les auantages qu'elle receut dans leurs pieux entretiens, & dans la veüe de leur bons exemples. Neantmoins prenant garde que ces mesmes personnes, estoient trauaillées de ie ne scay quelles peines interieures, qui les plongeioient dans vne profonde tristesse, elle en fut grandement estonnée; parce qu'estant ieune Noüice dans la vie spirituelle, & ne scachant pas encore les voyes épineuses, par lesquelles Dieu conduit les ames choisies, elle s'estoit imaginée; qu'il n'y deuoit auoir que des douceurs &

des consolations interieures dans la pratique de la pieté. C'est pourquoy voulant en estre éclaircie par son Directeur, apres l'auoir remercié de la connoissance qu'il luy auoit donnée de ces pieuses personnes; *Mon Pere*, adiouta-t'elle, *ie vois quelque chose en ces personnes, qui me fait de la peine, & que ie ne comprends pas. Il me semble qu'elles ont de grands troubles, & travaux dans leur interieur. Comment se fait cela? Ceux qui aiment Dieu peuuent ils auoir des inquietudes, & des peines interieures, ayants avec eux leur souverain bien, qui est la paix des ames, & qui n'a que des douceurs, & des consolations pour ses Espouses?* Le bon Pere admirant la simplicité de cette personne: *Ah ma fille*, luy dit il, *que ces peines dont vous parlez sont agreables à Dieu, & de tres grand merite, quand on les supporte comme il faut! Dieu veut par là purifier les ames qu'il aime, & qui sont embrasées de son amour, pour leur faire gonster sa pure dilection, & les attirer à l'union, & à la transformation Diuine. Il faut que la chair, & l'esprit propre soient dans cette purgation. Ce sont les sens qui crient, & font du bruit avec l'amour propre qui voudroit tousiours toucher & sentir Dieu; ce qui est trop bas, trop grossier, & contraire à la pureté de la foy & de la charité. De maniere qu'il est necessaire, que l'ame soit purgée par diuers troubles, ennuis, secheresses, & autres angoisses interieures. O quel dommage quand ces filles dont vous me parlez, ne se laissent toutes posseder à Dieu. Allez les voir ma fille, poursuiuit il, & si elles sont encore dans leurs peines, soulagez les, leur donnant vostre repos, & recenant leurs angoisses. Et si Dieu vous fait la grace de sentir leurs peines, cherissez les comme un grand tresor. La fille obeyt; & la chose arriua ainsi que l'homme de Dieu auoit ordonné; car les filles qui estoient dans les souffrances, en furent deliurées; & celle qui en estoit exempte, en fut accablée. Ce que ayant rapporté à son Directeur, il la consola, & l'instruisit, de quelle façon elle se deuoit comporter, pour bien adherer à l'esprit de Dieu.*

Le Fils de Dieu assure dans l'Euangile, que les ames qui croient en luy, feront de plus grands miracles, que ceux qu'il a operez luy mesme. Il semble qu'en cecy le Pere Yvan

n'a pas moins imité ce Divin Sauveur , que dans les prerogatives que nous auions desia remarquées ; car il a fait ce semble de plus grandes merueilles par les personnes, qui luy obeyssioient , que par luy mesme , ainsi que l'on peut voir par les exemples suiuaus.

Vne Dame de qualité dans Aix, tourmentée d'un cancer qui se formoit dans son sein , auoit desia inutilement employé diuers remedes pour sa guerison , lorsqu'elle fut inspirée de recourir aux Religieuses de Nostre Dame de Misericorde. S'estant donc adressée à vne d'icelles : *Ma bonne sœur*, luy dit elle, *ie viens vous faire sçauoir l'extremité où ie me trouue; pour vous prier d'auoir compassion de moy, & me donner quelque soulagement. I'ay un cancer dans le sein, qui me cause d'extremes douleurs, sans que i'aye aucune esperance de guerir, que par des incisions que ie ne sçanrois supporter. Madame*, répondit la Religieuse, *ayez bon courage, nous le dirons au Pere Yvan nostre Confesseur, qui priera pour vous, & nous prierons aussi avec nos bonnes sœurs. Ce n'est pas assez*, adiousta la Dame affligée, *ie vous demande instamment la grace de vouloir toucher mon mal. Ab Madame*, s'écria la Religieuse, *Dieu vous le pardonne, ie ne suis qu'une miserable creature incapable de faire aucun bien, si ie vous touchois, j'augmenterois vostre mal, au lieu de vous soulager.*

La Dame nonobstant cette réponse , continuant dans la mesme demande , & faisant de nouuelles instances ; & la Religieuse continuant aussi de refuser; on s'en remit à ce que le P. Yuan ordonneroit ; si bien que ce sage Prestre commanda à la Religieuse de faire ce que la Dame desiroit ; adioustant que si elle le faisoit par le seul motif d'obeyssance , elle verroit des merueilles. La Religieuse obeyt simplement, elle forma le signe de la Croix sur la partie de la maladie de cette Dame, la toucha , & en osta le mal, de telle façon , qu'à l'heure mesme elle se trouua entierement guerie.

Plusieurs familles de la ville d'Aix estoient dans un estrange desordre , à l'occasion de la mauuaise intelligence d'un mary avec sa femme , l'un & l'autre personnes de condition. Il y auoit eu diuerses querelles , & de tres facheuses contentions

entre les parens des deux parties. Des iniures, on auoit passé aux coups, avec tant de violence, que le mari ayant intenté des procès criminels auoit fait mettre en prison, des plus proches parens de sa femme. Diuerfes personnes d'autorité auoient desia employé leurs soins, pour trouuer quelque voye d'accommodement, & notamment pour accoiser l'esprit du mari, qui paroissoit de plus en plus irrité; lors qu'on eut recours aux prieres du Pere Yuan, & de ses Religieuses de Nostre Dame de Misericorde. Apres quelques prieres, vne de ces mesmes Religieuses demanda au Pere Yvan, s'il agreoit qu'elle enuoyast querir ce mari. Le Pere le luy permettant, luy donne la benediction, & promit de recommander cette affaire à Dieu, & à sa sainte Mere de Misericorde.

La Religieuse forrifiée de la benediction, & des prieres de ce grand seruiteur de Dieu, entreprit cette negociation, avec quelque assurance qu'elle en sortiroit heureusement. Et ainsi ayant enuoyé appeller le mari qui poursuuoit ses parties avec des empressements extraordinaires, elle tascha d'adoucir son esprit, luy representant tout ce qu'elle sceut, pour la moderer. Cet homme parut extraordinairement esmeu de haine & de colere, & de desir de se venger, si bien qu'au lieu de se ramollir, il s'endurcit de plus en plus, iusques à faire cét horrible serment, qu'il aimoit mieux estre englouti, viuant dans les Enfers, que de pardonner, ou de faire aucune paix avec ceux qui l'auoient traitté si indignement.


L'innocente fille fut fort effrayée d'une telle obstination, neantmoins sans perdre courage, inuoquant le plus affectueusement qu'elle peult, l'assistance de Dieu, par les merites du Pere Yuan, elle continua ses persuasions enuers luy, pour le porter au pardon. Enfin voyant qu'il s'emportoit tousiours davantage: *Monsieur*, luy dit elle, *reposez vous tant soit peu, & regardez l'image de la sainte Vierge, cette bonne Mere de Misericorde qui est sur nostre Autel; regardez là, dis-ic, & voyez qu'elle prie son fils de vous pardonner; cependant ie luy reciteray le salut Angelique pour vous.* Effet admirable de la puissance de la S. V. cet homme colere, qui transporté de hay-

ne & de vengeance, souffroit d'effroyables agitations dans son esprit, se trouua à l'heure mesme dans vn calme profond, & dans vne si grande tranquillite; qu'il sembla que tous ses sens fussent assoupis par vn agreable sommeil; si bien que se leuant & approchant de de la grille d'vne façon qu'il témoignoit le changement de son interieur: *Ah ma fille, s'écria-t'il, te veux vous croire, & faire tout ce que vous me conseillerez.* Ces bonnes paroles furent suiues des effets encore meilleurs; car renonçant à toute sorte de hayne, & de vengeance, oubliant mesme les iniures qu'il auoit receuës, il procura l'élargissement de ceux qu'il detenoit en prison, se reconcilia avec toute sa parenté, reprit sa femme, & vescu depuis avec elle, en grande paix & benediction.

Il y auoit dans Aix vn gentilhomme rude & violent, qui estoit dans des mouuemens de colere presque continuels, contre tous ceux qui s'approchoient de luy, & mesme contre toute sorte de personnes; dont il ne parloit quasi iamais qu'avec murmure, & detraction. Ce qui fomentoit ce mal en luy, est qu'il auoit fort peu de sentiment de pieté, & de crainte de Dieu, passant plusieurs années sans recevoir aucun Sacrement. Il continuoit dans cette malheureuse vie, lors qu'il fut atteint d'vne violente maladie, qui en peu de iours le reduisit à l'extremité, & hors d'esperance de guerison. Cependant il ne songeoit nullement au salut de son ame, & personne n'osoit luy en parler; craignant que cela ne le portast à des violences extremes, & mesme à des reniements sacrileges, ainsi qu'il auoit accoustumé. Enfin le Seigneur, qui veut sauuer tous les hommes, & ne refuse sa grace à aucun, non pas mesme aux plus grands pecheurs, inspira pour le salut de cethuy-cy à vne vertueuse Religieuse de N. D. de Misericorde, de demander, & faire demander sa conuersion par les prieres du P. Yuan. En effet elle en parla à ce zelé Confesseur, & luy ayant déclaré l'estat deplorable de ce malade, elle le supplia de prier pour luy, & faire quelques penitences, & bonnes œuures pour son salut. *Fille,* répondit le Pere, *ie feray ce que vous me proposez; mais d'ailleurs faites visiter ce malade,*

& enuoyés luy dire de vostre part , ce que Dieu vous inspirera.

La Religieuse obeyssant à son Confesseur , enuoya aussitost visiter le malade , & donna ordre qu'on luy dit de sa part, que Dieu vouloit l'appeller à soy de cette maladie , qu'il ne différast plus à purifier sa conscience , & à se bien preparer, auant que comparoistre deuant son terrible iugement , qu'au reste il eust confiance aux merites de Iesus Christ, & aux intercessions de la sainte Vierge Mere de Misericorde; que le Pere Yuan , & ses Religieuses prioient pour luy. L'on auoit tousiours apprehendé que le malade entrast dans quelque horrible furie , dès qu'on luy parleroit de la mort; neantmoins par vn euenement contraire, quand on luy eut proposé ce que les Religieuses auoient mandé par l'ordre du Pere Yuan: *Helas, s'écria-t'il, est il bien possible que Dieu pense à moy , après tant de pechés que j'ay commis contre luy; & que ses seruiteurs ayent de la charité pour mon salut? Que l'on m'aille viste appeller vn Confesseur, afin que ie profite du temps qui me reste, pour satisfaire à mon deuoir.* On ne scauroit exprimer l'étonnement des personnes qui estoient auprès de luy, voyant vne conuersion si soudaine , & si peu esperée; mais leur admiration s'accroit encore , lors que le Confesseur estant venu, il le receut avec vne ioye extraordinaire, & se confessa avec tant d'humilité, de confiance, & de contrition, qu'on eut suiet de croire que sa conuersion estoit veritable. Il perseuera dans ces pieux sentimens, iusques à son décès, avec tant de bonheur, qu'ayant eu la connoissance du moment de sa mort, il l'accepta avec grande resignation, & vne parfaite conformité à la volonté du Createur.



CHAPITRE XII.

Continuation du mesme sujet.

SViuant les memoires que i'ay, attestées par des personnes dignes de foy, le pouuoir merueilleux du Pere Yuan ne s'estendoit pas seulement sur les creatures raisonnables : mais encore sur celles qui sont priuées de raison ; & mesmes sur les insensibles.

Il entra vn iour dans le Monastere des Religieuses de Nostre Dame de Misericorde à Aix, vn chat estrange, qui d'abord paroissant furieux, fit de grandes violences, & d'étranges rauages. Il pouffoit d'horribles hurlemens, il rompoit & destruisoit tout ce qui tomboit entre ses griffes; il auoit Imprimé vne si grande terreur aux Religieuses, qu'elles estoient toutes espouuentées, dès qu'elles l'apperceuoient : enfin on crut qu'il estoit enragé, où possédé par quelque malin esprit. Nostre bon Prestre en estant aduerti, commanda qu'on luy ouurist les portes & les fenestres, & qu'on le chassast pour le faire sortir. On obeit; mais le chat se cacha & ne sortit point. Le Pere commanda derechef qu'on fist tout ce qui se pourroit pour le tuer. Les Religieuses s'y employerent durant quelques iours, mais leurs effets ayans esté inutiles, l'on fut contrainct de faire entrer vn homme robuste, armé de fer, & de feu pour le mesme sujet. Cét homme poursuuiuit le chat, le frappa, luy tira vn coup d'arquebuzé, mais tout cela luy fut inutile, & ne seruit qu'à irriter dauantage ce furieux animal. Enfin nostre sage Prestre ayant eu recours aux prieres, commanda à vne de ses Religieuses de prendre ce chat, & le luy apporter; luy promettant que si elle estoit bien humble, & bien obeyssante, le chat se laisseroit prendre sans aucune resistance. La fille obeyt avec foy & simplicité; si bien qu'ayant cherché & trouué le chat, au lieu de fuyr, ainsi qu'elle auoit accoustumé, elle s'en approcha avec assurance. Il semble

F F f

que le chat fut arresté par vne main inuisible ; car de sauuāge & de furieux qu'il estoit auparauant , deuenant tout à coup domestique , & traittable , se presenta à la fille , qui le prenant sans aucun effort , le porta à son Confesseur. Ce bon Pere après auoir remercié nostre Seigneur , prit de là occasion de blâmer ses Religieuses du peu de foy qu'elles auoient eue , & de leur recommander fortement la vertu d'obeyssance , laquelle assuiettissoit les bestes les plus farouches.

Dans le mesme Conuent des Religieuses de Nostre Dame de Misericorde , vn iour que les Religieuses estoient obligées de communier selon leurs constitutions , le Prestre qui deuoit leur donner la Communion , ayant desia auancé la Messe ; la Sacristine se prit garde que la clef de la fenestre par où elles communioient , estoit esgarée. Elle en aduertit la Superieure qui commanda aussi tost qu'on cherchast cette clef. On obeyt , mais on ne sceut la trouuer. Cela faillit à causer du trouble , parce qu'il n'y auoit point d'autre endroit , par où les Religieuses pussent communier : il estoit trop tard pour faire appeller le Serrurier , outre que le bruit qu'il auroit esté contraint de faire , auroit donné suiet de distraction aux Religieuses , qui se preparoient à la Communion , & à tous ceux qui assistoient au saint Sacrifice de de la Messe. L'on ne pouuoit pas aussi la remettre , ny differer , sans manquer au reglement du Monastere. Enfin on fit appeller le Pere Yuan , qui donna aussi tost vn moyen efficace ; pour que ses Religieuses peussent communier & que la fenestre s'ouurist sans clef , sans aide du Serrurier , & sans aucune violence. Après auoir prié Dieu , il commanda à vne de ses Religieuses , d'ouurir la fenestre , luy disant qu'elle eust vne grande foy , & vne parfaite soumission. La Religieuse obeissant simplement , & sans faire nulle reflexion , s'approcha de la fenestre , & la tira doucement par vn des barreaux de fer dont elle est composée. Il semble que le fer se ramollit , & qu'il se rendit aussi souple au commandement du Pere Yuan , que la Religieuse estoit obeyssante ; car la fenestre s'ouurit aussi tost que la Religieuse la tira ; elle s'ouurit , dis-je , sans effort , sans bruit , & avec plus de facilité que si on l'eust ouuerte avec la clef ; quoy que auparauant

on eust inutilement essayé de l'ouurir, mesme avec violence. Nostre humble Prestre voulut que ses Religieuses attribuassent cét effet à la seule vertu de l'obeyssance; prenant de là occasion de leur dire que cette vertu est la veritable clef, par laquelle Dieu ouure les portes de sa grace, & de sa gloire aux ames qui la pratiquent humblement, & avec amour & persuerance, iusques au dernier moment de leur vie.

Pendant que nostre bon Prestre demeueroit à Brignoles, le feu se prit dans vn quartier de la ville; avec tant de violence, qu'elle fut en danger d'estre entierement consumée par les flammes. Quelques efforts que les habitans fissent pour éteindre, ou arrester l'incendie, le feu s'estendoit dauantage, en telle sorte que l'embrasement croissoit à mesure que l'on y iettoit de l'eau en plus grande quantité. Le Pere Yuan estant appelé, y accourut avec diligence; & comme il auoit vne charité paternelle pour tout ce qui regardoit le bien de ses Parroissiens; il témoigna vn grand déplaisir du dommage que le feu causoit. Si bien que voulant les en deliurer, se mit à genoux, & opposant la ferueur de ses prieres à la furie des flammes, tandis que les autres y iettoient de l'eau, de la terre, & semblables choses, il y ietta vn Agnus, qui eut tant d'efficace, qu'au mesme temps le feu se retira, & les flammes se ramassans en forme de globe, s'éuanouïrent. Chacun cria, Miracle. Le Pere Yuan s'ensuyt, de peur d'estre loüé: mais la prouidence diuine permit vn succès bien contraire; car au lieu des loüanges, & des remercimens qu'il meritoit, il n'en eut que du blasme, & du mespris: plusieurs l'accusans d'estre sorcier, & imputant à sortilege l'effet merueilleux qu'il venoit d'operer. Ce qui nous enseigne le peu d'estat que nous deuons faire des iugemens des hommes, puis qu'ils sont si iniustes, & si trompeurs.

Nostre sage Prestre estant entré dans le Conuent de ses Religieuses d'Aix, pour quelque pressante necessité, se trouua dans la cuisine, quand vne Religieuse y vint pour prendre du feu, & le porter à la chambre de la Superieure. La diuine prouidence permit qu'il n'y eust alors dans la cuisine, ny chandelle, ny lampe pour prendre de la lumiere, ny aussi aucune pail-

le, ou autre instrument pour porter du feu : il n'y auoit mesme que du charbon allumé, Dieu ayant disposé, ce semble les choses de la sorte, pour donner lieu à ce qui arriva. La Religieuse estant fort en peine, demanda simplement à ce bon Prestre ce qu'elle deuoit faire, & en quelle façon elle pourroit porter du feu. *Ma fille*, répondit le Pere, *prends de ces charbons allumés dans ta main, ils ne te brusleront pas.* La fille obeïssant, prit de ces charbons ardents avec les doigts, les mit dans sa main, & les porta ainsi iusques dans la chambre de sa Supérieure, sans nulle incommodité : au contraire avec autant de ioye, & de consolation, que si elle eust porté vne poignée de fleurs. Si bien qu'ayant remis les charbons ardents dans vn rechaud, ses mains se trouuerent aussi saines & fraïches, que si elle eust porté des roses & des lys

Dans la ville de Bignoles, vne vertueuse femme, ayant fait des plaintes à nostre excellent Prestre son Directeur, & ce que n'ayant point la connoissance des lettres, elle estoit priuée de la lecture des bons liures, qui est vn des plus puissans secours de la vie spirituelle. Le Pere Yuan trouua le moyen de la deliurer de sa peine ; de maniere qu'apres luy auoir donné quelques auis salutaires touchant sa conduite : *tenez*, luy dit il, *voilà vn liure de deuotion que ie vous donne, & seruez vous en, vous y trouuerez ce qu'il vous faut.* Helas, mon bon Pere, répondit la femme, *ie ne sçay pas lire, comment est-ce que ie pourray m'en seruir.* Ourez le, repartit le Pere, *quand vous serez arrivée chëz vous, & regardez ce qui est escrit, le liure vous apprendra à lire.* La femme sans repliquer dauantage remercia le bon Pere, & s'en retourna chez elle, portant le liure qu'elle en auoit receu. Le mesme iour, elle ouure son liure, & s'estant assise, veut éprouuer la vérité des promesses de son Confesseur. Son mary se trouuant present, se prit à rire, & à la railler de ce que ne sçachant lire, elle en faisoit le semblant; mais sa raillerie se changea bien tost en vn serieux étonnement, lors que s'estant approché d'elle, & la priant de lire à haute voix, elle le satisfit, lisant distinctement, & avec grande facilité. Sur quoy s'estant informé d'où venoit ce nouveau changement, il benit le Sei-

gneur de la grace que sa femme auoit receuë.

Il arriua dans Aix vne mesme merueille à vne Demoiselle de vertu, qui auoit de profonds respects pour le Pere Yuan, son Confesseur. Elle ne sçauoit pas lire, & cette ignorance luy causoit de grands déplaisirs. Vn iour ayant demandé quelques auis de piété à nostre bon Prestre, il luy presenta le liure des conseils de perfection, qu'il auoit composé luy mesme. Cette Demoysele luy dit d'un ton qui faisoit connoistre son affliction : *Mon Pere, ie ne sçay pas lire ; mais ie trouueray quelqu'un qui m'en fera la lecture. Non pas cela,* répondit le Pere, *il faut que vous le lisiez vous mesme. Allez, si vous estes fidelle, le liure vous apprendra.* Le mesme iour elle trouua cette promesse veritable : car elle sceut lire à l'ouerture de ce mesme liure, dont elle receut vne si grande ioye, qu'elle alla à l'heure mesme publier cette merueille, pour faire connoistre le merite de son Confesseur. Mais sa reconnoissance fut encore plus grande, en ce qu'elle eut depuis vne telle estime, & amour pour ce liure que le Pere Yuan luy auoit donné ; qu'elle le monstroit comme vne relique, & le conseruoit comme vn tresor.

CHAPITRE XII.

Il fait, & distribuë des images de Nostre Dame, qui operent des effets merueilleux.

VN E des deuotions de nostre bon Prestre enuers la Mere de Dieu, ainsi que nous auons remarqué, estoit de grauer des planches de cette grande Reine, pour en tirer des Images qu'il distribuoit à diuerses personnes. Il s'occupoit à ce pieux travail avec vne application singuliere. Car outre qu'il y employoit tout le temps que les autres occupations de Iustice, ou de charité pouuoient luy permettre, il y apportoit des circonstances qui temoignoient sa foy, son respect, & son amour. Il se recueilloit auant que grauer les crus, & les plan-

ches, & auant que preparer la matiere pour en tirer les Images, comme s'il eust entrepris quelque sainte ou religieuse action. En trauaillant il se tenoit encore recueilly avec vne application semblable à celle qu'on remarquoit en luy, quand il faisoit l'oraison: d'où vient qu'alors il ne parloit que tres peu, & avec peine. Il trauailloit ordinairement la teste decouuerte, & recitoit de temps en temps de courtes & frequentes prieres à l'honneur de la sainte Vierge. Quant il pre-
paroit l'argile pour en mouler des Images, il y mettoit de l'caubenite, & y faisoit dessus plusieurs benedictions; y ad-
ioustant encore les prieres que sa pieté & son zele à faire hon-
orer la Reine des Cieux, luy suggeroit.

C'est pourquoy cette auguste Princeesse fauorisant les pieu-
ses intentions de son seruiteur, & benissant son trauail, don-
noit vne extraordinaire vertu aux Images qu'il distribuoit:
de maniere qu'il en est arriué vne infinie de merueilles, & en
arriue encore tous les iours, en faueur des personnes qui les
portent avec deuotion. L'Eglise des Religieuses de Nostre
Dame de Misericorde d'Aix, est presque toute tapissée des
tableaux qui ont esté donnez en reconnoissance des faueurs
singulieres, que le Ciel a accordées à diuerses personnes, à qui
le Pere Yuan, ou ses Religieuses auoient distribué des
Images dont nous parlons.

Le fils du sieur Balon Conseiller en la Cour de Parlement
d'Aix, trauaillé d'une retention d'vrine, estoit devenu enflé,
& réduit à vn estat si dangereux, qu'après diuers remedes,
l'on desespéroit de sa santé. La Dame sa mere eut recours
aux prieres du Pere Yuan, qui luy donnant vne des Images
de Nostre Dame qu'il faisoit, luy dit de la mettre sur son fils,
& l'exhorta d'auoir vne grande confiance enuers la mere de
Dieu. Cette Dame suiuant ses conseils, appliqua aussi tost sur
son malade l'Image qu'elle auoit receüe, avec tant de bon-
heur, qu'à l'heure mesme il commença à sentir du soulage-
ment, & bien tost après, il fut entierement gueri. En action
de graces de cette singuliere faueur, le pere & la mere du ma-
lade, ayant fait faire vn riche tableau, où la merueille est dé-

DV VENERABLE P. ANTOINE YVAN. 611
peinte, l'offrirent à Dieu, & à la sainte Vierge, dans l'Eglise
des Religieuses du Pere Yuan.

La Demoiselle Boissely atteinte d'un vomissement de
sang, en souffroit d'estranges maux, depuis plusieurs mois,
& vne si grande foiblesse, qu'après auoir inutilement employé
diuers remedes, elle n'attendoit plus que la mort. Le Pere
Yuan, après auoir prié pour elle, & l'auoir recommandée à
ses Religieuses, luy donna vne de ses Images, & de l'huyle de la
lampe qui brusse deuant le maistre Autel de son Eglise; si bien
que la malade s'estant appliquée ce pieux remede, se trouua à
l'heure mesme parfaitement guerie, sans que depuis elle ait
eu aucune atteinte de son incommodité. Elle offrit aussi vn ta-
bleau de sa guerison, dans la mesme Eglise de nos Religieu-
ses.

Vne autre femme qui auoit vn cancer dans le sein, après a-
uoir souffert diuers coups de rasoir sur la partie infirme, sans
en receuoir aucun soulagement, eut recours au Pere Yuan,
pour se recommander à ses prieres, & à celles de ses Religieu-
ses. Ce bon Prestre, après l'auoir consolée, luy donna vne de
ses Images de la sainte Vierge, l'excitant d'y estre bien deuo-
te, & d'auoir vne grande confiance à cette Mere de Misericor-
de. La malade l'ayant remercié, s'en retourna chez elle, &
d'abort ayant mis l'Image sur son mal, elle s'en trouua soula-
gée, & recouura bien tost l'entiere guerison, sans s'estre ser-
ui d'aucun autre remede. Pour reconnoissance de ce bien fait,
elle vint faire ses deuotions dans l'Eglise de N. Dame de Mi-
sericorde, & y porta vn tableau de sa guerison.

Nostre bon Prestre passant vn iour deuant la maison d'une
femme, dont la fille estoit hydropique, & gisant au lit de-
puis long temps, fut prié par elle mesme d'y entrer, pour
voir sa fille languissante. Les Chirurgiens appliquoient pour
lors des remedes sur la malade: ce qui luy faisoit pousser de
grands cris qui témoignoient la violence de sa douleur. Le
Pere Yuan l'exhorta d'auoir patience, & de souffrir son mal
avec resignation, pour l'amour de Iesus-Christ. Puis se tour-
nant vers la mere, *ne vous affligez pas*, luy dit il, *vostre fille*
ne mourra pas de cette maladie. Voila vn image de Nostre

Dame de Misericorde, que vous luy mettrez dessus : si vous auez une vraye confiance enuers cette grande Reine, vous esprouuerez combien elle est puissante, & misericordieuse. La femme receut avec respect le present du Pere, & le mit sur sa fille qui se trouua aussi tost soulagée : si bien qu'ayant recouuré ses forces, elle porta quelques iours après vn tableau de sa guerison dans l'Eglise des Religieuses du P. Yuan.

Il arriua vne rencontre presque semblable à vne autre femme qui estoit malade depuis long temps, & quasi hors d'esperance de guerir. Elle entendit vn iour qu'une de ses voisines saluoit le Pere Yuan qui passoit par la rue, & se recommandoit à ses prieres. Elle supplia aussi tost ceux qui estoient auprès d'elle, d'appeller ce bon Prestre, esperant receuoir vne grande consolation de sa visite. Le Pere vint dès qu'on l'aduertit, il vid la malade, l'exhorta à souffrir Chrestienne-ment, & il la consola ; mais d'une façon plus auantageuse, qu'elle n'auoit esperé. Car il luy donna vn Image de la sainte Vierge, par la vertu de laquelle se trouuant guerie, elle se leua de son lit, & le lendemain s'en alla dans l'Eglise de Nostre Dame de Misericorde, pour rendre graces de la faueur qu'elle auoit receüe.

La fille d'un Magistrat du Parlement d'Aix auoit eu la petite verolle, qui luy auoit causé de tres grandes incommoditez, & notamment la perte d'un œil. Nostre bon Prestre estant supplié de la recommander à Dieu, *il faut, dit il, donner à cette fille une image de Nostre Dame de Misericorde, & que ses parens fassent dire une neufuaine de Messes à son intention, j'espere qu'elle recouvrera entierement la santé.* La chose arriua de la façon qu'elle auoit esté dite. On donna vne Image de Nostre Dame à la fille, & on commença la neufuaine des Messes, pendant laquelle la malade recouura la veüe, & se trouua deliurée de toutes ses autres incommoditez. En reconnoissance de quoy, elle se donna soy mesme à Nostre Dame de Misericorde, se faisant Religieuse dans le Monastere de ses filles d'Aix, où elle mourut saintement quelque temps après.

La Demoiselle de Bompar fut merueilleusement guerie d'une

d'une fistule qu'elle auoit en vn œil , portant sur soy vne des Images de Nostre Dame de Misericorde , que le P. Yuan auoit faite.

La Deroyselle de Berenguer ayant fait vne fausse couche , estoit en danger de mourir ; en telle sorte que les Medecins desespoeroient de sa santé ; lors que ayant pris sur soy , vne Image de la sainte Vierge que le Pere Yuan luy enuoya , elle se trouua à l'heure mesme soulagée , & hors de peril.

Le sieur Iulien Procureur au Parlement d'Aix , après auoir esté trauaillé long temps du calcul , avec des douleurs effroyables qui le contraignoient de garder le lit , & de pousser des cris presque continuels ; ayant mis sur soy vne Image de Nostre Dame de Misericorde , que le Pere Yuan luy auoit fait donner , & s'estant recommandé aux prieres de ce bon Prestre , & de ses Religieuses , ietta sans violence deux pierres , & fut deliuré de son mal.

CHAPITRE X.V.

Continuation du mesme sujet.

IE n'aurois iamais fait , si ie voulois raconter toutes les merueilles qui sont arriuées par la vertu des Images de la sainte Vierge , que le Pere Yuan faisoit , & distribuoit. I'adiousteray seulement que nostre bon Prestre a operé par ses Images plusieurs autres effets , qui semblent plus merueilleux que les guerisons.

Il ya eu des femmes qui ayant tousiours fait de fausses couches , si bien que leurs fruits estoient priuez du Sacrement de Baptisme ; ces femmes , dis-je , portant sur soy de ces Images du Pere Yuan , se sont heureusement accouchées , & leurs enfans ont receu le Baptisme , & ioüy d'une parfaite santé.

D'autres femmes , qui n'auoient eu aucun enfant dans leur mariage depuis plusieurs annés , en ont obtenu , portant sur soy de nos Images de la sainte Vierge , & se recommandant aux

G G g

intercessions de cette grande Reine, par les prieres de nostre bon Prestre son seruiteur.

Plusieurs ont esté deliurez de la maladie contagieuse par ces mesmes Images, quoy qu'ils demeurassent dans des villes infectées de ce violent mal, & qu'ils vécussent mesme avec ceux qui en estoient atteints.

Le sieur Gautier marchand de la ville d'Aix, portoit sur soy vne de nos Images, lors que passant la riuere de Lizero dans le Dauphiné, le bateau se rompit, de maniere qu'il cheut estant à cheval, au milieu des flots. Les eaux de ce rapide torrent, l'emporterent d'abord si loin, qu'elles le mirent hors d'esperance humaine de se pouuoir sauuer. Il se souuint de l'Image de Nostre Dame qu'il portoit, & ce souuenir ayant releué son courage abbatu, & animé sa confiance enuers la sainte Vierge, il prit cette Image en sa main, & se recommanda à Nostre Dame de Misericorde. Il sentit en mesme temps, vn bras secourable qui le soustenant au milieu des flots, le conduisit heureusement avec son cheual, iusques au bord; lors que ceux qui l'auoient veu cheoir dans la riuere, le croyoient perdu. Il publia par tout la protection de la Mere de Dieu en son endroit, à l'occasion de son Image, & estant deretour à Aix, il offrit dans l'Eglise des Religieuses du Pere Yuan, vn riche tableau, qui represente le danger qu'il auoit encouru, & son heureuse deliurance.

Le mesme ayant esté trauaillé quelque temps après d'vne foiblesse de jambes, qui le contraignoit à se seruir de potences pour pouuoir marcher, fut encore deliuré contre l'esperance de ceux qui le traittoient, ayant eu recours à Nostre Dame de Misericorde, par les prieres du Pere Yuan, & de ses Religieuses.

Dans la ville de Toulon, vn ieune enfant regardant dans vn profond reseruoir d'eau, qui est dans vn jardin de Religieux, y tomba dedans, en telle sorte qu'il fut à l'heure mesme englouti dans les eaux. Il s'y rencontra par bonheur vn Religieux present, qui voyant cette cheute, s'écria, & s'approcha du reseruoir, pour secourir le garçon. Mais comme il ne paroissoit point, & qu'il n'osoit pas luy mesme y descendre,

DV VENERABLE P. ANTHOINE YVAN. 615

pour le chercher, il ietta vne des Images de Nostre Dame de Misericorde du Pere Yuan, à l'endroit où l'enfant estoit cheu. Merueille! l'enfant parut aussi tost sur l'eau; si bien que le Religieux l'ayant pris par le bras, le tira heureusement en vie, & hors de danger.

Dans la mesme ville de Toulon, vn ieune enfant emporté par vn tygre, qui estoit sorti d'un vaisseau dans lequel on l'auoit amené d'Affrique, estoit en danger d'en estre deuoré; lors que sa pauvre mere criant au secours, courut après; mais ne pouuant pas aller assez vite, pour atteindre ce cruel animal, & n'ayant aucune assistance du costé de la terre, elle eut recours au Ciel. Elle auoit vne de nos Images, qu'elle ietta après le tygre, suppliant la Mere de Dieu de deliurer son pauvre enfant de cet euident peril; en mesme temps le tygre lâcha sa proye, laissant l'enfant sans luy auoir fait aucun mal.

Dans la ville de Marseille, la femme d'un Marinier ayant receu quelques Images de Nostre Dame de Misericorde, faites par le Pere Yuan, & distribuées par ses Religieuses, en auoit donné vne à son fils, & la luy auoit attachée autour du corps avec vn petit filet, en forme de baudrier. Quelque temps après ce garçon estant monté sur la hune d'un grand vaisseau, en fut tout à coup precipité par le soufflé d'un vent impetueux. Ceux qui le virent cheoir, s'écrians de frayeur, creurent le voir tout brisé parmy les arbres, & les autres pieces de bois du nauite; mais sa cheute fut plus heureuse. Car ayant sur soy son Image attachée à vn fil délié, ainsi que nous auons dit; ce fil s'accrocha à vn clou de l'arbre, & l'arresta suspendu. Et encore qu'il fust si foible, qu'à peine auroit il peu soustenir vn fardeau du poids de deux ou trois liures; neantmoins ce fil fortifié par vne vertu extraordinaire, soustint la pesanteur du corps de cet enfant dans la violence de sa cheute, sans se rompre, iusques à ce que le mesme enfant estant reuenu de l'effray de sa cheute, & assisté des Mariniers qui y accoururent; se tira du danger, & descendit heureusement, sans autre mal que celui que la pour luy auoit causé. Le lendemain sa mere courut au Couuent des Religieuses de Nostre Dame de Misericorde, leur faire sçauoir ce qui estoit arriué à son fils, &

leur porta vn present d'une quantité de poisson, en reconnaissance de l'Image de Nostre Dame de Misericorde qu'elles luy auoient donnée, à qui elle attribuoit la conseruation de son enfant.

- Ce n'est pas seulement sur les corps que les Images de la Mere de Dieu, faites par le Pere Yuan, ont operé des merueilles : elles ont encore monstté sur les esprits la vertu de leur diuin Original ; produisant dans les ames des conuerfions, & des merueilleux changemens. Vne ieune fille griesuement malade, se sentant proche de la mort, par la défaillance de ses forces, & par le iugement des Medecins, ne pouuoit se résoudre à cette derniere separation, ny mesme souffrir qu'on luy en parlât. Ses parens, personnes de condition, vertueux & craignans Dieu, estoient fort en peine, apprehendans que les repugnances que leur fille témoignoit, à ne vouloir accepter la mort, ne fussent dommageables à son salut. C'est pourquoy, après l'auoir faite voir, & exhorter par diuerses personnes, ils eurent recours au Pere Yuan, & à ses Religieuses, qui promirent de prier Dieu, & sa sainte Mere pour elle ; & cependant elles luy enuoyerent vne de nos Images de la sainte Vierge. La fille receut cette Image de la part du P. Yuan, avec grand respect, la baïsa plusieurs fois, & la tint quelque temps serrée dans ses mains ; puis elle voulut qu'on la luy attachast au col avec vn ruban. Il semble que la Mere de Misericorde voulut recompenser cette fille, du respect, & de l'amour qu'elle portoit à son Image ; car à l'heure mesme la fille parut toute changée dans son interieur, montrant auoir vne grande paix & tranquillité dans son ame, & vne parfaite resignation aux ordres de la prouidence Diuine. De maniere qu'elle se disposa à la mort, avec grande serenité d'esprit ; & l'heure en estant venue, elle témoigna l'accepter avec autant de confiance, & de ioye, qu'elle auoit montré auparauant de repugnance, & d'apprehension.

Il arriua vn changement encore plus merueilleux en la personne d'un Religieux qui menoit vne vie libertine. Dieu auoit permis que cettuy-cy fust trauaillé de tentations contre la vocation (peut estre en punition de ses infidelitez à garder ses

vœux, & sa regle) mais au lieu d'en profiter, en les surmontant, il leur adhera, au grand scandale des gens de bien. Quelques personnes de pieté en ayant compassion, après luy auoir inutilement fait diuerses remonstrances, attacherent sans l'aduertir sur ses habits vne des Images de la sainte Vierge, que le Pere Yuan auoit faite. Il semble que Dieu eut égard à la foy de ces personnes, par l'effet qui s'en ensuiuit. Car ce Religieux peu de temps après sentit ie ne sçay quelle pesanteur sur ses habits à l'endroit où l'on auoit attaché cette Image, si bien qu'estant contraint d'y porter la main, il fut étonné de trouuer ce que c'estoit, & ayant reconnu que c'estoit vne des Images de Nostre Dame que le Pere Yuan faisoit, il en fut si aise qu'il la baisa par deuotion, & la porta sur soy par respect. Il sentit à l'heure mesme sa conscience bourrelée de mille remords, & son ame si pressée par de puissants mouuements qu'il le portoient à changer de vie, qu'il ne put trouuer aucun repos, qu'après auoir resolu de s'amender, & fait vne confession generale de toute sa vie.

CHAPITRE XI.

*Marques illustres & extraordinaires de son
merite.*

OVtre les graces gratuites que le Ciel auoit départi à nostre excellent Prestre, ainsi que nous venons de raconter; les memoires de sa vie portent encore plusieurs marques illustres & extraordinaires, qui font connoistre l'estat que Dieu faisoit de ce grand homme, & le rang qu'il luy donnoit entre ses plus fideles seruiteurs; puis qu'il le combloit des faueurs singulieres, que nous ne trouuons, que dans la vie des plus grands Saints.

Il a esté veu en diuers lieux tout à la fois, ainsi qu'on raconte de S. Nicolas, & d'autres Saints. Vne Demoyelle de grande pieté du lieu de Cotignac, allant visiter la Chappel-

le de Nostre Dame de Grace, vid venir après soy nostre bon Prestre avec deux personnes de vertu : vn ieune garçon qui accôpaignoit cette Demoyfelle, le vid aussi ; cependant il estoit pour lors saintement occupé dans vne maison de Cotignac. Car la mesme Demoyfelle qui l'auoit veu parmy les champs, estant promptement reuenue dans Cotignac, l'y trouua occupé en vne lecture spirituelle avec les deux personnes qu'elle auoit veuës dans le chemin, & s'estant informée s'il n'estoit point sorti à vne telle heure, elle sceut qu'il n'auoit bougé de l'endroit où elle le trouuoit. De maniere qu'elle crut que Dieu l'auoit fait paroistre en diuers lieux tout à la fois, ou que pendant qu'il lisoit vn liure de pieté, son Ange Gardien reuestu de sa figure estoit allé visiter l'Eglise de Nostre Dame de Grace ; ainsi que nous lisons dans la vie de la B. Ieanne de la Croix, que son Ange Gardien prenant sa forme, parloit, & agissoit pour elle, tandis qu'elle estoit absorbée dans l'oraison.

Ayant à traiter en des lieux éloignez, quelque affaire importante pour la gloire de Dieu, & le bien des ames, il estoit quelque fois rempli d'une force si extraordinaire, pour cheminer avec diligence mesme dans sa vieillesse, qu'il sembloit que l'esprit de Dieu le portoit, comme vn autre Abacuc dans l'ancien Testament, où S. Philippes dans les actes des Apostres. Et ainsi, après auoir presché dans vne Chappelle champestre, dediée à S. Alexis dans le terroir d'Aix, & trauaillé tout le long du iour à ouyr des confessions, & à vacquer à de semblables ceuures de pieté ; lors qu'on couuroit la table pour souper, il partit sans rien dire, marchant, quoy qu'il fust fort âgé, avec tant de vitesse, que ceux qui le regardoient, le perdirent de veüe, & en parlerent, comme s'il eust esté porté par vne main inuisible. On sceut après que la raison pour laquelle il estoit allé si à la haste, c'estoit pour terminer vne affaire tres importante au salut d'une personne qui l'attendoit dans Aix.

Il luy arriua vne chose presque semblable au retour de son premier voyage de Paris. Après auoir demeuré quelque temps dans Auignon, vn matin sans aduertir personne, il par-

tit, & s'en alla à pied de la mesme ville d'Auignon à Aix, villes distantes l'une de l'autre de douze grandes lieues de Prouence, encore qu'il fust agé de soixante & dix ans, faisant ce chemin dans vn iour avec tant de force, & de vitesse, qu'on eut occasion de croire qu'il auoit esté fortifié par vne extraordinaire vertu.

Messire Oliuier Prestre qui a succédé à nostre Imitateur, dans le soin des pauures de la Confrairie de la Misericorde d'Aix, & à present dans la direction de ses Religieuses de la mesme ville, personnage de grande pieté, qui a esté longtemps son disciple, & puis son Confesseur; atteste dans la relation qu'il nous a enuoyée des vertus, & des graces singulieres de ce bon Pere; qu'il a remarqué en luy plusieurs illustres marques de sainteté, & notamment celles-cy qui sont encore confirmées par d'autres personnes dignes de foy.

Le visage du Pere Yuan a quelques fois paru tout rayonnant de lumiere avec tant d'éclat & de Maiesté, que ceux qui le regardoient, en estoient ébloüys. Le Prestre que nous venons de nommer, assure qu'il l'a veu luy mesme en cét estat par diuerses fois. Premièrement dans Brignolle, où comme Prestre estant en vne maison particuliere, vid passer le Pere Yuan dans la rue, avec vne Maiesté si venerable, & vne si grande splendeur, qu'en estant ébloüy, & tout à fait surpris; il s'écria hautement : *quel est ce venerable Prestre qui passe? O qu'il faut bien que ce soit vn grand seruiteur de Dieu.* Cela luy arriua auant qu'il le connust; de maniere que s'estant informé de son nom, & ayant appris quel il estoit, il contracta avec luy vne tres étroite amitié, qui a depuis tousiours continué en l'un, & en l'autre.

En second lieu le mesme témoigne que frequentant nostre pieux Ecclesiastique à Aix, il auoit souuent remarqué, lors qu'il seruoit l'Eglise de Nostre-Dame de Beauueser, des changemens merueilleux sur son visage, qui tantost paroissoit plus blanc que la neige, & tantost éclattant & lumineux, & si couuert de rayons, qu'il n'osoit hausser les yeux pour le regarder.

Vne troisiéme fois ayant arresté iour avec luy, de se trou-

uer à la sainte Baume, la demeure de sainte Magdelaine penitente; ainsi qu'il s'approchoit de ce sacré, & venerable lieu, regardant en haut, il y vid le Pere Yuan qui estoit desia arriué. Il le vid, dis je, d'yne maniere surprenante; c'est à sçauoir tout couuert de lumiere, & son visage étincelant de rayons; si bien qu'il fut contraint de cligner les yeux, pour ne pouuoir supporter vn si grand éclat: Cette veüe s'estant si fort imprimée dans son esprit, qu'il assure que durant près de trente années qui se sont écoulées depuis ce temps là, il n'a jamais peu l'oublier, ny en effacer le souuenir. Et ce qui confirme encore plus l'impression qui luy reste de ce grand éclat qu'il vid sur le visage de ce seruiteur de Dieu, est que pour l'exprimer, il se sert de plus belles comparaisons qu'on puisse tirer de la nature, & des sacrez cayers. Car il le compare à l'aurore naissante, se seruant de ces paroles que l'Eglise adapte à la sainte Vierge, *Quasi aurora consurgens*. Il le compare aussi à Moïse, lors qu'il descendit de la montagne de Sinay, le visage & le chef tout rayonnant: disant que nostre Prestre auoit participé à sa grace de Prophete, & de Legislateur. Enfin il le compare à Iesus-Christ transfiguré sur le mont de Tabor, adioustant qu'il en a esté le vray, & fidele Imitateur.

Plusieurs personnes deuotes ont eu dans leurs oraisons, les veües du Pere Yuan, dans lesquelles l'esprit du Seigneur leur faisoit voir ce sien seruiteur tout couuert de lumiere, & rayonnant comme vn Soleil, pour leur en montrer le merite, leur en imprimer vn grand respect, & leur apprendre l'estat qu'elles deuoient faire de ses instructions. I'en ay rapporté quelques exemples dans la troisiéme partie, outre lesquels ietrouue encore celuy cy dans les memoires de sa vie.

Vne personne de haute pieté, estant rauie, vid nostre excellent Prestre dans vn estat obscur & tenebreux: quelque momens après, & dans le mesme rauissement, elle l'apperceut tout couuert de lumiere, comme la Lune en sa splendeur, ce qui signifioit en premier lieu ses humiliations, & sa vie cachée, par laquelle il taschoit de se rendre inconnu à tout le monde, & secondement la pureté de son ame, & l'éléuation de son estat. La personne qui auoit eu cette vision; nous assu-

re qu'elle est demeurée si empreinte dans son ame, qu'elle en a conserué le souuenir tres present durant près de 40. années : ce qui marque qu'elle estoit veritable & legitime, puis que l'impression en est demeurée si long temps.

Nostre bon Prestre estoit vn iour dans la Chapelle de sainte Anne de l'Eglise de Nostre Dame de Beauueser à Aix, où tournant la face vers le maistre Autel, il instruisoit vne personne de vertu ; lors qu'une lumiere éclatante en forme d'une Estoile, sortant du Tabernacle, où estoit le S. Sacrement se vint reposer quelque temps sur luy ; puis elle retourna au lieu d'où elle estoit sortie. Nostre humble Ecclesiastique, & la personne qui estoit avec luy furent dans vn grand estonnement de cette singuliere faueur ; si bien qu'en action de grace, ils repeterent plusieurs fois, *Deo gratias*. Le Pere Yuan prit de là occasion d'exhorter puissamment son disciple à estre bien deuot au tres adorable Sacrement de l'Autel, & à luy proposerauec confiance tous ses doutes, & toutes ses peines, comme à l'oracle, d'où nous pouuons puiser les plus belles connoissances de nostre salut.

Plusieurs personnes dignes de foy ont encore remarqué dans sa frequentation, que pendant qu'il grauoit des Images de la S. Vierge, ou qu'il s'occupoit à d'autres pieux ouurages, il exhaloit d'admirables odeurs, & de celestes parfums, en telle sorte que sa chambre sembloit vn Paradis, & l'on goustoit en sa compagnie, de douceurs telles que nous nous imaginons estre dans le Ciel : Dieu signifiant par cette odeur exterieure la force & la suauité de ses bons exemples, & qu'estant ainsi que l'Apostre dit de foy, la bonne odeur de Iesus Christ, il attiroit plusieurs à la connoissance, & à l'amour du mesme Iesus-Christ par ses discours & par ses actions. Mais ces douceurs exterieures que l'on goustoit en sa compagnie, n'estoient que l'Image des consolations interieures, que sa presence produisoit dans les ames, qui conuersoient avec luy, ainsi que plusieurs personnes dignes de foy l'ont souuent éprouué.

Il portoit la consolation des affligés avec foy, & encore que sa façon de conuerser, parust rude & seuer, parce qu'il estoit exact, & ennemy des railleries, vains propos, & autres

Liure fust fort petit. Messire du Laurens Archeuesque d'Arles l'ayant leu, en eut vne si haute estime, qu'il en fit extraire vne copie auant qu'il fust imprimé. Et Messire de Barreau son successeur, témoignant en auoir la mesme estime, aussitost après l'impression, en voulut auoir vn exemplaire qu'il mit dans son sein, comme vne precieuse relique. Il fut encore imprimé quelque temps après dans Auignon : & depuis le Pere Leon Religieux Carme, l'a fait imprimer dans Paris, sous ce titre : premier recueil des œuvres du Pere Antoine Yuan, qui est ioint à l'Eloge que cét eloquent Predicateur a donné au public en faueur de nostre excellent Prestre, après l'auoir prononcé deuant le Reine avec grand applaudissement.

Le premier traité de ce Liure, estoit intitulé en la premiere impression, *La verge de Moÿse, representant l'estat septenaire de l'ame, transformée en Iesus-Christ avec les Meditations pour chaque iour de la semaine.* Le second auoit pour titre, *La haye des Conseils*, qui depuis a esté distingué en trois parties; dont la premiere contient diuerses instructions generales pour conduire l'ame à la perfection Chrestienne; la seconde, comprend quelques conseils particuliers, qui portent le Lecteur à la hayne de soy mesme; la troisiéme enferme plusieurs aduis, propres aux personnes qui viuent en Communauté. Le troisiéme traité reduit ces conseils, & ces diuerses instructions, à la pratique des plus eminentes vertus, qui conduisent l'ame à la vraye & solide perfection. Ces vertus sont, ardent amour, profonde humilité, prompte obeyssance, pureté d'intention, presence de Dieu amoureuse, traualier, souffrir, mourir, estre crucifié, estre abandonné, confiant simple. Le quatriéme traité est vn Alphabet, ou diuers conseils donnez par ordre alphabetique, qui détachent l'ame de toutes choses, & la dépouillent d'elle mesme pour la reuestir de Iesus-Christ.

Nous auons depuis fait imprimer diuerses lettres de cét excellent Prestre, & vn autre Liure tiré de ses escrits, intitulé *Trompette du Ciel, qui esueille les pecheurs, & les excite à se conuertir*, & nous sommes sur le point d'en faire imprimer vn troisiéme, qui contiendra les exercices de la iournée, & d'une retraite, le reste de ses conseils, & les autres œuvres, que nous

avons recourré de ce grand seruiteur de Dieu.

Au reste les titres de son premier Liure sont mystérieux, & fondez sur des connoissances extraordinaires, que luy ou ses enfans spirituels en ont eüs. Il appelle son premier traité la Verge de Moyse; c'est vn mystere. Il conduisoit dans Brignole vn pauvre homme de grande pieté, à qui Dieu faisoit des faueurs extraordinaires; l'esprit de Dieu ayant vn iour fait voir à cet homme pendant son oraison les Prophetes Moyse, Helie, & Elisée, luy manifesta qu'il y auoit sur la terre trois personnes d'vne haute vertu, dont la vie se rapportoit à ces trois Prophetes; c'est à sçauoir le Pere Yuan représenté par Moyse, le Pere de Berule, depuis Cardinal par Helie, & le Pere de Gondran par Elisée. Ce bon homme qui estoit ravi, ayant demandé au Seigneur sur la fin de son rauissement, qu'est-ce qu'il exigeoit de luy, le Seigneur luy répondit, qu'il prit la verge de Moyse, & que cette verge estoit la conduite que le Pere Yuan auoit composée pour quelques ames deuotes, laquelle n'estoit pas encore imprimée. Il raconta depuis au Pere Yuan son Directeur, ce qui luy estoit arriué; qui en suite donna ce titre de verge de Moyse au premier traité de son liure; lors que ses amis, & plusieurs personnes de pieté, qui en connoissoient le merite, l'obligerent à le faire imprimer.

Il y eut quelque chose de semblable pour le second traité de son Liure, appelé la haye des conseils. Vne de ses filles spirituelles ayant veu en esprit dans son rauissement, vne vaste campagne en friche, & le Pere Yuan au milieu qui la cultiuoit, & l'entouroit d'vne grande haye, comme elle en eut demandé l'explication au Seigneur; elle apprit que ce champ signifioit vne ame d'élite sous la conduite du Pere Yuan, & que la haye exprimoit les conseils de ce fidele Directeur (ainsi que nous auons rapporté plus au long dans la troisiéme partie) ce qu'il porta à mettre ce titre de haye, au commencement de ses conseils.

Il y a à la fin de ses conseils vne tres belle, & tres deuote oraison qu'il appelle protestation de l'ame; qu'il composa à l'occasion d'vne personne trouuillée dans son interieur de diuers troubles, qui la faisoient souffrir des peines extraordinaires. Elle n'eut pas

plustost mis sur soy cette protestation que le bon Pere Yuan auoit dressée, qu'elle fut deliurée de ses angoisses, & ioutit d'une grande paix & tranquillité d'esprit. Ainsi que nous apprenons du mesme Pere Yuan en sa Lettre 57. où parlant de cette oraison. *La protestation, dit il, est plus difficile, & plus spirituelle que tout le Liure, & que tous n'entendent pas. Elle fut faite pour une ame, qui auoit un estat dans son interieur si étrange qu'il luy sembloit qu'elle se trouuoit dans les combats sur mer & sur la terre transportée en toutes les grandes affaires &c. Je n'eus autre recours pour la deliurer, & me mettre en paix, que de luy faire cette protestation, & la luy faire signer & mettre au col: quant & quant, merueille! elle se trouua toute changée, & en un estat de paix & de repos.*

Tout son Liure est merueilleux, si nous considerons les sources, d'où il en a puisé la matiere & l'intention qu'il a eue en le composant. Il nous l'apprend luy mesme dans sa Lettre 54. en ces termes. *Dans ce Liure sont les conseils qui depuis environ quarante ans ont esté donnez à des Religieuses, & à d'autres personnes spirituelles, & la plus grande partie ont esté pratiquez: & celuy qui a dressé ces conseils a eu tousiours intention & fin de faire tous de l'estat de Dieu souffrant & crucifié, & de les transformer tous en Crucifix. Nostre petit liure est fort naïf, comme la sainte Euangile; il n'est rien que l'estat de Iesus-Chr. crucifié dans la mer de sa passion, & profondes humiliations en sa vie &c. & dans la 58. parlant de ce mesme liure: quand ie donnois, dit il, ces conseils, ie regardois l'estat de nostre Seign. & ses desirs, plaisirs, volontez, complaisance, delices qu'il vouloit dans les ames; & ie les voulois toutes transformer en Iesus-Christ pour son plaisir & contentement. Et quand ie les écriuois, ie regardois interieurement ce que Iesus-Christ vouloit, & i'estois attentif en son estat. Il semble que ie lisois & voyois ce qu'il desire de cette ame.*

Mais enfin ce qui est de plus admirable, est que son Liure n'a esté qu'une expression de sa vie, & un abrégé de ses vertus; ainsi que nous le pouuons colliger d'une réponse qu'il fit un iour à une Religieuse de son Ordre; car cette fille luy ayant demandé, combien auoit il employé de temps à composer le Li-

HH hh iij

ure de ses conseils, *il y a*, répondit il, *quarante années que i'y traueille, parce que ie tasche de le mestre en pratique, depuis ce temps là.*

CHAPITRE XVII.

*Graces extraordinaires de quelques filles spirituelles
du Pere Antoine Yvan.*

LE Lecteur aura desia remarqué dans la suite de cette Histoire plusieurs effers merueilleux en diuerses personnes, qui viuoient sous la direction de nostre zelé Imitateur ; i'en adiousteray encore quelques vns avec d'autant plus de certitude, que c'est luy mesme qui nous en a fait la rapport de viue voix, ou par les escrits qu'il nous a laissez : quoy que son humilité nous en ait caché les plus belles choses, n'en ayant parlé, ny écrit que tres sobrement, & avec grande reserve, de peur qu'estans les ouurages de ses mains, & les fruits de ses travaux, l'on ne luy en attribuaist la gloire ; ainsi que nous faisons presentement.

Il nous a souuent dit, qu'il auoit dirigé quelques ames deuotes, qui après auoir passé par les diuers estats de la vie purgatiue & illuminatiue, estoient presque arriuées au sommet, de la vie vnitue, vivant dans vn entier détachement de toutes les creatures, & d'elles mesmes, & dans vne étroite vnion avec Dieu. Il y en auoit particulièrement deux, élouées en vne si haute contemplation, qu'elles passoient les semaines, & les mois entiers dans vn profond recueillement avec Dieu, sans presque estre distraites de la presence de sa diuine Maieité ; nonobstant l'embaras de leurs affaires, les mauuaises humeurs de leurs maris, les soins de leurs domestiques, & mesme l'entretien des compagnies. Et cette occupation interieure ne les empeschoit, d'auoir soin de leurs maisons, d'éleuer leurs enfans, & agir en tout ce qui estoit necessaire, avec autant de liberté & d'exaëtitude, que si elles n'eussent pas esté recueillies : comme

elles perseueroient dans le recueillement, de mesme que si elles n'eussent eu aucune autre chose à faire.

Le Pere Yuan nous proposoit cet exemple dans des conferences particulieres, afin de nous persuader, ces deux veritez importantes de la vie spirituelle : [la premiere, qu'une ame fidele a la grace peut s'appliquer à l'oraison en tout temps, & en tout lieu, quand elle veut se separer des creatures, & de soy mesme, & se recueillir de la bõne façon, *ainsi que Ionas, disoit il, fit oraison, dans le ventre de la balaine, & Iudas ne la fit pas en la compagnie de Iesus-Christ.* La seconde, que c'est vne marque assuree, que l'attrait à l'oraison, vient de l'esprit de Dieu; lors qu'il est compatible avec les fonctions exterieures qui sont d'obligation; & quand au lieu de détourner l'ame de ce qu'elle doit faire, il la pousse & la fortifie à s'en acquitter dignement: *comme les Anges, adioustoit il, ne cessent iamais de contempler la Maïesté de leur Createur, encore qu'ils s'employent par son ordre, à la conduite des creatures.*

Entre ces personnes qui viuoient sous la direction de nostre sage Ecclesiastique, il y en eut plusieurs, mesme de celles qui estoient engagées dans les liens du mariage, qui menans vne vie tres pure, meriterent que Dieu se communiquast à elles par des reuelations, visions, apparitions & semblables voyes extraordinaires: ce qui auoit causé à nostre Imitateur de tres-grandes peines d'esprit, & des soins immenses, craignant d'estre trompé en la direction de ces ames, & ne pas bien discerner les mouuemens de l'esprit de Dieu, de ceux de l'Ange des tenebres.

Il deffendit vn iour à vne de ses penitentes, qui auoit des visions extraordinaires, de n'en admettre aucune volontairement, sans sa permission. Cette deffense profita à la penitente, & la preserua des ruses de l'ennemy; car estant en priere la veille de la naissance de nostre Seigneur, comme vn Ange luy eust demandé, si elle vouloit qu'on luy fist voir le mystere de la Natiuité, *en la maniere qu'il estoit passé en Bethleem,* elle répondit, *que non, parce que son Confesseur le luy auoit deffendu.* Aussi tost cet esprit qui s'estoit fait voir en la forme d'un bon Ange ayant disparu, vn second aussi méchant que le premier,

se presenta d'abord, qui vsant d'une autre ruse, pour la surprendre en luy suggerant des pensées de vanité & d'estime d'elle-mesme : *ie viens, ma fille, luy dit il, me controuyr avec toy, de la victoire que tu as remportée sur le Demon par ton obeyssance, Ah que tu l'as bien surpris ! c'est ainsi qu'il faut tromper le trompeur.* Cette penitente esclairée de l'esprit de Dieu, reconnut la malice de ce second, & le renuoya comme le premier, luy disant, *qu'elle n'auoit pas permission de l'écouter, ny de s'entretenir avec luy.* Dans le mesme temps, elle receut vne ample recompense de sa soumission ; de maniere que l'esprit de Dieu l'ayant attirée en vn rauissement, luy fit voir les merueilles que la foy nous propose dans le mystere de la naissance de Iesus-Christ, luy faisant gouster les fruits qu'une ame si bien disposée que la sienne pouuoit en recevoir.

Vne autre penitente de nostre bon Prestre', faisant l'oraison sur les mysteres de la passion du Fils de Dieu, & s'arrestant particulièrement sur le soufflet qu'il receut dans la maison d'Anne ; portée d'un ardent desir d'imiter son Sauueur, le pria instamment de le luy faire sentir. A peine eut elle acheué sa demande, qu'une main inuisible luy assena un si grand soufflet, qu'elle en fut renuersée par terre, & demeura presque morte, la iouë enflée & liuide, la machoire ébranlée, & la bouche remplie de sang. Ayant repris ses forces, & estant releuée de sa cheute, elle remercia le bon Dieu de cette faueur, & luy demanda la grace de supporter avec patience, & avec amour la violente douleur, qui luy en resta durant long temps.

Le Pere Yuan ayant vn iour commandé à vne de ses penitentes, de le venir trouuer dans l'Eglise à vne heure déterminée, au moment qu'elle deuoit sortir de sa maison, il se leua vn grand orage, accompagné d'eclairs, & d'une furieuse pluye. La fille pour ne pas manquer à l'obeyssance, sortit nonobstant la pluye, & s'en alla à l'Eglise vers son Confesseur, trauersant plusieurs ruës sous diuers esgouts des toits, qui couloient à verse, & passant diuers ruisseaux, qui auoient grossi ; & toutesfois estant arriuée à l'Eglise, & s'estant présentée à son Confesseur, ses habits parurent aussi secs, que si elle eût demeuré dans la chambre, sans qu'il y eust aucune marque, qu'elle se
fust

fust exposée à la pluye. La merueille estant apperceuë, la penitente l'attribuoit aux merites du Confesseur, le Confesseur à l'obeyssance de la penitente; mais enfin l'un & l'autre en donnerent toute la gloire à Dieu, qui protège ceux qui se confient en luy, & n'abandonne iamais les personnes, qui laissent toutes choses pour son amour.

Vne Demoysele de grande pieté suiuant les conseils de nostre zelé Directeur, s'addonnoit à l'oraison, avec tant d'application, qu'elle y employoit tout le temps, que les occupations de sa famille luy permettoient; se priuant avec adresse des compagnies, des visites, & des autres diuertissemens inutiles, pour vacquer à ce diuin exercice. L'on ne scauroit exprimer les benedictions, que Dieu versoit en son ame, & les progrès merueilleux qu'elle faisoit dans la pratique de la vertu, au moyen de sa fidelité à l'oraison, & à la mortification; mais le Demon ne la laissa pas long temps en repos; de maniere qu'après auoir en vain essayé, de la détourner par diuerses peines, & tentations qu'il luy fit souffrir, il irrita enfin son mari contre elle, & le rendit ennemy mortel de ses deuotions.

Cet homme poussé par l'esprit malin, fit tout ce qu'il peut, pour détourner sa femme des exercices de sa pieté, & luy faire prendre vne vie contraire; l'obligeant à se parer, à se trouuer dans les compagnies, à recevoir & rendre des visites, à assister aux jeux, & aux autres diuertissemens du grand monde. Cette vertueuse femme obeyt à son mari en toutes les choses, qu'elle ne creut pas contraires à la loy de Dieu, se rendant si condescendante, qu'elle preuenoit mesme ses intentions, pour empescher qu'il ne iurast pas, & pour le gagner plus facilement à Dieu: mais parce qu'elle n'agissoit que dans la veüe de Dieu, sans autre dessein que de plaire à sa diuine Maiesté, Dieu luy fit la grace, qu'elle se trouua aussi deuote & recueillie au milieu des compagnies, que dans la solitude: & parmi les jeux, que dans son oratoire. Au lieu de se laisser attirer par la vanité, elle en conceut de nouvelles horreurs; elle trouua de nouvelles occasions de se mortifier parmi les plaisirs, & bien loin de contribuer au diuertissement des compagnies, il arriua qu'elle y seruoit d'obstacle & d'empeschement: sa modestie, sa pudeur

& les autres vertus qui reluisoient dans sa conduite, la rendant onereuse & importune aux esprits mondains, & libertins; si bien que son mari fut contraint de luy permettre de demeurer dans sa maison. Mais il ne cessa de la persecuter par des mépris, des paroles injurieuses, & mesme par des coups, la frappant comme vne esclaue quand il la trouuoit à genoux &c. iusques à ce que le tout puissant se declarant visiblement pour sa seruante, opera des merueilles en sa faueur.

Vn iour qu'elle s'estoit retirée dans le grenier, pour y faire oraison avec moins d'empeschement, son mari y entra portant vn baston en sa main à dessein de la frapper; mais Dieu la protegea d'une façon singuliere; de telle sorte qu'encore que cefust en plein iour, & qu'elle fust en vn lieu fort clair, & qu'il passast & repassast auprès d'elle iusques à la toucher, neantmoins il ne peut iamais la reconnoistre; si bien qu'il creut qu'elle en estoit sortie, pour aller en quelque autre lieu. Vne autre fois la cherchant aussi pour la mal traiter, & ne la trouuant pas dans la maison, encore qu'elle y fust, & qu'il eust passé plusieurs fois auprès d'elle, tandis qu'elle faisoit sa paiere à genoux sans la voir, il sortit en furie; fermant les portes de la maison, & portant les clefs avec soy, pour oster la liberté à sa femme de sortir, si elle estoit dedans, ou d'entrer, si elle se trouuoit dehors, & par ce moyen la mortifier. Mais à peine fut il éloigné de quelques pas de la maison, que Dieu luy faisant changer de resolution, il reuint, r'ouurit les portes, & remettant les clefs, il sortit derechef; sans que depuis il dit vn seul mot à sa femme, du suiet qu'il auoit creu auoir de se mettre en colere contre elle.

La mesme Demoyelle frequentant la confession & la communion, & desirant y apporter les plus pures, & plus parfaites dispositions, souhaittoit selon le conseil de l'Apostre & des Peres, garder continence la veille des iours qu'elle deuoit approcher de ces Sacremens: mais n'en ayant pas la liberté, à cause du lien de Mariage, & n'osant en parler à son mari, qu'elle sçauoit n'y estre pas porté, elle auoit recours à son Ange Gardien, & à celuy de son mari, les priant à tel temps de luy procurer cette faueur. C'est vne chose admirable, qu'encore

que son mari fust d'une inclination brutale, & qu'il n'eust presque aucun sentiment de pieté; neantmoins par ie ne sçay quel ressort de la prouidence diuine, il consentoit contre sa volonté, & cooperoit au desir de sa femme. Il est vray qu'il se plaignoit quelques fois à elle, luy disant qu'elle se seruoit de quelques charmes; mais ces charmes estoient sa pieté, sa confiance aux Anges gardiens, le grand desir de communier plus dignement, avec les prieres, & le merite du bon Pere Yuan, par le conseil, de qu'elle pratiquoit toutes ces vertus.

CHAPITRE XVIII.

*Peines arrivées à quelques personnes, pour n'auoir
suiuy les conseils du Pere Yuan.*

SI l'obeissance opere des merueilles, la des-obeissance produit des monstres. Vne fille auoit fait des progrès merueilleux dans les voyes de la perfection, sous la direction de nostre Imitateur, de telle sorte qu'elle estoit souuent rauie, découuroit l'interieur des personnes, & auoit d'autres semblables dons gratuits, outre qu'elle s'acquittoit humblement, & avec grande fidelité, de toutes ses obligations. Nonobstant les furieuses tentations qu'elle souffroit presque continuellement du costé des demons, elle conserva les graces extraordinaires que le Ciel lui auoit departies, & s'auança dans la pratique des vertus; tandis qu'elle perseuera à estre soumise & obeyssante à son Directeur: mais s'estant relaschée dans cette soumission, & ayant voulu escouter les lumieres de son propre esprit suiure son iugement, & adherer à sa volonté contre les auis du bon Pere Yuan, elle décheut tellement de son premier estat, qu'au lieu des communications de l'esprit de Dieu, elle n'eut plus que d'illusions du Demon: ses vertus solides se changerent en de fausses apparences, & enfin au lieu qu'elle estoit de tres bonne edification, sa compagnie deuint si pernicieuse quel'on fut con-

traint de la chasser d'un monastere, où elle estoit entrée pour y recevoir l'habit religieux.

Vne autre penitente du mesme Pere Yuan luy demanda permission d'aller faire ses deuotions dans vne Eglise, où il y auoit vn tres grand concours de peuple : le Pere la luy refusa, nonobstant ce refus y estant allée, elle receut vne sensible punition de sa desobeïssance. Car comme elle fut arriuée à dix pas de cette Eglise, elle eut ie ne sçay quel ébloüissement, qui luy en osta la veüe, de telle sorte qu'elle fut quelque temps à tourner d'un costé & d'autre sans pouuoir trouuer la porte : iusques à ce qu'une personne de vertu qui la connoissoit, ayant pris garde à ses esgaremens, la remit dans le chemin pour retourner dans sa maison ; où ayant reconnu sa faute d'auoir desobey, elle en demanda pardon à Dieu, & prit de nouvelles resolutions de ne rien faire pour saint qu'il luy parust, qu'avec dépendance & soumission à son Directeur.

Vne Dame de grande pieté souffrant de fascheux & continuels scrupules, touchant les confessions qu'elle auoit faites, fut conseillée de faire vne confession generale au P. Yuan : elle obeyt, & ensuite elle iouït d'une profonde paix, & d'une grande tranquillité dans son interieur. Le Pere Yuan luy deffendit de ne faire plus aucune confession generale de toute sa vie, si elle vouloit conseruer la paix interieure, dont elle iouïssoit ; elle obeyt durant quelque temps, & sa paix continua. Mais ayant entrepris de faire derechef vne confession generale, en l'absence du Pere Yuan, par le conseil des personnes, qui ne connoissoient pas son estat, elle retomba dans ses premiers troubles, & se trouua dans vn si grand labirinte de scrupules, & d'autres angoisses d'esprit, qu'elle faillit en perdre le sens & la santé : iusques à ce qu'ayant déclaré sa desobeïssance au Pere Yuan, & renouvelé sa soumission, elle fut deliurée de ses peines.

Vn Ecclesiastique ayant demandé conseil à nostre Imitateur, s'il ietteroit vn deuolu sur vn benefice, qu'il croyoit n'estre pas legitimement possédé par la personne qui en estoit pourueüe, ce bon Pere l'en dissuada aussitost, l'exhortant à se contenter des petits reuenus, dont il iouïssoit paisiblement, sans en pretendre par vne voye si contraire à l'esprit du Christia-

DV VENERABLE P. ANTOINE YVAN. 633
nisme, & de l'estat Ecclesiastique, que les procès, & le mena-
çant de tres fascheux accidens, s'il entreprenoit de plaider.
Cet Ecclesiastique deferant plus à son sentiment, & à celuy de
quelques personnes du monde, qu'à celuy de nostre sage Imita-
tateur, ietta le deuolu, & poursuivit le procès; mais avec vn
succès si desauantageux, qu'après y auoir consumé le plus li-
quide de son bien, après y auoir ruiné la santé de son corps, &
presque perdu la pieté de son ame, il fut condamné avec des-
pens, & avec confusion, & en danger d'estre assassiné par ses
parties aduerses: si bien qu'il ne luy resta qu'un tres cuisant
repentir, de n'auoir suivi le conseil de l'homme de Dieu,

CHAPITRE XIX.

*De la Fondation du Monastere des Religieuses de
N. D. de Misericorde dans Paris.*

LE retour du bon P. Yuan en Prouence, sans auoir rien a-
uancer pour l'établissement de son Institut dans Paris (ain-
si que nous auons dit dans le dernier chap. de la troisième par-
tie) sembloit en auoir fait eschoüer le dessein; neantmoins
ayant fait connoistre l'vtilité de son entreprise à plusieurs
personnes de grande pieté, ces personnes ne cesserent de conti-
nuer leurs soins mesme après son départ, pour en faciliter l'exé-
cution.

Enuiron ce temps le sieur de Montmort estant allé à Aix, à
l'occasion d'un procès qu'il y auoit pendant au Parlement, fut
si edifié des connoissances qu'il receut de nostre Institut, que
pour en faciliter l'établissement dans Paris, il s'obligea par con-
tract à donner quatre cent liures de rente annuelle & perpe-
tuelle à nos Religieuses, des qu'elles auroient vn Monastere,
dans cette grande ville.

Quelque temps après l'Abbé Ollier (dont la memoire est en
si grande veneration) ayant visité les saints lieux de Prouen-
ce, s'arresta quelques iours dans la ville d'Aix, pendant le-

d'employer tous les moyens que la providence divine leur presentoit, & que bien tost elles verroient l'accomplissement des promesses du Ciel.

Le Cardinal de S. Cecile estant reuenu de Paris dans Aix, visita aussi tost nos Religieuses, & leur ayant fait le recit des instantes prieres qu'on luy auoit faites à leur occasion, & du refus absolu qu'il auoit donné, il persista dans ses premiers sentimens, qu'il ne permettroit iamais leur sortie de son Diocese; taschant par plusieurs raisons de leur faire agréer son refus, & les destourner de leur dessein de s'établir dans Paris. Mais bien loin qu'elles fussent découragées par le refus de leur Prelat, & par les nouvelles difficultez qu'il leur proposoit; au contraire elles en deuinrent plus courageuses, & leur esperance se fortifiant, à mesure que les creatures vouloient l'affoiblir: *Monseigneur*, dirent elles au Cardinal, *Dieu nous fait esperer un établissement dans Paris, nous ne doutons point qu'il ne reussisse, lors que la divine Sagesse le trouuera à propos. Il n'est pas au pouuoir des creatures, de resister aux desseins de Dieu; sa puissance osterà tous les obstacles: & si vostre Eminence continuë de s'y opposer, Dieu pourra bien l'appeller à soy, & faire cesser son opposition.* Le Cardinal soustant, & tournant en raillerie ce qu'il venoit d'entendre. *Je me porte fort bien, graces à Dieu*, répondit il, *& ie suis encore ieune; de maniere que si vostre établissement dans Paris ne se fait qu'après ma mort, i'espere que vous n'y serez establies de long temps.*

La chose arriua pourtant, quelques mois après, de la maniere que nos Religieuses l'auoient proposée; car comme leurs affaires se dispoisoient à Paris, le Cardinal de S. Cecile partit d'Aix pour Rome, où il mourut, quelques iours après qu'il y fut arriué; & le mesme iour de sa mort, nos Religieuses receurent des lettres du Roy, & de la Reine regente, qui les appelloient à Paris, avec ordre au Vicaire du Diocese de leur expedier les permissions necessaires, & au Gouverneur de la Province, de les proteger de son autorité. Le Vicaire fit encore quelques difficultez d'accorder les expeditions qu'on luy demandoit, il les donna neantmoins, persuadé par les raisons que nos Religieuses luy firent entendre, & sollicité par la fem-

me du Gouverneur de la Prouince Madame la Comtesse d'A-lais, vne des meilleures amies de nostre Institut, qui auoit beaucoup contribué à sa Fondation, par son credit, & par sa pieté.

Il y eut encore quelques oppositions de la part des amis de nostre Monastere, qui ne pouuoient souffrir qu'auec vn extrême regret le départ de nos Religieuses, notamment, à cause qu'elles se preparoient à partir dans le mois de Novembre, où la saison commençant à estre fort rude, faisoit apprehender la rigueur du froid, auquel nos voyageres s'alloient exposer. Le bon Pere Yuan fut encore combattu, par la preuoyance que Dieu luy donna des dangers, & des grauds traux que ses filles deuoient souffrir pendant leur voyage; elles en eurent aussi beaucoup de pressentimens: mais comme le Pere & les filles n'enuisageoient que la gloire de Dieu, & l'accomplissement de sa volonté; & ne mettoient leur appuy qu'en sa diuine protection, rien ne fut capable de les détourner de leur dessein. Ainsi le iour arresté, trois de nos Religieuses après auoit ouy les regrets, & veu les larmes de leurs cheres sœurs, & de leurs bonnes amies partirent d'Aix, pour aller visiter leur Monastere de Marseille, & y prendre vne Religieuse, qui estoit choisie pour le voyage & la fondation, accompagnées du sieur Philippe digne Ecclesiastique, que le Pere Yuan, du consentement des Superieurs auoit choisi, pour les conduire dans leur voyage.

Dés qu'elles furent arriuées à Marseille, leur dessein faillit à estre rompu, ou retardé. L'Euesque de cette ville, touché de leur delicate complexion, & de la rigueur de l'hyuer qui estoit desia fort violente, comme il leur estoit tres affectonné, creut leur rendre vn bon office de les empescher de partir, ou de les retenir iusques au Printemps. Pour cet effet il enuoya vn Chanoine au Vicaire du Diocese d'Aix, pour luy faire reuoquer les permissions qu'il auoit données à nos Religieuses, de faire le voyage de Paris; ou afin qu'il luy enuoyast le pouuoir de les retenir. Le Vicaire qui n'auoit accordé les expeditions qu'à regret, donna à l'Euesque de Marseille la satisfaction qu'il demandoit. Voila les affaires
brouillées

broüillées plus que jamais , & nos voyageres fort en peine , de se voir arrestées. Croyans neantmoins que Dieu vouloit qu'elles continuassent leur route , & se confirmans d'autant plus dans cette croyance , qu'elles y trouuoient de plus grandes oppositions ; elles renuoyerent à Aix au Vicaire du Diocèse , & le presserent de telle sorte , qu'elles en obtinrent de nouvelles expéditions. L'Euesque de Marseille fit de nouueaux efforts pour les arrester pendant l'huyet : mais l'ayant humblement remercié ; elles témoignerent tant de resolution & de courage , & vne si grande confiance en la prouidence diuine ; que ce pieux Prelat leur ayant accordé leur congé , & donné sa benediction , elles se mirent en des littieres , & continuerent leur voyage par Auignon.

A peine furent elles sorties des portes de Marseille qu'il se leua vn temps fort rude , accompagné de neige & de glace , qui outre la rigueur du froid , les mit en danger de se fouruoyer du droit chemin : la neige ayant tout couuert , en telle sorte qu'il ne paroissoit aucun vestige. Elles furent contraintes des'arrester en chemin dans la metairie de Madame de Gaillard , vne de leurs plus intimes amies ; qui dans leur premier établissement , les auoit assistées , avec vne bonté maternelle , & vne charité singuliere. Le lendemain , quoy que le mauuais temps continuast , elles poursuirent leur voyage , iusques à Cauaillon , où le Seigneur de Montreal Euesque de cette ville , & qui depuis estant Euesque de Carpentras y a laissé de si beaux exemples de son zele & de sa rare pieté , les arresta durant trois iours dans le Conuent des Religieuses Bernardines , pendant lesquels , il donna plusieurs témoignages de l'estime , & de l'affection qu'il auoit pour le Pere Yuan & son Institut. Le sieur Casault Prestre d'vne vie exemplaire , & ouurier Apostolique , par sa grande charité enuers les pauvres , & son zele ardent pour la conuersion des pecheurs , les conduisit de Cauaillon à l'Isle , où il est Preuost de l'Eglise Collegiale , & de l'Isle à Auignon.

Elles furent contraintes de s'arrester quelques iours dans cette ville en leur monastere , pour la satisfaction de leurs bonnes sœurs , & de leurs amis , & principalement pour attendre que la rigueur du temps s'addoucist ; mais la saison continuant ,

KKkx

d'estte tousiours plus rude , elles partirent le lendemain du iour & la feste de la Conception immaculée de la sainte Vierge , avec quelques pieux Ecclesiastiques, & plusieurs Dames de condition , qui les accompagnerent iusques à Orange ; où elles furent receuës , & defrayées avec toute leur suite par le Marquis de Beauregard , personne de grande pieté , & d'un grand zele pour la foy Catholique. Le lendemain au matin ayant pris congé avec beaucoup de larmes de leur compagnie , elles prirent leur route vers Montelimar. Le sieur Casault voulut encore les accompagner iusques dans cette ville ; & ce fut par vne prouidence particuliere ; parce que la presence de ce seruiteur de Dieu leur seruit grandement pour les encourager dans le peril où elles se trouuerent. Car la nuit les ayant surprises , comme elles furent entrées sans s'en appercevoir , dans la riuiero qui passe auprès de Montelimar , qui estoit grossie par les neiges & par les pluyes , elles furent grandement épouuantées de voir que l'eau entroit dans leur carrosse & le secoüoit si furieusement , qu'elles creurent deuoir estre emportées par la rapidité des flots. Le sieur Casault les encouragea ; elles eurent recours aux prieres , & passerent enfin avec bien de la peine ; & par merueille au iugement de ceux , qui apprirent le danger qu'elles auoient couru de se noyer.

Vn ou deux iours après elles se trouuerent dans vn peril encore plus grand au passage de la Drome. Le Cocher qui les conduisoit ayant refusé d'aller passer par le barc , parce qu'il estoit vn peu esloigné du droit chemin , poussa ses cheuaux dans la riuiero pour la gayer. Elle estoit aussi grossie par les neiges & les pluyes qui continuoient , en telle sorte que l'eau entrant dans le carrosse , & s'éleuant iusques à l'arçondes cheuaux avec vne rapidité effroyable ; le Cocher se trouua dans vne tres grande crainte de se perdre avec ses cheuaux , son carrosse & les personnes qu'il conduisoit , ne sçachant s'il deuoit auancer ou reculer. En mesme temps deux Ecclesiastiques qui accompagnoient nos Religieuses s'estans auancez , l'eau gagna la croupe de leurs montures , si bien que l'on n'en voyoit que la teste. Nos Religieuses , & ceux qui estoient sur le bord , s'écrierent de frayeur ; voyant que les cheuaux ne pouuoient plus resister à

la violence de l'eau, & qu'il estoit tres difficile de les secourir. Nos pieuses personnes eurent recours à Dieu, & à la S. Vierge Mere de Misericorde qui leur donna des forces pour sortir heureusement de ce peril; non sans estonnement de plusieurs qui les virent, & qui asseurerent que quelques heures auparavant des mulets s'estoient noyez en ce mesme endroit, où elles auoient passé.

Du peril des eaux elles tomberent dans celuy des voleurs. Le bas Dauphiné par où elles passoient estoit plein de soldats; elles en furent plusieurs fois inuesties & épouuantes. Vn soir particulierement comme elles arriuerent au giste, quelques Caualliers qui en délogoient, les ayans apperceuës rebrousserent leur chemin, & vinrent loger dans la mesme hostellerie, où elles s'estoient arrestées. Vne de ces bonnes Religieuses qui s'estoit retirée à l'écart pour reciter quelques prieres, entendit ces Caualliers, qui consultoient entre eux des moyens de voler ces filles qu'ils croyoient auoir de riches nippes, ou beaucoup d'argent. Cette Religieuse intimidée eut recours à Dieu qui luy suggera vn moyen innocent de se deliurer de ce peril. Elles s'auança vers ces mesmes Caualliers, & feignant d'estre dans la derniere necessité, leur demanda humblement l'aumosne. Ces Caualliers estonnez luy firent plusieurs demandes, auxquelles la fille ayant répondu en telle façon qu'ils creurent qu'elle, & ses compagnes estoient dans la derniere pauureté, ils se retirerent brusquement; & disans entre eux qu'ils s'estoient trompez, ils remonterent à cheual & à l'heure mesme ils sortirent de ce logis.

Estans arriuées à Lyon, elles furent contraintes de s'y arrester trois ou quatre iours, pour laisser écouler les eaux, qui estoient débordées. Cependant le Seigneur de Richelieu Archeuesque & Cardinal de cette ville ayant sceu leur arriuée, les enuoya visiter, & prier de venir chez luy; parce qu'il estoit incommodé. Il s'informa avec grande affection de la santé du bon Pere Yuan leur Fondateur, & comme s'il eust preueu les maux qu'elles deuoient encore souffrir dans leur voyage, il s'efforça de les dissuader de passer outre; leur offrant de les établir dans Lyon, & leur donnant diuers témoignages de sa bonté. Mais

auoir humblement remercié son Eminence, & supplié de leur conseruer fa bonne volonté, pour vne autre occasion, elles témoignèrent tant de confiance & de courage, pour la continuation de leur entreprise; que ce pieux Cardinal, en estant tres edifié, leur donna sa benediction avec ioye, & commanda à des Officiers, de les accompagner dans tous les saints lieux, qu'elles voudroient visiter durant leur séjour en cette ville. Cependant au lieu que les eaux se diminuassent, elles s'augmentoient par les pluyes, qui continuoient; c'est pourquoy craignant que le débordement ne deuint encore plus grand, elles partirent sous les auspices de la prouidence, & de la protection de la S. Vierge.

La neige auoit couuert la montagne de Tarare, en telle maniere qu'il ne paroissoit aucun vestige du chemin, ny mesme des precipices, qui sont aux costes de cette montagne; si bien que nos Religieuses y estans arriuées, coururent risque de s'y perdre sans vne rencontre fauorable, qui les éloigna du danger. Le Cocher laissant aller ses cheuaux, sans sçauoir s'ils suiuoient le chemin ou non, conduisoit nos voyageres dans vn precipice; lors qu'une d'icelles (sans doute par vn mouuement qui venoit du Ciel) sortant la teste hors la portiere; *mon amy*, luy dit elle, *arreste, & regarde bien où est-ce que nous sommes*. Aussi tost vn garçon qui suiuoit après, s'estant avancé quelques pas, tomba dans vne fondriere de neige, en danger d'y perir s'il n'eust esté promptement secouru par des gens à cheual, qui accompagnoient le carroce: qui mettans pied à terre, dès qu'ils virent la cheute de ce garçon accoururent, & avec bien de la peine le retirerent de ce lieu.

Cet accident épouuanta tellement nostre troupe, qu'elle ne sçauoit où se tourner; lors que la mesme Religieuse qui auoit fait arrester le carroce, sortant encore la teste hors la portiere, apperceut vn ieune Berger qui s'approchoit du carroce; elle l'appella, & le pria de leur enseigner le droit chemin: *tournez à main droite*, dit le Berger avec vn visage riant, & *continuez vostre route sans rien apprehender*. Le Cochet obeyt, & comme ce Berger disparut presque aussi tost, l'on creut que c'estoit quelque personne extraordinaire; si bien que suiuant le

641
DV VENERABLE P. ANTHOINE YVAN. 641
chemin où il les auoit mis, elles arriuerent heureusement à Tarare, & le lendemain à Roüanne; sans autre incommodité que celle du froid.

A leur arriuée à Roüanne, le sieur de Tornisson Prestre Missionnaire ouurier Apostolique, par sa bonne vie & ses frequentes predications s'y rencontrant, dès qu'il les apperceut: *Ah bon Dieu! s'écria-t'il, pauvres filles où est-ce que vous allez? les chemins sont tous gastez, la riuere se gelera, & vous ne serez pas plustost à Paris, que tout y sera en guerre, & dans un desordre effroyable.* Il leur dit plusieurs autres choses semblables pour les dissuader de continuer leur voyage, & les induire à s'en retourner en Prouence: ses persuasions estoient d'autant plus fortes; qu'elles le connoissoient depuis long temps, & auoient vne grande confiance en lui. Mais comme elles s'encourageoient par les choses qui sembloient deuoir les abbattre: *Monsieur,* répondit vne d'entre elles, *nous n'auons pas entrepris ce voyage de nous mesmes, c'est Dieu qui nous y a appellées. Il sçait bien pourquoy il fait le tout comme Maistre Souuerain. Il a voulu naistre, & mourir le plus pauvre, le plus méprisé, & le plus souffrant de tous les hommes: ce nous sera vne grande faueur de pouuoir l'imiter en quelque chose.* Ce seruiteur de Dieu edificé de cette réponse prit congé d'elles, & continua son chemin.

La rigueur de la saison contraignit nos filles de seiourner quelques iours dans Roüanne; parce qu'à mesure que les eaux amoindrirent, la riuere se prit, & ne fut nauigeable que le 25. Decembre, auquel iour ayant ouy la Messe de minuit, & fait leur deuotion dans l'Eglise des reuerends Peres Minimes, elles s'embarquerent dans le bateau qu'on leur auoit préparé; mais comme la riuere n'estoit dégelée qu'à demy, & qu'elle traïsnoit vne quantité prodigieuse de pieces de glace, elles voguerent durant les trois premiers iours de leur navigation avec vn peril continuel; parce que ces pieces de glace, s'entrechoquant sans cesse contre le bateau, luy donnoient de si rudes secousses, que l'on auoit lieu d'apprehender, qu'il ne se fracassast en mille pieces. Ce danger fut suivi de trois autres. Le premier fut, que le bateau passant par vn lieu, où il

y a vn bureau estably pour leuer quelques droits, les Commiscrierent au batelier de venir au port pour faire visiter son bateau; mais cettuy cy continuant son chemin sans répondre, ceux-là accrocherent le bateau par vne longue perche, en telle sorte qu'ils en arracherent vn ais: ce qui se fit avec vne telle violence, que le bateau faillit à estre renuersé sans dessus dessous, & à estre tout à fait mis en pieces. Ceux qui estoient dans le bateau pousserent de grands cris, se croyans desia submergez: mais le Seigneur les conseruant leur donna lieu de rendre graces à son infinie bonté.

Le second peril fut, que comme le cours de la riuere n'estoit pas libre, à cause de la glace qu'elle traïsnoit, & que d'ailleurs elle estoit débordée, le bateau s'estant escarté du droit chemin, sans que le Pilote y prit garde, alloit dangereusement eschoüer, lors qu'une Religieuse en ayant quelque sentiment: *Mon amy*, dit elle, au batelier *où sommes nous? regardez ie vous prie, si tout va bien.* Cet homme connoissant d'abort le peril où il estoit, parut si estonné, qu'il n'osa dire mot, iusques à ce qu'ayant remis le bateau avec beaucoup de peine dans le bon chemin, il auoüa le danger, où il auoit esté de faire naufrage, & remercia nostre Religieuse, de l'aduis qu'elle luy auoit donné.

A peine furent elles sorties de ce danger, qu'elles tomberent dans vne autre: ayans esté contraintes sur le soir de prendre leur giste dans vn tres paubre lieu, elles y auroient esté volées sans vne protection singuliere de la diuine bonté. Il y auoit des gens de guerre. en celieu; on logea nos Religieuses en vn appartement, qui estoit enuironné de soldats de toutes parts, & les Prestres avec les autres hommes, qui accompagnoient nos filles, furent contraints de se loger en vn endroit éloigné, d'où ils n'auroient pû ny les ouyr, ny les secourir. Les soldats croyans l'occasion fauorable se resolurent de les voler, dès qu'elles seroient endormies: mais Dieu y pourueut. La Supérieure s'estant trouuée fort mal; deux de ses filles veillerent toute la nuit pour en auoir soin. La nuit auancée les soldats viennent à la porte de nos filles, & mettans des crochets dans les serrures s'efforcent de les ouurir: mais ayant ouy le bruit,

que les Religieuses firent en mesme temps , pour témoigner qu'elles estoient encore leuées, ils se retirerent en silence. Ils reuiennent deux heures après , & font la mesme chose : les Religieuses que la peur auoit renduë plus vigilantes, excitent de nouveau vn grand bruit , & se barricadant derriere leur porte, avec les bancs , & les autres choses qu'elles eurent , contraignirent les soldats à se retirer ; en telle sorte qu'ils n'oserent plus reuenir les inquieter.

Le lendemain ayant ouy la Messe de bon matin, la riuere se trouua entierement prise ; si bien qu'elles furent contraintes de quitter le bateau , & continuer leur chemin par terre. Il n'y auoit dans ce lieu ni carrosse ni coche , ni aucune autre voiture. L'on ne trouua qu'une asnesse qu'un vieil homme conduisoit, & vne petite charrette tirée par vn cheual. L'on fit monter sur l'asnesse la Religieuse qui auoit esté malade : sur la charrette l'on mit les hardes , & deux personnes seulement ; si bien qu'une parrie de nostre troupe suiuoit à pied sur la glace, avec beaucoup d'incommodité. En ce pitoyable equipage, elles furent rencontrées par vne bande de Boëmes, & après par des compagnies de soldats , qui les suiuant quelque temps, leur donnerent occasion de faire plusieurs actes de confiance en la protection du Tout puissant. Elles estoient neantmoins si courageuses, qu'elles donnoient mesme du courage aux hommes qui les accompagnoient. Aussi ne receurent elles aucun mal, si ce n'est que la charrette s'estant renuersée , & les paquets de hardes estans tombez sur les Religieuses , l'on apprehenda qu'elles ne fussent grisusement blessées : mais elles n'en receurent qu'une legere meurtrissure, qui fut guerie en mesme tēps. Ce leur fut vn nouveau suiet de benir Dieu ; d'autant mieux que si les cheuaux eussent encores auancé quelques pas , & que la charrette se fust renuersée , elles seroient tombées dans vne profonde fosse, avec vn peril euident de leur vie.

Estans arriuées à Montargis en cet estat , elles y passerent la nuit fort tranquillement ; mais le lendemain elles eurent besoin de continuer l'exercice de leur patience. Quoy qu'elles eussent arresté vn coche pour elles seules , & ceux de leur compagnie : neantmoins dès le matin , l'on y mit vne criminelle, qui ayant

esté condamnée à mort par les Iuges du pays, auoit releué appel au Parlement de Paris, & dedoit y estre conduite : nos Religieuses n'en auoient aucune connoissance, n'en ayant du tout point ouy parler ; & toutes fois, dès qu'elles l'apperceurent au fonds du coche, elles en conceurent vne telle horreur, qu'elles se prirent à crier, qu'on éloignast de leur compagnie cette méchante creature, & protesterent qu'elles n'entreroient point dans le coche, qu'elle n'en fust dehors. Ceux qui estoient chargez de la conduite, grandement estonnez de l'horreur que nos Religieuses témoignoient en auoir, sans que personne leur en eust parlé, auoient tacitement ce que s'en estoit, ce qui augmenta encore la repugnance de nos voyageres. Il y eut neantmoins grande contestation ; il fallut aller pardeuant les Officiers de la Iustice, qui tant pour contenter nos Religieuses, que pour la saine conduite de la criminelle, ordonnerent qu'elle seroit emmenée sur vne charette par vn autre chemin.

Cette aduenture fut accompagnée d'une seconde : à quelques lieuës de Montargis, nos voyageres apperceurent vne troupe de Cavaliers bien armez, qui s'approchant du coche, témoignèrent auoir quelque mauuais dessein. Elles en eurent d'autant plus de peur qu'ils sembloient vouloir se ruer sur le coche ; lors que tout à coup ils tournerent le dos, & prirent vne autre route avec grande vitesse. L'on sceut après que c'estoient vne troupe de parens ou amis de cette femme criminelle, dont nous auons parlé ; qui croyans qu'elle fust dans le coche, s'estoient assemblez pour l'enleuer des mains de la Iustice, & la sauuer, & ayant appris qu'elle estoit conduite par vne autre voye, auoient couru après pour l'atteindre. Cette rencontre donna nouuelle occasion à nos voyageres de remercier Dieu, & la sainte Mere de Misericorde de leur fauorable protection : mais aussi tost après, elles eurent besoin de recourir aux prieres, pour implorer l'assistance diuine.

Il sembla qu'il y eust vne armée de lutins, qui vinrent autour du coche pour inquieter ceux qui estoient dedans. Quoy que le chemin fust assez beau, les cheuaux bons, & la charge legere ; neantmoins le coche s'arrestoit quasi à chaque pas, comme s'il y eust

eut eu quelque main inuisible , qui se fust opposée aux chevaux ; & d'ailleurs il estoit dans des secousses continuelles , comme si l'on eust voulu le renuerfer avec violence , & le mettre en pieces. Il renuerfa en effet diuerfes fois , avec tant d'impetuosité , qu'il sembloit que tout deuoit estre brisé : il n'y eut pourtant rien de rompu , ny aucun de blessé ; si ce n'est vn gentilhomme de Marseille , qui estant tombé sur de la glace , & sentant d'abord vne grande douleur , se prit à crier , qu'il auoit la poitrine brisée. Nos Religieuses ayans appliqué sur luy vn Crucifix , que le Pere Yuan leur auoit donné en partant d'Aix , il ne sentit plus aucune douleur. L'on ne scauroit dire la peine où estoit le Cocher , de ne pouuoir faire auancer les chevaux , quoy qu'il se seruist de toute son adresse , & qu'il employast toutes les forces. Nos Religieuses le consoloient , & l'encourageoient à ne pas s'impatientser. Enfin le Coche s'arresta tout à fait , sans qu'il fust dans le pouuoir du Cocher , ny des hommes qui estoient descendus à terre pour pousser les roties , ny de quelques paysans , qui se rencontrans sur le lieu s'aiderent aussi de toute leur force , de le faire auancer , ny reculer. Comme la nuit approchoit , & que l'on n'estoit pas loin de Nemours , vn de la troupe qui estoit à cheual , s'auança au galop , pour emmener quelque autre voiture à nos voyageurs , leur coche estant deuenue comme immobile. Cependant elles estoient en prieres , lors que leur Superieure poussée par vn mouuement extraordinaire , prit le Crucifix du Pere Yuan , dont ie viens de parler , & fit avec iceluy plusieurs signes de Croix sur le coche , sur les chevaux & sur le chemin. L'on vid s'éleuer des enuiron du coche , comme vne épaisse fumée qui se dissipa. Quelques vns rapportent , que l'on entendit des voix , qui disoient. *Allons faire des rauages dans Paris* , en mesme temps les chevaux sans aucun effort tirerent le coche de ce lieu , & depuis continuerent heureusement le long de la route ; sans qu'il arriuaist aucun fascheux accident à nos voyageurs le reste de leur chemin.

Arriuaus à Ville-Iuif , elles y trouuerent des carrosses , que Monsieur l'Abbé Olyer Curé de saint Sulpice leur auoit enuoyez , luy estant detenu par quelque incommodité. Auam-

çant leur chemin, elles furent rencontrées par la Dame Marquise de Boteuille, accompagnée de la Damoy selle de Saucuse sa niepce, & du sieur Abbé de sainte Marie, vn de ceux qui s'estoit employé pour elles avec plus d'affection, & de zele. La ioye que nos voyageres receurent de cette honorable compagnie, leur ayant fait oublier vne partie des incommoditez, qu'elles auoient souffertes en leur voyage, elles arriuerent heureusement à Paris le 24. dumoisi de Ianuier de l'année 1649. L'Abbé Olyer les receut avec grande demonstration de ioye, dans l'Eglise de saint Sulpice où il les attendoit. C'estoit la veille de la feste de sainte Geneuiève Patrone de Paris; si bien que le lendemain, elles allerent par deuotion visiter l'Eglise dediée à son nom; pour la remercier des graces qu'elles croyoient auoir receu par son intercession, durant leur voyage, & luy en demander des nouuelles, pour l'accomplissement de leur pieux dessein.

La Reine Mere auertie de leur arriuée, témoigna en estre fort satisfaite; la Maiesté auoit mesme fait esperer, de les voir dans deux ou trois iours: mais dans ce temps le Roy estant sorti de Paris avec toute la Cour, les choses se broüillerent, Paris fut bloqué par les troupes du Roy, & ce fut le commencement de la guerre de cette grande ville, qui fut accompagnée & suivie de tant de troubles, de tant de desordres, & de tant de malheurs. Nos Religieuses rendirent graces à Dieu, d'auoir hasté leur arriuée, nonobstant les incommoditez du chemin, & de la saison; voyant que pour peu qu'elles eussent retardé, elles n'auroient peu entrer dans Paris qu'avec grand danger; à cause des soldats qui en occupoient les auenuës: & que peut-estre eust il fallu, qu'elles s'en fussent retournées en Prouence. Mais elles eurent encore plus de besoin de renouveler leur patience & leur courage, pour compatir aux grandes miseres; que cette guerre causa, & pour en supporter elles mesmes les incommoditez qu'elles en receurent: d'autant mieux que pratiquant à la lettre, la conseil que le Fils de Dieu donna à ses Apostres, de ne porter en chemin que les choses necessaires; elles estoient venuës sous les auspices de la diuine prouidence, sans autres richesses, que leur foy & leur confiance en la protection du

DV VENERABLE P. ANTOINE YVAN. 347
Seigneur, & de la sainte Vierge Mere de Misericorde.

Aussi peut on dire qu'elles ont esté recompensées de leur confiance ; car nonobstant les miseres de ce temps là, qui estoient extremes, Monseigneur l'Abbé de saint Germain leur accorda la permission de bastir vn Monastere de leur Ordre, & s'établir dans son Fauxbourg : le Roy leur octroya ses Lettres patentes, portans approbation, & autorisation de cet établissement : ces Lettres furent verifiées en la Cour de Parlement, elles acheterent la maison où elles sont à present, & s'établirent avec grande benediction ; dans le temps que plusieurs Communautéz regulieres desia établies dans la mesme ville de Paris, & dans les Fauxbourgs, furent contraintes de se dissiper, & les Religieuses reduites à se refugier dans des maisons seculieres de leurs parens ou amis, pour y auoir de quoy subsister. Cet établissement paroistroit merueilleux ; s'il m'estoit permis de rapporter en détail toutes les choses extraordinaires, qui s'y sont passées ; mais plusieurs raisons m'obligeans à ne les pas mettre presentement au iour, on les décrira au long dans les Croniques de cet ordre, où l'on fera vne honorable mention de toutes les personnes, qui ont contribué à l'accomplissement de cette bonne œuvre, de laquelle il semble que l'on doit esperer beaucoup pour la gloire de Dieu, & l'edification de l'Eglise ; si l'on iuge de son progrès, par son heureux commencement.



CHAPITRE DERNIER.

De la mort du venerable Pere Antoine Yvan.

NOUS mettons la mort de l'Imitateur de Jesus-Christ, entre les merueilles de sa vie, parce que s'en est vne des plus grandes, & celle que nous pouuons appeller, la couronne des autres. Sa vie peut estre considerée, comme vne preparation continuelle à la mort; puis qu'il s'est tousiours estudié à mourir à toutes les creatures, par vn parfait dépoüillement; & à soy, par les penitences, & les mortifications. La plus ordinaire matiere de ses pensees, de ses entretiens, & de ses predications, estoit celle de la mort, & des iugemens de Dieu. Il la ruminait sans cesse. Il en parloit continuellement, avec de grands sentimens de crainte & d'apprehension: ce qui luy procuroit vne si grande delicatesse de conscience; que dès qu'il croyoit auoir commis quelque peché, il couroit à confesse, pour s'en accuser avec contrition, & en obtenir le pardon; de telle sorte qu'il n'auroit point voulu se coucher, sans auoir esté à confesse, s'il eust eu le moindre remord d'auoir offensé Dieu. Cette pensée de la mort & des iugemens de Dieu, le portoit encore à s'occuper sans relasche à l'oraison, à la mortification, aux œuvres de charité, & à la pratique des autres vertus; afin d'estre de ces heureux seruiteurs de l'Euangile, que le Maistre trouue esueillez, & trauaillans à son arriuée.

C'est ainsi que nostre fidele Ecclesiastique s'est tousiours préparé à bien mourir; mais il se prepara d'une façon plus particuliere depuis vn aduertissement qu'il receut du Ciel, quelques années auant sa mort. Il celebrait les trois Messes de la minuit vn iour de la veille de Noël dans le Conuent de ses Religieuses de la ville d'Aix, lors qu'il ouyt vne voix distincte qu'il luy dit, *Antoine tu feras cecy encore six fois, & non plus.* Il receut ces paroles, comme vn aduertissement que le Seigneur luy donnoit des approches de son trépas, & creut en mé-

me temps, qu'il mourroit dans six iours, ou dans six semaines, ou dans six mois, ou enfin dans six années, ainsi qu'il est arriué; car il est decedé sur la fin de la sixiesme année après cet aduertissement. L'impression qu'il receut de cet aduisne causa aucun trouble, ny aucune fascherie dans son ame : mais elle acheua en luy, le dépoüillement qu'il auoit de l'amour de la vie presente, & de toutes les choses créées, & le confirma dans sa pratique de penser à la mort, & de s'y bien preparer.

Ses Religieuses ayans sceu par luy mesme ce qui luy estoit arriué, firent tout ce qu'elles peurent, pour le destourner de la pensée de la mort; taschant de luy persuader, que Dieu auoit voulu luy signifier quelque autre chose. Elles luy apporretent l'exemple de saint Henry, qui ayant ouy vne semblable voix, encore six fois, l'auoit receüe comme vn indice de sa mort, & ce fut vn prognostic de son élection à l'Empire. Ainsi elles s'efforcerent de le diuertir de cette application à la mort; craignant que cette pensée n'incommodast sa santé; luy faisant redoubler les penitences, qui estoient desia assez rudes, attendu son age de 72. ans. Mais toutes leurs raisons, & toutes leurs prieres, ne peurent rien gagner sur son esprit : il se regarda dès lors comme vne personne mourante, qui n'attend que la mort de moment en moment. Il se considera comme vn voyageur, qui doit estre prest à partir à toute heure, & qui n'attend que le signe de son départ. Il se leuoit le matin, dans les dispositions de mourir, auant que le iour fust passé; & le soir en se couchant, il se preparoit à mourir, pendant la nuit. Il n'auoit plus d'autre obiect dans ses meditations, & dans ses discours, que celui de mourir chrestienement; sa vie n'estoit plus qu'une mort viuante, ou vne expression de la mort; de maniere qu'il pouuoit dire avec l'Apostre S. Paul, que si la vie agissoit en la personne des autres, la mort agissoit en la sienne; ne viuant plus que dans la veüe & dans les dispositions de la mort.

Quelque temps après estant tombé dangereusement malade, les Medecins desespererent de sa guerison; neantmoins il ne creut pas mourir de cette maladie; en effet comme on luy porta le tres-saint Sacrement, il le receut par deuotion à ieun, & pria le Prestre de ne luy pas donner par viatique, disant qu'il en

auroit besoin vne autre fois. Estant releué de cette maladie, il visita les Monasteres de son Ordre des villes de Marseille & d'Auignon. Il sembloit prendre congé de ses bonnes filles ; car il ne les entretenoit plus que de la mort , & des dispositions pour comparoître deuant Dieu.

Enuiron ce temps, Dieu ayant permis pour sa gloire & pour le bien de plusieurs, qu'il y eut dans vn des Monasteres de cet Ordre, diuerses apparitions des ames de Purgatoire, accompagnées des visions de demons, & de plusieurs accidens extraordinaires ; nostre Fondateur s'y arresta quelque temps pour fortifier les filles, & les instruire, de quelle façon elles se deuoient comporter, pour adherer aux desseins de Dieu, & éviter les illusions de l'ennemy. L'on admirera vn iour l'Histoire de ces apparitions dans les Croniques de ce mesme Ordre ; si les Superieurs trouuent bon de les y donner au public. Ces ames reuelerent plusieurs diuerses fois, qu'il estoit necessaire que le Pere Yuan allast à Paris, & que ses Religieuses auoient vn très grand besoin de sa presence, dans leur nouuel établissement. L'ayant visité en ce mesme temps, pour m'informer de ce que l'on publioit de ces apparitions extraordinaires ; après m'en auoir raconté plusieurs choses surprenantes, & m'en auoir montré quelques remarques qu'il en auoit écrites de sa propre main : Ces ames adiousta il, *disent que Dieu veut que s'aïlle à Paris pour la consolation de nos Religieuses, & qu'elles ont besoin de moy. Mais ie ne scay pas, poursuiuit il avec grande simplicité, comment cela se pourra faire, car le chemin est bien long, ie suis fort agé, & grandement foible. La volonté du Seigneur soit accomplie, ie ne desire rien autre, & que sa bonté me fasse misericorde.*

Il estoit dans cette perplexité, comment pourroit il faire le voyage de Paris, luy qui ne songeoit qu'à faire le voyage de l'autre monde ; lors que Dieu l'en tira par vne occasion tout à fait fauorable. Le sieur de Monserain, personne de grand mérite, & vn de ses meilleurs amis, estant obligé de venir à Paris, l'alla trouuer pour se recommander à ses prieres, & luy demander s'il auoit quelque chose à enuoyer à ses Religieuses. *Mon bon Monsieur, luy répondit le Pere, ie vendross y aller.*

moy mesme, pour voir & consoler mes pauvres filles, si i'en avois la commodité. Ce gentilhomme ravi de cette occasion, qui luy donnoit moyen de témoigner le respect, & l'affection qu'il avoit pour nostre Imitateur, luy presenta d'abord son service, & s'offrit genereusement à luy fournir vne voiture tres-commode, & à le conduire avec grand soin iusques au Monastere de ses Religieuses de Paris. Cette rencontre fit que nostre bon Prestre ne douta plus, que Dieu ne l'appellast à Paris; puis qu'après luy en avoir fait connoistre sa volonté, par des voyes extraordinaires, il luy fournissoit vn moyen si facile pour l'accomplir; c'est pourquoy ayant accepté les offres de ce genereux ami il disposa ses affaires & partit avec luy dans vnelitiere. Ce gentilhomme luy tint fidellement sa promesse; car il eut vn soin tout singulier de sa conservation durant le voyage, il paya sa dépense, & le conduisit heureusement, iusques dans le Monastere de ses Religieuses, qui s'estoient nouvellement establies dans le Faux bourg S. Germain, rue du vieux Colombier, où elles sont à present.

Passant par Valance, il alla visiter les Prestres de la Mission du tres Saint Sacrement; il demanda à coucher chez eux, pour y estre plus recueilli, qu'il n'eust pas esté dans vne hostellerie. L'on reconnut qu'il continuoit la pratique des penitences; car quelques prieres qu'on luy fist de quitter ses habits pour se mettre dans le lit, on ne peut le luy persuader. Quelques vns luy ayans demandé, qu'alloit il faire dans Paris, estant si âgé? *J'y vais, répondit il, pour y mourir.* En effet il deceda quelques mois après, ainsi que nous dirons.

L'on ne scauroit dire la ioye, & la consolation que receurent, la Superieure & les Religieuses de son Monastere, ni les sentimens de reconnoissance, & de tendresses qu'elles luy témoignèrent à son arriuée. Mais comme il n'y a rien de permanent durant cette vie; cette ioye fut bien tost alterée par vne grande crainte, de perdre le bien que la prouidence leur avoit enuoyé. Ce bon Pere, quelques iours après son arriuée tomba dangereusement malade, si bien que les Medecins desespoient desia de sa guerison, attendu son age & sa foiblesse. Il revint toutesfois en conualescence; mais si foible & infirme,

principalement de la veuë ; qu'encore qu'il luy en restast assez pour se conduire , & pour connoistre les personnes , il ne peut plus reciter l'office diuin , ni celebrer le saint Sacrifice de la Messe.

Ce fut la plus sensible affliction que nostre feruent Ecclesiastique peut recevoir , que d'estre priué de la celebration de la sainte Messe , qui estoit son vnique consolation. Nous auons remarqué ailleurs l'ardent amour qu'il auoit pour ce diuin Sacrifice , & que l'estimant & le cherissant , comme le plus grand de tous les biens qui sont sur la terre , il auroit voulu donner tout ce qu'il auroit peu auoit de plus precieux , pour obtenir la grace , de le celebrer plusieurs fois chaque iour. Aussi comme nous apprehendons la priuation de ce que nous auons de plus cher ; ce bon Prestre regardoit il comme la plus grande desolation , & la plus rude épreuve qu'il peut apprehender , d'estre priué de cet inestimable bon heur ; si bien qu'en estant effectivement priué par la foiblesse de sa veuë , Dieu permit qu'il en sentit des détresses , & des angoisses , que l'on ne sçauoit exprimer , & qui continuerent depuis iusques à sa mort. Il auoit esté conduit presque toute sa vie dans vn estat interieur de secheresse , de delaissement , & de crainte des iugemens de Dieu , & dans des peines inconceuable à ceux qui ne les ont pas éprouuées. Ce delaissement, cette crainte , & les autres peines , s'estoient accruës en luy depuis quelques années , d'une maniere estonnante , ainsi que nous auons remarqué ailleurs : mais elles s'augmenterent encore depuis l'affoiblissement de sa veuë , d'une telle sorte , que sa vie n'estoit plus qu'une pitoyable agonie , & vn terrible martyre.

Mais ce qui est admirable ; il cachoit si bien toutes ses peines interieures , qu'il n'en donnoit aucune marque au dehors ; les supportant avec amour , & vne parfaite resignation. Il communioit chaque iour avec vne deuotion exemplaire , il se presentoit à confesse presque aussi souuent ; il recitoit plusieurs fois par iour le Rosaire de la S. Vierge , il oyait ses Religieuses à confesse , & auoit le soin de les diriger , il se leuoit encore à quatre heures du matin , & faisoit oraison , iusques à ce qu'il allast ouvrir la Chapelle de ses Religieuses ; en laquelle il demouroit presque

presque tout le long du iour deuant le tres saint Sacrement, dans vne forte & continuelle application à se preparer à la mort, & à comparoistre deuant le terrible iugement de Dieu. Il estoit si absorbé dans cette application, que l'on ne pouuoit plus le faire parler d'autre chose que de la mort, & des iugemens de Dieu. Plusieurs personnes de pieté de sa connoissance l'ayant visité pendant ce temps là, pour en receuoir quelque instruction, il ne leur disoit plus autre chose, si ce n'est *il faut mourir, & penser aux redoutables iugemens de Dieu.* Les Ecclesiastiques du Seminaire de S. Sulpice, l'ayant mené avec eux à vn iour de recreation pour le diuertir, comme ils le prirent de leur faire quelque entretien spirituel. *l'ay parlé autrefois,* répondit il avec grande modestie : *mais à present ie ne puis plus rien dire, si ce n'est qu'il faut mourir, & se tenir dans la crainte des iugemens de Dieu.* On le pressa avec instance de leur dire quelque autre chose ; mais ayant repeté le mesme, il se teut, & ne répondit plus. L'Ecclesiastique qui s'estoit chargée de le conduire, & qui mesme l'appuya sous ses bras, pour l'aider à marcher quand il reuint, le pria encore par diuerses fois, de luy dire quelque chose d'edification : mais il ne luy répondit autre chose à chaque fois, si ce n'est, *qu'il falloit mourir, & penser à comparoistre deuant Dieu.* Enfin cette application aux choses de l'autre vie l'auoit tellement affoibly, pour les affaires de celle-cy, qu'il en auoit presque perdu la connoissance, & le souuenir ; si bien qu'il estoit deuenu incapable d'en parler long temps : car aussitost il changeoit de discours, & parloit de la mort, & des iugemens diuins, ou il se taisoit & ne répondoit plus. Mais d'autant plus qu'il s'affoiblissoit dans la connoissance des choses temporelles, d'autant plus ce fortifioit il dans la science des mysteres diuins, & des veritez eterneles ; car il n'a iamais paru plus éclairé, ny plus feruent dans les choses spirituelles qu'en ce temps là, ainsi que ses Religieuses attestent auoit conneu, dans les entretiens de pieté qu'il leur faisoit.

Quelques iours auant sa mort, ayant fait appeller vne de ses Religieuses, à laquelle il auoit vne confiance particuliere, il la pria de luy apporter de l'eau tiede pour se lauer les pieds,

disant que c'estoit la derniere fois qu'il les laueroit. Puis il dît à cette mesme Religieuse, [qu'il vouloit faire ce iour là vne confession generale de tous les pechez: mais qu'ayant de la peine à les remettre en sa memoire, il la prioit de l'aider, en ce qu'estant connu d'elle, depuis plusieurs années, elle scauoit presque toutes les particularitez de sa vie.] La fille admirant la simplicité de son Confesseur, & sachant dans quelle innocence & pureté il auoit vécu, s'y accorda simplement, & l'aida à s'examiner par le recit des principaux incidens de sa vie, & des plus importantes rencontres qu'il auoit eues, où il auroit pû tomber en quelques défauts. Après quoy ce venerable vieillard l'ayant remerciée avec tendresse, & laissée dans vne grande admiration d'une vie si innocente, sans qu'elle luy endonnast aucun témoignage, s'en alla faire sa confession à vn Pere du Nouiciat des Iesuites, pour lesquels il auoit eu toute sa vie vne grande estime, & vne singuliere confiance.

Enuiron ce mesme temps vn Ecclesiastique de Prouence, qui auoit esté long temps de ses Disciples estant arriué à Paris, & l'estant venu voir, après l'auoir tendrement embrassé, il lui dît, auant que cet Ecclesiastique luy eût exposé, ny déclaré à aucun les causes de sa venue, *que le suiet pour lequel il auoit fait ce voyage ne reussiroit pas, & que Dieu demandoit d'autres choses de luy*: ce qui s'est trouué veritable. Ce mesme Ecclesiastique l'estant venu voir trois iours après (qui fut la veille de sa mort,) après quelques paroles, le Pere luy dît, & repeta diuerses fois, *qu'il se demist de sa cure entre les mains de son Prelat, & qu'il s'arrestast dans Paris, pour l'employ que la prouidence diuine luy auoit préparé*. L'Ecclesiastique fut estonné de la proposition du Pere, d'autant plus qu'il auoit resolu de s'en retourner à sa cure, & ne pensoit nullement de s'arrester dans Paris. Le lendemain le Pere Yuan estant mort, cet Ecclesiastique fut prié de rester pour rendre seruice aux Religieuses de la Misericorde; ce qui donna lieu de croire que ce bon Pere auoit eu connoissance de sa prochaine mort; puis qu'il auoit pourueu ses Religieuses d'un Confesseur, après son décès. Mais parce que la mort de ce grand seruiteur de Dieu fut tout à fait surprenante & accompagnée de circonstances mer-

DV VENERABLE P. ANTOINE YVAN. 655
ueilleuses , le Lecteur sera bien aise d'en sçauoir les particu-
litez.

Le lendemain qu'il se fut entrevenu auec cet Ecclesiastique,
dont nous venons de parler ; il se leua à quatre heures du matin
suiuant sa coustume , il fit son oraison iusques à cinq heures , &
vn quart ; puis estant descendu de sa chambre dans l'Eglise de
ses Religieuses , après y auoir adoré le tres saint Sacrement , &
attendu que les Religieuses eussent acheué l'Office , il fit ap-
peller la Superieure à la grille du Chœur , & luy dit qu'il auoit
fait son oraison auant les Religieuses. *Helas Mon bon Pere,*
répondit la Superieure , *pourquoy vous leuez vous si matin , es-*
stant si foible que vous estes ? car ie crains que vous n'en soyez
incommodé. Ma fille, repartit le Pere , *il faut mourir en priant*
Dieu. Sa diuine Maesté fait de moy ce qu'il luy plaist. Je ne
sçay plus rien dire ny faire , que prier Dieu , & penser à son
iuste iugement. Ce qui m'épouuante si fort , & de penser à mes
pechez , que ie ne sçauois l'exprimer. Il prononça ces pa-
roles auec vn si humble sentiment de soy-mesme, qu'il sembloit
vouloir s'aneantir. Puis continuant son discours : Fille , adiou-
sta-t'il , Dieu m'a amené icy pour y mourir , pour vostre conso-
lation , & pour des grandes choses , deuinez le reste. La reli-
gieuse luy ayant demandé pourquoy disoit , il cela , il repeta le
mesme , qu'il estoit necessaire qu'il mourust à Paris , & qu'il
estoit besoin que cela fust ainsi. La Superieure luy repartit.
Mon bon Pere , si Dieu dispose de vous de la maniere que vous
le dites , il vous donnera dans le Ciel , auec le grand Saint
Michel la conduite de vos maisons , & de vos filles. Témoignant
de la ioye à ces paroles : Ah fille , s'écria il , si Dieu fait cela , &
si sa bonté me fait misericorde , vous verrez de grandes cho-
ses , & de grandes benedictions. Il dit en suite de tres belles
choses de ce glorieux Archange ; il parla encore de ce que
Dieu operoit dans son ame , faisant connoistre qu'il souffroit
vne espeece d'agonie interieure , repetant plusieurs diuerfes
fois : O que Dieu est grand , & que son iugement est redouta-
ble ! Helas , adioustoit il , que feray-ie , me voyant tel que ie suis
deuant cette souueraine Maesté ? Ah que ie serois heureux si ie
ne l'auois iamais offensé ! mais helas , quel regret extreme est le


*mien, & que j'ay vne viue douleur d'auoir offensé Dieu ! Je n'ay rien en moy, qui ne soit épouuanté & aneanti. Je suis tout submergé dans cette crainte. Mon Pere, luy dit la Religieuse, il me semble que vostre estat est trop actif. Ah fille ! répondit il, que ie suis confus de voir d'un costé la pureté de Dieu, & de l'autre me voir vn pecheur criminel, qui meriteroit d'estre condamné, si Dieu n'auoit vne infinie misericorde. Enfin ie mourray de douleur de l'auoir offensé : car il me semble qu'il attire ma vie à soy, & tout ce que ie suis. He bien mon Pere, repartit la fille, c'est vostre Purgatoire, apres lequel vous verrez Dieu, qui consolera toutes vos craintes, toutes vos peurs, & toutes vos angoisses. Il témoigna que ces paroles luy donnoient quelque legere consolation. Il dit mille belles choses sur ce mesme sujet : ensuite il instruisit la Religieuse des choses, qui estoient necessaires pour le bien, & la perfection des maisons de son Ordre; qu'elle gouuernast ses filles avec grande sagesse, & ne fust rien de considerable sans bon conseil. Il parla avec grande affection de quelques amis & bien-faïcteurs de son Ordre, & particulierement du Duc d'Angoulesme, pour lequel ce bon Pere auoit vn singulier respect, il recommanda fort que l'on eût soin de prier pour luy, & dit à cette mesme fille à laquelle il parloit, que ce Prince la viendrait voir dans quelques iours, & qu'elle ne manquast point de le faire souuenir de la mort, & l'exhorter à s'y preparer diligemment, parce qu'il croyoit qu'il seroit surpris. Ce fut vne espee de Prophetie, car la chose arriua quelques iours après de la façon que nostre Ecclesiastique, l'auoit dite. Il parla aussi de la soumission à la volonté de Dieu, il en dit plusieurs choses de grande edification, & entre autres qu'il falloit prier Dieu, qu'il nous fust accomplir sa sainte volonté, & ne nous laissast iamais faire la nostre. Mais comme il estoit particulierement appliqué à la pensée de la mort & des iugemens de Dieu, il en repetoit le discours de temps en temps. Sur quoy la Religieuse luy ayant dit qu'elle s'estonnoit de ce qu'il parloit tant de la mort. *J'en ay suiet*, repliqua-t'il *il me semble que Dieu prend tous les iours quelque chose de ma vie & qu'à present il m'a tout osté, que ie ne parle plus moy-mesme que ie ne vois plus de mes yeux, & que ie ne connois plus que**

luy seul. Helas il m'attire si puissamment à soy, qu'il me fait oublier tout le reste. Après ces paroles il voulut quitter la Religieuse, & s'en aller; mais l'ayant prié de s'arrester encore vn peu, elle luy demanda, si c'estoit tout de bon qu'il creut de mourir bien tost. *Ouy ma fille*, répondit il, *ie n'attens que le moment: car ma vie ne tient plus à rien,* & reprenant encore le discours des iugemens de Dieu. *Helas, adiousta-t'il, que feray-je, que diray-je, quand ie me verray deuant ce iuste iugement? J'ay mon cœur tout outré de crainte, & de douleur: d'auoir manqué à ce que ie deuois à Dieu. Ah si ie ne l'auois iamais offensé! Helas priez le bien pour moy, qu'il me fasse misericorde, & qu'il n'entre point en iugement avec moy.* Après ces mots il voulut s'en aller, la Supérieure l'ayant prié de luy donner sa benediction, & à toutes ses filles, il la donna avec quelque demonstration de ioye. Puis estant allé dans le sanctuaire de son Eglise, apres y auoir fait quelque priere, il entra dans la Sacristie, pour se preparer à faire la sainte Communion. L'econome de la maison l'estant venu voir, & luy ayant demandé comment se portoit il. *Fille*, luy répondit il, *j'ay fait sçauoir mes intentions à vostre Supérieure, maintenant si ie meurs, ie mourray content.* La Religieuse luy dit encore quelques mots. Après lesquels s'estant retirée le Pere s'assit sur vne petite chaise, pour se preparer à faire la sainte Communion, mais à peine fut il assis, que sentant approcher son heure par la défaillance de ses forces, il se laissa couler à terre, & se coucha sur le paué, haussant les yeux, & les mains au Ciel. La Sacristine oyant remuer la chaise qui s'estoit renuersée, ouurit la grille du parloir, pour voir ce que c'estoit, & fut toute surprise de voir le bon P. estendu de son long contre terre, les yeux & les mains vers le Ciel en la posture d'un moribond: c'est pourquoy poussant vn cry, elle rappella l'Econome qui estant accouruë, se prit aussi à crier, & à appeller le Pere par diuerses fois. Le bon Pere esmeu par ses cris, tourna les yeux vers elle, pour luy parler: mais il ne peut dire autre chose si ce n'est. *He fille, Iesus-Maria.* La Supérieure accourut en mesme temps avec les Religieuses, qui en furent auerties, elle poussa aussi diuers cris, & appella le bon Pere, qui tournant les yeux vers

elle sans pouuoir parler, prit congé d'elle par vne œillade, qui témoignoit encore son amour & sa tendresse, & en mesme temps sans autre effort ny agonie, il rendit son ame à Dieu sur les huit heures du matin, le huitième du mois d'Octobre 1653. âgé de septante-huit ans. L'on auoit enuoyé en diligence querir le Medecin, & le Chirurgien pour luy appliquer quelques remedes, & à la Parroisse pour demander le Viatique, & l'extreme onction; mais les vns, & les autres arriuerent trop tard: l'on ne trouua plus en luy aucun mouuement, ny autre marque de vie. Son visage deuint si vermeil & si beau qu'il sembloit ietter des rayons de tous costez, de telle sorte qu'il inspiroit le respect, & la deuotion à ceux qui le regardoient.

Vne mort si singuliere estant diuulgée, il y eut grande affluence de personnes, qui vinrent visiter le corps de ce seruiteur de Dieu. Les Religieuses demanderent la permission des Supérieurs de le mettre dans leur chœur, où elles l'exposerent iusques au lendemain sur le soir que les Ecclesiastiques de la Parroisse, & du Seminaire de S. Sulpice vintrent faire les obseques de son enterrement dans l'Eglise de ses Religieuses, où il est enterré dans l'épaisseur du mur qui separe le chœur de l'Eglise, au dessous de la grille, par laquelle les mesmes Religieuses recoiuent la sainte Communion. L'on ne scauroit declarer l'affliction, que les Religieuses de la Misericorde receurent de la mort de leur Fondateur: mais cette affliction fut bien tost changée en ioye & en iubilation; parce que quelques vnes d'entre elles trauaillées de dangereuses maladies depuis long temps & iugées presque incurables par les Medecins, ayant appliqué sur soy des habits, & choses semblables, qui auoient esté employées à l'usage de ce grand seruiteur de Dieu, se trouuerent heureusement gueries tout à coup sans aucun autre remede; si bien qu'elles creurent que Dieu leur auoit accordé cette guérison par les merites, & les intercessions de leur Fondateur. Depuis ce temps-là plusieurs personnes de diuers lieux, qui auoient connu nostre pieux Ecclesiastique pendant sa vie, ou qui en ouyrent parler après son decés, s'estant recommandées à ses prieres, en ont receu des faueurs singulieres, ainsi que portent les lettres quel'on nous en a enuoyées sur ce sujet d'Aix,

DV VENERABLE P. ANTOINE YVAN. 639
de Marseille, de Brignole, de S. Maximin d'Auignon, &
d'autres villes, où le bon Pere a laissé des preuues de sa vertu.
Ces lettres font mention de plusieurs guerisons merueilleuses,
obtenues par l'application des Images de nostre Imitateur, &
mesme qu'il y a eu des conuersions extraordinaires par le recit
des merueilles que Dieu operoit en faueur de son seruiteur.
L'on nous a encore enuoyé diuerses attestations pour authori-
ser ces merueilles, il y en a mesme, qui sont confirmées par des
verbaux que les Vicaires des Prelats en ont fait sur les lieux.
Mais l'on n'a pas trouué à propos que nous les mettions au iour,
iusques à ce que l'Eglise les ayt approuuées par nostre S. Pere
le Pape, au iugement duquel ie soumets humblement & sincer-
ement tout ce que j'ay escrit dans cette vie, protestant ne vou-
loir croire, ny publier de la vertu du Pere Antoine Yuan, ny
des merueilles qui l'ont accompagnée, ou suiue, que ce qui
plaira à sa Sainteté en ordonner.



F I N.

A P A R I S.

De l'Imprimerie de **J E A N B O V L L A R D**, au dessus du carre-
four de Sainte Geneviève, vis à vis la petite
porte de Nauarre, à l'Image de la
mesme Sainte.

M. D C. L X I I.

A. PANDIMIGLIO
RESTAURI - CODICI
PERGAMINE - STAMPE
Via Poale - Firenze 158

